







620

B X 137

. B67

1839

t. 1

The Society

INSTITUTIONES
THEOLOGICÆ
AD USUM SEMINARIORUM.
—
TOMUS I.

*Je poursuivrai les contrefacteurs ou débitans
d'éditions contrefaites, selon toute la rigueur des
lois.*

Méquignon Junior.

DE L'IMPRIMERIE DE BEAU,
Saint-Germain-en-Laye.

INSTITUTIONES
THEOLOGICÆ
AD USUM SEMINARIORUM,

AUCTORE J.-B. BOUVIER,
EPISCOPO GENOMANENSI.

TERTIA EDITIO, ACCURATE EMENDATA.

ACCEDIT RERUM INDEX GENERALIS ALPHABETICUS.

TOMUS PRIMUS.

DE VERA RELIGIONE. — DE ECCLESIA.



PARISIIS,
APUD MÉQUIGNON JUNIOREM,
FACULTATIS THEOLOGICÆ BIBLIOPOLAM,
Via Majorum Augustinianorum, n° 9.

M DCCC XXXIX.

INSTITUTIONS

THEOLOGICAL

AND LIBRARY

OF THE

UNIVERSITY OF

CHICAGO

OF THE

THEOLOGICAL

LIBRARY

OF THE

UNIVERSITY OF



CHICAGO

LIBRARY

62577

MONITUM.

Quando divina Providentia, omnia viis sæpe inscrutabilibus disponens, permisit ut, anno 1811, e collegio, in quo philosophiam docebamus, ad diocesanum vocaremur seminarium, ibique munere theologiam docendi fungeremur, ægre videbamus alumnos incompletum et valde insufficientem præ manibus habere auctorem. Per addimenta manuscripta ei supplere tentavimus: integros tractatus novo juri accommodatos composuimus ac dictare cœpimus.

Sed multa inde nasci incommoda statim advertimus, videlicet temporis jacturam, tædium in alumnis, eorum fatigationem, sanitatis detrimentum, codices imperfectos, sæpe incorrectos, contradictoria aut falsa continentes. Hujusmodi malis, pro posse nostro, occurrere volentes, consilium iniimus, annis 1818 et 1819, tractatus de Restitutione et de Contractibus prelis mandandi et in lucem edendi: successu prævisionem nostram longe superante, alios de anno in annum dedimus tractatus qui, ad 3^{am}, 4^{am}, 5^{am}, 8^{am}, et usque ad 9^{am} editionem pervenerunt, et plerique nunc omnino desunt.

A pluribus annis inerat nobis propositum collectionem tractatum, seu Cursum theologicum junioribus seminariorum candidatis destinatum perficiendi;

et, per brevissima temporis momenta ab aliis gravissimi ponderis negotiis quotidie renovatis libera, huic scopo dabamus operam. Subito, præter expectationem et omnem verisimilitudinem, conditio nostra fuit prorsus immutata, ut omnes norunt, et vix paucissima quædam nobis relinquebantur instantia studio theologiæ et scriptis episcopali ministerio extraneis vacandi.

Cum tamen non superessent exemplaria alumni seminarii nostri pro anno scholastico proxime incipiendo necessaria, angustiis undique nascentibus premebamur: aut plures sejunctos tractatus de novo imprimendos curare, aut totam collectionem, licet nondum eo modo quo volebamus perfectam, edere oportebat. Quid melius aut prudentius esset sedulo perpendimus, et, examine peracto, secundam potius amplectendam esse partem duximus.

Scripta igitur nostra Theologica, sive jam impressa, sive manuscripta, Dissertatione in sextum Decalogi præceptum, Supplemento ad tractatum de Matrimonio et opere inscripto *Traité des indulgences* exceptis, sollicitudini bibliopolæ Parisiensis, clero Gallicano notissimi, sub directione virorum ecclesiasticorum scientia et experientia commendatorum coadunanda, imprimenda et publicanda commisimus anno 1834; secundam editionem dedimus anno 1836, et nunc damus tertiam.

In hac collectione non inveniuntur tractatus de Deo, de Creatione et Angelis, neque pars religionis quæ dicitur naturalis, quoniam Institutiones nostras Philosophicas ita coordinare intendentes ut illarum

studium conveniens sit præparatio ad theologiam, hæc in illis aptius tractanda esse judicavimus. Quintam igitur earum editionem adeat lector, si velit.

Quod semper diximus hic iterum affirmamus, nos scilicet, ab eloquentiæ regulis et styli pompis abstrahentes ac cuncta systemata postponentes, solam veritatem simplici intentione quæsiisse et manifestare studuisse : si quid minus rectum aut sanæ doctrinæ absonum nobis exciderit, in antecessum improbamus et rejicimus, plenissime parati judicio sanctæ Sedis et collegarum nostrorum in episcopatu obtemperare, necnon monita a quocumque ad nos directa grato animo suscipere.

THEOLOGIÆ PROLEGOMENA.

Theologia a verbis Græcis Θεός et λόγος veniens, idem significat ac *sermo de Deo*, et recte definitur : *Scientia de Deo et rebus ad Deum pertinentibus*.

1° Dicitur *scientia*, quia conclusiones ex principiis certis deducit et corpus doctrinæ efformat.

2° Dicitur *de Deo*, sive per rationem, sive per revelationem cognito; et his verbis primum assignatur theologiæ objectum.

3° Dicitur *de rebus ad Deum pertinentibus*; non solus enim Deus, sed res omnes ad Deum spectantes et quatenus ad Deum spectant consideratæ, secundarium sunt theologiæ objectum.

Theologia dividitur 1° in naturalem et supernaturalem. Theologia *naturalis* ea est quæ ex principiis naturalibus deducitur, seu quæ spectat Deum et res ad Deum pertinentes quatenus sola ratione cognoscuntur, aut quatenus ratione deprehenduntur in natura rerum fundatæ. De hujusmodi theologia in *Metaphysica* et *Ethica* sufficienter disseruimus. Theologia *supernaturalis* illa est quæ, licet humano modo acquisita et sub hoc respectu naturalis, ex principiis supernaturalibus deducitur. Nihilominus est *scientia*, tum quia principia supernaturalia sunt certa et evidenter credibilia, tum quia conclusiones ex illis certo et evidenter deducuntur. De hujusmodi theologia in hoc opere nobis agendum est.

Dividitur 2° in dogmaticam et moralem. *Dogmatica* tradit, explicat ac defendit credenda, et ideo appellatur etiam *polemica*, a verbo Græco πολεμος, *bellum*

Moralis vero disserit de agendis et ad mores pertinentibus.

Dividitur 3^o in positivam et scholasticam. *Positiva* illa est quæ in explicando sensu Scripturarum, traditionum, definitionum conciliorum et summorum Pontificum decretorum occupatur, qualis fuit theologia SS. Patrum aliorumque Scripturæ sacræ et sacrorum canonum interpretum; vocaturque *positiva*, quia ponit fundamenta totius religionis et argumentorum theologicorum. *Scholastica* ea est quæ artificiosa et syllogistica methodo de Deo rebusque divinis disserit, per oppositionem ad positivam, quæ sola Scripturæ sacræ, Patrum ac conciliorum lectione obtinetur. Dicitur *scholastica*, quia in scholis usurpatur, et a doctoribus in scholis docentibus fuit introducta, in octavo sæculo apud Græcos a S. Joanne Damasceno, et undecimo sæculo apud Latinos ab Anselmo Cantuariensi episcopo, quem secuti sunt Petrus Lombardus, episcopus Parisiensis, qui vocatus est Magister Sententiarum, S. Thomas, cui cognomen Doctor angelicus, etc.

Theologia dicitur etiam *ascetica*, *mystica*, *casuistica*, *exegetica*, si verum Scripturæ sensum investigat; *patristica*, si argumenta sua ex scriptis SS. Patrum præcipue eruat; *symbolica*, *liturgica* et *synodica*, si ex conciliorum seu synodorum decretis conclusiones deducat; *homilitica*, *catechetica*, *historica*, quæ voces facile intelliguntur.

His notatis, breviter dicemus 1^o de necessitate theologiæ, 2^o de locis theologicis, et 3^o de historia theologiæ.

DE NECESSITATE THEOLOGIE.

1° Theologia, generatim spectata, necessaria est Ecclesiæ; tradit enim dogmata, ea probat, confirmat, elucidat, defendit, quacumque utatur via; morum præcepta assignat, explicat, a falsis interpretationibus vindicat, etc. at talis scientia omnino necessaria est in Ecclesia, alioquin vera et integra Christi doctrina non transmitteretur. Non autem necessaria est singulis fidelibus quibus munus alios docendi non incumbit: iis sola fides sufficit ad salutem.

2° Theologia scholastica nec privatis, nec Ecclesiæ absolute necessaria est, siquidem per multa sæcula fuit ignota.

3° Verum hæc theologia, quæ per definitiones, divisiones, propositiones, probationes, objectorum solutiones procedit, modo a vanis disputationibus olim usitatis, a futilibus argumentis ad rem non pertinentibus absteat, ad veritatem cognoscendam, elucidandam ac solide probandam recto tramite pergat, utilissima est et absque temeritatis nota damnari non potest. Etenim 1° Wiclefistæ, Lutherani, Calvinistæ alique Ecclesiæ hostes contra hanc argumentandi methodum debacchati sunt, quia hujusmodi argumentis pressi, se expedire non poterant. 2° Concilium Constantiense, sess. 8, hanc Wiclefi damnavit proposit. n. 29: *Universitates, studia, collegia, graduationes et magisteria in iisdem sunt vana gentilitate introducta, et tantum prosunt Ecclesiæ sicut diabolus*: porro tunc universitatibus, collegiis et studiis sola vivebat methodus scholastica. 3° Facultas Parisiensis plures propositiones Lutheri, philosophiæ et theologiæ scholasticæ detrahentis, reprobavit, die 15 aprilis anni 1521, ut falsas, temerarias, sanæ doctrinæ con-

trarias, etc. (*Fleury*, l. 127, n. 20). 4^o Sine magna temeritate damnari non potest quod episcoporum, summorum Pontificum et universæ Ecclesiæ consensu ac praxi formatum est : atqui talis est methodus scholastica, *ut patet*. 5^o Illa methodus in eo consistit ut veræ notiones vocum et rerum exhibeantur, status quæstionis accurate exponatur, propositio asseratur, probetur, ab objectis vindicetur, et inter omnes partes naturalis ordo insinuetur : atqui manifestum est talem methodum nihil habere vitii, sed, e contra, valde utilem esse ad adversarios in linea incepta continendos, premendos et vincendos. Ergo.

Si autem plures scholastici futes ac insulas tractaverint quæstiones, vanas adhibuerint argumentationes, diffuso ac barbaro usi fuerint stylo, quod non fuit proprium theologis sed omnibus scientiarum et artium magistris commune, plurimis durantibus sæculis, idtribuendum est viris et præsertim sæculo in quo vivebant, non vero ipsi methodo. Ex tali igitur abusu, quem certe reprobamus et ab omnibus reprobandum censemus, nihil contra methodum scholasticam recte intellectam concludi potest.

4^o Theologia est omnium scientiarum nobilior et excellentior, quia nobilior et excellentior habet objectum.

DE LOCIS THEOLOGICIS.

Nomine locorum theologicorum intelliguntur quidam fontes, e quibus eruuntur momenta ad probandam propositionem theologicam convenientia. Novem communiter numerantur, nempe Scriptura sacra, traditio, auctoritas conciliorum, decreta summorum Pontificum, testimonia SS. Patrum, consensus theologorum, ratio naturalis, philosophia et historia.

1^o *Scriptura sacra*, quæ est verbum Dei divinitus

scriptum, de quo fusius dicemus in tractatu de Fide.

2^o *Traditio*, quæ est verbum Dei testimoniis humanis ad nos transmissum : de illa etiam dicturi sumus in tractatu de Fide.

3^o *Auctoritas Ecclesiæ*, cui, sive dispersæ, sive in conciliis coadunatæ, promissa est infallibilitas in docendo : patebit ex dicendis in tractatu de Vera Ecclesia.

4^o *Decreta summorum Pontificum*. Summus enim Pontifex supremam habet auctoritatem in universa Ecclesia, juxta omnes; sive sit infallibilis, quando ex officio totam Ecclesiam docet, ut multi volunt; sive judicium ejus non sit irreformabile, ut contendunt alii, certum est decreta ejus magnam habere auctoritatem et obligare saltem in foro externo. De iis alibi dicemus.

5^o *Testimonia SS. Patrum*. Nomine SS. Patrum intelliguntur pii illi ac docti viri qui, præsertim usque ad duodecimum sæculum, res divinas scriptis suis illustrarunt, quorum opera ab Ecclesia fuerunt approbata et magna ex parte ad nos pervenerunt. Unanimis Patrum consensus in materia fidei aut morum est infallibilis; nam in eo casu eorum consensus nihil aliud est quam doctrina Ecclesiæ cui falsum subesse non potest. Auctoritas etiam paucorum Patrum qui ut testes veritatis de praxi vel disciplina suo tempore usitata loquuntur, magni est momenti. Unius autem aut alterius sententia haberi non potest ut certa, maxime si alii dissentiant.

Attamen, ut sapienter observat Dens, si aliquis Pater in certa materia agnoscatur ab Ecclesia et proponatur ut suam exponens doctrinam, sola ejus auctoritas certam facit sententiam : talis est auctoritas S. Aug. in materia gratiæ et prædestinationis; S. Athanasii et S. Hilarii, in mysterio SS. Trinitatis; S. Leonis Magni, in mysterio Incarnationis, etc.

Nihilominus, « quia et ipsa doctrina catholicorum » doctorum ab Ecclesia auctoritatem habet, magis » standum est auctoritati Ecclesiæ quam auctoritati » vel Augustini, vel Hieronymi, vel cujuscumque » doctoris; » S. Th. 2 2, q. 10, art. 12. Hinc Alexander VIII sequentem damnavit propositionem : *Ubi quis invenerit doctrinam in Augustino clare fundatam, illam absolute potest tenere et docere, non respiciendo ad ullam Pontificis bullam.*

6° *Consensus theologorum.* Notandum illos aliquid docere posse vel ut decretum, id est de fide, hæreticum, erroneum, a catholicis amplectendum, etc. vel ut opinionem. Si omnes scholastici, moraliter loquendo, sibi sint concordēs in docendo aliquid tanquam de fide, hæreticum, etc. hæc universalitas facit propositionem certam; impossibile est enim ut Ecclesia Spiritu sancto semper directa, permittat aliquid hæreticum, erroneum, etc. in omnibus scholis catholicis publice doceri. Si vero scholastici aliquid doceant velut opinionem, illorum concordantia grave quidem subministrat motivum veritatis, sed non infallibile, quia, etsi hæc opinio esset falsa, non ideo Ecclesia censeretur docere aut approbare errorem. Ita specialiter, inter alios, *Bossuet*, t. 33.

7° *Ratio naturalis*, quæ ad cognoscendum verum a Deo nobis fuit concessa, sæpe inservire potest ad elucidandas, probandas et ab objectionibus expediendas propositiones Deum aut res divinas spectantes. Verum in his rebus regnare non debet ut domina, sed servire ut humilis fidei pedissequa : ejus maxime necessarius est usus contra eos qui ex ratione argumentantes, fidem et religionem subvertere conantur. In hoc excelluit S. Thomas, qui auctoritatem non negligit et rationum momenta nunquam omittit.

8° *Philosophia*, vel potius philosophorum auctori-

tas, quæ nonnisi probabile subministrat motivum : sic S. Th. sæpe citat Aristotelem. Inter eos annumerantur dialectici, metaphysici, morales et legis periti.

9° *Historia* sive profana, sive ecclesiastica : utraque enim theologum non parum adjuvat in quæstionibus tractandis, ostendendo prophetias esse impletas, colligendo facta ex quibus dogma fidei, punctum disciplinæ, regulæ morum confirmantur, transmittendo ad remotissimas generationes miracula patrata, Ecclesiæ decreta, hæreticorum damnationem, etc.

DE HISTORIA THEOLOGICÆ.

Ex Genesi constat Deum primos parentes nostros creasse loquentes, seipsum eis manifestasse atque ostendisse quo cultu honorari vellet : parentes hæc filiis narrabant, et sic de generatione in generationem transmittabant. Deus per Noe, Abraham, Isaac, Jacob nova revelavit vel antiquam revelationem iteravit, v. g. promissionem Redemptoris; deinde, per ministerium Moysis, legem suam in monte Sinai promulgavit, aliaque multa divinitus instituit : et tamen novus non existerat modus scientiam religionis docendi ac transmittendi; nullæ existerant publicæ scholæ.

Serius in Scriptura sæpe fit mentio de filiis seu discipulis Prophetarum, v. g. IV Reg. 11, 3 et 7, etc. Samuel creditur primus instituisse hujusmodi scholas Prophetarum. Præterea sacerdotibus incumbibat munus Legem interpretandi et populum docendi. Unde Malachias propheta, 11, 7 : *Labia sacerdotis custodient scientiam, et legem requirent ex ore ejus.*

Post captivitatem Babylonis fere ubique erectæ sunt synagogæ, in quibus per omne sabbatum libri Legis et Prophetarum legebantur, addita interpretatione et

exhortatione; et ita populus seu multitudo erudiebatur. Insuper plures institutæ sunt scholæ non solum Hierosolymis, sed in aliis civitatibus, quibus præfiebantur magistri qui suos habebant discipulos et cum illis vel coram illis disserebant, ut patet ex his verbis Act. xix, 8 : *Introgressus autem synagogam, cum fiducia loquebatur per tres menses, disputans et suadens de regno Dei. Cum autem quidam indurarentur et non crederent, maledicentes viam Domini coram multitudine, discedens ab eis, segregavit discipulos, quotidie disputans in schola tyranni cujusdam.*

Natæ sunt apud Judæos, paulo post captivitatem, quædam sectæ, Phariseorum, Sadduceorum, Essænorum, quæ suas habebant scholas : omnes de Deo de rebusque divinis suo modo agebant, discipulos erudiebant. Multi ergo ante Christum jam fuerunt theologi, id est viri scientia Dei et religionis revelatæ imbuti et ad alios erudiendos idonei.

Christus veniens in mundum ut illum illuminaret et sanctificaret, *incipiens quasi annorum triginta*, populum evangelizavit, discipulos habuit, eosque per universum orbem misit, jubendo ut omnes docerent quæcumque mandaverat eis, promittens se cum illis docentibus adfuturum esse omnibus diebus usque ad consummationem sæculi. Hinc nova exorta est methodus clara et lucida docendi, quæ sine ulla interruptione usque ad nos pervenit, et semper duratura est. Episcopi, Apostolorum successores, res sacras ad salutem necessarias populum publice docebant, et in domibus suis habebant discipulos quos erudiebant, virtutibus ornabant, disciplinis informabant, clero suo ascribebant; et ipsorum successores inter eos communiter eligebantur. Sic S. Athanasius fuit discipulus S. Alexandri, S. Joannes Chrysostomus S. Meletii, S. Cyrillus Alexandrinus Theophili patrui sui.

S. Aug. S. Fulgentius, S. Martinus juxta se habebant clericorum scholas e quibus plurimi prodierunt episcopi doctrina et sanctitate conspicui.

In quibusdam magnis urbibus exstiterunt, etiam in primis sæculis, publicæ scholæ pro catechumenis erudiendis erectæ, quibus non raro præfuerunt viri excultissimi, v. g. celeberrimæ scholæ Alexandrinæ S. Pantenus, S. Clemens, Origenes ingenio et eruditione tam præclarus, etc.

In monasteriis per pluribus floruerunt studia litterarum præsertim sacrarum, ut patet exemplo monachorum et abbatum non minus scientia quam pietate illustrium, v. g. Cassiani et Vincentii Lirinensis in quinto sæculo, venerabilis Bedæ in sexto, Rabani Mauri et Walafridi Strabonis ejus discipuli in nono, Lanfranci et S. Anselmi in undecimo, etc.

S. Anselmus, Lanfranci discipulus, deinde successor tum in regimine abbatiae Beccensis, tum in archiepiscopatu Cantuariensi, formam introduxit quæ vocata est scholastica. Eum secuti sunt Hugo a S. Victore, Hildebertus, Cenomanensis episcopus, qui ad archiepiscopatum Turonensem, anno 1225, fuit translatus; Hotto Frisingensis episcopus; Petrus Lombardus, Magister Sententiarum, cujus opus tam evasit famosum ut per plura sæcula celebriores doctores illud commentare studuerint.

Verum æmulatio ex arte disputandi inter doctores exurgens, multos generavit abusus, quæstiones vanas ac futes induxit, in infinitas argumentationes ex subtili ratione petitas abiit, et sanam religionis doctrinam sæpe deturpavit. Hinc prodierunt exercitationes viris theologis indignæ, a vera eruditione theologica prorsus alienæ: hinc errores Petri *Abeilard* aliorumque plurimorum qui, juxta testimonium S. Bernardi, de *Abeilard* loquentis, novarum vocum

et novorum sensuum volebant esse inventores.

In tredecimo sæculo institutæ sunt Universitates, et notanter domus Sorbonica, Parisiis, a Roberto de Sorbona, ejus fundatore, sic dicta, quæ inter cæteras eminentiorem tenuit locum. In ea docuerunt Alexander Hales, franciscanus; Albertus, dominicanus; S. Thomas, ejus discipulus, ejusdem ordinis; Joannes Duns, cognomine Scotus, et S. Bonaventura, ex ordine S. Francisci, qui cognominati fuerunt: primus, *Doctor irrefragabilis*; secundus *Magnus*; tertius, *Doctor angelicus*; quartus, *Doctor subtilis*; quintus, *Doctor seraphicus*.

Doctor angelicus, id est S. Thomas, præ cæteris excelluit, et *Summa* ejus, in tres partes divisa, sententiis Petri Lumbardi in scholis fuit substituta: pene omnes theologi ejus methodum et rationem secuti sunt. Cum Scotus opiniones opinionibus S.Th. contradictorias pluribus in punctis defendisset, natæ sunt, maxime apud Dominicanos et Franciscanos, scholæ *Thomistarum* et *Scotistarum*, quæ diu perstiterunt, et nunc penitus ac merito ab omnibus negliguntur.

Nunquam tamen defuerunt viri altioris mentis, qui vanas argutias contemnentes, scientiam theologicam saniori judicio didicerunt ac docuerunt: tales fuerunt S. Bernardus, Joannes Salisburiensis, Carnutensis episcopus, Petrus Blesensis, Gerson, etc. Gregorius IX, anno 1228, scripsit ad doctores Parisienses, hortans eos ut profanas novitates abjicerent et ad antiquam Patrum traditionem redirent; *Fleury*, l. 80, n. 3.

Capta Constantinopoli ab iis qui vulgo dicti sunt *les Croisés*, litteræ et scientiæ ab Oriente in Occidentem remigrarunt; multi eruditi Græci in Europam et præsertim in Italiam venerunt, æmulationem pro

vera scientia excitarunt; sicque philosophia et imprimis theologia a nugis scholasticis purgari cœperunt, licet plures adhuc agitatæ fuerint otiosæ disputationes, v. g. inter *Nominales* et *Realistas*, sub Ludovico XI.

Falsum est igitur Protestantes primos ostendisse vitia scholasticæ, et sacrorum studiorum reformationem induxisse: plura quidem vera juste carpserunt, sed quæ a catholicis jam didicerant carpenda; alia vero protulerunt falsa, et in hoc merito reprobati sunt.

Interea concilium Tridentinum, circa medium sæculi decimi sexti conclusum, non tantum multos reformavit abusus, sed insuper solidioris theologiæ jecit fundamenta: voluit ut ubique erigerentur seminaria quibus præficerentur sacerdotes juventuti erudiendæ idonei. Ex hoc tempore magis ac magis evanuerunt scholasticæ subtilitates vanæque disputationes: in Universitatibus, præsertim in Parisiensi, in ordinibus religiosis, insignes fuerunt magistri de rebus multo magis occupati quam de verbis, qui toti fuerunt ut hæreticos debellarent, incredulos convincerent, sanæ moralis regulas ac disciplinæ ecclesiasticæ leges traderent. In exemplum citari possunt Bellarminus, Suarez, de Lugo, Petavius, Natalis Alexander, Tournely, etc.

INSTITUTIONES THEOLOGICÆ

AD USUM SEMINARIORUM.

TRACTATUS DE VERA RELIGIONE.

RELIGIO, cujus vox a *religando*, juxta plures, oritur, considerari potest ut virtus, vel ut scientia. In priori sensu, est virtus moralis nos ad cultum Deo exhibendum inclinans; in posteriori vero sensu, est corpus doctrinæ officia nostra erga Deum complectens. Inter illa autem officia, alia spectant intellectum, sunt veritates credendæ; et alia voluntatem, suntque præcepta implenda. De religione hoc modo accepta in præsentī tractatu agitur. Nobis inquirendum esset an cultum Deo rependere teneamur, et qualis esse debeat.

Plurima vero alibi jam mature examinata, hic supponimus ut certa, videlicet Dei existentiam, naturam ejus perfectissimam, miranda illius attributa, mentis nostræ spiritualitatem, libertatem et immortalitatem, essenziale discrimen inter bonum et malum morale; necessitatem cultus interni, externi et solemnis; religionis naturalis necessitatem et insufficientiam; absurditatem indifferentiæ circa varias religiones existentes: hæc enim in Philosophia tractantur, ubi unusquisque ea relegere potest.

Hunc itaque maximi momenti tractatum in tres dividemus partes, quarum 1^a erit de religione revelata in genere; 2^a de religione Judaïca, et 3^a de religione Christiana.

PARS PRIMA.

DE RELIGIONE REVELATA IN GENERE.

REVELATIO, prout hic sumitur, est manifestatio dogmatum et præceptorum, extraordinarie, lapsu temporum, a Deo facta cum extrinsecis fidei motivis. Habere potest pro objecto dogmata sola ratione cognoscibilia, veritates captum rationis superantes, officia lege naturali jam præscripta, vel leges positivas præceptis naturalibus superadditas.

Nobis agendum est 1° de revelationis possibilitate; 2° de methodo illam inquirendi, et 3° de characteribus quibus existentia ejus certo dignoscatur.

CAPUT PRIMUM.

DE REVELATIONIS POSSIBILITATE.

Inter eos qui possibilitatem revelationis negant, alii contendunt Deum homines alloqui non posse; alii affirmant, ut *Rousseau*, in *Emile*, lib. 4, quod si Deus aliquid revelaret, omnibus et singulis hominibus immediate loqui deberet; alii dicunt cum eodem *Rousseau*, ibid. Deum revelare non posse veritates captum mentis nostræ superantes; alii denique volunt Deum facere non posse præcepta legi naturali superaddita: ita *Tindall* et *de Prades*, in famosissima *thesi* anni 1751; sicque errant alii in ipsamet revelationis possibilitate, alii in modo illam faciendi, et alii in ejus objecto. Varios errores istos persequentes profligabimus propositiones.

PROPOSITIO PRIMA.

Deus homines alloqui potest.

Prob. 1° Homines non carent facultate suas ideas et cogitationes aliis hominibus manifestandi : atqui Deus eamdem et perfectiorem habere debet facultatem; os enim hominis et linguam fecit, loquelam instituit, aures plantavit : ergo et ipse suas ideas suasque cogitationes manifestare potest.

2° Omnes populi existentiam revelationis semper admiserunt : ergo semper arbitrati sunt Deum homines alloqui posse; constans autem et universalis hæc persuasio argumentum est veritatis : ergo.

Obj. Deus organa vocis non habet : ergo loqui non potest.

R. Nego consequ. Nulla enim est connexio necessaria inter motus oris ac linguæ hominis, et modulationem auditionis quam interne mens audientium experitur, quia motus corporis agere non possunt in mentem omnino simplicem : igitur modulatio ista ex sola Dei institutione arbitraria provenit : Deus autem absque huiusmodi motibus efficere potest ut eodem modo interne afficiamur, ac si quis externe loqueretur : ergo.

Præterea, Deus clare et distincte per evidentiam interne nobis in rebus naturalibus loquitur : atqui non repugnat illum veritates supernaturales eadem via aperte nobis manifestare, *ut patet* : ergo.

PROPOSITIO SECUNDA.

Deus, ex hypothesi quod aliquid revelare velit, singulis hominibus immediate loqui non tenetur, sed potest illud manifestare quibusdam electis quorum ope alios doceat.

Prob. 1°. Ex hypothesi quod Deus aliquid revelare velit, etiam cum intentione omnes obligandi, sufficit ut tutissima illis subministret media quibus hanc revela-

tionem certo cognocere possint : atqui , licet Deus singulis hominibus immediate non loquatur, tutissima ipsis subministrare potest media quibus revelationem certo cognoscere possint; infra enim probabimus certissima dari posse media quibus existentia revelationis constare valeat, nempe miracula et prophetias : ergo.

2^o Revelationis existentia multo arctius hac via constare potest quam si Deus singulis hominibus immediate loqueretur; si enim admitteretur Deum tenere singulis hominibus immediate loqui , multi imaginationes suas pro divinis revelationibus sumere possent, et sic fallerentur ; quilibet impostor errores suos ut veritates divinitus sibi communicatas prædicare, nec falsitatis revinci posset; et sic uniformitas tolleretur : porro hæc incommoda existere nequeunt in suppositione quod Deus nonnullis tantum hominibus loquatur, et apertissima præbeat media quibus omnes, hanc revelationem certo cognoscere possint : ergo.

3^o Nemo exigit ut rex voluntates legesque suas omnibus subditis immediate manifestet : ergo *a fortiori* exigere non debemus ut Deus immediate nobis loquatur. Nonne conveniens est , e contra , ut in rebus ad religionem pertinentibus eadem via nos doceat qua in rebus naturalibus erudimur, scilicet, per traditiones aliaque documenta, ab hominibus nobis transmissa vel explicata? Ergo.

Obj. Tam facile singulis hominibus quam nonnullis tantum loqueretur Deus : ergo nulla est ratio cur omnibus non loquatur.

R. Nego conseq. Deus enim non tenetur ad id quod facile operari potest, alioquin debuisset mundum ab æterno creare, peccatum impedire, nos sicut angelos efficere, etc. Præterea , Deus perfecte liber est in bonorum suorum distributione, et ea omnino indebita pro bene placito suo nobis largiri potest : sola ergo ipsius voluntas ratio est sufficiens cur uni potius quam aliis immediate loquatur, sicut rex mandata sua per ministros cunctis subditis libere manifestat.

PROPOSITIO TERTIA.

Deus potest revelare veritates captum mentis nostræ superantes.

Prob. Si hujusmodi veritates Deus revelare non posset, vel quia nullas cognosceret, vel quia eas nobis manifestare non posset, vel quia repugnaret nos eas credere teneri : atqui nihil horum dici potest. 1^o Dici non potest Deum nullas cognoscere veritates captum mentis nostræ superantes; Deus enim in scientia est infinitus, nos vero valde finiti : in rebus naturalibus innumera, respectu nostri, existunt mysteria : ergo *a fortiori* et in rebus divinis. Ergo.

2^o Deus illas veritates nobis manifestare potest : *id sequitur ex prima propositione.*

3^o Non repugnat veritates captum mentis nostræ superantes nos credere teneri. Id enim a nobis Deus exigere postest quod libenter hominibus præstamus : atqui libenter in verba hominum credimus veritates captum mentis nostræ superantes; innumeræ enim sunt veritates in ordine naturali, v. g. in physica, in astronomia, etc. quas maxima pars hominum penitus ignorat : atqui tamen libenter eas ex verbis doctorum credimus, quamvis illas non percipiamus : ergo multo magis credere debemus veritates quas Deus nobis manifestat. Præterea, valde conveniens est quod tales ex verbo Dei credamus veritates; cum enim totum ens nostrum ab ipso oriatur, nobilior pars entis nostri, scilicet intellectus, illi submitti debet : atqui perfecte Deo non submittitur, nisi tales credendo veritates; sic enim supremam veritatem dignissimo cultu honorat. Unde D. *Frayssinous, Conf. de la religion considérée dans ses mystères* : « Les mystères sont incompréhensibles; eh bien! c'est par là même qu'ils sont plus dignes de la sagesse de Dieu. Jésus-Christ est venu pour guérir l'homme tout entier, remédier à la plaie profonde faite à son esprit par l'or-

» gueil, comme à son cœur par la volupté. Une curiosité
 » superbe l'avait précipité dans les plus monstrueuses
 » erreurs, comme l'amour des choses sensibles l'avait
 » plongé dans les plus brutales et les plus honteuses
 » passions; il fallait que son cœur fût purifié par une
 » loi sainte, et son esprit humilié par des vérités incom-
 » préhensibles. C'est du Père des lumières que nous
 » tenons la raison qui nous éclaire : or, si, par un indi-
 » gne abus, elle s'est soulevée contre son auteur, que
 » peut-elle faire de mieux, pour expier sa révolte, que
 » de s'immoler elle-même à la raison suprême, et de
 » plier sous le joug de l'incompréhensible, mais infailli-
 » ble vérité de Dieu? » Ergo 3^o, etc. aliunde, etc. Ergo.

Solvuntur objectiones.

Obj. 1^o. Deus sibi contradicere non potest : atqui Deus sibi contradiceret, si veritates captum mentis nostræ superantes revelaret, earumque fidem exigeret : ergo.

R. Nego min. Nam si in eo casu Deus sibi contradiceret, certe, ut asserit *Rousseau, Emile*, lib. 4, quia ex una parte rationem nobis concessit, et ex altera parte illius subinissionem veritatibus non perceptis exigeret. At in ea hypothesi nulla est contradictio : in tantum enim esset contradictio, in quantum rationem nobis ad percipiendas hujusmodi veritates concessisset, et illas supra captum rationis posuisset : atqui non ita agit Deus, sed tantum jubet ut ratio credat, ipso restante, veritates quas non percipit : in hoc autem nulla est contradictio, *ut patet* : ergo.

Inst. 1^o. Prædictæ veritates seu mysteria rationem offendunt : ergo, si Deus jubeat ut eas credamus, sibi contradicit.

R. Nego min. Illa enim mysteria rationem non offendunt, quæ manifestam repugnantiam non involvunt : atqui mysteria captum mentis nostræ superantia manifestam repugnantiam non involvunt; sunt quidem supra rationem, ex hypothesi; sed multum est discrimen in-

ter esse supra rationem et esse contra rationem : illud quippe est supra rationem quod ratio non percipit, illud vero solum est contra rationem quod realem involvit repugnantiam, ut, v. g. *Bis duo dant quinque; Totum est sua parte minus*. Porro mysteria quæ captum mentis nostræ superant talem repugnantiam non eo ipso involvunt : ergo.

Inst. 2º. Mysteria quæ insolubilibus argumentis impugnantur, rationem offendunt : atqui mysteria captum mentis nostræ superantia insolubilibus impugnantur argumentis : ergo.

R. 1º. Distinguo maj. Mysteria quæ insolubilibus impugnantur argumentis, ex evidenti repugnantia petitis, rationem offendunt, *conc.* si hæc argumentorum insolubilitas ex ipsa mysteriorum obscuritate, vel potius ex limitibus intelligentiæ nostræ oriatur, *nego maj.* Itaque fateor mysteria, insolubilibus argumentis ex evidenti repugnantia petitis impugnata, rationem offendere : *id manifeste patet.* At, si hæc insolubilitas ex ipsa mysteriorum altitudine vel ex intelligentiæ nostræ limitibus oriatur, tunc id unum merito concludi potest, scilicet, ea esse supra rationem : porro supra rationem esse possunt, et tamen rationem non offendere : ergo.

Et vero, plurimæ sunt veritates in ordine naturali quæ insolubilibus impugnantur argumentis, quales sunt existentia motus, ascensus liquorum intra tubos capillares, materiæ divisibilitas vel non divisibilitas in infinitum, etc. et tamen illæ veritates in dubium non revocantur : ergo *a fortiori* mysteria credere debemus, licet, etc.

R. 2º. Nego min. Plurima quidem contra mysteria instituuntur argumenta quæ directe, id est ex principiis a natura rei petitis, solvi non possunt; sed nulla sunt quæ ex alienis considerationibus solvi nequeant; cuncta enim argumenta mysteriis opposita indirecte solvuntur, si clare videatur ex una parte Deum locutum fuisse, et manifesta ex altera parte non demonstretur repugnantia : atqui hæc duo constare possunt ubi de mysteriis agitur.

1° Constare potest Deum locutum fuisse, *ut infra probabimus*. 2° Ex altera parte, clare ostendi potest incredulos manifestam non demonstrare repugnantiam. Ergo. Sic omnia incredulorum argumenta contra singula fidei Christianæ mysteria proposita centies soluta sunt, verum fidei objectum enuntiando, et ostendendo illud nullam exhibere contradictionem. Ergo.

Inst. 3°. In nonnullis mysteriis quædam apparet repugnantia quæ judicatur evidens : atqui repugnantia evidenter apparens eandem vim habet respectu nostri ac si vera esset : ergo tunc ea mysteria credere non possumus.

R. 1°. *Dist. maj.* Hæc apparens repugnantia judicatur evidens immerito et ante sufficiens examen, *concedo*; merito et post maturum examen, *nego maj.* Fateor quidem repugnantiam quæ in nonnullis videtur mysteriis, aliquando judicari evidentem, sed immerito et absque sufficienti examine. Illud enim solum merito judicatur evidens quod ex omni parte ita clare perspicitur, ut mens illi assentiat sine ulla errandi formidine : atqui mens non potest, omnibus sedulo perpensis, affirmare se ita clare prædictam in mysteriis perspicere repugnantiam, ut ille absque ulla errandi formidine assentiat; ubi enim sedulo advertit quid sint mysteria, multam in eis videt obscuritatem : at eo ipso quod talem videat obscuritatem, affirmare non potest se evidentem perspicere repugnantiam, ita ut illi iudicio absque ulla errandi formidine assentiat : ergo.

Et vero, in rebus naturalibus sæpissime evidens nobis apparet repugnantia, v. g. in phænomenis fulminis, electricitatis, adamantis, optices, etc. et tamen nemo hæc phænomena in dubium revocat : pariter, quando mirabiles luminis et colorum effectus cæco a nativitate narrantur, incredibiles illi videntur : si oculi ipsius pro momento aperirentur, et unum inter duo specula videret hominem, tres illi apparerent homines perfecte similes; si statim in eandem recideret cæcitatem, persuasum haberet non unum, sed tres ibi existere homines, et af-

firmaret hoc evidens esse : ut insanus tamen haberetur, si pertinaciter negaret unicum esse hominem. Ergo *a fortiori* ut insanus habendus est impius qui divina religionis mysteria negat, sub prætextu quod aliqua etiam evidens in eis appareat repugnantia.

R. 2º. Nego min. Evidentia enim realis eo majori fulget claritate, quo strictiori subjicitur examini : dum e contra, si evidentia quæ tantum est apparens sedulo examinetur, aliqua saltem detegitur obscuritas. Ergo.

Obj. 2º. Deus proponere non potest, ut objectum fidei nostræ, voces omni idea vacuas : atqui voces quæ mysteria captum mentis nostræ superantia exprimunt, omni idea sunt vacuæ : ergo.

R. Nego min. Illæ enim voces omni idea non sunt vacuæ, quæ sic exprimunt objectum, ut illud a quolibet alio discernere possimus : atqui mysteria captum mentis nostræ superantia ita vocibus exprimi possunt, ut ea a quolibet alio objecto discernere valeamus. Sit enim vox *Trinitas* : vox illa exprimit objectum in natura sua quidem valde obscurum, sed tamen ab omni alio distinctum; si nullum enim exprimeret objectum, illius prolatio mentem non plus afficeret quam vox Arabica vel Persica, vel omnino barbara : contrarium autem evidens est : ergo.

Obj. 3º. Revelatio mysteriorum rationi imperviorum est inutilis : ergo repugnat Deum ea revelare.

R. Nego ant. Nam 1º hæc dogmata intellectum nostrum Deo subjicientia, efficiunt ut reverentiam nostram ei testificemur. 2º Fundamentum sunt præceptorum moralium eorumque sanctio omnino necessaria, ut mors Christi, purgatorium, æternitas pœnarum in inferno, etc. 3º Hæc dogmata sunt inter se concatenata, ita ut quædam sufficienter cognosci non possint quin alia manifestentur : v. g. necessitas gratiæ supponit peccatum originale et mortem Christi; mors Christi supponit incarnationem, et incarnatio pluralitatem personarum in Deo. 4º Non obscuritatem mysteriorum Deus immediate fidei nostræ proponit, sed veritates supernaturales, quarum notitia nobis necessaria vel saltem maxime utilis est : cum autem illæ

veritates aciem mentis nostræ superent, aliquam obscuritatem respectu nostri involvunt, et inde mysteria quæ debilitatem intelligentiæ nostræ arguunt. 5° Revelatio quæ conterendæ superbiæ mentis humanæ aptissima est, inutilis dici non potest : atqui talis est revelatio et fides mysteriorum captui nostro imperviorum, *ut in probatione ostendimus*. Quod aliunde *Bayle* ipse sic exprimit, *Dict. art. Pauliciens, not. F*, versus finem : « Il est plus utile » qu'on ne pense d'humilier la raison de l'homme, en » lui montrant avec quelle force les hérésies les plus folles, » comme sont celles des Manichéens, se jouent de ses » lumières, pour embrouiller les vérités les plus capitales. » Cela doit apprendre aux Sociniens, qui veulent que la » raison soit la règle de la foi, qu'ils se jettent dans une » voie d'égarement qui n'est propre qu'à les conduire » de degré en degré jusqu'à nier tout, ou jusqu'à douter » de tout, et qu'ils s'engagent à être battus par les gens » les plus exécrables. Que faut-il donc faire ? Il faut captiver son entendement sous l'obéissance de la foi, et » ne disputer jamais sur certaines choses. » Ergo.

PROPOSITIO QUARTA.

Deus nova præcepta legi naturali addere potest.

Prob. 1°. Deus est supremus dominus noster; sed ut supremus dominus habet facultatem præcipiendi officia quæ in lege naturali non contineantur; principes enim, legislatores et quilibet superiores hujusmodi habent facultatem, eam quotidie exercent, et inferiores eis parere debent, ut omnes fatentur et alibi probatur. Ergo a fortiori et Deus talia facere potest præcepta quibus parere tenemur.

Prob. 2°. Si Deus talia præcepta facere non posset, maxime quia forent inutilia : atqui hujusmodi præcepta non sunt inutilia; nam 1° multum inservire possunt ad custodienda legis naturalis præcepta, sicut leges positivæ

principis ad servandum ordinem publicum conducunt; 2^o sensus pietatis in mentibus nostris foveat et excitant, a vitiis nos revocant, et ad colendas virtutes incitant; 3^o uniformitatem cultus divini stabiliunt et conservant; lex enim naturalis dictat aliquem cultum Deo deberi, sed illius formam non determinat: attamen necesse est formam cultus divini positive determinari; aliunde, tot essent diversi modi Deo serviendi quot capita, et tunc nulla daretur uniformitas in religione, nulla decentia, nulla majestas. Ergo.

CAPUT SECUNDUM.

QUA METHODO INQUIRENDA SIT REVELATIONIS EXISTENTIA ?

Duplex est via qua veritates extra nos positae cognoscere possumus, nempe ratio et auctoritas: per methodum rationis rem in natura sua intrinseca expendimus; per methodum auctoritatis, non rem ipsam juxta proprietates suas, sed motiva credibilitatis quibus existentia ejus asstruitur, requirimus: sic ratione scimus radios circuli esse æquales, et auctoritate novimus Alexandrum olim existisse. *Rousseau* et deistæ illius asseclæ, cum velint Deum nihil revelare posse supra rationem, contendunt in revelatione incipiendum esse a ratione, et nihil ut revelatum admitti posse nisi prius rationi consentaneum deprehendatur: omnes vero catholici solam viam auctoritatis prætendunt esse admittendam, et dicunt in inquisitione revelationis procedendum, non ab examine rerum quæ ut revelatæ proponuntur, sed a consideratione motivorum quibus revelationis existentia credibilis efficitur, quærendo scilicet an Deus locutus fuerit; et, hoc semel agnito, spernendas esse quæ a ratione suggeri possunt difficultates. Cum his sit

PROPOSITIO.

*In inquisitione revelationis sola via auctoritatis
admittenda est.*

Prob. 1º. Revelatio est factum contingens : atqui facta contingentia ex ratione cognosci non possunt , sed ex sola auctoritate ; solam enim possibilitatem factorum contingentium ratio demonstrat , et nihil dicit nec dicere potest de eorum existentia : Ergo.

Prob. 2º. Cum , *ex dictis* , non solum possibilis , sed necessaria sit revelatio , aliqua debet esse via qua omnes illius existentiam certo cognoscere possent : atqui sola via discussionis omnes certo cognoscere nequeunt revelationis existentiam ; in ea enim hypothesi , unusquisque res revelatas sola ratione expendere , attingere et a non revelatis tuto secernere debet : omnes igitur difficultates quæ ab incredulis proponuntur , omnesque responsiones quas afferunt catholici notas habere , omnes Scripturas , sanctorum Patrum opera , auctores ecclesiasticos , imo et profanos percallere , quidquid in gratiam religionis et contra eam scriptum est , non solum in versionibus et in interpretationibus , sed etiam in ipsa lingua qua scripti sunt libri addiscere debet : atqui maxima pars hominum , ne plus dicam , tanti studii et examinis omnino est incapax : ergo.

Prob. 3º. Illa via admitti non potest quæ plena est temeritatis , superbiæ ac impietatis : atqui talis est via discussionis.

1º Plena est temeritatis. Nihil enim magis temerarium est quam mysteria et res supernaturales velle ponderare ad trutinam rationis , quæ sæpissime in rebus etiam naturalibus cæca est ; naturam Entis infiniti , ejus attributa ejusque æterna decreta velle perscrutari et comprehendere : verumtamen ita se gerit qui sola via discussionis in inquirenda revelationis existentia utitur : ergo 1º.

2° Hæc via plena est superbiæ et impietatis; summæ enim superbiæ et impietatis est humanam rationem ita extollere, ut nihil cognoscat Deus, nihil saltem revelare possit quod mentis nostræ captum superet : atqui via quam hic impugnamus hoc supponit : ergo 2°.

Prob. 4°. Deus nec falli nec fallere potest : ergo ubi de revelatione agitur, hoc unum expendendum est, nempe an revera locutus fuerit necne; proindeque ad sola credibilitatis motiva recurrendum est. Ergo.

Solvuntur objectiones.

Obj. 1°. Motiva credibilitatis sufficienter non expendantur, nisi expendantur etiam omnia momenta quæ in gratiam singularum religionum proferuntur, nisi cunctæ perpendantur difficultates quæ circa illa motiva solent agitari : atqui maxima pars hominum id præstare non potest : ergo via auctoritatis non facilior est quam via discussionis.

R. 1°. Ex illo argumento sequeretur maximam hominum partem nullo modo veram religionem cognoscere posse, illique prudenter adhærere : hoc autem summæ providentiæ et bonitati Dei repugnat : ergo.

R. 2°. *Nego maj.* Nam, ut quis prudenter judicet religionem suam esse veram, sufficit quod aperte videat nullam esse aliam in orbe quæ tantis et tam splendidis motivis credibilitatis gaudeat : at in decursu hujus tractatus demonstrabimus tanta et tam splendida esse credibilitatis motiva in favorem religionis Christianæ, ut fere primo intuitu appareat rusticis et imperitis nullam esse aliam quæ talibus veritatis argumentis gaudeat ; unicuique enim manifestum est nullam esse aliam tot prophetiis annuntiatam, tot miraculis confirmatam, tot martyrum sanguine signatam, tam mirifice et tam celeriter diffusam, contra tyrannorum et cupiditatum conatus. Unde sic ratiocinari possunt etiam simplicissimi homines : Vel religio Christiana vera est, vel nulla : at certum est unam esse veram : ergo, etc. Non necesse est igitur ut

singula momenta quæ in gratiam aliarum religionum proferuntur, ab unoquoque expendantur, nec ut omnes difficultates quæ circa motiva credibilitatis agitari possunt, perpendantur.

Quilibet homo, etiam imperitus, absque ulla errandi formidine credit corpora existere, licet omnes difficultates quæ circa illorum existentiam fuerunt excogitatæ nec cognoscat, nec solvere queat : sic unusquisque certo cognoscere potest imperium Romanum olim exstitisse, Alexandrum victorias reportasse, quamvis cavillationibus Pyrrhonorum respondere non possit : ergo *a pari* unusquisque infallibiliter cognoscere potest motiva credibilitatis religionis, licet non solverit nec solvere valeat difficultates quæ circa illam proponuntur.

Inst. 1º. Omnes plebei et imperiti homines credibilitatis motiva cognoscere non possunt nisi per aliorum explicationes : at semper timendum est ne ab aliis decipiantur : ergo.

R. Nego min. Plebei enim et imperiti homines non nisi per aliorum explicationes cognoscunt facta præterita, v. g. existentiam imperii Romani, victorias Alexandri vel Julii Cæsaris : attamen de illis factis non dubitant. Cum enim videant quoscumque doctos ea unanimiter asserentes, facile comperiunt inter eos nullam esse collusionem, ac proinde de huiusmodi factorum veritate minime dubitant. Porro eadem certitudine cognoscere possunt motiva credibilitatis religionis nostræ, nempe miracula et prophetias; quotidie namque audiunt parochos aliosque doctos ea facta supernaturalia constanter et unanimiter docentes, asserentes et ab objectis incredulorum vindicantes : atqui, hoc posito, ea ut certa habere debent; clare enim percipere possunt parochos et alios doctos illa asserentes non esse impostores, impossibile esse illos inter se ad decipiendum collusisse. Præterea, si quid falsi dicerent, hæretici, schismatici, mali sacerdotes, innumeri fideles, qui etiam sunt docti, totis viribus statim reclamarent. Ergo.

Inst. 2º. Absurdum est credere objecta ab aliis tantum

intellecta : at in hac hypothesi plebeii et imperiti crederent objecta ab aliis tantum intellecta : ergo.

R. Dist. maj. Si de veritate illorum objectorum aliunde non constet, *concedo*; si de veritate illorum aliunde infallibiliter constet, *nego maj.* Etenim nulla est absurditas credere objecta in seipsis non intellecta, si aliunde de illorum veritate nullum moveri possit dubium : verum de veritate objectorum quæ revelata sunt ita per motiva credibilitatis constare potest, ut circa illa nullum dubium moveri queat : ergo.

Inst. 3º. Absurdum est objecta per alienos oculos videre : ergo *a pari*, etc.

R. Dist. ant. Absurdum est, etc. si oculi nostri sint sani et objecta præsentia, *concedo*; si oculi sint vitiiati, vel si objecta sint a longe posita, *nego ant.* Equidem absurdum esset objecta per alienos oculos videre, si oculi nostri essent sani et objecta præsentia : at si oculi nostri sint vitiiati, non absurdum est objecta per alienos oculos videre; imo absurdum esset ea negare, quamvis testes oculati assererent illa existere et esse talia vel talia : at in rebus religionis, circa quas cæci sumus, non minus absurde Deo loquenti denegaretur assensus. Ergo.

Inst. 4º. Pagani et Mahumetani non magis dubitare debent de sacerdotum suorum sinceritate quam apud nos plebeii et imperiti : si ergo sola via auctoritatis admittenda sit, nullo modo a tenebris errorum suorum exire poterunt.

R. Nego ant. Nam facta quæ in favorem religionis Christianæ narrantur, tam sensibilia, clara et splendida sunt, doctrina illius tam sapiens, pura et sancta est, ut omnes facile percipiant sacerdotes non esse deceptos nec deceptores : atqui tales veritatis characteres non reperiuntur in paganismo nec in mahumetismo, *ut unicuique vel leviter attendenti patebit*; undique enim et in dogmatibus et in factis evidens manifestatur absurditas. Ergo nulla est paritas.

CAPUT TERTIUM.

DE CHARACTERIBUS QUIBUS EXISTENTIA REVELATIONIS
CERTO CONSTARE POTEST.

Respectu illius cui immediate Deus loquitur, nullum requiritur signum externum; eodem modo enim Deus veritates supernaturales nobis manifestare potest, quo nobis communicat veritates naturales, v. g. omnes circuli radios esse æquales; id est, efficere potest ut tam infallibiliter judicemus ipsum nobis loqui interne, quam certo percipimus veritates evidentes. Ergo.

At non tenemur fidem iis omnibus adhibere qui prætendunt se a Deo fuisse missos et nomine ejus loqui; requiruntur notæ quibus prudenter judicemus eos non esse deceptos aut deceptores; notæ autem illæ duplicis sunt generis: aliæ sunt negativæ et aliæ positivæ.

Notæ negativæ sunt quædam conditiones sine quibus revelatio existere non potest, quamvis iis positis non constet illam existere, ideoque vocantur negativæ.

Illæ vero conditiones sunt: 1^o ut doctrina quæ tanquam revelata profertur, non sit evidenter absurda; nam quod est absurdum falsum est et a Deo revelari non potest. 2^o Requiritur ut præcedenti revelationi certæ non sit opposita, quia repugnat Deum sibi contradicere: attamen quasdam leges positivas ad tempus duraturas condere, alias eis substituere, et revelationem obscure factam, clarius deinceps manifestare potest. 3^o Requiritur, saltem ordinarie, ut ii quibus revelatio facta dicitur sint probi, pii et virtutibus conspicui; licet enim impios ad delarationem veritatis Deus cogere possit, repugnat tamen illum, ad revelandam instituendamque religionem sanctam, eorum uti ministerio qui tanquam peccatores publice habentur. 4^o Requiritur ut doctrina quæ velut revelata exhibetur, ad Dei gloriam et hominis felicitatem conducat; si enim ad finem perversum tende-

ret, vel cupiditatibus faveret, a Deo venire non posset.

Notæ positivæ sunt signa quædam extrinseca et velut litteræ testimoniales, digito Dei subscriptæ ipsiusque sigillo munitæ, quibus infallibiliter judicatur præcones revelationis ab eo missos fuisse et nomine ipsius loqui. Signa hæc vocantur credibilitatis motiva. Debent esse 1° sensibilia et omnium captui accommodata; alioquin simplices et imperiti revelationem prudenter cognoscere non possent; 2° certa et inconcussa, ut omnem tollant dubitationem et ad fidem proxime disponant.

Plurima autem numerantur signa externa, nempe miracula, prophetiæ, martyres, mira religionis propagatio, etc. Primum et præcipuum locum tenent miracula et prophetiæ, de quibus valde litigant cuncti revelationis hostes. Nobis igitur de illis paulo fusius in duplici articulo disserendum est.

ARTICULUS PRIMUS.

DE MIRACULIS.

Hanc gravis momenti quæstionem sub uno tantum respectu investigaturi sumus, quatenus scilicet miraculum exhiberi potest ut veræ religionis demonstratio relative ad nos, et examinaturi sumus: 1° quid sit miraculum; 2° an sit possibile; 3° an certo cognosci possit; 4° an vim habeat probandi veram esse doctrinam in cujus gratiam patrat.

Miraculum igitur consideraturi sumus in genere, a cunctis peculiaribus factis abstrahendo, necnon a potestate sive angelorum, sive dæmonum.

§ I. Quid sit miraculum.

Miraculum a *mirando* sic dicitur, quia, juxta omnes, est factum aliquod insolitum et mirandum. Certum est tamen omnia facta quæ mirationem movent et excitant, non ideo esse miracula; nam multa quasi inviti miramur quæ sunt naturalia, qualia sunt stupendi effectus electricitatis et magnetis, apparitiones cometarum, auroræ

boreales, subtilitates nonnullorum ludentium, *des joueurs de gobelets, des faiseurs de tours de passe-passe*, etc.

Philosophi autem et theologi non sibi concordant in assignando legitimam et accuratam miraculi definitionem; præcipuas eorum opiniones referemus, deinde nostram statuemus.

1° *Locke*, philosophus Anglicus, in opere gallice inscripto *Christianisme raisonnable*, definit miraculum, *Opus sensibile quod cursui naturæ contrarium et divinum judicat spectator*. At illa definitio admitti non potest ex qua sequeretur idem opus esse simul miraculum et non miraculum, prout judicaretur ab astantibus: at tale esset miraculum si definitio philosophi Angli legitima esset: ergo.

2° *Clarke*, alter celeberrimus Anglicus, *Traité de l'existence de Dieu*, t. 3, c. 19, miraculum definit, *Opus contrarium cursui consucto naturæ, id est, regularibus et constantibus legibus juxta quas Deus regit orbem universum, productum interventu intelligentiæ homini superioris*. Hæc definitio a multis theologis admittitur, et nihil continet propter quod rejici debeat.

3° *Houtteville*, in suo tractatu dicto, *la Religion chrétienne prouvée par les faits*, definit miraculum, l. 1, c. 6: *Un événement singulier, produit hors de l'enchaînement des causes naturelles*. Postea, confutans *Spinosam*, qui contendebat miracula esse impossibilia quia Deus sua decreta mutare non potest, dicit supponi posse Deum, in ipso mundi exordio, universas condendo leges quibus regerentur corpora, non ad solum ordinem physicum attendisse, sed etiam ordinem moralem et seriem eventuum quibus vera religio confirmanda esset inter homines spectando, quasdam simul instituisse leges occultas quæ, in determinatis circumstantiis, extraordinarios producerent effectus quos miracula vocamus. Hæc hypothesis, inquit, minime repugnat; nam Deus, qui libere leges universi orbis condebat, quas volebat exceptiones eis apponere poterat: in ea autem hypothesis, decreta sua non mutat, miracula operando, siquidem ea

prævidit, voluit et ab initio mundi decrevit. Hæc miracula nihilominus vim habent probandi; cum enim sint eventus extraordinarii, licet legum naturalium consecratoria, voluntatem Dei evidenter manifestant, quia casu fortuito cum circumstantiis in quibus patrantur coincidere non possunt: quis, v. g. dicere vellet solo casu fortuito fieri posse ut ad vocem ejusdem hominis cæci videant, surdi audiant, muti loquantur, claudi ambulent, morbi pellantur, mortui resurgant, etc. etiamsi effectus isti ex legibus ab initio conditis orirentur? revera igitur dicendum est cum Magis Pharaonis: *Digitus Dei est hic*, Exod. VIII, 19. Ergo.

Ad hanc hypothesim *Houtteville*, quam ipse non admittit nisi ut possibilem, recurrere non necesse est ut Spinosæ argumentum funditus evertatur. Ideo enim, juxta Spinosam, Deus patrare non potest miracula, quia, ex una parte, leges naturæ sunt ipsius decreta, et ex altera parte decreta sua mutare non potest: sed, admissis duabus his præmissis, nihilominus Deus patrare potest miracula leges naturæ suspendendo; ab initio enim discernere potuit quod in tali vel tali circumstantia has suspenderet leges: atqui tunc, eas suspendendo, sua non mutat decreta, sed e contra ea perficit et absolvit, ut manifestum est. Imo hypothesis *Houtteville* bene intellecta ad hanc responsionem reducit; nam leges speciales et occultæ quæ extraordinarios illos producerent effectus quos miracula vocamus, nihil aliud videntur quam in legibus generalibus exceptiones, seu derogationes: non intelligo autem cur tantopere desudet ut ostendat Deum miracula sic operari posse.

Præterea, hæc hypothesis 1º nullo innititur fundamento, siquidem nihil in illius gratiam affertur, præter meram possibilitatem; 2º adversatur vulgari hominum opinioni, qui omnes persuasum habent miraculo universalibus naturæ legibus derogari; 3º verbis actibusque Christi et Apostolorum consentanea non videtur: dicitur enim de illis quod miracula operarentur, ventis et mari imperando, infirmos curando, mortuos suscitando, opera

faciendo, etc. ergo, nisi hypothesis *Houtteville* sensu supra dicto intelligatur, prorsus rejicienda est.

Miraculum igitur recte definitur : *Opus externum, consuetis naturæ legibus contrarium, et vires humanas superans.*

Dicitur 1° *opus externum*, quia debet esse sensibile et omnibus cognitu facile; alioquin clara et evidens revelationis nota esse non posset.

Dicitur 2° *consuetis naturæ legibus contrarium*; his verbis a quibuscumque naturalibus operibus distinguitur, et sigillum Dei esse intelligitur, saltem ex natura sua, ut ex dicendis patebit.

Dicitur 3° *vires humanas superans*, non vero asserimus illud vires angelicas necessario superare.

§ II. An miraculum sit possibile.

PROPOSITIO.

Miraculum, prout illud definivimus, est possibile.

Prob. Miraculum, ex dictis, nihil aliud est quam derogatio consuetis naturæ legibus : at Deus, qui est auctor legum naturæ, eis pro nutu suo derogare potest, sive per se immediate, sive per delegatum.

Præterea si eis derogare non posset, maxime propter suam immutabilitatem, ut aiunt increduli post antesignanum suum Spinosam : verum hæc ratio nulla est, siquidem, ut jam notavimus, Deus, condendo leges suas, ab æterno statuere potuit se eis in talibus vel talibus circumstantiis derogaturum esse. Ergo, etc.

Unde sic ipse civis Genevensis, omnis religionis revelatæ hostis infensissimus, *lettre 3 de la Montagne* :

« Dieu peut-il faire des miracles ? c'est-à-dire peut-il » déroger aux lois qu'il a établies ? Cette question, sérieu- » sement traitée, serait impie, si elle n'était absurde : ce » serait faire trop d'honneur à celui qui la résoudrait » négativement, que de le punir ; il suffirait de l'enfer-

» mer : mais aussi quel homme a jamais nié que Dieu
 » pût faire des miracles ? »

Obj. Deus non pōtest turbare ordinem hujus mundi ,
 quem sapienter instituit : at operando miracula turbaret
 ordinem hujus mundi : ergo.

R. 1°. Nego maj. Deus enim pro libitu illum pertur-
 bare potest ordinem quem libere instituit, quem potuis-
 set non instituere, quem mutare et destruere posset :
 atqui certum est Deum ordinem præsentis aspectabilis
 mundi libere instituisse, illum nunc mutare et etiam
 destruere posse : ergo 1°.

R. 2°. Nego min. Si enim Deus patrando miracula or-
 dinem mundi turbaret, certe quia leges naturæ suspen-
 deret : atqui ordinem mundi non ideo perturbat, quia
 leges naturæ aliquando suspendit; lex enim contra quam
 peragitur miraculum, in eo tantum casu particulari sus-
 penditur, in cæteris vero casibus consuetos habet effec-
 tus : v. g. si ignis in fornace Babylonis tribus pueris
 pepercit, non ideo cessavit in aliis mundi partibus et in
 cæteris casibus objecta sibi exposita juxta morem suum
 comburere. Ergo.

§ III. An miraculum certo cognosci possit.

PROPOSITIO.

Miraculum certo cognosci potest.

Prob. Miraculum enim, ex dictis, est derogatio con-
 suetis naturæ legibus : at certo cognoscere possumus
 consuetis naturæ legibus fuisse derogatum, si nempe
 consuetas naturæ leges circa nonnullos effectus certo no-
 scamus, et clare videamus factum eis oppositum : porro
 hæc duo constare possunt; v. g. experientia omnium
 sæculorum constat solem quotidie ab oriente ad occasum
 declinare videri, nunquam pati eclypsim nisi luna ipsum
 inter et terram fuerit posita, ac proinde tempore novi-
 lunii; morbos pertinaces subito et absque remediis phy-

sice applicatis non sanari, mortuos non resurgere, etc. : si ergo videamus solem in medio cursus sui sistere, in tempore plenilunii eclypsim pati; si ad solum hominis jussum conspiciamus morbos expelli, infirmitates curari, mortuos resurgere, nonne videmus aperte hæc extraordinaria facta consuetis naturæ legibus nobis bene notis esse contraria ? Ergo, etc.

Dices. Omnes naturæ leges non cognoscimus : porro inter leges nobis ignotas forsitan existit naturalis causa hujusmodi extraordinariorum factorum : ergo.

R. Nego min. Nam 1° quamvis omnes naturæ leges non cognoscamus, omnes homines unanimi voce pronuntiant tales aut tales effectus consecutaria alicujus legis naturales esse non posse; v. g. licet non percipiamus quid industria humana in sanandis morbis valeat, infallibiliter affirmamus pertinaces morbos ad jussum hominis expelli non posse. 2° Leges occultæ ex solis viribus naturæ agentes effectus suos stupendos arbitrariis hominis verbis aut factis apprime conformes non producerent. 3° Leges naturæ debent esse constantes, uniformes et eosdem producere effectus in iisdem circumstantiis : at tales non essent illæ fictitiæ leges quæ in sinu naturæ delitescere supponuntur, siquidem postquam per multa sæcula otiosæ exstitissent, in effectum subito erumperent, et statim in eandem relaberentur inertiam. Ergo.

§ IV. An miracula habeant vim probandi veram esse doctrinam in cujus gratiam patrantur.

PROPOSITIO.

Miracula certo existentia, vim habent probandi veram esse doctrinam in cujus gratiam patrantur.

Prob. Etenim 1° miraculum est effectus consuetis naturæ legibus derogans et speciali Dei auctoris naturæ productus vel permissus : at talis effectus evidenter probat veram esse doctrinam in cujus gratiam producitur,

quia haberi debet velut testimonium Dei eam confirmantis : supponatur enim homo qui annuntiet aliquam doctrinam ut divinam et polliceatur se , in illius confirmationem , mortuum suscitaturum aut quoddam aliud portentum operaturum ; si effectus promissionem sequatur , nonne universorum oculis clare patebit Deum hanc prædicationem sigillo suo munire ? Errorem vero sic obfirmare non potest : ergo. Unde civis Genevensis , *Emile* , lib. 4 : « Qu'un homme vienne nous tenir ce langage : » Mortels , je vous annonce la volonté du Très-Haut ; re- » connaissez à ma voix celui qui m'envoie. J'ordonne au » soleil de changer sa course , aux étoiles de former un » autre arrangement , aux montagnes de s'aplanir , aux » flots de s'élever , à la terre de prendre un autre aspect : » à ces merveilles , qui ne reconnaîtra pas à l'instant le » Maître de la nature ? elle n'obéit point aux impos- » teurs. » Ergo.

Et vero negari non potest Deum voluntates suas hominibus per ministerium legatorum manifestare posse. Quemadmodum autem principes litteras commendatitias appositione sigilli regii authenticas faciunt , ita et Deus missionem legatorum suorum aliquo signo certam facere debet : at nullum excogitari potest signum magis divinum et sensibile quam miraculum. Itaque , vel miracula vim habent , etc. , vel dicendum est Deum voluntates suas per ministerium legatorum certo manifestare non posse : hoc autem posterius admitti nequit : ergo.

2^o Propensio universalis et invincibilis ut firmum veritatis argumentum haberi debet : atqui propensione universali et invincibili ferimur ad judicandum miracula divinæ voluntatis esse signa splendidissima ; cum enim sciamus Deum esse mundi rectorem et legum quibus regitur conditorem , ubi videmus eas interrumpi vel suspendi , v. g. morbos ad vocem hominis fugere , cæcos videre , claudos ambulare , mortuos resurgere , etc. invincibili propensione ferimur ad judicandum ea divina virtute fieri , et dicimus sicut incantatores Pharaonis : *Digitus Dei est hic*. Hinc omnes populi persuasum semper

habuerunt præcipua religionis momenta esse divina miracula; hinc confessio philosophi Genevensis qui in sua impietate dicebat se nolle videre miraculum, ne insanus præ stupore fieret. Hæc sunt ipsius verba de extraordinariis sanationibus loquentis, 3^e *lettre de la Montagne, Mélanges* : « Il y a pourtant, je l'avoue, des choses qui m'étonneraient fort, si j'en étais le témoin.... Au reste, quelque frappant que pût me paraître un pareil spectacle, je ne voudrais pour rien au monde en être témoin; car que sais-je ce qu'il pourrait en arriver? Au lieu de me rendre crédule, j'aurais grand'peur qu'il ne me rendît (ce spectacle) que fou. » Ergo.

3^o Divina providentia, omnia in ordine morali sicut et in ordine physico gubernans, permittere non potest piissimos homines in errorem invincibilem induci: at si miracula vim non haberent probandi, etc., Deus permetteret piissimos homines in errorem invincibilem induci. Etenim quid Deo magis placeat attente observant: si advertant miracula in gratiam alicujus doctrinæ patrari, invincibili propensione feruntur ad judicandum eam a Deo venire, et adversus conscientiae dictamen se ire arbitrarentur, nisi corde et animo ei subscriberent: ita ut cum Hugone a Sancto-Victore, lib. de Trinitate, dicere possent: « Domine, si error est, a teipso decepti sumus; ista enim in nobis tantis signis et prodigiis confirmata sunt et talibus, quæ nonnisi per te fieri possunt: ergo 3^o, etc. aliunde, etc. Ergo.

Solvuntur objectiones.

Obj. 1^o. Multi non experiuntur propensionem qua contendimus impelli homines ad judicandum miracula divinæ voluntatis esse signa. Ergo.

R. 1^o. *Nego ant.* Quod enim omnium populorum consensu firmatur, ut vox naturæ haberi debet: atqui consensus omnium populorum testatur omnibus inesse propensionem ad judicandum, etc. ipsi deistæ fatentur religionem esse divinam si tot firmetur miraculis quot in

gratiam religionis Judaicæ et Christianæ facta esse dicuntur : Spinosa solebat dicere, referente *Bayle* in suo Dictionnario, fidem Christianam se amplexurum esse si resurrectionem Lazari certam existimaret : hæc igitur miracula rejiciunt, non autem negant propensionem qua ferimur ad judicandum, etc.

R. 2º. Nego conseq. Plures enim negaverunt ex relatione sensuum demonstrari posse corpora existere; alii dixerunt nullum amorem erga parentes esse præscriptum : attamen inde concludere non licet propensionem qua ferimur ad judicandum corpora existere, vel amorem parentibus deberi, non esse naturalem : ergo pariter, etiamsi plures miraculis non moverentur, non ideo inferendum foret naturalem in nobis non esse propensionem ad judicandum ea divinæ voluntatis esse signa. Ratio autem cur increduli miraculis non moveantur est, quia doctrina iis confirmata cupiditatibus adversatur.

Inst. 1º. Forte hanc propensionem diabolus producit, ut nos decipiat : ergo.

R. Nego suppositionem. Illa sententia admitti non potest quæ omnem tolleretur certitudinem physicam et moralem : atqui hæc sententia omnem tolleretur, etc. Si enim admittatur diabolus per quamdam propensionem invincibilem ad finem mendacibus portentis adhibendam nos determinare, semper nobis timendum erit ne sic per aliquam diabolicam artem deludamur, et ita omnis certitudo corruet : Deus autem id permittere non potest respectu totius generis humani. Ergo.

Obj. 2º cum Rousseau, Emile, lib. 4 : « Apôtre de la vérité, qu'avez-vous donc à me dire dont je ne reste pas le juge ? Dieu lui-même a parlé ; écoutez sa révélation. C'est autre chose. Dieu a parlé : voilà certes un grand mot. Et à qui a-t-il parlé ? Il a parlé aux hommes. Pourquoi donc n'en ai-je rien entendu ? Il a chargé d'autres hommes de vous rendre sa parole. J'entends : ce sont des hommes qui vont me dire ce que Dieu a dit. J'aimerais mieux avoir entendu Dieu lui-même ; il ne lui en aurait pas coûté davantage, et j'aurais été à l'abri de la séduction. Il vous en garantit en manifes-

» tant la mission de ses envoyés. Comment cela ? Par des
 » prodiges. Et où sont ces prodiges ? Dans les livres. Et
 » qui a fait ces livres ? Des hommes. Et qui a vu ces pro-
 » diges ? Des hommes qui les attestent. Quoi ! toujours
 » des témoignages humains ? toujours des hommes qui
 » me rapportent ce que d'autres hommes ont rapporté ?
 » Que d'hommes entre Dieu et moi ! » Unde sic. Illi mi-
 raculis credere non tenentur qui propriis oculis ea non
 conspexerunt : ergo vim probandi non habent miracula,
 nisi ad summum respectu testium oculatorum.

R. Nego ant. Tenemur enim fidem eis adhibere miraculis quæ in dubium rationabiliter revocare non possumus : at fieri potest ut in dubium rationabiliter revocare non possimus miracula quæ tamen propriis non conspeximus oculis : nam multa sunt facta præterita a nobis longe distantia quæ tamen in dubium nullo modo revocare possumus : talia sunt facta Socratis, juxta ipsum *Rousseau*, ibid. atqui miracula sunt facta sensibilia, tam cognitu facilia quam alia quælibet facta historica ; non magis enim multi decipi aut decipere possunt, sive loquendo, sive scribendo, circa prodigia non æquivoca, sed manifesta et publice facta, quam circa naturales eventus : ergo.

Et vero, si Deus efficere teneretur ut singuli eum loquentem audiremus, miracula jam non essent miracula ; vel enim secundum regulas uniformes contingerent, vel non : si prius, non essent miracula, nec plus ea miraremur quam animalium generationem, granorum, plantarum ac arborum reproductionem aliaque hujusmodi mirabilia ; si posterius, quotidie legibus naturæ diversis modis derogaretur, et nihil esset certum. Ergo.

Inst. 1º. Fidem adhibere miraculis non tenemur nisi sint certissima : at miracula præterita non possunt esse respectu nostri certissima : ergo.

R. Nego min. Propter rationes jam allatas. Tam enim miracula certa esse possunt respectu nostri quam facta historica : sed quædam facta historica sunt respectu nostrî certissima, fatentibus ipsis adversariis : ergo.

Inst. 2º. Testimonium unius aut alterius hominis est

fallibile : at sæpe miracula præterita testimonio unius aut alterius hominis duntaxat constant, nempe respectu imperitorum apud Christianos, et omnium apud gentiles : ergo.

R. 1º. Hæc objectio deistas remove non deberet a credendo ; ibi enim de imperitis agitur, et ipsi inter imperitos se annumerandos non putant. Ergo.

R. 2º. Nego min. et dico de miraculi essentia non esse ut illius existentia testimonio unius aut alterius hominis duntaxat nitatur : factum quippe consuetis naturæ legibus derogans potest esse non solum sensibile, sed coram multis patratum, sed publicum, et talibus veritatis characteribus vestitum ut in dubium rationabiliter revocari non possit. Ergo.

Obj. 3º. Miracula sunt tantummodo facta consuetis naturæ legibus opposita : atqui hujusmodi facta voluntatem Dei per seipsa non manifestant : ergo.

R. Dist. min. Voluntatem Dei non manifestant, si considerantur seorsim a circumstantiis in quibus peraguntur, vel ab interpretatione illius cujus ministerio Deus utitur, *concedo* ; secus, *nego min.* Equidem, si miracula considerarem independentem a circumstantiis, v. g. si hodie solem in cursu stare videremus, nihil inde concludere possemus ; sed ubi speciales adsunt circumstantiæ, vel interpretatio illius cujus ministerio Deus utitur, miracula aliquid significant : id autem quod significant necessario verum est, alioquin Deus falsum approbaret, quod repugnat. Ergo.

Inst. 1º. Fieri potest ut ille cujus ministerio Deus utitur, in sua declaratione mentiatur. Ergo.

R. Nego ant. Miracula enim sunt velut sigillum divinæ voluntatis : at Deus permittere non potest ut tale sigillum falsitati apponatur, quia errori directe patrocinaretur. Ergo.

Inst. 2º. Deus permittit sacramenti ministrum potestate sibi divinitus concessa abuti : ergo permittere potest ut miraculorum minister eis ad decipiendum abutatur.

R. Nego consequ. et paritatem. Ratio disparitatis est, quod homines naturali propensione impellantur ad cre-

dendum Deum per miracula loqui : unde si miracula in gratiam erroris patrarentur, error in ipsum Deum refundendus esset : contra vero, homines naturali propensione non feruntur ad credendum ministrum sacramentorum ea semper licite vel etiam valide administrare. Ergo.

Inst. 3°. Fieri potest ut dæmones quædam faciant opera extraordinaria vires humanas superantia ad suadendam falsitatem : at in ea hypothesi nullum daretur signum quo miracula ab hujusmodi prodigiis tuto secernerentur : ergo.

R. 1°. De potestate dæmonum alibi diximus, et hic tractare non intendimus.

R. 2°. *Nego min.* nam 1° si prodigium sit inutile, ridiculum, indecorum, aliquid crudelitatis, obscenitatis, fraudis vel cujusvis criminis admixtum exhibeat, sive in operatione externa, sive in effectibus ejus, Deo tribui non potest, quia repugnat Deum consuetis naturæ legibus derogare ad illicita confirmanda aut perficiendas nugas : *sanctus* est enim *in omnibus operibus suis*, Psal. cXLIV. Hinc quædam prodigia apud veteres paganos celebrata, ut aqua in cribro delata et non effluens; cos novacula incisa, humanæ sunt imposturæ, vel diabolicæ operationes. Eodem modo pronuntiandum est de famosis *convulsionibus* Jansenistarum : quis enim credere potest Deum leges naturæ suspendere aut eis derogare ut homines ad pietatem se exercentes excruciet, ab eis clamores, dentium stridorem, membrorum contorsiones, saltus incompositos extorqueat? Similiter quæ tendunt ad solam curiositatem, ostentationem, superbiam, qualis fuisse refertur ascensio Simonis magi per aerem coram Nerone, a Deo venire nequeunt. 2° Si, e contra, factum adeo sit splendidum ut actionem auctoris naturæ evidenter arguat, v. g. resurrectio mortuorum, subita morborum sanatio, panum multiplicatio, super aquas deambulatio, etc.; si appareant hujusmodi facta numerosa, pro circumstantiis varia, opportuna, ad vocem loquentis prodeuntia, soli Deo tribui possunt. Ergo, etc.

ARTICULUS SECUNDUS.

DE PROPHETIIS.

Vox *prophetia* a duobus verbis græcis venit $\pi\acute{\rho}\delta$, *ante*. et $\varphi\eta\mu\acute{\iota}$, *dico* : unde formatæ sunt voces latinæ, *prædicere*, *prædictio*. *Prophetia* autem recte definitur : *prædictio certa eventus futuri qui in causis naturalibus ab intelligentia humana prævideri non potuit*.

Quatuor, juxta omnes, requiruntur conditiones ut prædictio alicujus eventus vera sit *prophetia* : scilicet, 1º ut ante eventum facta fuerit; 2º ut eventus contingat et prædictioni consentiat; 3º ut in causis naturalibus prævideri non potuerit; 4º ut consensio eventus cum prædictione casui fortuito tribui non possit. Necessitas hujusmodi conditionum per se patet.

Eædem recurrunt quæstiones circa prophetiam ac circa miraculum, videlicet 1º an sit possibilis; 2º an certo cognosci possit; 3º an vim habeat probandi veram esse doctrinam in cujus gratiam editur. His quæstionibus per sequentes propositiones responsuri sumus.

PROPOSITIO PRIMA.

Prophetia est possibilis.

Prob. *Prophetia* est possibilis si Deus quosdam noscat eventus futuros qui in causis naturalibus prævideri non possint, et si eos hominibus prænuntiare possit : atqui hæc duo certa sunt. 1º Deus quosdam noscit eventus futuros qui, etc. nam, utpote infinitus in scientia, universa novit, et præterita, et præsentia, et quæcumque futura, etiam contingentia et libera, ut contra deistas in Philosophia probatur : porro, inter hæc futura, multa sunt quæ in causis naturalibus prævideri non possunt, v. g. nativitas hominis qui circa ducentos annos venturus est, nomen ejus, præcipuæ ipsius vitæ actiones ; certum est enim hæc in causis naturalibus prævideri non posse. Ergo 1º. 2º Eventus illos quos perfecte noscit, Deus manifestare potest hominibus ; aptissima enim ipsi

non desunt media quibus homines alloqui possit : vel 1° per inspirationem internam , certam quarundam veritatum cognitionem mentibus imprimendo ; vel 2° clara voce ; vel 3° per visionem , res futuras manifestando prophetæ ut præsentés ; vel 4° per somnia , etc. In his casibus signa indubitata locutionis suæ dare potest Deus ; id a nemine negari potest , sicut ostendimus supra , ubi de revelatione in genere. Ergo.

PROPOSITIO SECUNDA.

Prophetiarum existentia certo cognosci potest.

Prob. Ad hoc enim tria sunt requisita , videlicet 1° ut futurus eventus certo prænuntiatus fuerit ; 2° ut eo modo contigerit quo fuit prædictus , et 3° ut clare videatur illum in causis naturalibus prævideri non potuisse , nec casu fortuito cum prædictione concordari : atqui hæc tria possibile sunt. 1° Prædictio futuri eventus est factum ex natura sua sensibile et eodem modo cognoscibile ac alia facta historica. 2° Idem dicendum est de prædictionis adimpletione ; eventus quippe cum suis circumstantiis est factum historicum. 3° Ex natura eventus et ex adjunctis facile dijudicari potest an ejus prævisio causis naturalibus , vel illius executio casui fortuito tribui possit ; v. g. si agatur de futuris liberis longe ante eventum prænuntiatis , quæ tempore statuto cum circumstantiis descriptis apprimè contingant. Ergo.

PROPOSITIO TERTIA.

Prophetiæ vim habent probandi veram esse doctrinam in cujus confirmationem eduntur.

Prob. 1° Sicut omnes populi miracula in gratiam suæ religionis celebrant , omnes pariter oracula divinitatis memorant : ergo persuasum habent inesse oraculis , seu prophetiis , vim probandi , etc.

2° Miracula habent vim probandi veram esse doctrinam in cujus gratiam patrantur : sed in omni prophetia verum existit miraculum ; cum eventus futurus qui prædicatur , in causis naturalibus prævideri non potuerit ;

necesse est igitur ut causa supernaturalis interveniat : ergo verum adest miraculum.

3^o Vim quam habent miracula probandi veram esse doctrinam in cujus gratiam patrantur , præcipue deducimus ex naturali propensione qua ferimur ad judicandum ea esse divinæ voluntatis signa : atqui eadem propensione ferimur ad judicandum prophetias characteribus supra expositis munitas , divinæ voluntatis esse signa ; non minus enim inclinamur ad credendum divinam in eis esse operationem quam ad judicandum miracula a Deo patrari : ergo. Unde ipse *Rousseau*, *Emile*, lib. 4 : « Et » pourquoi les prophéties ne font-elles pas autorité pour » vous ? Parce que , pour qu'elles la fissent , il faudrait » trois choses dont le concours est impossible ; savoir , que » j'eusse été témoin de la prophétie , que je fusse témoin » de l'événement , et qu'il me fût démontré que cet événement n'a pu cadrer fortuitement avec la prophétie. » Si qua ergo existeret prophetia his conditionibus munita , vim haberet probandi , etc. porro dari possunt hujusmodi prophetiæ : ergo.

1^o Fieri potest ut iidem homines sint testes oculati et prophetiæ et ejus eventus , quod pluries revera contigit , ut narratur in libris sacris. Sic Moyses annuntiabat Pharaoni horam qua plagæ Ægypti incipere et desinere debebant ; Elias , Eliseus pluresque alii regibus Juda et Israel prædixerunt eventus quorum futuri erant et revera fuerunt testes : sic Apostoli et innumeri Judæi qui audierant Christum passionem suam , mortem , resurrectionem et ascensionem prænuntiantem , hæc propriis oculis viderunt completa : sic generatio de qua Christus dixerat , *Non præteribit , donec omnia fiant* , testis fuit excidii Hierosolymitani et omnium calamitatum quas obveniendas tam graphice prædixerat , ut legitur apud Matth. xxiv.

2^o Constare potest consensionem inter eventum et prædictionem casui fortuito tribui non posse. Si enim non solum facti substantia prædicatur , sed variæ illius circumstantiæ ex occultissimis naturæ legibus vel ex libera hominum electione pendentes describantur ; si non una

aut altera, sed multæ edantur prophetiæ idem habentes objectum, et tamen cunctæ ad apicem impleantur, luce meridiana clarius est concordiam inter eventum et prædictionem casui fortuito tribui non posse: atqui demonstrabimus postea tales existere prophetias: ergo.

Notandum est quod hic prophetiarum existentiam non discutiamus nec inquiramus, sed tantum earum qualitates speculative et in genere sumptas.

Quæritur an prophetiæ maiorem vel minorem habeant vim probandi quam miracula?

R. 1°. Certum est miraculum evidenter divinum vim habere probandi, independenter a prophetiis: nam Moyse et Apostoli missionem suam probaverunt per miracula quæ non fuerunt prænuntiata, vel quorum prædictio testibus eventus non erat nota, nempe gentibus: ipse Christus divinitatem suam ex miraculis, sine ullo respectu ad prophetias, ostendit, v. g. ex sanatione paralytici, ex restitutione visus cæco nato, etc. Item Apostoli ex sanationibus per miraculum factis missionem suam probant. Ergo.

R. 2°. Prophetiæ vim habent per se et independenter a miraculis probandi veram esse doctrinam in cujus gratiam eduntur. Nam 1° Christus, post resurrectionem, discipulos euntes Emmaüs docens, incipit a *Moyse et omnibus prophetis*, Luc. xxiv, 27; de miraculis nihil dicit. 2° Apostoli sæpe solas allegant prophetias, ut in pluribus locis Actuum Apostolorum legitur. 3° Sæpissime sancti Patres aliique religionis christianæ defensores argumenta ex solis prophetiis, sine respectu ad miracula, educunt. 4° Prophetia, *ex dictis*, est opus tam divinum quam miraculum. Ergo.

R. 3°. Cum miracula et prophetiæ sint pariter opera vires humanas superantia, eandem habent vim intrinsicam probandi veram esse doctrinam in cujus testimonium proferuntur: vis autem externa pendet a variis circumstantiis talis miraculi aut prophetiæ.

R. 4°. Veræ autem prophetiæ eodem modo secerni possunt ab humanis imposturis vel a dæmoniorum oraculis, quo vera a falsis distinguuntur miracula.

PARS SECUNDA.

DE RELIGIONE JUDAICA.

Probavimus necessariam sed insufficientem esse religionem naturalem, revelationem esse possibilem et necessariam; indicavimus signa quibus illius existentia constare possit. Nunc vero inquirendum est an existat. Quatuor religiones gloriantur se revelationem habere, nempe Judaica, Christiana, Mahumetana et pagana: unica autem potest esse vera. Fateantur deistæ religionem paganam et Mahumetanam esse falsam. Christiana cum Judaica essentialiter colligata est, imo ad originem mundi ascendit, cum Christus, ipsius caput, a primis patriarchis fuerit exspectatus tanquam lapsus protoparentis reparator. Itaque sedulo examinandum est quid de religione Judaica, deinde quid de Christiana sentiendum sit. Triplex circa religionem Judaicam proponitur quæstio: 1° an sit vera; 2° an sit divina; 3° quamdiu esset duratura; seu de ejus veritate, divinitate, et duratione. Unde in hac parte tria erunt capita quibus prævium præmittimus caput de religione primæva.

CAPUT PRIMUM.

DE RELIGIONE PRIMÆVA.

Inter recentiores deistas plurimi contendunt hominem e manibus Creatoris prodiisse cum sola facultate cogitandi ac ratiocinandi, et omni cognitione destitutum. In hac hypothesi, homines debuerunt propriis viribus ideas intellectuales sibi efformare, sermonem instituere,

societatem inire, ad notionem divinitatis et cultus illi exhibendi devenire. Cum multos conspexerint effectus stupendos in natura sensibili, causas illorum naturali curiositate quærentes, varias pro variis effectibus sibi finxerunt, eas velut deos habuerunt; sicque natus est polytheismus, prima omnium religio, cui post plurima sæcula successit theismus. Quid de tali suppositione sentiendum sit per sequentes statuemus propositiones.

PROPOSITIO PRIMA.

Homo qualibet cognitione positiva destitutus, religionem naturalem nunquam propriis viribus excogitare potuisset.

Prob. Ad excogitandam religionem naturalem prærequisitæ fuissent ideæ intellectuales: at impossibile est hominem qualibet cognitione positiva destitutum, ideas intellectuales sibi efformare potuisse; res enim intellectuales nobis repræsentare non possumus nisi per earum nomina seu per expressionem internam: atqui homo, sibi derelictus, expressionem idearum intellectualium invenire non potuisset; siquidem expressio supponit ideas, sicut ideæ pærequirunt expressionem: ergo.

Hoc argumentum confirmat experientia. Etenim 1^o surdi a nativitate non solum sunt muti, sed nullam habere videntur ideam rerum mere intellectualium aut absentium; ubi vero per gestus et signa hæc objecta apud ipsos exprimuntur, ea perfecte concipiunt, et idonei sunt ad discendam methodum perceptiones suas exterius manifestandi. 2^o Qui extra consortium hominum a tenera infantia vixerunt, fere similes sunt bestiis agrorum; non loquuntur, nihil proprie percipiunt, nulla rationis indicia exhibent. Ergo.

PROPOSITIO SECUNDA.

Deus ab initio hominem cognitionibus positivis instruxit, et religionem ei revelavit.

Prob. 1^a pars. Consulendi sunt annales mundi a Moyse

scripti, quorum mox authenticitatem et veritatem demonstraturi sumus: at illi annales testantur hominem fuisse creatum adultum, cogitantem, loquentem, ratiocinantem: hac igitur sola ratione cuncta evanescent deliramenta incredulorum circa originem humanarum cognitionum et linguarum.

Prob. 2^a pars. Narratio Moysis inducit Deum primos parentes nostros alloquentem, eos docentem, saltem uno præcepto positivo obstringentem, peccatores redarguentem, ad pœnas damnantem et reparatorem eis promittentem: in tali autem agendi ratione se eis manifestavit et plures veritates eis revelavit. Ergo.

Præterea, religio patriarcharum primorumque hominum exhibetur in Genesi ut pura, sancta, sublimis et veneranda: at talis religio a sola ratione humana sic inveniri non potuisset. Etiam si admitteretur nullas in ea extitisse veritates captum humanum superantes, certum est rationem sibi derelictam nonnisi intra multa sæcula ad perfectas hujusmodi notiones divinitatis, cultus illi exhibendi atque præceptorum naturalium pervenire potuisse: quinimo nunquam hucusque devenisset, ut patet exemplo nationum excultissimarum ipsorumque philosophorum qui, ut in Philosophia ostendimus, ope sapientiæ humanæ corpus sanæ doctrinæ circa Deum, religionem et mores efformare non valuerunt. Ergo, etc. Vide *Hooke*, part. 2, art. 3, et *Bergier*, *Traité de la Religion*, t. 1, c. 1.

Quæritur quid revelatio primitiva continuerit?

R. Continebat veritates duplicis generis: dogmata et præcepta moralia.

1^o *Dogmata*, videlicet 1^o fidem unius Dei omnipotentis, rerum omnium creatoris et supremi moderatoris; 2^o formationem hominis ad similitudinem Dei quoad spiraculum vitæ quo præ cæteris animantibus fuit donatus; 3^o lapsum Adami e pristino statu et posterorum ejus ruinam; 4^o promissionem Redemptoris venturi et veniæ per illum obtinendæ. Tria priora clare expressa sunt in libro Geneseos; quartum vero deducitur ex his verbis, Gen. III, 15: *Inimicitias ponam inter te et mulie-*

*rem, et semen tuum et semen illius : ipsa*¹ *conteret caput tuum.* Si hæc ultima verba tantummodo sensu litterali intelligerentur, majestate Dei forent indigna, siquidem Deus promitteret solum semen mulieris caput serpentium contritum esse : si e contra sensu metaphoricum sumantur, et de liberatione generis humani ex potestate diaboli per serpentem figurati intelligantur, Deum magnifice decent ipsiusque bonitatem ac misericordiam patefaciunt : ergo sic accipi debent. Aliunde divina hæc promissio pluries clarius fuit iterata, v. g. Gen. xxii, 18; xxvi, 4 : *Et benedicentur in semine tuo omnes gentes terræ.* Idem constat ex opinione universali circa lapsum humanæ naturæ et promissionem venturi redemptoris. Ergo.

2° *Præcepta moralia.* Ex prædictis dogmatibus plurima sequuntur officia, tum erga Deum, tum erga alios homines, tum erga nosmetipsos, in natura nostra et in essentiis rerum fundata. Dubitare non licet quin Deus ea parentibus nostris simul revelaverit; id insuper constat ex historia patriarcharum; clare enim videtur in Genesi eos accurate hæc officia naturalia cognovisse : non potuissent autem ea sola ratione tam cito et tam perfecte cognoscere : ergo.

Præterea, duo saltem præcepta positiva et generalia Deus primis parentibus revelavit, nempe præceptum offerendi sacrificia cruenta et præceptum sanctificandi diem septimum; quamvis enim natura doceat Deum esse honorandum et aliquod tempus cultui ejus consecrandum, sacrificia cruenta non præcipit, nec circumstantiam diei septimi cultui divino consecrandi determinat : attamen semper et ubique sacrificia cruenta fuerunt in usu apud omnes gentes, et dies septima quodam modo cultui divino fuit consecrata, 1° apud Hebræos etiam ante Moysen, ut satis indicant hæc Dei verba in Exodo, xx, 8 : *Memento ut diem sabbati sanctifices*; non tam enim præ-

¹ In textu Hebræo et Samaritano et in cunctis versionibus Vulgata antiquioribus, loco *ipsa*, legitur *ipsum*, id est *ipsum semen*. Sic igitur Vulgata nostra intelligenda est : *ipsa* mulier, per semen suum, *conteret caput tuum*.

ceptum novum Deus his verbis instituit, quam veteris observationem urget; 2^o apud gentes, quæ dies per septimanas ubique diviserunt, et unam ritibus sacris specialiter destinant. Ergo.

CAPUT SECUNDUM.

DE VERITATE RELIGIONIS JUDAICÆ.

Hæc religio describitur in *Pentateucho*, id est, in quinque libris nomine Moysis inscriptis, qui sunt *Genesis*, *Exodus*, *Leviticus*, *Numeri* et *Deuteronomium*: unde vera est religio Judaica si quinque libri Moysis sint authentici, veri et integri. Præsens igitur caput in tres dividemus articulos: 1^{us} erit de authenticitate Pentateuchi; 2^{us} de ejus veritate, et 3^{us} de ejusdem integritate; quibus quartum addemus de cæteris Veteris Testamenti libris.

ARTICULUS PRIMUS.

DE AUTHENTICITATE PENTATEUCHI.

Ille liber est authenticus, qui ejus est auctoris cui ascribitur et eo tempore fuit scriptus ad quod refertur; ille vero est spurius vel apocryphus, qui ejus non est auctoris cui tribuitur, vel qui recentiori tempore fuit scriptus quam dicitur aut creditum est. Itaque Pentateuchus est authenticus si genuinum Moysis sit opus et in ipso reipublicæ Judaicæ initio fuerit scriptus, ut fertur. Spinosa et *Hobbes*, primi contra fidem Judæorum et Christianorum insurgentes, Pentateuchum dicteriiis lacesse- runt atque in dubium revocaverunt. Ab hoc errore non multum recessit Isaac *La Peyrère*, auctor libri olim flammis addicti et inscripti *Præadamitæ*: inter multos errores asserebat Adam non fuisse primum hominem, et hodiernum Pentateuchum esse duntaxat fragmenta libro-

rum Moysis. Richardus Simon, in famoso opere dicto, *Histoire critique du Vieux Testament*, docebat Moysen ordinem scribarum instituisse et eorum ministerio res tempore suo gestas in commentariis scribendas curasse, atque Pentateuchum nunc exstantem esse compendium hujusmodi commentariorum post captivitatem Babylo-nicam scriptum et publica auctoritate confirmatum. Hodierni increduli, ulterius progredientes, libros Moysis vel omnino rejiciunt, vel erroribus plenos esse affirmant. *His notatis*, sit

PROPOSITIO.

Pentateuchus est genuinum Moysis opus, et eo tempore ad quod refertur fuit scriptus.

Prob. 1º. Pentateuchus est genuinum, etc. si constanti traditione Judæi, Christiani, Mahumetani et ipsi pagani illum ut talem semper habuerint; alioquin nullus liber in mundo esset authenticus: atqui Judæi, Christiani, Mahumetani et ipsi pagani constanti traditione Pentateuchum habuerunt ut genuinum Moysis opus, et eo tempore ad quod refertur scriptum.

1º Judæi. Quotiescumque enim in cæteris Veteris Testamenti libris aliqua fit mentio de lege Judaica, nomine Moysis inscribitur, v. g. Josue, I, 7: *Ut facias et custodias omnem legem quam præcepit tibi Moyses servus meus*; Judic. III, 4: *Dimisitque eos ut in ipsis experiretur Israel, utrum audiret mandata Domini quæ præceperat patribus eorum per manum Moysi, an non*; item in III Regum, II, 3; in IV Regum, XIV, 6, et in sexcentis aliorum librorum locis. Idem legitur in antiquo Judæorum canone, teste Josepho contra Appionem, lib. 1. Idem pariter clare videtur in antiquioribus Scripturæ versionibus, v. g. in ea quæ dicitur Septuaginta interpretum, in Syriaca, in Chaldaica, etc. omnes namque Pentateuchum Moysi tribuunt. Ergo 1º.

2º Christiani, etc. Legitur enim apud S. Marcum, XII, 19 et 26: *De mortuis autem quod resurgant, non legistis in*

libro Moysis, etc. Hic refert Christus textum Exodi, III, 6. Apud S. Lucam, XXIV, 27 : *Et incipiens (Jesus) a Moyse et omnibus Prophetis, interpretabatur illis in omnibus Scripturis quæ de ipso erant; et 44: Quoniam necesse est impleri omnia quæ scripta sunt in lege Moysis.* Denique omnes Christiani semper fuerunt et adhuc sunt unanimes circa illud punctum. Ergo 2°.

3° *Mahumetani.* Nam id multis locis libri Mahumetis dicti l' *Alcoran*, fit mentio Moysis et legis ejus : porro lex Moysis est in Pentateucho : ergo 3°.

4° *Ipsi pagani*, quorum tamen maxime intererat Moysis existentiam negare, constanter eum habuerunt ut verum Pentateuchi auctorem; sanctus enim Justinus in sua Cohortatione ad Græcos, n° 9, multos designat auctores paganos qui *Moysen ut principem et ducem gentis Judæorum commemorant*, inter quos numerantur Polemon, Appion, Ptolomæus, Hellanicus, Philochorus, Castor, Thallus, Alexander Polyhistor, et celeberrimus Diodorus Siculus. Idem senserunt, inter Latinos, Celsus, Porphyrius et Julianus Apostata, qui tot et tanta contra Judæos et Christianos scripserunt. Ergo 4°, etc. aliunde, etc. Ergo.

Prob. 2°. Vel Pentateuchus est authenticus, vel recentiori tempore ab aliquo impostore fuit suppositus; atqui posterius dici non potest; vel enim suppositus fuisset post mortem Esdræ, vel tempore Esdræ, vel ante Esdræ: atqui nihil horum dici potest.

1° *Non post mortem Esdræ.* Omnibus enim fatentibus, suppositio ista contingere non potuit a tempore quo Pentateuchus, qualis nunc exstat, in linguam Græcam sub Ptolomæo Philadelpho a septuaginta interpretibus fuit translatus, siquidem ex tunc ad exterarum gentium transiit, et in diversis linguis idem semper fuit conservatus. Itaque suppositio ista fieri debuisset a tempore Esdræ usque ad Ptolomæum: at etiam in eo tempore hæc suppositio fuit impossibilis; tunc quippe Samaritani erant per schisma a Judæis divisi, et tamen eundem habent Pentateuchum ipsumque Moysi adscribunt: porro illum

non haberent si, durante schismate, ab aliquo impostore suppositus fuisset; illum enim a Judæis suppositum non admisissent ut divinum; nec Judæi illum a Samaritanis excogitatum accepissent. Ergo 1°.

Insuper, ex libris Machabæorum, ex Antiquitatibus Josephi et ex tota traditione constat Hebræorum religionem et rempublicam juxta leges Mosaicæ semper fuisse administratam. Pentateuchus erat liber ritualis ad usum sacerdotum, codex civilis ad usum judicum, instrumentum genealogiarum ad usum patrumfamilias, tabula hæreditatum ad usum privatorum, catechismus dogmaticus et moralis ad usum omnium: porro hæc reddunt suppositionem omnino impossibilem in quocumque tempore: ergo 1° saltem post mortem Esdræ dicta suppositio contingere non potuit.

2° *Non tempore Esdræ* et ab ipso Esdra, ut dicere non erubuit Spinoza; nam tempore Esdræ tota gens Samaritanorum a Judæis jam ex multis annis erat divisa: impossibile ergo tunc fuisset persuadere illis ut Pentateuchum, de quo nihil unquam audissent, tanquam genuinum Moysis opus reciperent; illum velut spurium rejecissent sicut alios libros a tempore schismatis scriptos rejecerunt. Ergo 2°.

3° *Non ante Esdræ*. Nam tunc vel post, vel ante Roboam: at neutrum dici potest. Non post Roboam, quia decem tribus jam separatæ erant: ab illo autem tempore suppositio Pentateuchi facta est omnino impossibilis, propter rationes expositas. Non ante Roboam; quo enim viciniora sunt tempora, eo difficilior est suppositio. Præterea, a Roboam retrogradiendo usque ad Moysen, accurate descripta existit series factorum in diversis libris qui successive prodire debuerunt; sunt enim secundus et primus Regum, Ruth, Judicum et Josue: omnes libri isti declarant, vel supponunt Moysen fuisse Judæorum legislatorem, religionis eorum, reipublicæ, legum, cæremoniarum, sacrificiorum, festorum institutorem ac Pentateuchi auctorem: nemo autem non videt quam absurdum sit dicere hæc omnia ante

Roboam fuisse supposita, et sic miro artificio sibi concatenata: ergo 3^o, aliunde, etc. Ergo.

Prob. 3^o. Si Pentateuchus fuerit suppositus, omnes alii libri Veteris Testamenti fuerunt etiam suppositi; nam de Pentateucho loquuntur, illum ut opus Moysis tradunt, cum illo perfecte sunt concordēs: at dici non potest cunctos Veteris Testamenti libros fuisse suppositos; nam, præter innumeras authenticitatis notas quas præ se ferunt, vel ab unico impostore fuissent suppositi, vel a pluribus: atqui neutrum dici potest. 1^o Non ab unico; impossibile quippe est unum hominem finxisse tot libros, rebus in eis contentis et modo quo dicuntur a se distinctos, in quibus tot emicant diversi characteres styli, figurarum, eloquentiæ, simplicitatis et sublimitatis. 2^o Non a pluribus; nullus enim vir bonæ fidei et aliquo præditus iudicio sibi persuadere poterit plures impostores, ex mutua conspiratione, varios Antiqui Testamenti libros excogitasse, tam sublinem et mirandam doctrinam in illis depinxisse, cum universa terra in densissimis tenebris esset involuta, et multas partes a se tam discrepantes tanta industria inter se colligasse, ut ita sibi corresponderent. Ergo.

Opinio autem Richardi Simonis nullo innititur fundamento, communi antiquorum et recentiorum sensui adversatur, siquidem nullibi fit mentio commentariorum quæ supponit, et omnes persuasum semper habuerunt Pentateuchum, qualem eum nunc habemus, genuinum esse opus Moysis.

Præterea, etsi concederetur, quod falsum est, primum exstitisse commentaria sub directione Moysis scripta, quorum Pentateuchus nunc exstans compendium esset, nihilominus opus foret authenticum quoad substantiam, ideoque nihil inde concludere possent increduli.

Solvuntur objectiones.

Obj. 1^o. Jupiter, Mercurius, Apollo alique apud paganos percelebres, erant tamen personæ fictæ: ergo a pari Moyses potest esse tantum persona ficta.

R. 1º. Dist. ant. Jupiter, Mercurius, etc. erant personæ fictæ, id est, historia eorum maxima ex parte est ficta, *concedo*; id est, nullo modo exstiterunt, *nego ant.* Etenim apud omnes in confesso est historiam deorum paganismi maxima ex parte fabulosam esse et nullam mereri fidem; sed communiter docetur plerosque deos istos vere exstisse et celebres fuisse viros qui, propter sua erga alios homines merita, deorum numero post mortem adscripti sunt; vel nihil aliud sunt quam ipse Moyses sub diversis nominibus cognitus et honoratus. Ea de re consulantur doctissimus *Huet*, in *Demonstratione evangelica*, prop. 4, cap. 3, 4, 5, etc. et *Banier*, *Explication historique des fables*.

R. 2º. Nego consequ. et paritatem. Ratio disparitatis est, quod historia deorum paganismi nullis nitatur fundamentis fide dignis, e contra, multa de illis dicantur perabsurba: Moysis vero narratio est simplex, clara, distincta et inconcussis innixa monumentis: ingens ergo datur discrimen ipsum inter et deos paganismi. Et vero, qui serio contenderet Darium, Alexandrum, Cæsarem, Constantinum, etc. fictos esse homines, ut delirans haberetur: at multo magis repugnat Moysen non exstisse, *ut in probatione ostendimus*; existentia enim illustrium hominum istorum non aliunde constat quam ex traditione et historicis monumentis: at nulla constantior et firmior traditio, nullaque majora excogitari possunt monumenta quam ea quæ Moyses existentiam attestantur. Ergo.

Obj. 2º. Auctor Pentateuchi constanter de Moyse loquitur in tertia persona, illum tanquam virum mitissimum laudat, mortem ejus in ultimo Deuteronomii capite narrat: atqui hæc Moyses scribere non potuit: ergo.

R. Nego min. quoad omnes partes. 1º Moyses de se in tertia persona loqui potuit; nam plures auctores quorum opera a nemine in dubium revocantur, sic de seipsis in tertia persona scripserunt: v. g. Esdras, Xenophon, Josephus, Evangelistæ, Julius Cæsar, etc. Ergo.

2º Humilitas Moysis in toto Pentateuchi decursu ap-

paret : suos defectus simpliciter enarrat , suam in Deum diffidentiam confitetur , semel tantum se laudat et quia ministerium ejus et gloria Dei id postulabant ; soror enim ejus Maria ob suam erga Deum rebellionem percussa fuerat lepra : tunc Moyses ostendere voluit hoc malum ex nimia ipsius severitate non evenisse , sed ex sola Mariæ iniquitate. Ergo.

3°. Quidam dicunt Moysen mortem suam per anticipationem et ex speciali revelatione descripsisse ; alii vero probabilius asserunt totum caput ultimum Deuteronomii ex libro Josue excerptum fuisse , ut quod pertinebat ad Moysen uno tenore legeretur. Ergo.

Obj. 3°. Moyses nunquam flumen Jordanis transiit : attamen Deuteronomium trans Jordanem fuit scriptum , ut ex c. 1, v. 1, *patet*. Ergo.

R. Nego min. Nam vox Hebræa *abr* triplicem habet significationem , ut videre est in dictionnario Buxtorf et in radicibus P. *Houbigant* ; modo significat trans , modo citra , modo ad ripam , *au-delà, en-deçà, sur le bord*, prout sensus phrasis id exigit : atqui Moyses , quando Deuteronomium scripsit , erat citra Jordanem et ad ejus ripam , id est , ab illo non longe. Septuaginta autem interpretes, Vulgata aliæque versiones verterunt *trans* , quia plaga in qua hæc verba protulit et scripsit Moyses , trans Jordanem erat respectu Judæorum qui flumen transgressi erant ut Terram Sanctam possiderent. Ergo.

Obj. 4°. Gen. XII , 6 , legitur : *Pertransiit Abraham in terram Chanaan usque ad Sichem. Chananæus autem tunc erat in terra ista*. Unde sic. Ex his verbis *patet* Chananæum jam in Terra Sancta non esse quando ille liber fuit scriptus : atqui tamen Chananæus erat in terra ista quando vivebat Moyses : ergo Moyses illius libri non est auctor.

R. Nego maj. Nam textus qui nobis objicitur sic naturaliter intelligi potest : *Chananæus autem jam erat in terra ista* , id est , antequam Abraham in terram istam adveniret , Chananæi illam jam occupabant ; omnes enim etiam

doctissimi interpretes, et ipse rabbi Aben-Ezra, eruditissimus, conveniunt hunc esse sensum.

Confusio linguarum in Babel et dispersio gentium acciderunt circa annum 1757 mundi; vocatio Abraham et ingressus ejus in terram Chanaan, circa annum 2083: Moyses autem legem a Deo in Horeb accepit et promulgavit anno 2513, ac consequenter 430 annis postquam Abraham egressus est de Ur Chaldæorum ut iret in terram semini suo promissam: non mirum est ergo si Moyses observaverit *tunc*, id est, jam Chananæos fuisse in terra ista. Ergo.

Obj. 5°. Plurima leguntur in Pentateucho locorum et urbium nomina quæ nonnisi post Moysen fuerunt imposita: v. g. Gen. x, 11, *Ninive* dicitur a Nemrod ædificata, et tamen nomen suum accepit a Nino qui sat longe post mortem Moysis vixit; Gen. xiv, 14, agitur de *Dan* quæ sic dicta est tempore Josue, xix, 47, quia tribus Dan eam cepit; antea enim vocabatur *Lesem*. In Deuteronomio, ii, 30, sermo fit de Galgala: at nomen istud impositum est sub Josue, *ut patet ex libro ejus*, v, 9, etc. Moyses hæc nomina scribere non potuit: ergo non est auctor Pentateuchi.

R. Nego consequ. Nova enim hæc nomina inscribi potuerunt in margine vel in spatiis interlinearibus, ad majorem textus intelligentiam; hinc forte ipsimet textui inserta sunt et prioribus substituta nominibus jam desuetis: porro hujusmodi levissimæ mutationes authenticitatem Pentateuchi labefactare non possunt: alioquin nullum opus antiquum ut genuinum agnosci deberet; nam vix ullum reperitur in quo tales vel graviores non existant mutationes.

Præterea, confidenter asserere possumus nullam ex his aliisque ejusdem generis difficultatibus esse quam Scripturæ sacræ interpretes facile non solvant, et quidem multiplici responsione, sæpe evidenti, semper saltem probabili. Responsiones illas hic per ordinem et singulatim efferre non possumus; consulantur diversi commen-

tatores, ut D. Calmet, Vence, Duguet, etc. legantur *Abbadie, Traité de la Religion*, t. 1; *Bossuet, Discours sur l'Histoire Univ.* 2^o part. cap. 3; *Huet*, prop. 4, cap. 14; *Bergier*, t. 5; *Duvoisin*, etc.

Obj. 6^o. In libro Josue, viii, 32, legitur *Deuteronomium legis Moysis, quod ipse digesserat*, in lapidibus altaris scriptum fuisse: atqui Deuteronomium quale nunc habemus in lapidibus altaris scribi non potuisset: ergo non est Deuteronomium Moysis.

R. 1^o. Multi doctissimi critici existimant non integrum Deuteronomium per illa libri Josue verba intelligendum esse, sed tantum illius partem quæ legem continet; Moyses enim dixerat, Deut. xxvii, 2 et 4: *Eriges ingentes lapides et calce lævigabis eos, ut possis in eis scribere omnia verba legis hujus*: in eo textu agitur tantum de verbis legis.

R. 2^o. Moyses præscripserat ut *ingentes* erigerentur lapides; non repugnat autem totum Deuteronomium in ingentibus scribi lapidibus: ergo.

Obj. 7^o. In Gen. xxxvi, 31, hæc leguntur verba: *Reges autem qui regnaverunt in terra Edom antequam haberent regem filii Israël, fuerint hi, etc.* octo postea numerantur reges et duodecim duces qui ab Esäu usque ad Moysen, id est, intervallo 250 annorum, regnaverunt et sibi successerunt. At 1^o octo reges et undecim duces sibi succedere non potuerunt; 2^o qui hæc verba scripsit, *antequam haberent regem filii Israël*, ostendit suo tempore filios Israel jam habuisse regem. Ergo Moyses hæc scribere non potuit.

R. Nego min. quoad utramque partem. 1^o Octo reges facile sibi succedere potuerunt in spatio 250 annorum, *ut evidentissime patet*. Duces autem successerunt quidem regibus, ex I Paral. i, 51. At multo probabilius omnes simul et in diversis locis imperabant; nam in Gen. xxxvi, 40, legitur: *Hæc ergo nomina ducum Esäu, in cognationibus, in locis et vocabulis suis*. Aliunde dici posset cum *Duguet*, in Gen. viii, reges et undecim duces per 250 annos sibi successisse; si enim æqualiter vixissent duode-

cim annos unusquisque regnasset vel imperasset: multi autem potuerunt brevi tantum tempore vivere, sive naturaliter, sive propter violentam mortem, aut propter expulsum, etc. Ergo.

2^o Multi dicunt hæc verba, *antequam regem haberent*, etc. non intelligenda esse quasi diceretur, *antequam Saül et David regnarent*, sed *antequam filii Israël, jugo Ægyptiorum excusso, rempublicam efformarent et ducem haberent*, scilicet Moysen qui tunc eos primus regebat. Ergo.

Cæterum, hujusmodi difficultates quas congerit Spinosa, probarent ad summum quædam in Pentateucho fuisse inserta, sive a Samuel, sive ab Esdra, sive ab aliis prophetis vel auctoribus, sed minime destruunt positivas quas attulimus rationes ad demonstrandum quinque hos libros genuinum opus esse Moysis.

Solent quidem critici ex talibus notis vel characteribus pronuntiare aliquem librum esse apocryphum, sed ubi positiva et firma aliunde non dantur motiva quibus clare ostendatur illum esse authenticum; nam in posteriori hoc casu, si nonnulla reperiant loca quæ proprio auctori celebri clare tribui non possint, rectius judicant ea quacumque de causa fuisse inserta: ergo etiamsi concederemus quædam annotationes a recentioribus scriptoribus Pentateucho fuisse insertas, nihil inde proficerent increduli.

Voltaire, Dict. philos. art. Moïse, et plures ejusdem scholæ homines quædam alia objiciunt, v. g. artem scribendi a Cadmo et post Moysen tantum fuisse inventam, solos tunc fuisse in usu apud Ægyptios et Chaldæos hieroglyphos qui in lapidibus et lateribus sculpebantur, longam historiam non potuisse per solos hieroglyphos depingi, et aliunde impossibile esse de loco in locum omnes transferre lapides et lateres qui necessarii fuissent ut integer contineretur Pentateuchus, etc. Ergo.

At illæ aliæque similes objectiones meræ sunt hypotheses quæ ex ipsamet Pentateuchi historia destruuntur; sic enim ratiocinandum est. Invictis argumentis

demonstratur Moysen esse Pentateuchi auctorem: in illo igitur tempore non soli existebant hieroglyphi; ars scribendi, et probabilius aliter quam super lapides et lateres, inventa erat. Vide exquisitum opus ab omnibus notum, *Lettres de quelques Juifs portugais*, etc. t. 1; *Bergier*, t. 5; *la Bible vengée des attaques des incrédules*, par Duclot, obs. prél. etc.

Parvi refert an Moyses per seipsum historiam enarraverit, vel per scribas aut secretarios qui sub illius directione scripserint. Sed admitti non potest systema Richardi Simon superius expositum, quia nullo nititur fundamento, constanti Judæorum et Christianorum traditioni adversatur, cum aliis monumentis quibus Pentateuchi aliorumque librorum Veteris Testamenti authenticitas probatur, conciliari non potest: unde *Bossuet* fortiter illud impugnavit statim atque in lucem prodiit, et communiter catholici ipsique protestantes illud procul rejecerunt.

ARTICULUS SECUNDUS.

DE INTEGRITATE PENTATEUCHI.

Probavimus Moysen esse auctorem Pentateuchi: *nunc quæritur* an ipsius opus hucusque integrum manserit. Duplex distinguitur adulteratio: una accidentalis et levis, quæ consistit in additione, omissione vel mutatione quorundam nominum, punctorum, virgularum aliorumve hujusmodi; et alia substantialis, quæ in eo sita est, ut aliquid addatur vel omittatur in doctrina, in institutis et in factis gravis momenti.

Fatemur Pentateuchum priorem non habere integritatem, et quasdam in eo subisse mutationes ignorantia, negligentia vel inadvertentia amanuensium; talis enim fuit sors omnium librorum, præsertim antiquissimorum qui per tot sæcula nonnisi manu scribi potuerunt: quæstio igitur est an Pentateuchus aliquam subierit mutationem essentialem in doctrina aut in factis alicujus momenti.

PROPOSITIO.

Pentateuchus nullam subiit mutationem essentialem, sive in doctrina, sive in factis.

Prob. Pentateuchus enim talem non subiit mutationem si demonstretur illam fuisse omnino impossibilem : atqui pluribus invictis argumentis demonstratur talem mutationem fuisse omnino impossibilem.

1° Facta quæ referuntur in Pentateucho sunt inter se concatenata ; doctrina cum miraculis, miracula cum legibus connectuntur, adeo ut alia ab aliis fulciantur vel supponantur : v. g. solemnitas Paschæ supponit miraculosum populi egressum ex Ægypto, festum Pentecostes locutionem Dei in monte Sinai, serpens æneus murmuraciones Israelitarum adversus Moysen, etc. at evidens est gravem mutationem introduci non potuisse in hujusmodi factis.

2° Quo magis notus est liber, eo difficilior est mutatio seu adulteratio : at Pentateuchus universo populo erat notissimus ; illum quotidie præ manibus habere tenebantur sacerdotes, ut ritus et cæremonias sub gravibus pœnis præscriptas religiose servarent ac explicarent ; principes populi et magistratus, ut jus dicerent, patresfamilias ut suas cognoscerent genealogias suisque fruerentur juri-
bus ; rex ipse illum propria manu scribere tenebatur, Deut. xvii, 18 ; quolibet septennio publice in concursu omnis populi legebatur ; tanta veneratione servabatur, ut scirent Israelitæ, teste Josepho, quot vicibus et quo ordine eadem littera in toto Pentateucho adhiberetur : porro nemo non videt hæc omnia essentialem mutationem reddidisse omnino impossibilem.

3° Libri Josue, Judicum, Regum et cæteri tantam cum Pentateucho habent connexionem, ut simul corrumpi debuissent ; omnia uniuscujusque libri exemplaria simul et eodem modo adulterare oportuisset : at illud fieri potuisse a quocumque etiam solertissimo impostore abso-

lute repugnat; multa enim ubique sparsa existere debuerunt legis exemplaria.

4° Schisma populi sub Roboam magis impossibilem adhuc quamlibet corruptionem effecit; si enim Judæi Pentateuchum adulterassent, mox Samaritani reclamassent, et, vice versa, Judæi si Samaritani hujus generis mutationem inducere tentassent; aliunde nec Judæi exemplaria Samaritanorum habuissent, nec Samaritani exemplaria Judæorum. Ergo.

Solvuntur objectiones.

Obj. 1°. IV Regum, xxii, 8, et II Paral. xxxiv, 14, legitur Helciam, sacerdotem Domini, librum Legis in templo casu fortuito reperiisse et Josiæ statim deferendum curavisse. Pius rex jussit ut ille liber sibi legeretur; illum vero audiens, expavit, flevit, scidit vestimenta sua dicens, II Paral. xxxiv, 21 : *Magnus furor Domini stilavit super nos, eo quod non custodierint patres nostri verba Domini, ut facerent omnia quæ scripta sunt in isto volumine;* misit etiam ad prophetidem Oldam, ut per illam consuleretur Dominus. Unde *sic efformatur argumentum.* Ex præcedenti narratione constat unicum tunc exstitisse volumen Pentateuchi quod erat perditum, et Legem tunc penitus oblitam jacere : atqui Helcias volumen illud facile corrumpere potuit : ergo non constat Pentateuchum esse integrum.

R. 1°. *Nego maj.* Nam antequam ille liber reperiretur, jam cœperat Josias instaurare templum et omnia ad legis præscripta adducere : nec igitur lex nec ipsius præscripta in oblivionem penitus devenerant.

Et vero, sub impiis regibus Amon et Manasse, prædecessoribus Josiæ, multi Judæi remanserant fideles; absurde enim supponeretur cunctos fuisse prævaricatores; Deus contra Manassem locutus est *in manu servorum suorum prophetarum*, IV Regum, xxi, 10. Porro illi servi Dei et Judæi fideles exemplaria Legis conservare debuerunt.

Igitur admiratio Helciæ, stupor et fletus Josiæ non probant præfatum exemplar fuisse unicum, et totam legem in oblivionem devenisse. Alio et verisimili modo explicari possunt; colligitur enim ex Deut. xxxi, 9 et 24, Moysen jussisse ut exemplar Legis propria manu sua scriptum in latere arcæ fœderis custodiretur, et quolibet septennio coram omni populo legeretur. Testatur Josephus, Antiq. l. 10, c. 3, illud religiose servatum esse usque ad tempora impii Manasses, quo regnante, una cum arca in secretiorem locum translatum esse, ut occultaretur: probabile est autem illud præcise volumen ab Helcia casu fortuito repertum fuisse, *cum efferrent pecuniam quæ illata fuerat in templum Domini*, II Paral. xxxiv, 14; nam hæc sunt ipsius textus verba: *Reperit Helcias sacerdos librum Legis Domini per manum Moysis*. Porro valde credibile est ingentem fuisse trepidationem Josiæ totiusque populi cum audierint verba hujus libri; tunc enim sibi repræsentabant ipsum Moysen eos objurgantem et graves pœnas, propter eorum peccata, nomine Dei minantem. Ergo.

R. 2º. Nego min. Etiam si concederetur prædictum volumen unicum fuisse Legis exemplar, nihilominus Helcias illud corrumpere non potuisset. Nam 1º sacerdotes, levitæ, magistratus, patresfamilias et omnes qui penitus legem oblivisci non potuerant, statim reclamassent. 2º Samaritani ex multis annis a Judæis jam erant separati: ergo Helcias illorum Pentateuchum adulterare non potuisset: attamen eorum Pentateuchus idem est ac Pentateuchus Judæorum. Ergo, etc. Præcipua Pentateuchi facta reperiuntur etiam in libris Regum, Paral. Psalmorum, Prophetarum, etc. Helcias autem hos libros adulterare non potuisset. Ergo.

Obj. 2º. Ex lib. IV Esdræ, xiv, 21 et 22, constat omnia Legis exemplaria in incendio Hierosolymitano periisse, et Esdram illa de novo scripsisse: ergo facile ea adulterare potuit.

R. Nego ant. 1º Quartus liber Esdræ est apocryphus, ac proinde nullius auctoritatis; nobis igitur nocere non po-

test. 2° Impossibile est omnia Legis exemplaria ita in incendio periisse ut nemo sciret quæ antea facta fuissent opera, quemadmodum dicit textus v. 21; nam omnia exemplaria non erant in templo, multa inter populum erant dispersa in cunctis urbibus, pagis et domibus. 3° Eodem tempore permulti Judæi erant in Babylonica captivitate, et ibi diu post incendium Hierosolymitanum commorati sunt: atqui Legem habebant, ut constat ex historia Danielis et Susannæ, ex Ezechiele, etc. 4° Exemplaria Samaritanorum in eodem incendio perire non potuissent. Ergo.

Frustra adhuc objicitur ex I lib. Machab. 1, 5 6, libros Legis ex jussu Antiochi traditos fuisse et combustos; impossibile enim fuit, propter easdem rationes, cuncta exemplaria comburere.

Inst. Veteribus characteribus quibus utebantur Hebræi ante captivitatem Babylonicam, Chaldaicas litteras substituit Esdras: ergo *a pari* substantiam Pentateuchi aliorumque librorum corrumpere potuit.

R. 1°. *Nego ant.* Non constat enim Esdram litteras Chaldaicas veteribus characteribus substituisse: 1° quia multi contendunt nullam hujusmodi factam fuisse mutationem, et Hebræos semper usos esse iis characteribus quibus nunc utuntur; 2° quia in hypothesi quod mutati fuerint characteres, et hoc probabilius nobis videtur, non ideo constaret Esdram illius mutationis unicum esse auctorem: versimiliter enim hæc mutatio eodem modo contingere debuit quo ejusdem generis mutationes apud alias gentes fieri solent, id est, non eodem tempore et ab unico auctore, sed sensim et sine sensu: v. g. unus scribendo his potius quam aliis utitur characteribus; alter postea iisdem utitur, quia sunt clariores, pulchriores, legentibus magis placent; alii deinde illos adoptant, et paulatim veteres characteres in oblivionem labuntur: sic apud nos modus scribendi et imprimendi plures subiit mutationes; sic Latinæ versiones quæ Vulgatam S. Hieronymi præcesserunt, ita oblitæ jacent, ut ne una quidem inveniri queat. Ergo.

R. 2º. Nego conseq. Nam Judæi qui, durante captivitate Babylonis, per septuaginta annos linguam Chaldaicam didicerant, characteres ejus linguæ et modum eam scribendi callere debebant : facillime ergo his assuefieri potuerunt in usu divinorum librorum ; e contra , si qua ipsis proposita fuisset notabilis mutatio in doctrina, in legibus, in cæremoniis, etc. eam sine reclamationibus non admisissent. Præterea, illæ mutationes in textu Samaritano non invenirentur; Samaritani quippe novos Judæorum characteres non admiserunt : *a fortiori* ergo graviores non admisissent mutationes. Ergo. Vide dissertationem D. *Calmet* de mutatione alphabeti sub Esdrâ.

Obj. 3º. Textus Hebraicus fere componitur ex litteris consonantibus tantum quibus, loco vocalium, quædam addita sunt arbitraria puncta ad determinandum sensum verborum : porro qui hæc puncta instituerunt, totum sensum subvertere potuerunt : ergo.

R. Nego min. Nam ante puncta Pentateuchus ab omnibus intelligebatur, quotidie legebatur, non tantum a sacerdotibus, sed coram omni populo; quatuor versiones Græcæ, scilicet Septuaginta interpretum, Aquilæ, Symmachi et Theodotionis, Paraphrasis Chaldaica, versio Syriaca et nostra Vulgata, factæ sunt super exemplaribus punctis destitutis; siquidem puncta, juxta omnes, sancto Hieronymo sunt posteriora, et probabiliter non fuerunt in usu ante decimum æræ nostræ sæculum : prædictæ autem versiones perfecte sibi sunt concordæ, saltem quoad substantiam; earum igitur auctores textum Hebraicum punctis destitutum intelligebant, et nos etiam illum facile absque punctis intelligimus, sequendo methodum D. *Masclæf* et patris *Houbigant*. Plurima quidem invenimus verba obscura, dubia, æquivoca : at nulla est æquivocatio vel incertitudo circa corpus doctrinæ et factorum. Ergo.

Obj. 4º. Ingens datur discrepantia, quoad chronologiam, inter diversos Pentateuchi textus. In Hebræo, a creatione usque ad diluvium 1656 numerantur anni, et

427 a diluvio usque ad vocationem Abrahæ; in Samaritano, 1307 ante diluvium, et 1017 a diluvio usque ad vocationem Abrahæ; in Græco Septuaginta interpretum, 2242 ante diluvium, et 1307 inter diluvium et vocationem Abrahæ. Abraham itaque vocatus est anno mundi 2083, juxta textum Hebraicum et nostram Vulgatam ex illo conversam, 2324 juxta Samaritanum et 3549 secundum Græcum: atqui talis diversitas casui fortuito tribui non potest, ut ex lectione diversorum textuum patet: ergo Pentateuchus fuit adulteratus saltem in ea parte quoad substantiam, etc.

R. Toto concesso argumento, nihil adversum nos concludi potest; hæc quippe mutatio ut essentialis haberi non debet: in eo tantum consistit quod patriarchæ plus minusve vixerint antequam suum primogenitum haberent, et non impedit quin eadem sit doctrina, eadem sint miracula, eadem leges et cæremoniæ, eadem omnino personæ et genealogiæ: atqui talis mutatio reputari non debet essentialis; quinimo probat nullam factam esse mutationem essentialem; si enim essentialis aliqua facta esset mutatio, quoddam saltem illius remaneret vestigium: porro nullum talis mutationis existit vestigium, sed perfectissima inter diversos textus reperitur uniformitas quoad substantiam; ergo.

De hujusmodi chronologiæ discrepantia eodem modo judicavit Ecclesia. Licet enim in concilio Tridentino, sess. 4, tanquam veram et authenticam probaverit Vulgatam traductionem quæ textui Hebraico conformis est, commemorat tamen in Martyrologio, vigilia Nativitatis Domini, supputationem Septuaginta interpretum. Ergo.

Quo autem tempore, qua ratione, quo motivo, a quibus personis facta fuerit ista mutatio? Omnes eruditi fatentur has quæstiones insolubiles esse; existimat tamen *Duguet*, in Gen. t. 2, textum Hebraicum aliis textibus anteponendum esse, tum quia Ecclesia illum approbasse videtur, quando Vulgatam approbavit, tum quia est antiquior, tum quia in Synagoga et in vera Christi Ecclesia semper fuit in usu.

ARTICULUS TERTIUS.

DE VERITATE PENTATEUCHI.

Multum datur discrimen inter authenticitatem et veritatem alicujus libri. Liber enim potest esse authenticus et non verus; quia fieri potest ut scriptor sit deceptus vel deceptor, quod frequenter accidit. Itaque, authenticitate et integritate Pentateuchi demonstratis, nunc probandum est illum esse verum, id est, cuncta facta quæ in eo continentur vere contigisse. Inter facta quæ describit Moyses, alia ipsi erant coæva et alia respectu ipsius præterita. Facta prioris generis referuntur in Exodo, Levitico, Numeris et Deuteronomio; alia vero describuntur in Genesi. Nobis examinandum est 1° an vera sint facta quæ in quatuor posterioribus Pentateuchi libris narrantur; 2° an quæ in Genesi referuntur.

PROPOSITIO PRIMA.

Vera sunt facta quæ in quatuor posterioribus Pentateuchi libris describuntur.

Prob. Vera sunt enim hæc facta si Moyses non fuit deceptus nec deceptor: atqui utrumque certissimum est.

1° *Moyes non fuit deceptus.* Innumera enim Moyses describit facta publica, sensibus obvia, sibi personalia, quorum dicit se fuisse non solum testem oculatum, sed operatorem: at impossibile est illum fuisse deceptum circa talia facta; circa hujusmodi facta enim decipi non potuit quin fuerit plusquam fanaticus et extraordinaria correptus dementia: attamen, nedum fuerit fanaticus aut dementia correptus, patet ex ipsius scriptis, doctrina, legibus, etc. illum fuisse virum prudentem et sapientissimum, ut ipsi adversarii fatentur: ergo 1°.

2° *Non fuit deceptor.* Si enim fuisset deceptor et facta quæ narrat finxisset, vel Hebræi cum illo in faudem

conspirassent, vel solus omnes decepisset: atqui neutrum dici potest.

1° Dici non potest Hebræos in fraudem cum illo conspirasse; absurdum est enim supponere tot hominum millia simul conspirasse in fraudem sibi inutilem: atqui omnes Israelitæ simul conspirassent in fraudem sibi inutilem, imo sibi nocivam et odiosam; multa namque referuntur facta genti Hebrææ probrosa, ut vituli aurei adoratio, actus idololatriæ in deserto, murmurationes adversus Deum et Moysen, Moysis contra gentem objurcationes, etc.

Præterea, si Moyses et tota gens Hebræa simul in fraudem conspirassent, excogitassent facta antiquiora, obscura et vaga, non vero recentia, splendida, publica et circumstantibus gentibus tam nota ut fraus omnibus statim apparuisset. Ergo 1°.

2° Dici non potest solum Moysen fuisse impostorem et Hebræos decepisse. Nam 1°, secundum sanæ critices regulas, non licet sinceritatem alicujus scriptoris historici, sine rationibus positivis, in dubium revocare. 2° Ut impostor haberi non potest qui manifestos præ se fert sinceritatis characteres; atqui Moyses manifestos præ se fert sinceritatis characteres; in omnibus enim scriptis suis non æquivoca præbet signa probitatis et pietatis; doctrina ejus est sublimis, præcepta sancta, leges sapientes, quidquid operatur ad bonum gentis dirigitur, proprii commodi semper est immemor; filios suos absque ullo splendore in gente sua relinquit: atqui hæc manifesti sunt sinceritatis characteres. 3° Si Moyses decipere voluisset, incredibilia non excogitasset facta quorum unusquisque falsitatem primo intuitu conspexisset: in ea quippe hypothese, fingit aquas fluminis in sanguinem coram duabus gentibus versas esse, tenebras per plures dies integram cooperuisse regionem; mare divisum fuisse et totam gentem sicco pede inter aquas transiisse, manna per quadraginta annos e cælo pluisse, aquam e rupe percussa fluxisse, homines et jumenta bibisse, legem a Deo super montem Sinai inter tonitrua et fulgura solemniter datam

fuisse coram omni multitudine, et innumera ejusdem generis facta; impostor autem, vel minimo præditus iudicio, aliter contextas excogitaret fabulas. 4° Non semel Moyses splendidiora sua narrat miracula, sed continuo ea commemorat, exprobrat Hebræis quod sint duræ cervicis; aspere eos redarguit, transgressionem in specie levissimas pœna mortis plectit, multa hominum millia propter eorum rebellionem trucidat, etc. porro non ita se gerit impostor qui benevolentiam populi sibi conciliare intendit. 5° Impossibile fuisset Moysi suam gentem circa facta quæ narrat decipere; illa enim exhibet tanquam publica, præsentia et ante omnium oculos peracta, v. g. maris divisionem et multitudinis transgressum, columnam nubis et ignis, manna jugiter e cœlo decidens, vestes per quadraginta annos integre servatas, tonitrua et fulgura in monte Sinaï, etc. Tota gens Hebræa tam firma persuasione hæc admittit facta, ut sola eorum auctoritate patiatur jugum gravissimæ legis sibi imponi; tres solemnes instituuntur festivitates, quæ in summo honore semper fuerunt, Pascha in memoriam egressus populi ex Ægypto, Pentecostes propter legem datam in monte Sinaï, et Scenopegia seu festum Tabernaculorum, in commemorationem mansionis populi in deserto sub tentoriis. Arca in deserto ex jussu Moysis confecta, virga Aaron, tabulæ Legis, manna, serpens æneus cultu religioso tanquam pretiosa monumenta servabantur: verum si facta quæ Moyses narrat totidem essent mendacia, hæc universo populo suaderi non potuissent, *ut attendenti patebit*: ergo 2°, etc. aliunde, etc. Ergo.

Solvuntur objectiones.

Obj. 1°. Moyses Terram Promissam exhibet ut præ abundantia melle et lacte fluentem: atqui constat illam esse aridam et sterilem: ergo.

R. Nego min. Multi enim viatores testantur regionem illam esse situ delectabilem et sua natura feracissimam; inconcussis autem argumentis constat illam fuisse olim

omnis generis fructibus abundantissimam; solo igitur defectu culturæ facta est sterilis, sicut Græcia et multæ regiones Africæ. Ergo. Vide quatuor dissertationes D. Guénée, circa fertilitatem Palæstinæ, in ultimis vol. operis dicti, *Mémoires de l'académie des inscriptions*, et ad calcem sui operis *Lettres de quelques Juifs*, etc.

Obj. 2º. Narrat Moyses Israelitas vitulum aureum fusibilem in deserto fecisse: at incredibile est Israelitas sufficiens habuisse aurum in deserto, necessaria possedissee instrumenta, et artem satis percaluisse, ut talem conficerent vitulum: ergo.

R. Nego min. 1º Sufficiens aurum facile haberi potuit, cum in aures aureas uxorum suarum, filiorum et filiarum obtulerint Israelitæ, Exod. xxxii, 3; 2º forte ille vitulus modicæ erat molis; 3º forte accurate et eleganter non fuit elaboratus; 4º per unam aut per duas hebdomadas operi illi vacare potuerunt Israelitæ; incredibile autem non videtur inter tantam hominum multitudinem inventos fuisse nonnullos qui tale opus sic perficere potuerint; nihil enim facilius est, secundum communes chimiæ regulas, quam aurum liquefacere; ars vero liquefaciendi metalla, et diversa ex illis faciendi opera, notissima erat in Ægypto. Non mirum ergo si Israelitæ artem illam sufficienter percaluerint ut conflatilem vitulum facerent. Pari ratione facile concipitur Moysen potuisse eundem vitulum in pulverem redigere, cum aqua miscere, et bibendum Israelitis porrigere. Vide *Lettres de quelques Juifs*, t. 1.

Obj. 3º. Frequenter Israelitæ adversus Deum et Moysen murmuraverunt, et in idololatriam prolapsi sunt: atqui Deum et ipsius cultum non ita deseruissent, si ea vidissent miracula quæ a Moyse referuntur: ergo.

R. Nego min. Nam, quidquid dicatur, certum est Israelitas legem Mosaicam admisisse et tenuisse tanquam divinam, licet graviter sibi onerosam et cupiditatum coercitivam: at nunquam illam sic admisissent, nec tanto zelo tenuissent, si miraculis a Moyse relatis non credidissent.

Illorum vero murmurationes et idololatriæ sunt actus inconsequentiae, sicut multos quotidie inter nos videmus. Quot enim Christiani pœnarum æternitatem unico debitam esse peccato firmiter credunt, et in innumera tamen prolabantur scelera ! eadem facilitate in idololatriam prolabi potuerunt Israelitæ ; nam ingenii eorum crassitudo, cæterarum gentium exempla, comessationes aliæque sensuum voluptates, quæ inseparabiles erant idololatriæ comites, tam fortiter eos in actus idololatriæ alliciebant quam consuetæ cupiditates inducunt Christianos in peccatum. Ergo.

Obj. 4º. Facta quæ narrat Moyses tanta sunt et tam splendida, ut a vicinis nationibus ignorari non potuissent, et a scriptoribus profanis referri debuissent : attamen nihil de illis dicunt scriptores profani : ergo.

R. 1º. Nego maj. Nam 1º scriptores profani etiam antiquiores multo sunt Moyse posteriores, ut postea dicemus ; facta igitur a Moyse relata, quamvis splendida, ignorare potuerunt, aut saltem nonnisi confuse et obscure ea cognoscere debuerunt ; si enim abhinc 600 aut 1000 annis quædam facta etiam lucidissima apud aliquam gentem nobis vicinam contigissent, et nihil de iis scriptum fuisset, quid circa illa nunc sciremus ? fere nihil præter quasdam forte eorum notiones vagas, confusas et incertas : porro sic erant ad minus scriptores profani respectu factorum a Moyse scriptorum ; nihil de illis cognoscere poterant, nisi per quasdam traditiones vagas, confusas et valde incertas, tum propter longiorem distantiam, tum quia Judæi nullum habere volebant commercium cum gentilibus, tum quia lingua Hebraica cæteris gentibus erat ignota, et 300 annis tantum ante Christum libri Moysis fuerunt a Septuaginta interpretibus in linguam Græcam translati. Ergo.

R. 2º. Nego min. Mentionem enim fecit Sanchoniaton de creatione mundi, Callimachus de homine ex luto facto, Berosus de diluvio, Artapanus de traiectione maris Rubri, Herodotus de præcipuis eventibus qui in Genesi describuntur ; horum testimonia unusquisque videre potest

apud Grotium, De vera religione, et in toto opere citato *Guérin du Rocher*. Ergo.

Præterea positivæ probationes non impugnantur per rationes negativas : atqui veritas historiæ Moysis positivis et firmis nititur argumentis ; rationes autem ex silentio auctorum paganorum deductæ sunt tantum negativæ : nihil ergo probant. Si enim hæc argumentandi methodus valeret, multæ historiæ, de quarum veritate nemo dubitat, rejiciendæ essent, v. g. victoriæ Julii Cæsaris in Gallia ; siquidem illarum testes habemus tantum ipsum Cæsarem et paucos ejusdem gentis scriptores, nec ulli proferuntur libri veterum Druidum, qui tamen de illis silere non debuissent. Ergo.

Manethos, Trogus Pompeius, Justinus et Tacitus referunt Israelitas ex Ægypto propter scabiem et lepram fuisse ejectos ; addit Tacitus, Hist. l. 1, 2, 3 et 4, fontem in rupe ab iisdem Israelitis sitientibus fuisse detectum, unde Moyses totum populum recreavit. Hæc iterum nihil aliud esse videntur quam mera historiæ Moyses corruptio ; illius saltem auctoritatem labefactare non possunt. Nam 1º illi scriptores Moyse sunt recentiores ; 2º nulla assignant monumenta ; 3º multa referunt absurda, v. g. Tacitum non pudet asserere caput asini religioso cultu in templo Hierosolymitano servari propter fontem aquæ repertum ; 4º absurdum est totum Israeliticum populum scabie et lepra fuisse corruptum, alioquin tot leges non fuissent institutæ ad distinguendum eos qui tali genere morbi laborabant.

Obj. 5º. Si prodigia quæ narrantur in Exodo essent divina, Pharao eis non restitisset. Ergo.

R. Nego ant. Nam 1º sæpe veritati cognitæ reluctatur, quando cupiditatibus est adversa : atqui prodigia quæ narrantur in Exodo cupiditatibus Pharaonis erant adversa. 2º Ea admittere potuit ut certa, et eorum consequentias negare, illa videlicet tribuendo magiæ. 3º Non semper illis restitit ; ex historia enim Moysis pluries fidem illis adhibuit, et tandem, evidentia rei omnino victus, populum Israeliticum dimisit : ipsa ergo Pharaonis resi-

stentia demonstrat prædicta prodigia fuisse divina. Ergo.

Inst. 1º. Si mare in duas partes divisum fuisset, Ægyptii hoc miraculo perterriti, a persequendis Hebræis temperassent. Ergo.

R. Nego ant. Nam 1º Pharaon magis ac magis induratus, tam huic miraculo resistere potuit quam præcedentibus quæ in Ægypto patrata erant. 2º Columna luminis ex parte Hebræorum, erat nubis ex parte Ægyptiorum: hoc posito, facile concipitur quomodo Ægyptii, ira inflammati, persecuti fuerint Hebræos, etiam inter fluctus maris hinc et inde pendentes; illos propter noctis et columnæ nubis tenebras non videbant: unde, quando audierunt Deum e columna nubis tonantem, et senserunt aquas in se ruentes, stupefacti exclamaverunt, Exod. xiv, 25: *Fugiamus Israel: Dominus enim pugnat pro eis contra nos*: ergo hucusque miraculum non viderant.

Inst. 2º. Ipse Josephus, lib. 2 de Antiq. c. 7, dubitare videtur an transitus maris Rubri fuerit supernaturalis, an mere naturalis. Ergo.

R. 1º. Quicumque integrum Josephi textum legerit, clare percipiet illum de veritate miraculi non dubitasse. 2º Etiam si de illa veritate dubitasset, nihil inde sequeretur; apud omnes enim constat illum non semel ex humana prudentia suam dissimulasse fidem, ne Vespasiano et aliis magnatibus Romanis displiceret. Eo usque devenit ut inter leges Moysis hanc a se confictam inseruerit: *Nemo blasphemet deos quos aliæ civitates deos æstimant*: ipsius ergo testimonium contra testimonium Moysis prævalere non posset.

Obj. 6º. Moyses, qui fuit eruditus in omni sapientia Ægyptiorum, solertia erat præditus, et forte magnus fuit incantator: porro non repugnat talem hominem Hebræis per diabolica prodigia illusisse, vel per fraudes callide structas decepis: ergo.

R. 1º. Nego maj. Narratio quippe Moysis omnes præ se fert characteres gravitatis, ingenuitatis et omnimodæ sinceritatis, adeo ut nullus scriptor humanus majorem vel etiam æqualem mereatur fidem.

R. 2º. Nego. min. Etiam si admitteremus hypothese[m] nobis objectam, quæ repugnat, quisquis Pentateuchum attente legens, sibi persuadere non posset illum ab impostore fuisse scriptum. Quis enim impostor, quantumvis solers, vel diabolica potestate præditus supponatur, posset efficere vel simulare tanta prodigia, sensibilia, obvia, publica, sæpius iterata, ab ingenti multitudine visa, observata, firmiter credita, multiplicatis solemnibus monumentis ad posteros transmissa? Certe tale insanie exemplum, vel potius tale portentum, omnium prodigiorum esset maximum. Ergo.

PROPOSITIO SECUNDA.

Vera sunt facta quæ in Genesi narrantur.

Prob. Illa historia vera est cujus scriptor non fuit deceptus nec voluit decipere, et quæ insuper confirmatur notis veracitatis et populorum traditionibus: atqui talia sunt facta in Genesi narrata.

1º *Scriptor*, id est Moyses, non fuit deceptus. Nulla est difficultas circa facta Abrahamo posteriora, quia gens Hebræa in duodecim tribus divisa, secundum numerum filiorum Jacob, historiam avorum suorum in duodecim lineis parallelis conservabat; sic eam Moyses facile cognoscere potuit: sola igitur quæstio est an Moyses certe cognoscere potuerit facta quæ narrat ab origine mundi usque ad vocationem Abrahamæ: atqui hæc facta certo cognoscere potuit; plurimæ enim sunt viæ quibus illorum veritas ad ipsum certo pervenire potuerit, scilicet traditio oralis, cantica, scriptura, monumenta et revelatio.

1º *Traditio oralis.* Quamvis enim a creatione usque ad Moysen 2513 numerentur anni, paucae tamen interfuerunt generationes, ob longissimam primorum hominum vitam: fere trecentis annis vixit Adam cum Mathusala, Mathusala sexcentis annis cum Noe, Sem vidit Isaac, Isaac Levi, et Levi diu vixit cum Amram patre Moysis; sic quinque aut sex ad summum reperiuntur generationes

ab Adam usque ad Moysen : veritas autem factorum quæ narrat Moyses , per generationes istas facile transmitti potuit integra ; nam historia primævi illius temporis est brevissima , et quædam tantum graviora continet facta : porro graviora hæc facta per solam traditionem oralem certo cognosci potuerunt ; patres enim diutissime cum filiis vivebant , laboribus parum incumbabant , sed ordinarie greges pascebant , artes nondum erant inventæ , nullæ aliæ existebant historiæ : continuo igitur de factis ad prædecessores pertinentibus , de mundi creatione , de diluvio , et præsertim de genealogiis loqui debebant. Ergo 1°.

2° Moyses potuit cognoscere facta quæ narrat per quædam *cantica* usu recepta ; apud omnes gentes enim mos ab initio fuit , ut communiter tenetur , carmina et cantica componere quibus celebriores eventus passim decantarentur et memoriæ commendarentur : atqui mos ille apud primævos homines , aut saltem ante Moysen existere debuit , siquidem Moyses pluribus in locis illum supponit , v. g. Gen. xxxi , 27 , Deuteron. xxxi , 19 et 21. Ergo 2°.

3° Certum est artem aliquo modo *scribendi* tempore Moysis exstitisse , sed non constat quando illa fuit inventa ; a multo tempore forte jam existebat : non repugnat ergo Moysen quædam saltem facta per scripturam cognovisse. Ergo 3°.

4° Ea cognoscere potuit per publica quæ tunc existebant *monumenta* ; in memoriam enim factorum alicujus momenti solebant hujus temporis homines altare ædificare , puteos fodere , lapides erigere , etc. ut legitur de Jacob , Isaac , Abraham , Noe , etc. sola præsentia hujusmodi monumentorum ea testabatur facta ob quæ fuerant erecta , *ut patet*. Ergo 4°.

5° Illa denique per *revelationem* ~~certo~~ cognoscere potuit ; ex prima enim propositione constat vera esse splendida quæ in Exodo referuntur miracula : porro ex illis patet Moysen mirabile cum Deo habuisse commercium : impie ergo diceretur illum cognoscere non potuisse facta

quæ narrat circa mundi originem , et usque ad Abrahæ vocationem : ergo 5°, etc. aliunde, etc. insuper, etc. Ergo 1° Moyses non fuit deceptus.

2° *Noluit decipere.* Nam 1° Moysi tribuere non licet propositum a notissima ipsius indole alienum : attamen, in hypothesi adversariorum , tribueretur Moysi propositum , etc. In quatuor enim posterioribus Pentateuchi libris manifestos atque innumeros exhibet sinceritatis characteres. Ergo. 2° Juxta adversarios , Moyses solertissimus fuisset impostor : at solertissimus impostor non ita excoGITasset facta quæ narrantur in Genesi , ut vocationem Abrahæ præcedentia ; aut ea omisisset ; aut ea referendo, nomina propria , epochas , genealogias prudenter tacuisset , et generalioribus verbis usus esset , ne arma contra se subministraret. 3° Indubiis signis ostendit Deum sibi frequenter loqui : repugnat autem Deum mendacia impostori cœlestibus signis confirmare. Ergo 2° Moyses noluit decipere.

3° *Historia Moysis notis veracitatis confirmatur.* Etenim circa originem mundi informia quædam nobis exhibet initia potentissimorum imperiorum quæ postea exstiterunt : vix Abraham ingressus est Ægyptum , et de adventu novi hospitis rex admonetur ; idem legitur de Abimelech Gerarum rege : in Palæstina tot erant reges quot urbes ; quinque ex eis devincit et in fugam vertit Abraham cum 318 vernaculis. Simples tunc fuisse omnium mores mirabiliter narrat idem Moyses ; opes locupletissimorum hominum ipsorumque regum repræsentat in numero servorum et armentorum ; juxta ipsius narrationem , patresfamilias , uxores , filii et filiæ quæcumque officia per seipsos implebant , greges ducebant , custodiebant , ad-aquabant , hospites benigne suscipiebant , aquam ad lavandos pedes eis præbebant , ipsa familiæ domina cibos parabat. Victus autem erat simplex et naturalis , in lacte , butyro , ovibus , hædis , vitulis et panibus subcineritiis , consistebat , etiam quando honoratiores hospitio excipiebantur viri. Nulla fit mentio artium , scientiarum , legislationis , quales esse debuissent apud populos a

multis sæculis jam existentes : porro hujusmodi narrationes apprime congruunt infantiae mundi. Sic Homerus, 600 annis post Moysen scribens, mores et usus suae ætatis depinxit, et libenter agnoscunt deistæ ipsius narrationem esse veram. Ergo 3°.

4° Hæc Moysis historia *traditionibus populorum confirmatur*. Ubique enim videmus plus minusve distincte chaos immensum, terram aquis involutam, spiritum Dei cuncta vivificantem, tenebras luce priores, hominem ex luto formatum, ipsius innocentiam, deinde ejusdem lapsum : hinc poetæ auream finxerunt ætatem, postea ferream. Varii Indiæ populi nomen et historiam Adami, Evæ, arboris, serpentis, etc. servarunt. Deprehenduntur vestigia longævæ patriarcharum ætatis in historiis, quæ testantur primos homines mille circiter vixisse annis, turris Babel in historiâ gigantum qui bellum cælo inferre voluerunt, et aliorum Genesis factorum in mythologiæ deliriis, ut fuse exponit *Guérin du Rocher*, in opere cui titulus : *Histoire véritable des temps fabuleux*. Multa variorum populorum testimonia et monumenta legi possunt apud Grotium, t. 1, c. 16. Ergo 4°, etc. aliunde, etc. insuper, etc. Ergo.

Solvuntur objectiones.

Obj. 1°. Auctores profani multa referunt facta publica et magni momenti, quæ nullam merentur fidem, v. g. bellum inter Jovem et Titanos, diluvium Deucalionis et novam formationem virorum ac mulierum ex projectione lapidum, aurei velleris ablationem, etc. Ergo.

Notandum, antiquiores profanos scriptores multo recentiores esse Moyse. Homerus, v. g. qui ut antiquissimus exhibetur, 600 annis post Moysen, et 300 circiter post captam Trojam scripsit : multo igitur difficilius quam Moyses facta priorum temporum cognoscere potuerunt.

R. Nego conseq. Sæpe enim facta quæ narrant sunt absurda ; aliunde epochas non determinant, circumstan-

tias non describunt, seriem continuatam et accuratam non exhibent, nullos denique sinceritatis characteres præ se ferunt; ordinarie sunt poetæ, qui nihil aliud quærere videntur nisi ut per delectabiles fictiones versibus adornatas sensus demulceant et hominibus placeant. Insuper plures auctores sat probabiliter ostendunt plerasque paganorum fabulas aliquod habere fundamentum in factis a Moyse relatis, ac proinde illa confirmare : v. g. historia diluvii Deucalionis quamdam supponit ideam diluvii universalis; fabula gigantum qui cælum ascendere volunt, est ipsa turris Babel traditio, etc. Ergo. Vide *Huet, Démonst. évang.*

Inst. 1º. Ideo profani auctores nullam merentur fidem quoad prima tempora, quia multa referunt facta absurda vel impossibilia : atqui Moyses multa etiam hujusmodi refert facta in Genesi : ergo.

R. Nego min. et dico, nullum ex iis factis quæ narrat Moyses in Genesi absurdum esse, nullumque demonstrari impossibile. Ergo.

Inst. 2º. Narrat Moyses, Gen. vi et vii, Noe ingentem fecisse arcam, et in eam duo saltem cujusque speciei animalia sive terrestria sive cœlestia coadunasse : at incredibile est Noe tale opus fabricare potuisse; impossibile tot animalia diversa, cum pabulis necessariis, in arca, quâlis describitur, simul inclusa fuisse : quomodo Noe omnia, fera et mansueta, quadrupedia, reptilia et volatilia, undique accersisset? quomodo ea in arcam introduxisset et nutritisset? Ergo.

Nego min. quoad omnes partes. 1º Quidquid blasphemans et irridendo, juxta morem suum, dicat *Voltaire, Dict. philos. art. Déluge*, certum est Noe arcam a Moyse descriptam fabricare potuisse; centum enim habuit annos ad opus illud perficiendum : absurde autem diceretur ipsi defuisse aut materias convenientes aut operarios necessarios, aut instrumenta requisita; a multo enim jam tempore Tubalcain *faber fuerat in cuncta opera æris et ferri*, Gen. iv, 22; ædificabantur domus et civitates, ibidem, 17. Non minus absurde contenderetur Noe

ignorare debuisse regulas stupendam illam conficiendi machinam; ex hypothese enim quod eas non calluisset, propria industria illas forte invenire aut ab ipso Deo immediate accipere potuisset. Ergo.

2° Certum est pariter arcam, prout in capite vi Genesis describitur, cuncta animalia cum pabulis et nutrimentis necessariis continere potuisse. Habebat enim 300 cubitos seu 500 pedes longitudinis (cubitus namque Ægyptius, quo probabiliter utebatur Moyses, erat 20 pollicium), 50 cubitos seu 83 pedes latitudinis, et 30 cubitos seu 50 pedes altitudinis: porro immensa hæc capacitas divisa per quatuor ordines (*étages*), abunde sufficere debuit ad continenda animalia, et quidquid in arca includi debuit. In primo enim ordine, id est, in carena, poterat esse aqua sufficiens ad annum; in secundo, cuncta pabula ad omnia animantia; in tertio, omnia animalia terrestria: nam ad 150 circiter primigenas species reducuntur; ut autem contineatur par 150 specierum, quarum paucae sunt ingentes, abunde sufficiunt 500 pedes longitudinis cum 83 pedibus latitudinis: supponamus in medio, per totam longitudinem, spatium 15 pedum vacuum, 34 pedes adhuc remanebant in utroque latere spatium: illud poterat adhuc per totam longitudinem in duas partes separari, quarum unaquæque 10 pedes latitudinis habuisset, et 14 pedes superfuissent vacui in medio; sic quatuor exstitissent longitudines 500 pedum cum 10 pedibus latitudinis: si 500 per 6 dividantur, 83 habebuntur mansiunculæ seu stabula 6 pedum ex una parte et 10 ex altera: 83 autem per 4 multiplicata dabunt 332 hujusmodi stabula, certe multo vastiora pro plerisque bestiarum speciebus: duo vel tria coadunari potuerunt pro majoribus speciebus, v. g. pro elephantis, camelis, etc. in quarto ordine facillime collocari potuerunt aves et volatilia. Noe ergo plurima sibi suæque familiæ construere potuit cubacula, et spatium non deerat. Vide D. Calmet, *Dissert. sur l'arche de Noé*; Bergier, t. 5, præsertim Duclot, t. 2, et Eugène de Genoude, t. 1^{er}.

Thévenard, vice-amiral, in commentariis quæ tempore

reipublicæ Gallicanæ scripsit, 4 vol. in-8°, speciebus animalium enumeratis, eorum pabulis æstimatis ac ponderatis, demonstrat arcam a Noe descriptam omnia hæc facile continere potuisse. (*Tribune catholique du 1^{er} mai 1833.*)

3° Deus, qui omnium est dominus, facillime subministrare potuit Noe media adducendi et in arcam introducendi cuncta animalia quæ in illa conservanda erant. Ergo.

Multa reperta sunt ossa fossilia quæ ad species animalium cognitæ non pertinent : inde forte concludendum est plurimas species, Deo ita volente, penitus extinctas fuisse, quamvis causas et rationes talis destructionis ignoremus. Sed nihil inde contra nos inferri potest, cum spatium in arca non defuerit.

Inst. 3°. Refert Moyses, Gen. vii, diluvium universam cooperuisse terram, ita ut aquæ 15 cubitis super altiores elevarentur montes : atqui tale diluvium omnino impossibile erat; unde enim venissent aquæ sufficientes? quo recessissent? Ergo.

R. Nego min. Deus enim exhibetur in Genesi tanquam hujus diluvii causa immediate efficiens : at dici non potest tale diluvium Deo fuisse impossibile; ex hypothesi enim quod aquæ existentes non suffecissent, alias in quantitate quæ sibi placuisset creare, et postea annihilare, vel in novos abyssus præcipitare potuisset.

Sed ad novam creationem recurrere non necesse est; nam altiores qui noscuntur montes 3,000 sexpedis circiter supra faciem maris elevantur : at in solo aere plus est aquæ quam necesse est ad producendam hanc altitudinem aquarum super faciem terræ. *Bernardin de Saint-Pierre, Études de la nature*, asserit solas glacies et nives, quæ plures cooperiunt longas montium catenas, et immensas sub duobus polis jacentes plagas, bene sufficientes fore, si resolverentur in aquam, ad immergendam universam terram : unica borealis aurora, ex observationibus *D. de Mairan*, superabundanter sufficeret ut altissimi penitus immergerentur montes : quid foret ergo

si adjicerentur omnes aquæ in sinu maris contentæ, et in visceribus terræ delitescences? Nemo inficiabitur Deum unico actu voluntatis aquas undequaque magno impetu sic coadunare potuisse, et revera, juxta narrationem Moysis, sic fecit : nam, *Rupti sunt omnes fontes abyssi magnæ, et cataractæ cœli apertæ sunt*, Gen. vii, 11. Ergo dici non potest sufficientes non exstitisse aquas ad diluvium generale, quale Moyses illud describit.

Præterea, sola ratione constat diluvium, prout describitur in Genesi, admittendum esse; multa quippe sunt phænomena quæ absque diluvii suppositione intelligi nequeunt, et, admissio diluvio, facile explicantur : v. g. super montes altissimos et in visceribus terræ reperiuntur conchæ et exuviæ piscium qui in mari tantum vivunt; arbores, plantæ et multa animalium corpora in lapides conversa, *pétrifiés*, existunt inter rupes durissimas, ardorias et metalla etiam in profundo terræ, et in regionibus in quibus tales arbores et plantæ non inveniuntur, et ubi ejus generis animalia vivere nequeunt, ut dentes et ossa elephantum in Siberia : atqui hæc aliaque permulta, si diluvium non admittatur, intelligi non possunt; increduli enim nostri temporis, quamvis toti jugiter fuerint ut naturales scientias addicerent, frustra insudarunt ut, diluvio rejecto, hæc phænomena naturaliter explicarent. Secretarius academici dictæ *l'Institut* aiebat anno 1806, in ipsamet Academia : « Que le nombre des systèmes de » géologie s'est tellement augmenté, qu'il y en a aujourd'hui plus de quatre-vingts. » Omnia illa systemata sunt vaga, incompleta, obscura, incertis principiis innixa, sæpe absurda et semper sibi contradictoria; quod videre est apud D. Cuvier, *Discours sur les révolutions du globe*.

Contra vero, admissio diluvio, hæc naturæ phænomena facile explicantur. Si enim simplex torrens qui abundanti pluvia subito inflatur, arbores eradicet, domos evertat, ingentes aggeres secum trahat, lapides volvat, etc. quid accidere debuit tempore diluvii? Fontes magnæ abyssi erant dirupti, cataractæ cœli apertæ, incomprehensibilis pluvia ex ira Omnipotentis divinitus immissa,

horribiliter per quadraginta dies et quadraginta noctes in terram ruebat, ubique et subito crescebant aquæ, præcipientes e montibus in valles fluebant, e vallibus in torrentes, in rivos et in flumina; omnia debebant eradicare, destruere, evertere et secum trahere. Super altissimos elevatæ montes, per centum et quinquaginta dies non imminutæ sunt; vento agitatæ ibant et redibant; profunde terram sulcare debuerunt, arbores et plantas, hominum et animalium corpora volverunt, versus omnes plagas disperserunt, promiscue cum luto, glarea aliisque materiis infoderunt: in omni parte globi terrestris diversas materias sic congesserunt, modo per ordinem et alias super alias, modo sine ordine et promiscuas. Hinc tot varietates quas geologi quotidie observant in sinu terræ. Item cum nulla tunc existerent littora maris, cujuslibet generis pisces super terram ierunt, sicque exuvias et conchas passim relinquere debuerunt: ergo admissio diluvio, multa terræ phænomena facile explicantur, quæ aliter explicari non possent. Unde multi viri, superstitionis minime accusati et in geologia versatissimi, arbitrantur diluvium a Moyse descriptum, licet rationi impervium, ut certissimum admittendum esse. Sic inter alios Pallas in opusculo de Formatione montium, *de Lignac, Lettre à un Américain*; sagacissimus Deluc, Genevensis, *Lettres physiques et morales sur l'histoire de la terre et de l'homme*, etc. Vide Bergier, t. 5, *Dictionnaire philosophique*, art. *Déluge*; *Bible vengée*; de Genoude, t. 1^{er}, etc.

Insuper, omnes philosophi et geologi nunc fatentur universam terræ superficiem sub aquis, a sæculis non multis, fuisse involutam: atqui factum istud explicari non potest nisi per diluvium universale. Vel enim per diluvium explicandum est, vel per insensibilem motum maris ab oriente ad occidentem, ut multi voluerunt: at dici non potest mare lento gradu ab oriente ad occidentem gradiens, universam terræ superficiem cooperuisse; nam, in ea suppositione, infinita jam elapsa essent sæcula ex quo globus terrestris ab hominibus est habitatus: porro

illud admitti non potest; quia 1^o historia Moysis fide dignissima contrarium expresse continet, et, ob meram hypothesim, in dubium revocari non potest; 2^o omnes artes, gubernia populorum eorumque annales et monumenta manifesta exhibent novitatis signa; 3^o apud omnes populos constans traditio testatur ingentem catastrophem terram universam per aquas turbasse et genus humanum pene extinxisse: hinc opinio diluvii Deucalionis apud Græcos. Apollodorus loquitur de arca; Plutarchus, de columbis ex arca missis ad videndum an aquæ decrescerent; Lucianus, de animantibus in arca inclusis, etc. Vestigia magnæ hujusmodi inundationis reperiuntur in monumentis Chaldæorum, Ægyptiorum, Sinensium, Indorum, Americorum: arca, cujus ope reliquæ generis humani salvæ factæ sunt, in grandi veneratione semper habita est in Oriente, præsertim in Armenia, ubi, effluentibus aquis, fixa remansit. Vide opus citatum D. *Cuvier*. 4^o Suppositus maris ab oriente in occidentem motus experientiæ est contrarius; terra enim incredibili velocitate ab occidente ad orientem volvitur, et atmosphæra simul cum illa rapitur: at impossibile est aquam maris, inter aerem et terram positam, utraque mole pressam, oppositam sequi directionem.

Præterea, si globus in aqua leviter immersus velociter volvatur, tunc aqua secundum lineam tangentem erumpit, sed eandem sequitur directionem: unde, nisi aqua maris aere premeretur, forte erumperet, etiam lineam tangentem sequendo versus orientem.

Aliunde, in littoribus maris a multis sæculis cognitis, nulla deprehenduntur signa quibus judicari possit mare orientales plagas deserere et occidentales invadere; nonnullas quidem hic aut illic tam in occidente quam in oriente deseruit, sed ideo quia fluctus areas, glareas, aliasve materias illuc jecerunt et deposuerunt, ut videre est in portu Foro juliensi et in pluribus aliis; mare enim ab illis sat longe discessit: at nemo vel minimam illius immi-nutionem deprehendere potuit secus littora Provinciæ, Britannix, etc. ergo motus ille maris ab oriente in occi-

dentem est chimericus, et diluvium universale necessario admittendum est.

Etenim peritiores in rebus physicis et naturalibus viri nunc dicunt actualem superficiem terræ constructionem referendam esse ad epocham non longe distantem, et ad causam unicam, generalem, uniformem, violentam et subitam. Sic inter alios, *Deluc*, jam citatus; *André, de l'institut des sciences et des mathématiques* (*Moniteur des* 30 et 31 décembre 1806); *Dolomieu* et *Cuvier*, qui sic se habet in opere jam citato, p. mihi 282 :

« Je pense donc, avec MM. Deluc et Dolomieu, que ,
 » s'il y a quelque chose de constant en géologie, c'est que
 » la surface de notre globe a été victime d'une grande et
 » subite révolution, dont la date ne peut remonter beau-
 » coup au-delà de cinq ou six mille ans; que cette révolu-
 » tion a enfoncé et fait disparaître les pays qu'habitaient
 » auparavant les hommes et les espèces des animaux
 » aujourd'hui les plus connus ; qu'elle a , au contraire,
 » mis à sec le fond de la dernière mer, et en a formé
 » les pays aujourd'hui habités; que c'est depuis cette
 » révolution que le petit nombre des individus épargnés
 » par elle se sont répandus et propagés sur les terrains
 » nouvellement mis à sec, et, par conséquent, que c'est
 » depuis cette époque seulement que nos sociétés ont
 » repris une marche progressive, qu'elles ont formé des
 » établissemens, relevé des monumens, recueilli des faits
 » naturels, et combiné des systèmes scientifiques. »

Inst. 4^o. Ex novis geologiæ observationibus constat multas reperiri in sinu terræ moles arenarum, ardosiarum, marmoreorum aliorumque lapidum quæ nonnisi per infinita sæcula formari potuerunt : ergo Moyses verum non dicit quoad mundi originem.

R. Nego conseq. Sicut enim Deus creavit hominem adultum fecitque arbores grandes et fructus jam ferentes, ita, creando terram, formare potuit in illa lapides, rupes, metalla aliasque varias aut præcipuas substantias quæ in ea reperiuntur : frustra igitur vanæ instruuntur hypotheses, ut omnia secundum arbitraria principia,

vel secundum leges physicas nunc consuetas explicari queant.

Inst. 5°. Ex iteratis hodiernorum geologorum observationibus, multa nunc habenda sunt ut certa, quæ per diluvium explicari non possunt; v. g. constat immensas rupes, quæ ut substantiæ primitivæ merito habentur, in statu fusionis olim exstitisse, et nonnisi intra multa sæcula ad soliditatem actualem pervenire potuisse; multa reperiuntur fossilia, ubique sparsa, diversis modis in visceribus terræ posita, quæ longe ante diluvium a Moyse descriptum infossa fuerunt, quæque supponunt terram pluries graviter fuisse cominotam: porro hæc cum narratione Moysis conciliari non possunt. Ergo.

R. 1°. Etiam si facta quæ nobis obijciuntur per causas naturales nobis cognitæ explicari non possent, non ideo narratio Moysis rejicienda esset, sed potius inculpanda foret nostra temeritas quæ omnia præscrutari intendit, et audacter pronuntiat res sic aut sic esse, et aliter esse non posse. Cum veritas Pentateuchi solidis rationibus fulciatur, ipsius auctoritas rejici non debet propter mera etiam peritorum systemata: verumtamen nonnisi mera systemata narrationi Moysis opponuntur, et eorum inventores sibi consentire nequeunt; multa inter eos manent obscura et incerta: quod unus astruit, alter reformat; innumeræ jam excogitatæ sunt hypotheses sese pugnantes, et sicut hodierni geologi antecessores suos sugillant, ipsi forte postea sugillabuntur. Quis ergo sanæ mentis eorum conjecturas historiæ Geneseos fidenter opponere vellet?

R. 2°. *Nego min.* Nam 1° impossibile est determinare quid diluvium operari debuerit, quid ante diluvium fieri potuerit, quid Deus creando mundum fecerit, quid causæ naturales produxerint, etc.: hæc tamen determinanda forent, ut prudenter assereretur ea cum narratione Moysis conciliari non posse.

2°. Supponamus cum plerisque nunc exstantibus geologis terram longe ante creationem Adami exstitisse et plures jam subiisse violentas catastrophes ante diluvium

a Moyse descriptum, certe nihil inde sequitur nobis adversum : nihil quippe vetat quin per dies creationis quædam intelligantur epochæ plus minusve longæ, cum sol diem et noctem distribuens ante diem quartum non exstiterit, juxta Genesis narrationem : quinto die producta sunt reptilia, volatilia, cete grandia et omnis anima vivens et in aqua motabilis; deinde bestię terræ, et tandem homo qui super omnem creationem dominaretur. His ita positis ut in Genesi per ordinem descriptis, concedere possumus hodiernis geologis 1° terram longe ante creationem hominis exstitisse; 2° in fusione primitus fuisse; 3° aquis fuisse coopertam; 4° aquas ab aquis fuisse divisas, aridam apparuisse et maria fuisse formata; 5° herbas virentes et plantas exstitisse; 6° reptilia, volatilia, pisces et conchas omnis generis ex aquis divina Creatoris actione prodiisse; 7° globum sic formatum et habitatum vi interna nobis ignota vehementer fuisse commotum, montes e profundo maris elevatas, aquas maris versus alia loca pulsas, nova constituisse maria, novas relinquendo plagas; 8° bestias terræ fuisse creatas, et varias terræ partes per alias commotiones graviter fuisse turbatas. Hinc facile explicabitur cur in sinu terræ, sub diversis materiæ specieb, reperiantur fossilia concharum, piscium, reptilium, vegetalium, bestiarum, et plurium specierum nunc in terra et in mari non exstantium, inter quæ nulla sunt vestigia humana, videlicet neque ossa, neque ulla humanæ industriæ objecta.

Chronologia mundi a Moyse descripta incipit a creatione hominis : sufficit ergo ut novorum geologorum inventa huic chronologiæ non contradicant : porro ei non contradicunt, ex notatis, sed potius narrationi Moysis concordant, optimeque demonstrant eum a Deo fuisse instructum, alioquin mundi originem tam profunde et accurate sic describere non potuisset. Ergo, etc.

Inst. 6°. Plures observationes astronomiæ et supputationes probant scientiam siderum esse diluvio anteriorem : atqui hæc scientia sic acquiri non potuit nisi per infinita sæcula : ergo, etc.

R. Nego maj. Ex multis observationibus constat quidem scientiam astronomiæ antiquissimam esse respectu aliarum scientiarum, et illud facile concipitur : nam primi homines, etiam diu post diluvium, erant pastores vel agricolæ, ut videre est non solum in Genesi, sed in Homero et aliis remotis auctoribus : at pastores et agricolæ, præsertim in regionibus valde temperatis, ubi aspectus cœli diu noctuque semper est delectabilis, continuo sidera aspicere debuerunt, eorumque motus considerare, computare et prævidere ; hæc igitur scientia ante alias scientias inveniri et perfici debuit : ex Chaldæa transiit ad Ægyptios, ex Ægyptiis ad Græcos, et ex Græcis ad Romanos cæterosque populos. Sed nullis rationibus solidis probatur hanc scientiam esse diluvio anteriorem, aut a diluvio sic perfici non potuisse ; multa enim effluxerunt sæcula a diluvio usque ad tempus quo primæ hujusmodi observationes fuerunt scriptæ. Quis affirmare poterit, per illa sæcula multas alias observationes minus perfectas non præcessisse, et ab omnibus eruditis perducere non potuisse ad hanc perfectionem quam demiramur ? Præterea, ante diluvium multa jam observare debuerunt homines circa sidera, decies enim plus quam nos vivebant ; artibus et aliis scientiis non vacabant : probabile est autem illas observationes in diluvio non omnino periisse ; etenim Noe qui 600 annis ante diluvium vixerat, eas cognoscebat : probabiliter igitur eas saltem quoad substantiam, posteris suis transmisit. Ergo.

Inst. 7º. Physici et viri in astronomia periti qui exercitum nostrum duce Napoleone comitati sunt in Ægyptum, duos reperierunt zodiacos, unum in *Denderah*, et alterum in *Hesné*, ex quibus constat mundum multo antiquiorem esse quam illum facit Moyses. Ergo.

R. Cuncti pseudosapientes nostri, superbia tumentes, erga religionem Christianam et Judaicam exardescentes, magna alacritate zodiacos istos susceperunt, et ex præcordiis victoriam proclamaverunt : at plures viri scientia et ingenio conspicui, clara luce demonstrarunt nihil ex præfatis zodiaco contra historiam Moysis erui posse. In-

ter eos citantur D. Visconti, in antiquitatibus eruditissimus; D. Testa, litterarum Latinarum S. pontificis secretarius. Plures alii etiam celebriores in notitia siderum periti, zodiacum *Denderah* nuper Parisios importatum diligentissime considerarunt, et unanimi ore fatentur ipsius antiquitatem cum libris Moysis minime pugnare, imo ultra quintum sæculum ante vulgarem æram nostram non ascendere. Vide *Duclot*, t. 1, *Halma*, *Examen et explication du zodiaque de Denderah*, etc.

D. Dupuis, suo duntaxat zelo adversus religionem Christianam notus, ex nominibus quibus duodecim signa zodiaci nostri nunc appellantur demonstrare intendit illum saltem a 15,000 annis fuisse inventum. Sed quantum illud systema sit obscurum, arbitrarium, solidis principiis destitutum, temerarium et falsum, non difficile periti ostendunt, et nemo ei nunc adhæret: igitur supervacaneum foret de illo disserere. Vide adhuc *la Bible vengée*, et D. Cuvier. Postquam hic celebris naturæ observator firmis argumentis demonstravit nihil ex zodiaco pro antiquitate mundi inferri posse, sic concludit: « En » voilà sans doute autant qu'il en faut pour dégouter » un esprit bien fait de chercher dans l'astronomie des » preuves de l'antiquité des peuples: mais quand ces » prétendues preuves seraient aussi certaines qu'elles » sont vagues et dénuées de résultats, qu'en pourrait-on » conclure contre la grande catastrophe dont il nous » reste des documens bien autrement démonstratifs? Il » faudrait seulement admettre, avec quelques modernes, » que l'astronomie était au nombre des connaissances » conservées par les hommes que cette catastrophe » épargna. »

Inst. 8°. Historia Moysis conciliari non potest cum analibus plurimorum populorum, v. g. Chaldæorum, Ægyptiorum, Sinensium, etc. ergo non est vera.

R. Nego conseq. Sic enim potius ratiocinandum est: Annales plurimorum populorum, v. g. Chaldæorum, etc. conciliari non possunt cum historia a Moyse descripta: ergo non sunt veri, nec proinde admittendi; ingens nam-

que datur discrimen inter historiam Moysis et annales qui nobis objiciuntur. Omnes sinceritatis et veritatis characteres, qui desiderari possunt, præ se fert Moyses, dum præfatorum annalium auctores tales sinceritatis et veritatis characteres non manifestant; plerumque enim sunt privati omnino ignoti, eorum nativitas, status, vita, mors assignari non possunt; maxima ex parte perierunt illorum opera, quorum nonnulla tantum nobis remanserunt fragmenta; nullum fere exhibent factum determinatum, suis circumstantiis vestitum, circa quod nulla fraus existere queat; sed infinitas duntaxat narrant genealogias deorum vel regum, nullo momento firmatas: tales autem annales narrationi Moysis bona fide opponi non possunt.

Et vero, antiquiores auctores qui ab incredulis nobis opponuntur, sunt Sanchoniaton apud Phœnices, Berosus et Abydenus apud Chaldæos, Zoroastres apud Persas, Manethos apud Ægyptios, et Confucius apud Sinenses: atqui ex his auctoribus nihil contra nos erui potest.

1º Non ex Sanchoniaton. Ille auctor, quem *Voltaire* asserit esse omnium antiquissimum et Moyse valde anteriorem, tempore belli Trojani vivebat, juxta Porphyrium, Eusebium et Theodoretum, ac proinde 300 annis post Moysen: juxta plures alios est adhuc multo recentior; loquitur enim de Tyro tanquam de urbe antiquissima, quæ tamen plusquam centum annis post captam Trojam fuit fundata. Quidam illius existentiam negant: certum est illius opera ante imperatorem Adrianum fuisse ignota, et quædam tantum eorum superesse apud Porphyrium et Eusebium fragmenta, quæ fere nihil clarum et distinctum continent. Ergo 1º. *Histoire universelle par une société de gens de lettres, traduite de l'anglais, t. 3; Duglot, Bible vengée, t. 1.*

2º Si nonnullis fides adhiberetur, annales et observationes Chaldæorum ultra 400,000 annos ascenderent; sed Berosus, primus eorum scriptor historicus, vivebat tempore Alexandri Magni; illius historia, juxta Plinium, 480 annorum facta et eventus continet: quædam solum-

modo adhuc exstant ejus fragmenta a Josepho et Polyhistore citata : quid ergo ex tali auctore certo concludi potest pro longissima antiquitate ? Aliunde in factis quæ cum aliqua explicatione narrat, cum Moyse perfecte consentit quoad substantiam : ergo facta Moysis potius confirmat quam infirmat ; *Bible vengée*, t. 1. Pauca etiam nobis restant fragmenta Abydeni apud Eusebium, Cyrillum Alex. et Georgium Syncellum : ostendit autem Scalliger nihil ea continere narrationi Moysis oppositum. Ergo 2°.

3° Zoroastres apud Persas existebat tempore Darii filii Hystaspis, 550 annis ante Christum. *Voltaire* contendebat illum fuisse sapientissimum legislatorem, et illius libros esse vetustissimos mundi : postea autem, cum hos libros in linguam nostram viderit conversos, non dubitavit dicere eos nihil continere fide dignum « C'est un » fatras abominable, dont on ne peut lire deux pages » sans avoir pitié de la nature humaine. » *Lettres de quelques Juifs ; Duclot*, t. 1.

4° Manethos sub Ptolomæo Philadelpho vivebat, circiter 300 annis ante æram nostram : infinitas descripserat dynastias et deorum et regum qui principatum in Ægypto obtinuerant per 53,535 annos. Opus ejus non exstat, sed quædam tantum illius portiunculæ quas Georgius Syncellus ex Julio Africano citat. Omnes periti fatentur nihil clarum et solidum ex illis contra narrationem Moysis educi posse : imo *Guérin du Rocher* firmis argumentis demonstrat Ægyptiorum traditiones ex vera Moysis historia excerptas esse, et nihil aliud esse, magna ex parte, quam præcipuorum Pentateuchi factorum corruptiones. Ergo.

5° Confucius, qui in tanta veneratione est apud Sinenses, 550 annos ante Christum et 1000 post Moysen scribebat : annales quidem Sinensium contexuit ; sed ultra 200 annos ante suam ætatem per epochas certas ascendere non potuit. Quidam auctores posteriores longiorem chronologiam ordinare conati sunt : at nulla assignant monumenta quibus aliqua haberi possit certitudo : unde

D. *de Guignes*, in litteris Sinensibus versatissimus, testatur historiam primorum sæculorum hujus imperii nec authenticam esse, nec veram. Multi periti contendunt nihil in eorum chronologia reperiri omnino certum, ante 200 vel ad summum 300 annos ante Christum. Vide *Duclot* et *Genoude*.

Brachmanes apud Indos longissimam etiam habent chronologiam, sed libri eorum innumeris absurditatibus referti, nullam merentur fidem. *Ita omnes docti ipsique increduli.*

Susplicari licet, cum D. *Cuvier*, annales fabulosas communem habuisse originem, præsertim apud Indos, Chaldæos et Ægyptios, quia apud illas gentes, inter multos errores locales, quædam observatur identitas quoad substantiam. Fabulæ circa deorum et hominum existentiam præteritam semel contextæ, ab una regione in aliam per transmigrationem populorum cum novis erroribus transierunt.

Obj. 2º. Ex Gen. iv, 14, dixit Cain : *Omnis qui invenerit me, occidet me.* Unde sic : hæc verba supponunt Cainum tunc non fuisse solum cum Adam et Eva : atqui tamen, ex narratione Moysis, Cain post mortem Abel erat solus in terra cum Adam et Eva : ergo.

R. 1º. Nego maj. Etiam si enim Cain tunc fuisset solus in terra cum Adam et Eva, hæc tamen verba proferre potuisset, tum respectu futurorum suorum fratrum, qui ex Adam et Eva forte nascituri erant, tum respectu propriorum liberorum, tum etiam respectu bestiarum terræ, quæ illum occidere poterant.

R. 2º. Nego min. Scriptura quidem alias non designat personas præter Adam, Evam, Cain et Abel, sed perperam inde concluderetur alias tunc non exstitisse ; ordinarie enim Scriptura primogenitum duntaxat patriarcharum nominat, cæteros vero et filios et filias ad summum generali modo designat : possibile est ergo, imo et probabile, alios tunc exstitisse liberos ex Adam, et forte ex ipsismet Cain et Abel natos. Ergo.

Inst. 1º. Inter homines, alii sunt albi et alii omnino

nigri : porro albi et nigri ex uno et eodem patre communi descendere non possunt : ergo.

R. Nego min. Ex commercio enim nigri cum alba, vel albi cum nigra, semper in regionibus nostris post generationes paucas nascuntur albi : porro si albi et nigri diversæ essent speciei, non solum ex utriusque speciei commixtione non nascerentur albi, sed fetus eorum tertiam efficerent speciem, quæ saltem ordinarie infecunda esset, ut in bestiis ex specie diversa provenientibus observant naturalis historiæ investigatores. Nigritudo igitur qualitas est accidentalis, ex nimio solis ardore proveniens. Vide *Buffon* et *Valmont-Bomare*, art. *Nègre*.

Inst. 2°. Quando America prima vice fuit detecta, ubique in ea erant incolæ et innumeræ gentes : atqui nulla ratione explicari potest quomodo in ea exstitissent incolæ, si omnes homines ab eodem patre descenderent : ergo.

R. Nego min. Nam 1° fieri potuit ut una vel pluribus vicibus navis aliqua aut cymba ventorum impetu in littora magni illius continentis, aut in insulas ipsi vicinas, projectæ fuerint : quædam hujus generis citantur facta, v. g. anno 1731 parva navis cum quinque vel sex hominibus a Teneriffa in insulam Trinitatis vehementi tempestate fuit projecta : porro quod hac vice contigit, aliis vicibus et longe antea contingere potuit. 2° Multi contendunt quod olim America per isthmum continenti nostro fuerit juncta in septentrione, prope *Kamtschatka*. 3° *Cook* in tertio itinere suo circa mundum, per fretum *Behring* transiens, agnovit Americam decem et tribus leucis tantum ab Asia distare : atqui homines facile hoc fretum transire potuerunt, sive in cymbis, sive etiam pedibus super glaciem, quæ ibi fere est perpetua : ergo.

Aliunde, clare comperitur non a remota antiquitate habitatam fuisse Americam ; nihil enim in ea repertum est quod antiquitatem redoleret, nec annales authentici, nec monumenta fide digna, nec leges bene ordinatæ, nec artes, nec scientiæ ; sed, e contra, ubique apparebant evidentissimæ novitatis notæ : vastissimæ regiones omnino desertæ, sylvæ circumquaque spississimæ, impenetrabiles ;

et nullis manibus hominum plantatæ , quæ tam antiquæ esse videbantur quam ipse mundus; pauci admodum erant habitantes præ magnitudine terræ, etc. Ergo.

ARTICULUS QUARTUS.

DE CÆTERIS VETERIS TESTAMENTI LIBRIS.

Præter quinque Moysis libros, de quibus sub nomine Pentateuchi tractavimus, quadraginta alios in Veteri Testamento numerant catholici, nempe libros *Josue*, *Judicum*, *Ruth*, *quatuor Regum*, *duos Paralipomenum*, *duos Esdræ*, *libros Tobiae*, *Judith*, *Esther*, *Job*, *Psalmorum*, *Proverbiorum*, *Ecclesiastis*, *Cantici canticorum*, *Sapientiæ*, *Ecclesiastici*, *quatuor majores Prophetas*, *Baruc cum Lamentationibus Jeremiæ*, *duodecim minores Prophetas* et *duos priores libros Machabæorum*. In omnibus libris istis pretiosa reperiuntur monumenta in gratiam religionis Judaicæ; valde igitur nostra interest scire cujus sint auctoritatis. Itaque sit

PROPOSITIO.

Cæteri libri Veteris Testamenti omni fide sunt digni.

Prob. Illi enim libri omni fide sunt digni, si sint authentici, veri et integri: atqui cæteri libri Veteris Testamenti sunt authentici, veri et integri.

1º *Sunt authentici.* Publica enim et constanti traditione semper habiti sunt ut authentici, id est, eorum auctorum quibus attribuuntur, et eo saltem tempore scripti ad quod referuntur; omnes plus minusve pertinent ad statum populi, sive religiosum, sive civilem et politicum, in summa veneratione semper custoditi sunt, et a diversis auctoribus exarati, diverso genere compositi; alii videlicet sunt historici, alii prophetici; alii continent sententias, alii cantica, alii vitam privatorum; alii ab aliis pendunt, se invicem supponunt; et tamen, non obstantibus tot diversitatibus, perfecte sibi concordant. Porro tales

libri nunquam supponi potuerunt, et, licet auctores aliquorum non noscantur, nihilominus certum est illos eo tempore ad quod referuntur fuisse scriptos, ac proinde sub eo respectu vere authenticos esse. Ergo 1°.

2° *Sunt integri*. Nam publici erant, cultu religioso servabantur, ubique erant sparsi, apud sacerdotes, magistratus et populum : impossibile est autem omnes hujusmodi libros fuisse simul et eodem modo adulteratos : ergo 2°.

3° *Sunt veri*. Veri sunt enim, si eorum auctores non fuerint decepti nec deceptores : atqui non fuerunt decepti nec deceptores. 1° Non fuerunt decepti ; referunt enim facta publica, omnibus sensibus obvia ; tradunt morum præcepta evidenter vera et sancta ; edunt prophetias quæ suum semper apprime consequuntur effectum : atqui hæc omnia probant illos non fuisse deceptos. 2° Non fuerunt deceptores. Nam 1° omnes sinceritatis characteres præ se ferunt, *ut unicuique legenti patet*. 2° Facta quæ narrant sunt publica et præsentia, sibi et cum præcedentibus concatenata : at impossibile est circa hujus generis facta decipere ; qui enim talia facta impudenter supponeret, non nisi contemptum et derisum sibi acquireret : atqui prædictorum librorum auctores summam venerationem e contra sibi conciliaverunt : ergo 3°, etc. aliunde, etc. Ergo.

Judæi non agnoscunt ut canonicos libros Sapientiæ, Ecclesiastici et Machabæorum, saltem illud controvertitur ; item protestantes duos Machabæorum libros rejiciunt. Has speciales controversias hic non aggredimur, quia his libris ad demonstrandam veritatem religionis Judaicæ non indigemus.

CAPUT SECUNDUM.

DE DIVINITATE RELIGIONIS JUDAICÆ.

Religio Mosaica non potest esse vera quin eo ipso sit divina, quia exhibetur tanquam immediate et supernaturaliter a Deo proveniens: vel ergo supposita sunt facta quibus innititur, et tunc est falsa; vel certa sunt, et tunc vera est ac divina: sed *probavimus* verissima esse facta quibus innititur: ergo certum est illam esse divinam. Pro majori tamen hujus veritatis explicatione, sit

PROPOSITIO.

Divina est religio Mosaica.

Prob. Ex probatis in prima hujus tractatus parte, divina est illa doctrina quæ non est evidenter absurda aut falsa, et aliunde veris miraculis et prophetiis confirmatur: atqui talis est religio Mosaica.

1º Non est evidenter absurda aut falsa, est e contra evidenter pura, sublimis et sancta. Moyses enim Deum exhibet unicum, æternum, immensum, infinite bonum, omnipotentem, purissimum spiritum, totius orbis conditorem et moderatorem, malos pœnis et bonos præmiis afficientem, quibuscumque perfectionibus exornatum, talem, uno verbo, qualem ipsa ratio demonstrat, et qualem ipsi deistæ eum esse profitentur. Dogmatibus istis sublimioribus eximia de moribus addit præcepta: docet namque Deum esse totis viribus diligendum, grates ipsi persolvendas, proximum esse amandum, et opem ei ferendam; furta, cædes, odia, avaritiam, fornicationem, adulterium, prava desideria, et quæcumque sunt mala vel inhonesta prohibet. Denique decem Decalogi præcepta, quæ regulas morum summatim complectuntur,

et quæ, fatentibus deistis, eximia sunt et rationi conformia, tradit tanquam legem abbreviatam et omnium captui accommodatam : atqui talis doctrina, nedum sit evidenter absurda aut falsa, manifeste est pura, sublimis et sancta, imo eo ipso divina est ; Moyses enim natus erat in Ægypto, fuit educatus inter Ægyptios, crocodilorum et plantarum adoratores ; ea vivebat ætate qua tot apud varias gentes erant deorum monstra, tot acerbitates erga proximum et præsertim erga servos exercebantur, tot fœdissima vitia publice et universim apparebant : his autem positis, non solum incredibile, sed impossibile est eum, propriis viribus et absque speciali Dei assistentia, excogitasse doctrinam tam puram, tam sublimem, tam sanctam et tam perfectam ; maximi enim philosophi et omnes mundi sapientes simul collecti nihil unquam simile docuerunt : ergo, etc. Ergo 1°.

2° Religio Mosaica veris confirmatur miraculis. Nam Pentateuchus est authenticus, integer et verus : atqui multa in Pentateucho referuntur facta quæ evidenter sunt miraculosa, nempe mirabilia ministerio Moysis peracta : v. g. conversio virgæ in serpentem, decem plagæ Ægypti, transitus maris Rubri, columna nubis et ignis, fulgura et tonitrua in monte Sinai, manna e cœlo decidens, aqua de rupe percussa fluens, terra dehiscens ut Core, Dathan et Abiron vivos absorbeat, etc. porro hæc facta evidenter sunt miraculosa. Multa sunt alia ejusdem generis in cæteris Veteris Testamenti libris : v. g. transitus Jordanis, obsessio Jericho, immobilitas solis ad vocem Josue, victoriæ Gedeonis, fortitudo Samsonis, etc. Ergo 2°.

3° Religio Mosaica divinis confirmatur prophetiis. Refert enim Moyses prædictiones a Deo factas Abraham, Isaac et Jacob de mirabili seminis illorum multiplicatione, Gen. xv, 5 ; xvii, 2 ; xxvi, 4 et 24 ; narrat diversas prædictiones quas Jacob moriens fecit relative ad singulos filios suos, et præsertim ad summum principatum quem Juda habere debebat, licet quartus tantum esset in ordine, Gen. xlix. Dici autem non potest has prædic-

tiones et in primis eam quæ Judam spectat fuisse suppositam; longe namque post Moysen suum habuit effectum.

Ipsæ Moyses plures edidit prophetias quæ omnes obtinuerunt suum effectum. Sic Numerorum xiv, 22, prædicit nomine Dei omnes qui divinam viderant majestatem in Ægypto et in solitudine, et viginti annos attingerant, ut ex xxvi, 2, concluditur, Terram Promissam non ingressuros esse, exceptis Caleb et Josue; et revera omnes in deserto mortui sunt, ut totis verbis legitur in cap. xxvi, 63 et 64 ejusdem libri. Annuntiaverat filios Israël quadraginta annos in deserto mansuros esse, Num. xiv, 33 et 34: res autem ita evenit, ex c. xxxii, 13. Prædixerat Israelitas sibi constituturos regem, sicut alias gentes, et officia illius ac jura determinat: porro regem de facto post quatuor sæcula sibi constituerunt, nempe Saül quem Deus ipsis postulantiis concessit.

2º Abias prædixit regnum Salomonis dividendum, et Jeroboam decem tribus habiturum, III Regum xi, 31; quod duobus abhinc annis reipsa evenit. Regni Israel vastationem et destructionem prædixerunt Osee, cap. ix, et Amos, cap. v, quadraginta annis ante eventum.

3º In diversis prophetis multa sunt oracula quæ regnum Juda spectant: sic, v. g. Isaias, xliv, 28 et xlv, 1, Cyrum proprio nomine appellat tanquam Judæorum liberatorem, et plusquam 200 annis ante eventum. Jeremias, xxxix, septuaginta annos quibus duratura erat captivitas Babylonica numerat, dicens: *Cum cæperint impleri in Babylone septuaginta anni, visitabo vos et reducam vos ad locum istum.* Daniel, ix, accurate describit, fere 500 annis ante eventum, ultimam totius reipublicæ Judaicæ destructionem et finem.

4º Innumeræ sunt aliæ prophetiæ claræ et splendidæ, ante eventum certo editæ, et eventu confirmatæ: aliæ spectant Assyrios, aliæ Babylonios, aliæ Persas, aliæ Græcos, aliæ Romanos, aliæ Idumæos, aliæ Tyrios, aliæ Ægyptios, etc. Tam clare describit Daniel res sub Alexandro Magno et Antiocho Epiphane gestas, ut affirmaverit Por-

phyrius, librum istum ab aliquo impostore post eventum fuisse fabricatum vel potius : ergo religio Mosaica veris innititur prophetis, serie non interrupta prophetiarum ; aliunde, veris confirmatur miraculis ; insuper doctrina ejus est pura, sublimis et sancta : ergo evidenter est divina.

Et vero, illa religio est divina in cujus gratiam specialis Dei assistentia perpetuo se manifestavit : atqui specialis Dei assistentia perpetuo in gratiam religionis Mosaicæ se manifestavit. Moyses enim in Deut. xxviii et xxix, ingentes annuntiaverat calamitates superventuras populo, si mandata Dei non custodiret ; e contra, multas illi promittebat benedictiones, si constanter religiosum et fidelem se ostenderet : atqui revera Deus sæpius gravissimas induxit calamitates super populum prævaricatorem, et easdem ab illo avertit aut eis finem attulit, ob ipsius gemitus et pœnitentiam. Sic, defuncto Josue et exstincta generatione quæ mirabilia viderat in deserto et in ingressu Terræ promissionis, *Fecerunt malum (filii Israel) in conspectu Domini, et obliti sunt Dei sui, servientes Baalim et Astaroth*, Judic. iii, 7 : tradidit illos Deus in manus Chusan, qui oppressit eos per octo annos : *Clamaverunt ad Dominum, qui suscitavit eis liberatorem*, videlicet Othoniel, fratrem Caleb, qui liberavit eos. Sic deinceps pluries in easdem aut in similes relapsi sunt prævaricationes, et fuerunt oppressi ab Eglon rege Moab decem et octo annis, a Jabin rege Chanaan viginti annis, a Madian et Amalec septem annis, a Philistiim et Ammonitis decem et octo annis ; et clamantes ad Dominum ac misericordiam ejus implorantes, divinitus liberati sunt successive per Aod, Barac, Debboram, Gedeon, Jephthe. Porro in his factis manifesta est specialis Dei assistentia : ergo.

Solvuntur objectiones.

Obj. 1º. Illa religio non est divina, quæ prorsus Deo est indigna : atqui religio Mosaica prorsus Deo est indigna : ergo.

R. Nego min. Illa enim religio Deo non est indigna, cuius doctrina est pura, sublimis et sancta: atqui doctrina religionis Mosaicæ est pura, etc. ut ostendimus: ergo.

Inst. 1º. Illa religio Deo est indigna, quæ innumeras præscribit observationes vanas, inutiles et ridiculas: atqui religio Mosaica multas, etc. Tales sunt tot ritus circa diversa sacrificia, eorum tempus et modum, tot ablutiones ad immunditias nescio quas abstergendas, tot distinctiones inter cibos, tot præcepta circa figuram et formam vestium, circa modum arandi, serendi, domos ædificandi, et sexcenta hujusmodi. Ergo.

R. Nego min. Nam 1º quidquid a Deo venit, nunquam vanum, inutile aut ridiculum reputari debet, quantumvis tale nobis appareat: at certum est prædictas observationes a Deo venire, id est, ab ipso fuisse præscriptas: etiamsi ergo rationes ob quas institutæ sunt afferre non possemus, nihilominus eas deridere aut rejicere tanquam vanas aut inutiles non liceret.

2º Hæc rituum et observantiarum multitudo non fuit primario instituta quando Deus legem suam in monte Sinai promulgavit, sed secundario et post stupidam populi Israel in adoratione vituli aurei prævaricationem: consilium igitur Dei fuit, ut gentem idololatriæ ream plecteret, ut illam ab eo criminis genere, in quod tum naturali sua propensione, tum vicinorum exemplo, nimium proclivis erat, tutius avertere.

Insuper, necesse erat ut gravia illi præberentur motiva quibus contra imbecillitatem suam firmaretur, et media quibus ab omni commercio cum alienis gentibus retraheretur: atqui duplicem hunc finem Deus obtinuit, ritus et observantias legales instituendo.

1º Gravia præbuit Israelitis motiva quibus contra inclinationem vel imbecillitatem suam firmarentur; quæ enim graviora illis præbere poterat motiva, quam efficiendo ut ante oculos perpetuo haberent sanctissimam ipsius præsentiam, supremum ejus dominium in omnes creaturas, necessitatem eum adorandi, amandi, deprecandi, gratias ei agendi, obsequium præstandi, de pec-

catis dolendi, sordes mundandi, levissimas immunditias abstergendi, etc. Porro multi instituti sunt ritus quibus hæc in memoriam populi perpetuo revocarentur, ut dies sabbati, celebriores festi, oblatio primitiarum, redemptio primogenitorum vel eorum immolatio, solemnia et perpetua sacrificia, victimarum pro peccatis destructio, aspersiones et ablutiones. Ergo 1°.

2° Aptissima eis subministravit media quibus ab omni commercio cum alienis retraherentur; multa enim dedit præcepta consuetudinibus paganorum opposita: v. g. prohibuit ne lucus juxta altare Dei plantaretur, ne Deus in excelsis adoraretur, Deut. xvi, 21, et Lev. xxix, 30; ne Israelitæ comam in rotundum attonderent, ne super mortuo carnem suam inciderent, ne figuras aut stigmata in seipsis facerent, ne carnem cum sanguine comederent, etc. Lev. xix, 26; ne hædum in lacte matris coquerent, ne lac de ovibus cum adipe agnorum manducarent, Deut. xxxii, 14: hæc omnia faciebant gentes. Pariter, ne tentarentur redire in Ægyptum, pluries præscripsit illis ut in sacrificiis uterentur vino et oleo, quæ in Ægypto non colliguntur; ut ab omnibus distinguerentur populis, præter circumcisionem qua insigniri tenebantur, alios instituit ritus speciales, v. g. formas vestium et ædificiorum, modum arandi et semen in terram fundendi, distinctionem inter cibos, quorundam animalium prohibitionem, etc. Inde factum est Judæos, licet tot calamitatibus afflictos et per orbem sparsos, a cunctis aliis gentibus semper remansisse separatos: ergo 2°. Ergo, etc. Præterea omnes isti ritus figuræ erant rerum in nova lege adimplendarum, ac proinde non erant vanæ. Consule opus jam citatum, *Lettres de quelques Juifs*.

Inst. 2°. Illa religio Deo est indigna, quæ immortalitatem animæ non agnoscit: atqui religio Mosaica immortalitatem animæ non agnoscit, nec ullam de beatitudine æterna mentionem facit: ergo.

R. 1°. Pentateuchus est collectio legum ritualium et civilium ad regendum populum Israeliticum destinatarum, non vero completa religionis expositio: religio

enim a Deo primis hominibus tradita et decursu temporis magis explicata, ut supra p. 55 notavimus, Moyse anterior erat.

R. 2º. Nego min. Certum est enim Judæos hoc dogma nunc profiteri; illud tempore Christi et Apostolorum credebant, ut constat tum ex Josepho, tum ex aversione qua prosequiebantur Sadducæos; illud tenebant tempore Machabæorum; cubarant enim ut preces et sacrificia pro defunctis offerrentur, II Mach. xii, 43; *clarius patet* ex historia martyrii Eleazari, septem fratrum et matris eorum, ibidem, vi et vii. Eadem veritas sæpius et evidentissime continetur in libris Sap. præsertim iii, v et xv, et Eccl. v, 8, et vii, 40. Expressius eam docent Dan. xii, 2; Ezech. xxxvii, 5; Isaias, xxvi, 19; Osee, xiii, 14; Tobias, ii, 18; Job, xix, 25. Continuo eam cantat aut supponit David in Psalmis; in I Regum, xxix, Saül evocat Samuelem per pythonissam et illum consulit: illum autem evocare et consulere non cogitasset, si persuasum habuisset animam perire cum corpore: ergo dogma alterius vitæ constanti traditione creditum fuit apud Hebræos, saltem a tempore Saül. Atqui eo ipso concludendum est illud tempore Moysis et omnibus retro sæculis admissum fuisse; si enim non semper creditum fuisset, illius opinio ab aliquo fuisset introducta, et tunc quædam hujus introductionis vestigia inveniri possent: atqui nulla assignantur nec inveniuntur: ergo.

Præterea, fatentibus *Voltaire* aliisque ejusdem scholæ pseudosapientibus, dogma alterius vitæ et immortalitatis animæ publice et universatim credebatur apud Persas, Chaldæos, Babylonios, Syrios, Cretenses, Phœnices, Arabes, Ægyptios et omnes Græcos: Hebræi autem suam habent originem ex Chaldæa, plusquam ducentis annis manserunt in Ægypto, vicini erant Arabum, Phœnicum et Græcorum; illud igitur dogma ignorare non potuerunt: ergo illud credebant. Si enim in hoc gravissimo puncto a cæteris gentibus discrepassent, certe aliquod talis discrepantiæ existeret indicium, et ipse Moyses hanc superstitionem prohibere debuisset: etiamsi ergo Moyses circa illud dogma omnino siluisset, non ideo

concludere liceret illud ab Israelitis fuisse ignoratum.

Sed falsum est Moysen circa illud dogma siluisse; pluribus enim in locis evidenter illud ut certissimum supponit, v. g. 1° in Gen. xxvii, 8, de Abraham dicitur : *Deficiens mortuus est... congregatusque est ad populum suum*. Idem dicitur de Isaac, xxxv, 28; de Aaron et Moyse, Deut. xxxii, 50 : porro non apponebantur ad populum ratione corporis, nam in eodem loco non sepeliebantur. 2° Jacob dicit in Gen. xxxvii, 35 : *Descendam ad filium meum lugens in infernum* : non existimabat autem se descensurum ad filium suum in sepulcrum; siquidem persuasum habebat illum a bestia fuisse devoratum. 3° In Exodo, iii, 6, 15 et alibi, Deus vocatur Deus Abraham, Deus Isaac et Deus Jacob : atqui *non est Deus mortuorum sed vivorum*, ut ait ipse Christus, Matth. xxii, 32. 4° Moyses in Deut. xviii, 11, prohibet ne veritas a mortuis quærat : hæc prohibitio clare supponit tunc morem fuisse mortuos per pythones interrogare, sicut fecit Saul : atqui mos ille supponit communem esse persuasionem animas cum corporibus non interire, quod ipse sic agnovit *Fréret a Guénée* citatus : « Ce passage, disait-il en parlant de cette loi, mérite beaucoup d'attention, parce qu'il prouve contre les Saducéens modernes qu'au temps de Moyse les Hébreux croyaient communément les âmes immortelles; sans cela ils ne se seraient pas avisés de les consulter : on n'interroge point ce que l'on ne croit point exister. Il est singulier que cette conséquence ait été si peu aperçue jusqu'à présent. » Ergo denique religio Mosaica docet vitam futuram et animæ immortalitatem.

Inst. 3°. Moyses bona aut mala temporalia tantum prænuntiat populo Israelitico, prout mandata Dei custodiet vel non custodiet, ut videre est variis in textibus, præsertim Deuteronomii : ergo nec beatitudinem, nec pœnas alterius vitæ agnoscebat.

R. Distinguo ant. Moyses bona aut mala temporalia tantum prænuntiat populo Israelitico, quatenus est gens politica et corpus morale, *concedo*; quatenus Israelitæ

sunt privati et individui, *nego ant.* Itaque sub duplici respectu considerari possunt et debent Israelitæ, scilicet, collective et privatim : sub duplici illo respectu Moyses fuit eorum legislator, ac proinde sanctionem dare debuit suis legibus prout gentem vel privatos spectabant.

1° Prout gentem spectabant, dare illis debuit sanctionem temporalem, quæ sola possibilis erat ; gens enim est totum morale in hac vita tantum existens : ergo leges eam spectantes, pro vita præsentis tantum existunt, sicque earum sanctio debet esse temporalis. Unde si gens Hebræa leges a Deo sibi præscriptas custodisset, pace, tranquillitate aliisque bonis promissis perfruita fuisset : mali cives iisdem bonis participassent, ut pars gentis. Contra vero, gente in prævaricationes labente et calamitates annuntiatas incurrente, boni cives simul cum malis plectebantur, quia ad eandem gentem pertinebant.

Nulla sanctio spiritualis, in promissione alterius vitæ pro bonis et metu pœnarum pro malis consistens, apponi potest legibus gentem ut talem spectantibus; fieri enim potest ut tota gens moraliter leges custodiat, et quidam tamen eas coram Deo transgrediantur, nempe eas omittendo, vel exterius tantum observando; et, vice versa, contingere potest ut gens fiat rebellis, licet multi remaneant sanctissimi coram Deo : hos autem æternis addicere suppliciis, ob aliorum prævaricationem, iniquum foret, sicut et malos futuris præmiis, propter aliorum virtutes donare. Ergo.

2° Moyses sufficientem dare debuit sanctionem suis legibus, quatenus spectabant privatos, alioquin insulse egisset : atqui nullam vel insufficientem dedisset sanctionem, si ad spirituales non attendisset ; nam, juxta consuetum divinæ providentiæ cursum, unusquisque æquiori modo remunerari vel puniri non potest, nisi in altera vita : ad eam igitur Moyses necessario attendere debuit, et ita semper intellexerunt Judæi. Unde legis doctori interroganti quodnam esset magnum in Lege mandatum, respondit Christus : *Diliges Dominum tuum*, etc. *hoc fac et vives*, Matth. xxii, 36. Ibi agitur de lege Mo-

saica : qui ergo illam observat, vivet. Porro hæc vita non est alia quam vita æterna : ergo. Igitur Moyses expressius de vita æterna non loquitur, quia eam ut quid notissimum supponit : ergo 2°; aliunde, etc. Ergo.

Hinc patet quam erraverint Spenser, auctor Anglus, in suo tractatu, aliunde commendato, de Hebræorum legibus earumque motivis, et abbas *de Prades*, in sua thesi a Sorbona, anno 1751, proscripta; uterque enim docebat leges Hebræorum omni sanctione spirituali esse destitutas, et Moysen semper repræsentasse Deum tanquam principem civilem et politicum.

Inst. 4°. Illa religio divina esse non potest, quæ humana approbat aut præscribit sacrificia : atqui religio Mosaica humana approbat aut præscribit sacrificia; nempe 1° Abraham laudatur, quia paratum se præbuit unigenitum suum mactare, Gen. xxii, 16.

2° In Lev. xxvii, 28, 29, hæc leguntur verba : *Omne quod Domino consecratur, sive homo fuerit, sive animal, sive ager, non vendetur, nec redimi poterit; quidquid fuerit semel consecratum, sanctum sanctorum erit Domino; et omnis consecratio quæ offertur ab homine non redimetur, sed morte morietur.*

3° In Exodo, xxxi, Moyses jubet ut quinquagesima pars eorum quæ in bello capta sunt, ab homine usque ad pecus, in partem Domini cedat et Eleazar sacerdoti tribuatur, sane ut immoletur.

4° Jephthe propriam suam filiam immolavit, Judic. xi, 39, et Samuel in frustra concidit coram Domino Agag regem Amalec, I Regum xv, 33. Ergo.

R. Nego min. Nedum enim religio Mosaica humana præscribat sacrificia, ab eis e contra abhorret. Chananæi solebant hujusmodi sacrificia diis suis offerre, et filios suos et filias in honorem Moloch comburere : propterea Moyses prohibet Israelitis ne similes faciant abominationes, *quas aversatur Dominus*, Deut. xii, 31. Idem habetur in Psal. cv, in quo gravissime increpantur Israelitæ qui ita prævaricati sunt, ut sicut gentes filios suos et filias immolarent : ergo religio Mosaica talia nunquam appro-

bavit sacrificia. Itaque alio sensu necessario intelligendi sunt textus qui nobis obijciuntur.

1° Abraham non se præparabat filium suum immolare, ex præcepto legis Mosaicæ, quæ nondum existebat, sed ex mandato Dei, qui supremus est dominus vitæ et mortis : ergo illud exemplum nihil probaret contra legem Moysis. Aliunde, Deus ipse brachium Abraham retinuit, aliam substituit victimam, sicque satis ostendit se humano sanguine non delectari : unde Abraham non laudatur ex eo quod filium suum immolaverit, sed quia prompte Deo obedivit, nihil hæsitans. Ergo.

2° Verba Levitici citata sic intelligi debent : omne quod Domino consecratur, ea voti specie quæ dicitur anathema, redimi non poterit, sed morte morietur, subaudiendo, si mori possit, et mors ejus non prohibeatur ; nam in eodem loco et eodem ordine ponuntur agri, agri vero certe mori non possunt ; inter animalia quædam sunt munda et alia immunda, immunda autem in sacrificium offerri non poterant : ergo illa verba, licet universalialia videantur, necessario ad ea restringi debent quæ immolari non prohibentur : atqui prohibetur in Lege ne homines immolentur, *ut vidimus* : ergo.

Sensus igitur illorum verborum est, quod homines Deo consecrati templi servitio mancipari deberent, sicut Samuel, nec eos redimere liceret. Vide *Bullet et Guénée*, t. 2. Ergo.

3° In textu Exodi qui hic obijcitur, nulla fit mentio de immolatione hominum ; agitur tantum de parte prædæ in bello captæ, quæ sacerdotibus et levitis concedi debet : porro sacerdotes et levitæ non accipiebant homines captos in bello ut eos immolarent, bene vero ut illis tanquam mancipiis uterentur : ergo.

4° Si revera Jephthe arbitratus est, ut plerique veteres tenuerunt, se ex voto obligatum esse filiam suam mactare, erravit ; sed ipsius error ex lege Moysis originem non habuit, nisi per abusum. Multi autem, præsertim inter recentiores, putant Jephthe non credidisse se teneri filiam suam realiter immolare, nec de facto illam jugulasse ;

ignorare enim non poterat vota implenda esse modo ad naturam rei accommodato; unde si immundum quoddam animal sibi occurrisset, v. g. porcus, canis, certe illud non immolasset, quia lex tales prohibebat victimas; illud pretio redemisset: si vero animal mundum sibi occurrisset, illud reipsa immolasset: personam autem a se pendentem Deo consecrare debebat, id est, eam in perpetuum servitio templi devovere, non vero eam mactare. Hunc sensum clare exprimit textus Hebraicus, Jud. 11, 31: *Vel erit Domini, vel erit in holocaustum*. Eundem sensum versus sequentes indicant; legitur enim filiam Jephthe duobus mensibus suam virginitatem (non suam mortem) flevisse, et v. 39: *Fecit ei sicut voverat quæ ignorabat virum*. In Septuaginta legitur: *Quapropter virum non cognoscebat*; nullibi vero legitur eam in holocaustum revera fuisse oblatam. Ergo.

5^o Samuel occidit quidem Agag regem Amalec, quia Deus illum morti devoverat ob ipsius scelera; sed illum non obtulit in holocaustum: verba hæc, *coram Domino*, non significant altare, sed præsentiam Dei; Galgala enim in summa erat veneratione, quia ibi circumcisi fuerant Hebræi post transitum Jordanis, Josue v, 7, ibi phase celebraverant, ibi castrametati et diu commorati erant, etc. sensus igitur prædictorum verborum est, mortem Agag non fuisse dilatatam; sed statim, ibi, in eodem loco, et respiciente Domino, eum occisum esse. Ergo.

Inst. 5^o. Illa religio Deo est indigna, quæ odium proximi et ultionem expresse permittit: atqui religio Mosaica odium proximi et ultionem expresse permittit. 1^o Odium proximi; dixit enim Christus, Matth. v, 43: *Audistis quia dictum est: Diliges proximum tuum, et odio habebis inimicum tuum*. 2^o Ultionem; nam in Deut. xix, 21, dicitur: *Animam pro anima, oculum pro oculo, dentem pro dente, manum pro manu, pedem pro pede exiges*. Ergo.

R. Nego min. quoad utramque partem. 1^o Religio Mosaica non approbat odium proximi: nam datur præceptum diligendi proximum sicut nosmetipsos, et insuper, Deus per Moysen dicit, in Lev. xix, 18: *Non quæras ul-*

tionem nec memor eris injuriæ civium tuorum. Et in Exod. xxiii, 4 et 5 : Si occurreris bovi inimici tui aut asino erranti, reduc ad eum ; si videris asinum odientis te jacere sub onere, non pertransibis, sed sublevabis cum eo. Hæc autem conciliari non possunt cum odio etiam inimici.

Verba autem ista, *odio habebis inimicum tuum*, nullibi leguntur in Pentateucho ; nihil ergo contra legem Moysis probant. Plurimi contendunt ea Legi addita fuisse per Pharisæos ; legebant enim : *Diliges amicum tuum sicut teipsum* ; et inde sic concludebant : *et odio habebis inimicum tuum*. Hunc errorem reformat Christus, dicendo : *Diligite inimicos vestros*, Matth. v, 44. Alii volunt prædicta verba a Deo prolata fuisse, et per traditionem oralem transmissa ; sed relativa erant tantum ad populos Chananæos qui, ex jussu Dei, sine misericordia exterminandi erant : at in ea hypothesi nihil contra religionem Mosaicam inferri potest : ergo.

2° Pœna talionis, *animam pro anima, oculum pro oculo*, etc. a nomine adjectivo *talis* sic dicta, eo sensu intelligenda est ut a magistratibus, non vero a privatis infligenda sit. 1° Enim Deus ultionem sibi reservat. Deut. xxxii, 35 : at frustra ultionem sibi reservasset, si unusquisque jus habuisset pœnam talionis propria auctoritate infligendi. 2° In tota serie librorum Veteris Testamenti non legimus privatos hanc exercuisse facultatem, nec eam nunc exercent Judæi. Ergo.

3° Hæc pœna non est accipienda physice, quia reus talem semper de facto subiisset pœnam qualem intulisset, sed moraliter pro determinatione pœnæ quam judices infligere tenebantur ; sæpe enim impossibile erat pœnam omnino similem inferre, vulnus pro vulnere, fracturam pro fractura, præsertim habita ratione diversitatis sexus, ætatis, virium, complexionis, etc. cum tamen expediret judices communem habere regulam, ex qua per proportionem, ex æquo et bono, ut aiunt, determinarent pœnam infligendam, Moyses prædictas condiciones illis constituit. Ergo.

Inst. 6°. Juxta hanc interpretationem, nulla in hoc esset

oppositio inter doctrinam Moysis et doctrinam Christi : atqui tamen hoc falsum est , juxta hæc Christi verba : *Audistis quia dictum est : Oculum pro oculo , dentem pro dente ; ego autem dico vobis , non resistere malo* , Matth. v , 38. Ergo.

R. Nego maj. Non solum enim Christus tradit præceptum justitiæ , sicut fecerat Moyses , sed dat consilium perfectionis , *non resistere malo* , id est , tibi injuriam facienti : *Si quis te percusserit in dexteram maxillam tuam , præbe illi et alteram.* Ergo.

Inst. 7º. In decursu librorum Veteris Testamenti , frequenter leguntur desideria ultionis et gravissimæ imprecationes , v. g. in Ps. cviii. Ergo.

R. 1º. Juxta multos Scripturæ interpretes , imprecationes quæ passim in libris sacris leguntur , sunt prædictiones futurorum malorum quæ peccatoribus obventura erant : in Hebraica lingua præsens et futurum sæpe eodem modo exprimuntur. Sic B. Petrus testatur , Act. i , 20 , Deum per os David sub figura imprecationis apostasiam Judæ Iscariotis prænuntiasset : *Episcopatum ejus accipiat alter.* Ergo.

R. 2º. Dist. ant. Et illæ imprecationes ex odio peccati et zelo gloriæ Dei procedebant , *concedo* ; ex odio personarum , *nego maj.* Cum enim Lex odium et vindictam personalem prohibeat , si prædicti viri mala ex desiderio ultionis personalis imprecati essent , non laudarentur velut sancti : ergo ex odio peccati et zelo gloriæ Dei sic agebant : porro imprecationes sic intellectæ nihil habent inordinatum ; peccatores enim in peccato obdurati , veritatem impugnantes , Deo oppositi ipsiusque inimici , gravissimis digni sunt pœnis : ergo.

Obj. 2º. Lex Mosaica exigebat ut Israelitæ gentes sibi vicinas exterminarent : atqui lex hujusmodi Deo est indigna : ergo.

R. Nego min. Milites qui jussu regis malefactores interficiunt , non reputantur injusti : ergo *a fortiori* qui ex mandato Dei peccatores ad mortem juste damnatos exterminant , crudeles reputari non debent : at Israelitæ , ex mandato Dei et tanquam ipsius ministri , Chananæos ex-

terminabant; Deus quippe septem illas gentes, propter abominanda earum flagitia, ad internecionem damnaverat, ut nomen ejus *sanctum et terribile* glorificaretur, et populum suum tali severitatis exemplo ab idololatria efficacius deterreret. Ergo.

Cæterum, his gentibus exceptis, leges Judæorum nihil habebant juri gentium oppositum; imo commendant præcipiuntque humanitatis officia erga hospites et advenas: *Si habitaverit advena in terra vestra et moratus fuerit inter vos, non exprobrete ei: sed sit inter vos quasi indigena, et diligetis eum quasi vosmetipsos: fuistis et vos advenæ in terra Ægypti*, Lev. xix, 33. Ergo.

Obj. Quidquid a Deo venit sapientissimum esse debet: atqui leges politicæ Moysis plures continent dispositiones consuetis sapientiæ regulis adversas, v. g. præceptum agros non serendi et vineas non putandi septimo anno; Lev. xxv, 4; condonationem omnium debitorum in annis Jubilæi, ibidem, v. 10. Talia sunt etiam præcepta de alieno in civem non recipiendo nisi duræ circumcisionis legi se submitteret, de commercio cum extraneis non habendo: unde factum est gentem Hebræam aliarum gentium odia et arma in se concitavisse: ergo illæ leges a Deo non veniunt.

R. Nego min. Nedum enim illæ leges sint absurdæ, ut placuit *Voltaire*, sapientia legibus Ægyptiorum, Assyriorum, Atheniensium, Lacedæmoniorum et etiam Romanorum longe præstant; sapientia enim legum politicarum in eo consistit, ut populus prosperitate fruatur, sit numerosus, robustus, ab extraneis nihil timendum habeat, vera felicitate gaudeat, et in eo statu permaneat: at talis semper fuit populus Israeliticus, quamdiu mandata Dei custodivit, ut ex historia ejus constat; nullus namque fuit populus in antiquitate qui tanto tempore in eodem statu prosperitatis et felicitatis permanserit; si gravissimas interdum passus est calamitates, eas non suis legibus, sed suis peccatis tribuere debet, divina testante auctoritate.

Exempla in objectionem nobis opposita plus pro nobis quam contra nos probant.

1^o Inconcussis monumentis constat gentem Israeliticam semper fuisse numerosissimam, pro extensione regionis Palæstinæ, et non plus expertam fuisse famem quam cæteræ gentes: septimus ergo annus requietionis numero populi non nocebat. Moyses autem, nisi hoc futurum certo novisset, non ausus esset talem præcipere requietionem, quia timendum fuisset ne populus fame periret: perpetua igitur abundantia, quæ septimi anni sterilitatis supplevit, ut jure haberi debet miraculum. Ergo 1^o.

2^o Condonatio debitorum in anno Jubilæi maximæ erat utilitatis; inde enim fiebat ut ea terræ divisio, quæ primitus facta fuerat, eadem semper remaneret, familiæ debitis ultra modum crescentibus non gravarentur, et pauperes sublevarentur; anno quippe Jubilæi appropinquante, non minus tenebantur divites commodare pauperibus id quo indigebant, Deut. xix, 9; hinc radix cupiditatis resecabatur.

3^o Cum Israelitæ in peculiarem coalescere deberent populum, sua religione, suis moribus et legibus ab aliis populis segregatum, prohibuit Moyses ne cum alienigenis communicarent, eorum consuetudinibus idololatricis participando: at commercium, prout illud nunc intelligimus, nec prohibuit, nec præcepit; parum de illo curavit, quia nationi agricolæ et abundantem fructuum terræ copiam colligenti necessarium non erat.

4^o Præscripsit quidem Moyses ut advena non recipetur in civem, nisi prius circumcideretur, et hoc non mirum; volebat enim gentem suam religiosam simul et politicam esse: ergo exigere debuit ut, qui membrum hujus societatis fieri vellet, legibus ejus religiosis et politicis se submitteret.

Si odia cæterarum gentium in se concitaverint Judæi, inde concludere licet divinam esse eorum legem; 1^o quia tam firmiter ei adhærere non potuerunt, nisi credendo vera esse facta quibus nititur; 2^o quia gens parva, cæteris odibilis, sola Dei assistentia per tot sæcula perseverare potuit. Ergo.

Obj. 4º. Prodigia in Pentateucho narrata, via naturali explicari possunt : v. g. solerter Israelitæ trajecerunt mare Rubrum secus littus tempore fluxus, et Ægyptii eos persequentes a redeunte æstu corrépti submersi sunt, etc. Ergo.

R. Nego ant. et ejus probationem. Circumstantiæ enim alicujus facti ab ipso separari non debent; at transitus maris Rubri, prout in Exodo describitur, via naturali explicari non potest, sed insigne fuit miraculum. 1º Enim aquæ in duas partes hinc et inde divisæ sunt, et instar muri steterunt; fluxus maris aquas sic dividere non potuit.

2º Æstum maris non ignorarunt Hebræi, nec igitur circa tale factum a Moyse decipi potuerunt : attamen constanter persuasum habuerunt transitum maris Rubri, cujus erant testes oculati, maximum fuisse miraculum. Ægyptii nec æstum maris nec ipsius horam ignorabant : quomodo ergo in viam adeo periculosam ausi fuissent se committere ? quomodo sic omnes periissent ? incredibile est æstum tam vehementer rediisse ut nullus fugere posset.

3º Si Moyses et Israelitæ ope æstus mare naturaliter trajecissent, ut volunt adversarii, certe in extremitate, prope isthmum Suez : at ille transitus effici non potuit per spatium ibi ab aquis relictum; per sex enim horas aquæ paulatim decrescunt, et statim per alias sex horas paulatim redeunt, ita ut ad summum spatium ducentorum passuum latitudinis per sex horas maneat siccum : sed plusquam duo millia millium, inter sex horas, per tale spatium a littore ad littus transire non potuerunt cum curriculis, jumentis suis et omni supellectili necessaria.

4º In Josue, iv, 22 legitur : *Per arentem alveum transiit Israel Jordanem istum, siccante Domino vestro aquas ejus in conspectu vestro, donec transiretis ; sicut fecerat prius in mari Rubro, quod siccavit donec transiremus.* Eodem modo igitur Hebræi transierunt mare Rubrum quo postea Jordanem : atqui non transierunt Jordanem ope fluxus et refluxus : ergo.

Notandum est, deistis non sufficere unum aut alterum Pentateuchi prodigium via naturali explicare; modo unum sit divinum, omnia sunt divina, quia Deus doctrinam impostorum aliquo miraculo confirmare non potest; porro multa sunt prodigia in Pentateucho descripta quæ ne tentarunt quidem deistæ via naturali explicare.

Præterea, non tantum substantia factorum, sed omnes illorum circumstantiæ explicandæ forent: v. g. quomodo decem plagæ subito et inter paucos dies affligerint Ægyptum; quomodo hæc a Moyse prævisa et prædicta fuerint; quomodo illæ plagæ, dum cunctos afficiebant Ægyptios, Israelitas inter eos degentes non tangebant, etc. evidens est has circumstantias modo naturali explicari non posse: ergo denique, etc. Vide dissertationem D. Calmet sur le passage de la mer Rouge; *Bullet*, t. 1; *Bergier*, t. 6.

Josephus, Strabo et Plutarchus narrant Alexandrum cum suo exercitu mare Pamphilæ pedibus trajecisse; an pedibus siccis? non affirmat: dicunt e contra Alexandrum secus littus iter fecisse, et exercitum ejus aquam usque ad medietatem corporis habuisse: igitur transitus iste fuit naturalis, et nulla est paritas.

CAPUT SECUNDUM.

DE DURATIONE RELIGIONIS MOSAICÆ.

Cum Judæis hucusque pugnavimus adversus incredulos, communes hostes nostros; nunc autem contra ipsos Judæos arma conversuri sumus, et examinabimus 1º an religio Mosaica abrogari debuerit; 2º an de facto sit abrogata.

ARTICULUS PRIMUS.

AN RELIGIO MOSAICA ABROGARI DEBUERIT.

Notandum, in religione Mosaica duas distingui partes,

unam naturalem et alteram positivam. Pars naturalis, quæ etiam moralis dicitur, ea continet dogmata et præcepta quæ sola ratione, prout eam habemus in præsentī statu, in essentiis rerum fundata deprehenduntur, v. g. unitatem Dei, cultum illi exhibendi necessitatem, animæ immortalitatem, præmia virtutis et pœnas vitii in altera vita, Decalogi præcepta, etc. Pars positiva, quæ et cæremonialis seu ritualis vocatur, omnes complectitur leges et cæremonias quæ ex libero Dei arbitrio fuerunt institutæ, v. g. tabernaculi exstructionem, levitarum distributionem, sacerdotum ordinem et consecrationem; diversa sacrificiorum genera, victimarum purificationem, festorum aliorumque hujusmodi instituta, formas et modos. Hæc religionem Mosaicam ut talem constituunt; in his enim præcise consistit peculiare fœdus quod Deus per ministerium Moysis cum Hebræis constituit. Pars namque altera, cum ab essentiis rerum pendeat, non fuit instituta, nec finem habitura est; necessario debet esse pars religionis veræ, quæcumque sit.

Itaque de abrogatione religionis Mosaicæ tractantes, quæstionem non movemus de parte ejus naturali, sed tantum de parte positiva et cæremoniali.

PROPOSITIO PRIMA.

Religio Mosaica non erat in perpetuum duratura, sed in ordine divinatorum decretorum abrogari debuit.

Prob. 1º. Religio Mosaica evidenter erat localis; nam in ea multæ erant leges quæ uni tantum genti et non valde numerosæ convenire poterant: talis erat obligatio sæpius eundi Jerusalem, ibi festa celebrandi, sacrificia et primitias offerendi, primogenitos præsentandi, coram sacerdotibus se sistendi, etc. atqui locales illæ leges certo erant abrogandæ; centies enim in Prophetis clare prænuntiatur vocatio gentium, divisionis inter eas et Israellem existentis destructio, ut unus esset populus: ergo.

2º Ad essentiam religionis Mosaicæ pertinebat ut sa-

cerdotes familia essent Aaron, et in solo templo Jerusalem offerrentur sacrificia : atqui ex pluribus Prophetarum oraculis, hæc erant abroganda; in Isaia enim LXVI, 21, legitur : *Et assumam ex eis (gentibus) in sacerdotes et levitas.*

In Daniel IX, 26 : *Civitatem et sanctuarium dissipabit populus cum duce venturo, et finis ejus vastitas, et post finem belli statuta desolatio.... et usque ad consummationem et finem perseverabit desolatio.*

Is. XIX, 19 : *In die illa erit altare Domini in medio terræ Ægypti.... clamabunt ad Dominum a facie tribulantis, et mittet eis salvatorem et propugnatorem qui liberet eos.*

Malachiæ I, 10 : *Non est mihi voluntas in vobis, dicit Dominus exercituum, et munus non suscipiam de manu vestra; ab ortu enim solis usque ad occasum, magnum est nomen meum in gentibus, et in omni loco sacrificatur et offertur nomini meo oblatio munda.* Unde sic. Ex diversis illis textibus patet sacerdotes ex gentibus esse assumendos, templum, sanctuarium et urbem sanctam in perpetuum evertenda esse, sacrificium Deo in Ægypto et in omni loco offerendum : ergo religio Moysis abrogari debuit.

Obj. Lex Mosaica sæpissime dicitur in perpetuum, in sempiternum duratura, v. g. Exod. XXXI, 16; Lev. VI, 18; Num. XXXV, 29, et præsertim Deut. V, 29. Ergo.

R. Nego consequ. Nam 1º lex Moysis, quatenus est figurativa, aliquo sensu non erat abroganda, sed potius adimplenda; figuræ enim adimplentur quando realitas ipsius substituitur; eo sensu Christus apud Matth. V, 17, dicit : *Nolite putare quoniam veni solvere Legem aut Prophetas; non veni solvere, sed adimplere.* 2º Illæ voces, in perpetuum, in sempiternum, non absolute, sed relative accipi debent pro tota duratione reipublicæ Judaicæ vel usque ad legitimam abrogationem : sæpe legislatores humani, summi pontifices, v. g. decernunt sua statuta in perpetuum duratura : attamen non ignorant ea a successoribus suis mutari vel abrogari posse. Ergo.

PROPOSITIO SECUNDA.

Legi per Moysen promulgatæ novum fœdus substituendum erat.

Prob. 1º. Isaiaë XLII, 7: Ego Dominus vocavi te in justitia... et dedi te in fœdus populi, in lucem gentium. Unde sic. Instituendum erat fœdus quo lumen daretur gentibus: atqui lex Mosaica jam existebat tempore hujus prophetiæ: ergo ibi agitur de alio fœdere. Aliunde, lex Mosaica non erat idonea, utpote localis, ad cunctas gentes illuminandas: nova igitur lex ipsi substituenda erat, ac proinde novum fœdus.

Prob. 2º. Ex Jeremia, xxxi, 31: Ecce dies veniunt, dicit Dominus, et feriam domui Israel et domui Juda fœdus novum, non secundum pactum quod pepigi cum patribus eorum... sed hoc erit pactum quod feriam cum domo Israel post dies illos... dabo legem meam in visceribus eorum, et in corde eorum scribam eam, et ero eis in Deum, et ipsi erunt mihi in populum... et omnes cognoscent me a minimo eorum usque ad maximum. Ergo antiquo fœderi novum erat substituendum.

PROPOSITIO TERTIA.

Fœdus novum per aliquem mediatorem erat instituendum.

Prob. 1º. Ex Gen. xxii, 18: Benedicentur in semine tuo omnes gentes terræ; et ibid. xlix, 10: Et ipse erit expectatio gentium; vel, ut in Hebræo habetur: Ad ipsum erit congregatio gentium.

Deut. xviii, 15: Prophetam de gente tua et de fratribus tuis sicut me suscitabit Dominus Deus tuus; ipsum audies. Ibi agitur de propheta, numero singulari, de propheta Moysis simili, qui ergo debet esse mediator inter Deum et homines, potentia miraculorum insignis, novæ doctrinæ novique fœderis institutor; his enim characteribus Moyses ab aliis prophetis discrepat. Ergo.

Is. xix, 20 : *Clamabunt ad Dominum a facie tribulantis, et mittet eis salvatorem qui liberet eos, et cognoscetur Dominus ab Ægypto...* Ibi agitur de novo fœdere cum Ægyptiis, ac proinde cum aliis gentibus per salvatorem seu mediatorem ineundo. Et xlii, 1 : *Ecce servus meus, suscipiam eum; electus meus, complacuit sibi in illo anima mea; dedi spiritum meum super eum, judicium gentibus proferet.* Judicium ergo per aliquem mediatorem gentibus est proferendum : at hujusmodi judicium aliter intelligi non potest quam de novo fœdere cum gentibus per mediatorem ineundo, et de quo in v. 6 clarius agitur.

Innumera alia loca tam ex Prophetis quam ex aliis Scripturæ locis citari possent. Ipsi Judæi semper crediderunt et nunc credunt venturum esse mediatorem quem vocant Messiam. Ergo novum fœdus, etc.

ARTICULUS SECUNDUS.

AN RELIGIO MOSAICA DE FACTO SIT ABROGATA.

PROPOSITIO.

Jamdudum abrogatam esse religionem Mosaicam, ex ipso solo actuali Judæorum statu, evidenter demonstratur.

Abrogata est quippe, si fœdus inter Deum et Israelitas penitus sit rescissum : atqui fœdus olim existens Deum inter et Israelitas penitus rescissum est; illius namque conditiones a Deo non observantur nec ab Israelitis observari possent. 1° A Deo non observantur; Deus enim tutelam populi Judaici ipsiusque regimen in se suscepit : sed a diuturno tempore gentem Judaicam jam non tuetur, nec eam sicut antea regit; prophetas in ea non suscitatur, ministros non constituit, miracula non patrat, silent oracula; in dura captivitate a tot annis gementem, perpetuis calamitatibus obrutam non audit neque liberat; stupendum illius excidium eventurum permisit, nullum ei solatium dedit : et hæc omnia tempore adventus Christi contigerunt. Ergo 1°.

2° Conditiones fœderis antiqui observare non possent Judæi, etiamsi vellent; ex lege enim variis in locis, et præsertim in Exodo, xxix, 9, 44, etc. sola tribus Levi sacrificare poterat; ad locum tabernaculi et deinde ad templum Hierosolymitanum omnes ter in anno ascendere tenebantur, Exod. xxiii, 17; xxiv, 17; Deut. xvi, 16. Tenebantur insuper quolibet septennio a cultura terræ abstinere, debita remittere, etc. atqui hæc jamdudum impossibilia sunt Judæis, genealogiæ distingui nequeunt; templum non existit, et aliud ipsi substitutum non fuit, etc. Ergo 2°.

Neque dici potest, eadem facta tempore captivitatis Babylonæ contigisse. Nam 1° plures tunc exstiterunt prophetæ, qui missionem suam miraculis confirmabant et restitutionem rerum prænuntiabant : unde suspensa tantum, non vero abrogata erat Lex. 2° Decem et octo sæcula septuaginta annis æquiparari nequeunt. 3° Maxima pars Judæorum in Judæa tempore captivitatis remanserat. 4° In ipsamet captivitate Judæi suos habebant principes, suos judices, et magna ex parte suas observabant leges : at nihil horum ex multo tempore existit : ergo.

Ex pluribus autem famosissimis Prophetarum oraculis positiva deducuntur argumenta quæ eandem astruunt veritatem, scilicet, religionem Mosaicam esse abrogatam; religio enim Mosaica abrogata est, si Messias seu mediator per quem novum fœdus instituendum erat jam advenerit : atqui Messias jam a multo tempore venit, idque probatur ex quatuor præsertim celebrioribus Prophetiis, de quibus seorsim dicendum est.

§ I. — De prophetia Jacob.

Hæc prophetia sic habetur Gen. xlix, 10 : *Non auferetur sceptrum de Juda, et dux de femore ejus, donec veniat qui mittendus est; et ipse erit expectatio gentium.* Plures dantur variantes circa hanc prophetiam in Hebræo, in Samaritano, et in diversis Græcis, Latinis aliarumque linguarum versionibus; sed illæ variantes ad ista revocantur

puncta. 1° Loco *sceptri*, alibi legitur *virga*, *regnum*, *principatus*, vel distinctio tribus, ducta metaphora a baculo quo caput familiæ uti solebat in signum suæ auctoritatis. 2° Pro *duce*, in Hebræo habetur, *legislator*, *magistratus*. 3° Pro *de femore ejus*, quidam ferunt, *de filiis ejus*, *de inter pedes ejus*, *de vexillis ejus*. 4° Qui *mittendus est*, alibi vertitur, *pacificus*, *filius ejus*, vel *ille cui reservatur regnum*. 5° *Et ipse erit exspectatio gentium*; in Hebræo legitur, *et ipse erit congregatio populorum*. In quibusdam versionibus habetur, *et ipsi erit obedientia populorum* vel *gentium*. Omnes illæ variantes colliguntur ex textibus Hebraico et Samaritano, ex versionibus Græcis Septuaginta interpretum, Aquilæ, Symmachi et Theodotionis, ex Syriaca, Arabica et Persica, ex Latinis et ex ipsis paraphrasibus Chaldaicis ante Christum a Judæis exaratis; unde certum est alias non existere variantes essentielles: atqui omnes variantes a nobis recensitæ ad eundem sensum substantialem evidenter redeunt: ergo lectio Vulgatæ nostræ admitti et retineri potest: examinandum est igitur an ex illa prophetia sic expressa probari possit messiam jam advenisse.

PROPOSITIO.

Ex memorata Jacob prophetia clare probatur Messiam jam a multo tempore advenisse.

Prob. Ex illa Jacob prophetia probatur nostra propositio, si ille quem sanctus patriarcha sub eo nomine designat, *qui mittendus est*, sit Messias, et si jamdudum advenerit: atqui hæc duo certa sunt.

1° Ille quem designat, est Messias. Nam 1° ibi eum designat quem Deus ipsi prædicit, sicut antea Isaac et Abraham prædixerat, dicens, Gen. XII, 3; XVIII, 18; XXII, 18; XXVI, 4; XXVIII, 14: *Et benedicentur in te et in semine tuo cunctæ tribus terræ*: atqui ille in quo benedicendæ erant cunctæ tribus vel nationes terræ, juxta omnes Judæos, erat Messias. 2° Designat eum *qui mittendus est*, qui

est *exspectatio gentium*, *desideratus cunctis gentibus*, ut ait Aggæus : verum solus Messias dici potest exspectatio gentium, desideratus gentibus ; solus merito dici potest simpliciter mittendus, pacificus, filius cui reservatur regnum. 3° Antiqui Judæi, ut Septuaginta interpretes, tres Chaldaici paraphrastæ ante Christum existentes, Aquila, Symmachus et Theodotio post Christum viventes, et plures rabbini etiam recentiores, hunc textum de Messia interpretati sunt. Ergo 1°.

2° Ille quem Jacob hic designat, jamdudum venit; venire namque debuit antequam auferretur sceptrum seu potestas de Juda, priusquam cessaret dux, scriba, vel legislator de femore ejus, seu de inter pedes ejus, juxta textum Hebraicum, vel de vexillis ejus, ut fert Samaritanus, vel antequam cessaret tribus, ut alii volunt, intelligentes per *schebet* baculum præeminentiae in familia : atqui manifestum est omnem potestatem jamdudum ablatam esse de Juda; a decem enim et octo sæculis, tribus Juda nullam inter alias habet præeminentiam, nullum regem, nullum principem, nullum legislatorem, nec magistratum, imo non existit ut tribus; ubique terrarum est dispersa et durissima oppressa captivitate : ergo 3°; etc. aliunde, etc. Ergo.

Solvuntur objectiones.

Obj. 1°. Vox Hebraica שֶׁבֶט, seu *schebet*, quam per *sceptrum* vertimus, significat etiam *virgam tribulationis* : sensus ergo hujus prophetiæ hic esse potest : non auferretur virga tribulationis de Juda, donec, etc.

R. Dist. ant. Vox *schebet* significare potest virgam tribulationis, si per quædam adjuncta ad hunc sensum determinetur, *conc.* sola et in se sumpta, *nego ant.* Equidem vox illa significare potest virgam tribulationis; hæc enim vox hunc habet sensum in Ps. 11, 9 : sed jungitur cum ברזל, ferrum, et vertitur, in *virga ferrea* : at nunquam vox illa talem habet sensum nisi ad eum ex adjunctis determinetur. Porro in prophetia Jacob nulla

sunt addita quibus ad sensum istum determinetur; statim enim subjungitur, *et dux de femore ejus*, etc. Præterea diversarum versionum auctores, antiqui Judæi, et plures etiam recentiores rabbini eam sic intellexerunt. Ergo.

Plures etiam recentiores Judæi contendunt adverbium Hebraicum *ad cui*, quod per *donec* interpretamur, significare etiam *in æternum postquam*, adeo ut sensus esset: non recedet sceptrum de Juda in æternum postquam advenit Messias. Sed illi Judæi prædictum sic interpretantur vocabulum ex punctis massoreticis: atqui illa puncta nullius sunt auctoritatis, utpote valde recentia. Longe majorem merentur fidem auctores omnium versionum, et antiqui Judæi, præsertim celebriores, qui præfatum adverbium sensu nostro intellexerunt, ut patet ex versione Septuaginta interpretum, ex paraphrasibus Chaldaicis, etc. Præterea multi contendunt quod, etiam auctoritate punctorum admissa, prædicta adverbii verba non sint disjungenda, et sensu nostro intelligi debeant. Ergo.

Obj. 2º. Vocabulum SCHILOH, *qui mittendus est*, applicari potest Moysi, Saüli, David vel Salomoni: non certum est ergo per illam vocem intelligendum esse Messiam.

R. Nego ant. Nam 1º Moyses non erat de tribu Juda; 2º post alios principes citatos sceptrum seu potestas de tribu Juda non recessit: non ergo nisi in desperatione causæ ad tales interpretationes confugerunt Judæi recentiores. Quidam hucusque insaniere, ut arbitrati sint prædictam vocem de Nabuchodonosor vel de Cyro intelligendam esse, quasi illi vastatores terræ fuissent *expectatio gentium*. Ergo.

Obj. 3º. Illa Messię prædictio forsitan fuit conditionata, et fidelitati Judæorum subordinata: ergo fieri potest ut propter Judæorum peccata adventus Messię differatur, vel nunquam contingere debeat.

R. Nego ant. Nam 1º illa prædictio haberi non potest ut conditionata, quæ verbis absolutis exprimitur, et neque per antecedentia neque per sequentia ad conditionem aliquam determinatur: atqui talis est Messię

promissio in prophetia Jacob. 2° Messias non promittitur tantum pro Judæis, sed pro cunctis gentibus : promissio autem in gratiam cunctarum gentium facta, pendere non debebat a fidelitate Judæorum. 3° Messias futurus erat exspectatio gentium, omnes familiæ terræ in ipso benedicendæ erant, omnes in ipsius lumine ambulare, id est, Deum verum et unicum per ipsum cognoscere debebant : at cognitio unius veri Dei terram universam invasisit : ergo.

Præterea, prophetia Jacob correspondet prophetiæ Danielis, de qua mox dicturi sumus : porro Daniel, ix, 26, formaliter prædicit Judæos, propter suam infidelitatem, a Messia, quem negaturi erant, reprobandos esse : ergo promissio Messiæ per Jacob facta non erat conditionata.

Inst. Gen. xlix, 26, sic de tribu Joseph vaticinatur Jacob : *Benedictiones patris tui confortatæ sunt benedictionibus patrum ejus : donec veniret desiderium collium æternorum.* Unde sic. Tam absolute hic prædicitur præeminentia tribus Joseph usque dum veniat Messias, quam, v. 10, prædicta fuerat præeminentia Juda : attamen hæc prædictio erat conditionata, siquidem de facto in tribu Joseph non fuit impleta : ergo *a pari*, etc.

R. Nego majorem et dico, hæc verba, *desiderium collium æternorum*, de Messia non intelligenda esse. Nam 1° verbum *venire* non reperitur in Hebraico textu, nec in ullis versionibus antiquis. 2° Textus Hebræus sic verti potest : *Benedictiones patris tui valuerunt præ benedictionibus montium perpetuorum, præ desideriis vallium æternorum*; eundem habent sensum Septuaginta interpretes, paraphrasis Chaldaica, versio Arabica; hanc interpretationem indicat Moyses, qui, Deut. xxxiii, 13, 14, 15, de Joseph dicit : *De benedictione Domini terra ejus, de pomis cœli, et rore, atque abyssu subjacente. De pomis fructuum solis ac lunæ. De vertice antiquorum montium, de pomis collium æternorum*, etc. Hæc Moysis prædictio eadem est evidenter ac prædictio Jacob : atqui prædictio Moysis nullam promittit præeminentiam Joseph, usque dum Messias

venerit, *ut patet* : ergo nec Jacob, in textu supra citato.

Obj. 4^o. Tempore captivitatis Babylonicae ablatum est sceptrum de Juda, et tamen Messias non venit. Ergo.

R. Nego antecedens. Nam 1^o potestas tribus Judæ fuit ad summum durante captivitate suspensa, non vero destructa; ipsi Judæi sciebant illam per septuaginta annos tantum duraturam esse, ut prædixerat Jeremias, xxv, 12. 2^o Suprema potestas non fuit stricto sensu suspensa; Judæi enim suas adhuc sequebantur leges, saltem in aliquibus, quosdam ex suis contribulibus habebant magistratus seu iudices, ut patet ex historia Susannæ, Dan. xiii. 3^o Si, ut plures volunt, per vocem *schebet* intelligenda sit tantum præeminentia tribus Juda, nulla est difficultas; certum est quippe hanc tribum tempore captivitatis fuisse distinctam, ac proinde *schebet* in ea fuisse. Ergo.

Inst. Post captivitatem Babylonicam, Judæi summam non recuperaverunt auctoritatem, et duces eorum sæpe ex aliena erant tribu, v. g. Mathathias, qui erat de tribu Levi, Asmonæi pontifices, ab Asmonæo proavo Mathathia sic dicti, Joseph. l. 12, c. 8, qui per 126 annos principatum obtinuerunt, et Herodes gentilis. Ergo.

R. Nego ant. Ut enim tribus Juda supremam obtinuerit potestatem, sufficit quod fuerit gens completa, ab omnibus aliis gentibus distincta; gens quippe completa necessario supremam habet potestatem: atqui tribus Juda revera fuit post captivitatem gens completa; Judæi enim usque ad Vespasianum semper habiti sunt ut natio; tribus Judæ præminentiam in ea natione habebat, imo totam nationem moraliter constituebat; decem enim tribus remanserunt ultra Euphratem, pauci erant Benjamitæ et pauci Levitæ respectu Judæorum; aliunde Levitæ altaris servitio erant mancipati: ergo. Primus dux Judæorum post captivitatem, fuit Zorobabel de tribu Juda; gnoramus ex qua tribu fuerint illius successores per 400 annos circiter; ex eadem tribu probabiliter ortum habuerunt: contrarium saltem probari non potest. Mathathias autem erat de familia Phinees, ex genere sacerdotum et tribu Levi, sed a Judæis ob præclara facinora electus,

cis benevolentibus præfuit, Josephus, de Bello Jud. l. 1, c. 1. Jonathas et Simon pariter fuerunt electi, I Mach. vii, 30, et xiii, 8. Idem præsumi potest de aliis. Etiam si non fuissent electi, eo ipso quod legitimi essent Mathathiaë, Jonathæ et Simonis successores, ex libera Judæorum voluntate regnabant. Porro qui libere ducem eligunt, aut libere ei se submittunt, supremam habent potestatem.

Non inde concludendum est Judæos non habuisse ducem de femore Juda; nam gubernium eorum erat aristocraticum, et magnates eorum magnam exercebant potestatem: epistolæ scribebantur nomine principis seniorum, sacerdotum et totius populi, I Mach. xii, 6; suos habebant magistratus, sua tribunalia, et præsertim magnum *sanhedrin*, sicque veram exercebant potestatem. Ergo, eo sensu genuino et naturali, revera semper fuit dux de femore Juda, vel *de inter pedes ejus*, ut fert textus Hebræus, et a fortiori *inter vexilla*, si anteponatur Samaritanus, qui certe magnæ est auctoritatis; vexilla enim Asmonæorum et ipsius Herodis erant vexilla Judæorum; siquidem illi principes unicam cum Judæis componebant gentem integram, ab aliis independentem et proprio nomine designatam.

Romani illam duce Pompeio subjugaverunt, tributa illi imposuerunt, Herodem gentilem pro rege in Galilæa constituerunt, Pontium Pilatum in Jerusalem gubernatorem præfecerunt: tunc potestas Judaica fuit imminuta, sed nondum penitus extincta; quædam illius umbra adhuc aliquo tempore perseveravit, et tandem in excidio Hierosolymitano, anno Christi septuagesimo, omnino evanuit. Ergo.

Si autem admittatur interpretatio eorum qui dicunt *schebet* hic non designare supremam auctoritatem, sed tantum præeminentiam vel distinctionem tribus in Juda, donec veniat Messias, omnino evanescet præsens difficultas, *ut patet*.

§ II. — De prophetia Danielis.

Celeberrima Danielis prophetia sic legitur in Vulgata

nostra, cap. ix. Versus finem captivitatis Babylonis, Daniel commemorans *numerum annorum, de quo factus est sermo Domini ad Jeremiam prophetam, ut complerentur desolationis Jerusalem septuaginta anni*, posuit faciem suam ad Dominum ut eum in jejuniis, in sacco et cinere rogarer et deprecaretur, longam et ardentissimam effudit orationem. Tunc, adhuc eo loquente, venit archangelus Gabriel, et dixit ad eum, v. 22:

Daniel, nunc egressus sum ut docerem te et intelligeres. Ab exordio precum tuarum egressus est sermo : ego autem veni ut indicarem tibi quia vir desideriorum es : tu ergo animadvertes sermonem, et intellige visionem. Septuaginta hebdomades abbreviatæ sunt super populum tuum, et super urbem sanctam tuam, ut consummetur prævaricatio, et finem accipiat peccatum, et deleatur iniquitas, et adducatur justitia sempiterna, et impleatur visio, et prophetia, et ungatur Sanctus sanctorum. Scito ergo et animadvertes : ab exitu sermonis, ut iterum ædificetur Jerusalem, usque ad Christum ducem, hebdomades septem, et hebdomades sexaginta duæ erunt: et rursum ædificabitur platea et muri in angustia temporum. Et post hebdomades sexaginta duas occidetur Christus : et non erit ejus populus, qui eum negaturus est. Et civitatem, et sanctuarium dissipabit populus cum duce venturo : et finis ejus vastitas, et post finem belli statuta desolatio. Confirmabit autem pactum multis hebdomada una: et in dimidio hebdomadis deficiet hostia et sacrificium : et erit in templo abominatio desolationis : et usque ad consummationem et finem perseverabit desolatio.

Juxta omnes, nulla datur discrepantia substantialis inter textum Hebraicum, Vulgatam nostram et cunctas alias versiones, licet plures sint variantes.

PROPOSITIO.

Ex prophetia Danielis demonstratur jam advenisse Messiam.

Prob. Ex prophetia Danielis probatur, etc. si ille qui

annuntiatur, 1° sit Messias, et 2° jam advenerit : atqui hæc duo certa sunt.

1° Qui annuntiatur est Messias ; dicitur enim Christus venturus, Sanctus sanctorum, per quem consummanda est prævaricatio, abolendum peccatum, delenda iniquitas, adducenda justitia sempiterna, implenda visio et prophetia, instituendum et confirmandum novum pactum : atqui illi characteres soli conveniunt Messiae, et revera Messias sub his characteribus in aliis Prophetis designatur, v. g. Ps. LXXI, 7; Is. XLV, 8; Jer. XXIII, 6. Plures rabbini celebriores hanc prophetiam de Messia intelligunt, plures antiqui Judæi eam sic intelligebant, referente S. Hieronymo, in cap. IX Dan. Ergo 1°.

2° Jamdudum advenit. Post septuaginta hebdomades advenire debuit, juxta hæc verba prophetiæ : *Septuaginta hebdomades abbreviatæ sunt*, id est, juxta alias versiones, decisæ, concisæ, vel determinatæ sunt, ut *ungatur Sanctus sanctorum, deleatur iniquitas, adducatur justitia sempiterna*, etc. at illæ hebdomades jamdudum elapsæ sunt ; duplicis enim generis erant hebdomades apud Judæos, aliæ videlicet dierum ut apud nos, et aliæ annorum, juxta quod dicitur in Lev. cap. XXVI, 8 : septuaginta autem hebdomades, de quibus loquitur Daniel, sunt hebdomades annorum; in capite enim sequenti, v. 2 et 3, aliarum hebdomadarum mentionem faciens, denotat eas esse dierum : ergo præcedentes erant annorum. Aliunde magni quos prænuntiat eventus intra breve spatium 490 dierum contingere non poterant : manifestum est igitur quod ibi hebdomades annorum intellexerit. Porro septuaginta hebdomades annorum quæ 490 efficiunt annos, a multo tempore elapsæ sunt; initium enim earum differri non potest ultra centesimum annum post finem captivitatis, quo anno exiit sermo seu edictum Artaxercis Longimani ut iterum ædificaretur Jerusalem, II Esdr II, 13 : atqui plus quam 2200 effluerunt anni ab illo edicto : ergo.

Præterea, qui in ea prophetia annuntiatur, venire debuit antequam subverteretur templum post captivitatem ædificatum, dissiparetur civitas iterum exstructa, defice-

ret hostia et cessaret sacrificium : sed a multis sæculis eversum est templum, dissipata est civitas, defecit hostia et cessavit sacrificium : ergo 2º, etc. aliunde, etc. Ergo.

Solvuntur objectiones.

Obj. 1º cum quibusdam rabbinis. Christus qui a Daniele prædicitur venturus, forsitan est Agrippa secundus qui tempore ultimi excidii Hierosolymitani occisus est, vel Zorobabel, vel Esdras, vel Cyrus : ergo non constat eum esse Messiam.

R. Neg. ant. Nam 1º nullus ex illis principibus dici potest simpliciter et sine addito, *dux, Christus dux.* 2º Nullus appellari potest *Sanctus sanctorum.* 3º De nullo dici potest quod per illum adducta fuerit justitia sempiterna, finem acceperit peccatum, deleta fuerit iniquitas. 4º Agrippa junior, ex Josepho, non erat rex Judæorum, et aliunde non constat illum fuisse occisum. 5º Septuaginta hebdomades annorum non effluxerunt a Daniele usque ad Zorobabel, Esdras aut Cyrum. Ergo illa rabbinorum interpretatio merum est figmentum.

Obj. 2º. In prædicta prophetia duplex videtur esse Christus, scilicet, Christus dux post septem hebdomades, et Christus qui occidetur post sexaginta duas hebdomades : ergo *probari non potest* ibi sermonem esse de Messia; aut si de illo agatur, non constat illum jam venisse.

R. Nego. ant. Nam 1º septem hebdomades et sexaginta duæ separatim accipiendæ non sunt, quasi duplicem efficerent numerum; unicum siquidem supra efficiunt numerum : *septuaginta hebdomades abbreviatæ sunt.* 2º Christus qui occidetur, seu excindetur, ut fert Hebræus, idem est ac Christus dux prius designatus; evidens est enim secundam prophetiæ partem prioris partis esse continuationem et explicationem; in utraque parte iidem characteres, soli Messiae proprii, Christo venturo tribuuntur : ergo falsum est duplicem ibi annuntiari Christum.

§ III. — De prophetiis Aggæi et Malachiæ.

Judæi qui de captivitate cum Zorobabel venerant, negligentius in ædificando templo laborabant, quia constituti erant in impossibilitate illud juxta priorem splendorem reædificandi : inde mœrore conficiebantur. Tunc Deus misit ad eos prophetam Aggæum qui suis adhortationibus eos confortaret. Sic autem capite secundo locutus est, v. 4 :

Quis in vobis est derelictus qui vidit domum istam in gloria sua prima? et quid vos videtis hanc nunc? numquid non ita est, quasi non sit in oculis vestris? Et nunc confortare, Zorobabel, dicit Dominus : et confortare, Jesu, fili Josedec, sacerdos magne; et confortare, omnis populus terræ, dicit Dominus Deus exercituum, et facite..... quia hæc dicit Dominus exercituum : Adhuc unum modicum est, et ego commovebo cælum, et terram, et mare, et aridam; et movebo omnes gentes : Et veniet desideratus cunctis gentibus : et implebo domum istam gloria, dicit Dominus exercituum. Meum est argentum, et meum est aurum, dicit Dominus exercituum. Magna erit gloria domus istius novissimæ plus quam primæ, dicit Dominus exercituum : et in loco isto dabo pacem, dicit Dominus exercituum.

Malachias autem, qui centum annis circiter post Aggæum, scilicet tempore Nehemiæ prophetabat, hæc habet, cap. iii, 1 :

Ecce ego mitto angelum meum, et præparabit viam ante faciem meam. Et statim veniet ad templum suum Dominator quem vos quæritis, et angelus testamenti quem vos vultis. Ecce venit, dicit Dominus exercituum.

PROPOSITIO.

Ex duabus Aggæi et Malachiæ prophetiis constat præteritum esse tempus quo venire debuit Messias.

Prob. Certum est templum, a Zorobabel post captivitatem reædificatum, multis abhinc sæculis penitus esse

destructum ; factum istud a nemine in dubium revocari potest : unde si Messias templum istud visitare debuit, certum est illum jamdudum venisse : atqui, ex prophetiis Aggæi et Malachiæ, probatur Messiam templum a Zorobabel ædificatum visitare debuisse ; nam in his prophetiis agitur de templo a Zorobabel ædificato et de Messia venturo.

1° De templo a Zorobabel ædificato agitur, non vero de tertio templo ab ipso Messia ædificando, ut quidam Judæi somniant. Nam 1° Aggæus, ut confortaret Judæos mœrore confectos, eosque in construendo templo excitaret, prædicit gloriam illius futuram esse majorem gloria prioris templi : atqui hoc argumento finem intentum non obtinisset, si de alio templo post sæcula ædificando locutus fuisset. 2° Dicit, *adhuc modicum*, etc. at dicere non potuisset *adhuc modicum*, si de templo futuro cogitasset. 3° Aggæus his utitur vocibus, *domum istam, domus istius, loco isto* : illæ autem voces clare designant templum præ oculis positum, quod exstruebant Judæi, et cujus exiguitatem in comparatione prioris flentes aspiciabant. 4° Idem templum designat Malachias : nam ipsius prophetia cum prophetia Aggæi evidentem habet affinitatem ; tempore secundi templi vaticinatur, et prædicit Dominum ejus ad illud brevi esse venturum : *Ecce ego mitto... et statim veniet*, etc. Porro hæc intelligi non possent de futuro templo a Judæis excogitato : ergo, etc. Ergo 1°.

2° De Messia venturo agitur. Nam 1° ille de quo fit sermo vocatur *desideratus cunctis gentibus*, vel, ut in Hebraico textu habetur, *desideria cunctarum gentium* : at in allis prophetiis sic vocatur Messias, *expectatio gentium* ; *in eo benedicentur gentes*, etc. dare debet pacem : porro Messias vocatur *princeps pacis*, apud Isaïam IX, 6 ; *Disciplina pacis nostræ super eum*, Isaïæ LIII, 5 ; *Orietur in diebus ejus justitia et abundantia pacis*, Ps. LXXI, 7. 3° Ad ipsius præsentiam commovebuntur cælum et terra, mare et arida, et omnes gentes : hæc autem intelligi non possunt nisi de Messia. 4° Ad templum suum statim veniet ;

est dominator quem Judæi quærent, angelus testamenti quem volunt : atqui magnæ illæ qualitates soli Messiae competere possunt, et simul probant quanta debeat esse ejus dignitas. 5° Ex illius adventu et visitatione tantum honorem suscipiet templum Zorobabel, ut priori templo gloria præcellat : infinita tamen erat distantia inter utrumque templum, ratione structuræ, magnificentiæ, utensilium, vasorum, ornamentorum sacrorumque monumentorum ; in priori enim summa veneratione custodiebantur virga Aaron, tabulæ Legis, arca fœderis, man divinitus datum et conservatum ; cum sacra hæc objecta perierint in captivitate, nullum eorum fuit in secundo templo : porro nullus, præter Messiam, tantum honorem tantamque gloriam templo illi conferre potuit. 6° Denique plures rabbini, inter quos citantur Akiba, Aben-Esra, Maimonides, etc. has prophetias de Messia interpretati sunt. Ergo 2°.

Obj. Josephus, lib. 15 Antiq. cap. 11, testatur secundum templum majoribus sumptibus ab Herode fuisse exornatum quam a quovis alio antea : ergo sua magnificentia priori templo præcelluit.

R. Nego conseq. Josephus enim, dicendo Herodem majoribus sumptibus exornasse templum quam alii quilibet, loquitur tantum de principibus qui secundum templum a Zorobabel ædificatum decoraverant : non vero intendit magnificentiam hujus templi supra magnificentiam templi Salomonis extollere ; narrat enim Herodem mille carros et decem millia peritissimorum opificum per octo annos ad templum reædificandum adhibuisse : atqui nulla est proportio inter hujusmodi sumptus et sumptus quibus exstructum est Salomonis templum ; namque David, I Paral. xxii, centum millia talentorum auri, et millia millium talentorum argenti paraverat ; Salomon vero, II Paral. ii, centum nonaginta millia virorum per septem annos adhibuit, præter immensos labores quos jam fieri curaverat David, ad præparanda ligna, ferrum ad clavos, æs ad juncturas, ad lapides cædendos et poliendos. Ergo.

PARS TERTIA.

DE RELIGIONE CHRISTIANA.

Quamvis religio Christiana vera esse non possit quin sit divina, nec divina quin sit vera, sub duplici hoc respectu tamen considerari potest: igitur duplex hujus partis erit caput: primum erit de veritate religionis Christianæ; secundum, de ejus divinitate.

CAPUT PRIMUM.

DE VERITATE RELIGIONIS CHRISTIANÆ.

Religio Christiana est vera, si a Christo fuit instituta, et a discipulis ejus promulgata, prout in libris Novi Testamenti narratur. Licet igitur plurima et validissima aliunde afferri possint argumenta ad hujusmodi veritatem invicte demonstrandam, v. g. ex traditione, ex testimonio paganorum et Judæorum, sicut fecit *Bullet* in opere dicto, *Histoire de l'établissement du Christianisme tirée des seuls auteurs juifs et païens*, sufficit tamen probare libros Novi Testamenti esse authenticos, integros et veros; quod in triplici articulo præstabimus.

ARTICULUS PRIMUS.

DE LIBRORUM NOVI TESTAMENTI AUTHENTICITATE.

Illi libri sunt numero viginti septem, nempe quatuor *Evangelia*, *Actus Apostolorum*, quatuordecim *B. Pauli Epistolæ*, duæ *B. Petri*, una *B. Jacobi*, très *B. Joannis*,

una *B. Judæ*, et *Apocalypsis B. Joannis*. Quæstio est igitur an ab eis auctoribus quibus attribuuntur, et eo tempore ad quod referuntur, scripti fuerint.

PROPOSITIO.

Libri Novi Testamenti ab eis scripti sunt auctoribus quibus attribuuntur, et eo tempore ad quod referuntur.

Prob. Illud factum ut certissimum haberi debet quod constantissima omnium sæculorum fides testatur, alioquin nihil esset certum in historia : at constantissima omnium sæculorum fides testatur libros Novi Testamenti eos habuisse auctores quibus tribuuntur ; in eo quippe consentiunt omnes scriptores catholici, hæretici et pagani.

1^o *Catholici*. Increduli enim non negant eos in hac esse persuasione a tertio sæculo : atqui pariter constat eos in eadem persuasione semper fuisse ; nam persuasio ista tam universalis esse non potuisset in tertio sæculo, si ab initio non exstitisset. Præterea, sancti Patres et omnes ecclesiastici auctores qui in hoc intervallo scripserunt, v. g. S. Clemens B. Petri discipulus et successor, S. Ignatius, S. Polycarpus B. Joannis auditor, S. Justinus, S. Irenæus, de diversis libris Novi Testamenti, præsertim de Evangeliiis, mentionem sæpe faciunt. Tertullianus, lib. de Præsc. cap. 36 : « Percurre, inquit, ecclesias Apostolicas, apud quas ipsæ authenticæ litteræ eorum (Apostolorum) recitantur, sonantes vocem, et repræsentantes faciem uniuscujusque. Proxima est tibi Achaia ? habes Corinthum.. ; si non longe es a Macedonia, habes Philippos, habes Thessalonicenses. Si non potes in Asiam tendere, habes Ephesum. Si autem Italiae adjaces, Romam. » Hæc Tertulliani verba indicant ipsa beati Pauli autographa tunc apud illas ecclesias adhuc servari, aut saltem Epistolas ejus in summa veneratione esse. Ergo 1^o.

2^o *Hæretici* catholicis unanimiter consentiunt in tri-

buendis libris Novi Testamenti eis auctoribus quorum nomine inscribuntur : quoad hæreticos tempore nostro existentes, nulla est difficultas ; hos libros cultu religioso prosequuntur tanquam divinos, et iisdem ac nos tribuunt auctoribus. Rejiciunt quidem Epistolam ad Hebræos; Epistolam B. Jacobi, secundam B. Petri, duas ultimas sancti Joannis et Apocalypsim : sed cum nihil illæ Epistolæ contineant quod non sit quoad substantiam in aliis libris, controversiam hic cum hæreticis non aggredimur ; revera concludere possumus contra deistas, præsentibus hæreticos nobis esse concordantes circa librorum Novi Testamenti authenticitatem. Porro alii hæretici, etiam qui ad tempus Apostolorum magis approximabant, eandem constanter tenuerunt doctrinam, v. g. Ebionitæ, Marcionitæ, etc. Illorum intererat rejicere auctoritatem librorum quibus catholici eos refellebant : attamen illos tanquam suppositos non rejecerunt, nec ut dubios habuerunt, sed conabantur eorum sensum tum bene tum male in suas sententias detorquere. Ergo 2°.

3° Idem confessi sunt *pagani*. Plurimæ enim Celsi et Porphyrii reperiuntur objectiones apud Origenem contra religionem Christianam ; noscuntur opera et dicta Juliani Apostatæ adversus eandem religionem, ea nobis transmisit S. Cyrillus Alexandrinus in suis libris contra hunc apostatam : at illi auctores nihil arguunt contra authenticitatem librorum Novi Testamenti, imo eos sine ambiguitate eisdem ac nos tribuunt auctoribus, præsertim quatuor Evangelia. Sic Celsus multa ex Evangeliiis commemorat, quæ ex scriptis Apostolorum se decerpisse profitetur ; sic Julianus, quando prohibuit ne Christiani humaniores edocerent litteras, « Satis ipsis fuerit, *inquit*, » Lucam et Matthæum in Galilæorum cœtibus exponere. » Et iterum apud eundem Cyrill. t. 6 : « Jesum quippe » illum neque Paulus Deum dicere ausus est, neque » Matthæus, neque Lucas, neque Marcus ; sed bonus » ille Joannes... » Ergo nullum habebant dubium circa authenticitatem prædictorum librorum. Ergo 3°.

Et vero, libri Novi Testamenti ut authentici haberi

debent, si constet nullo tempore illos supponi potuisse : atqui constat, etc. Certum est enim eos in secundo et in primo sæculo exstitisse, et tunc ut authenticos habitos fuisse : porro ante hoc tempus supponi non potuerunt ; nunquam enim omnes sibi persuadere potuissent eos ab Apostolis fuisse scriptos, hæretici et pagani illud non credidissent. Numquid ecclesiæ Romanorum, Corinthiorum, etc. sibi persuadere potuissent se epistolas a B. Paulo accepisse, se eas retinere ? quo pacto vel qua fascinatione adduci potuissent ad eas in tanto honore habendas, ut in publicis cœtibus eas legerent ? Ergo.

Solvuntur objectiones.

Obj. 1º. Plures libri diu habiti sunt ut authentici, qui postea deprehensi sunt suppositi : ergo *a pari*, etc.

R. Nego consequ. et paritatem. Nam 1º hoc argumento similiter probaretur opera Virgilii, Horatii, Taciti, etc. fuisse supposita, et sic universalis admittendus esset pyrrhonismus : quod rationi evidenter repugnat.

2º Libri qui diu habiti sunt ut authentici, vel erant obscuri et parvi momenti, vel diu post auctores quibus tribuebantur prodierunt, vel quosdam præ se ferebant suppositionis characteres : unde contigit quod, ubi applicatæ sunt sanæ critices regulæ, statim detecta sit eorum suppositio. At nihil horum existit respectu librorum Novi Testamenti : non sunt obscuri et parvi momenti, siquidem fundamentum religionis Christianæ continent ; non diu post Apostolos quibus tribuuntur prodierunt, *ut probavimus* ; nulla præ se ferunt suppositionis indicia, sed, e contra, eo magis apparent authentici quo severiori subjiciuntur examini. Ergo.

Obj. 2º. In primis Ecclesiæ sæculis falsæ prodierunt Apocalypses, falsæ Apostolorum Epistolæ, falsaque eorum Acta et spuria Evangelia, quæ ad minus quinquaginta numerat doctissimus Albertus Fabricius. Ergo.

Nego consequ. et paritatem. Scripta enim sub nominibus Apostolorum aliorumque auctorum supposita, nunquam habita sunt in Ecclesia ut authentica, sed constan-

ter ut fictitia rejecta sunt: Christiani ergo cæteros pariter rejecissent libros quos ut authenticos habemus, si præbuisent suppositionis characteres; hæc igitur objectio propositionem nostram confirmat, nedum aliquid roboris ipsi detrahat: nam si falsi inveniantur nummi, merito concluditur alios esse veros quibus falsi non sunt conformes: ergo *a pari* libri apocryphi supponunt alios esse genuinos, alioquin fideles hos ab illis nunquam distinxissent.

Insuper notandum, omnia quæ in libris apocryphis scripta sunt, non ideo semper esse falsa; fieri enim potest ut liber sub alterius nomine suppositus nihil nisi verum contineat; fieri etiam potest ut plurima habeat vera et quosdam simul adjunctos contineat errores: sic Evangelia apocrypha pluribus in punctis cum quatuor Evangeliiis nostris concordant: ergo sub eo respectu illa confirmant.

Denique refert Tertullianus, lib. de Bapt. c. 17, quemdam presbyterum qui, ex pia fraude, falsa supposuerat acta sub nomine B. Pauli Apostoli, ab Ecclesia damnatum et a sacerdotio depositum fuisse: factum istud probat quanta tunc esset sollicitudo Ecclesiæ circa vera et falsa Apostolorum scripta: ergo similiter proscripsisset libros Novi Testamenti quos nunc habemus, si non effluiscent in illis evidentia authenticitatis indicia.

Notandum, tot non fuisse Evangelia apocrypha quot Fabricius numerat: nam, ut ipse observat, quædam sub diversis cognoscebantur titulis, prout ab hæreticis varia eis addita vel detracta erant: sic Evangelium secundum Matthæum dictum est Evangelium Matthæi, Evangelium Cerinthi, Evangelium Carpocratis, Evangelium duodecim Apostolorum, Evangelium secundum Hebræos, etc.

Inst. Sancti Patres Justino antiquiores pluries citant Evangelia apocrypha, et de quatuor Evangeliiis nostris nihil dicunt: ergo in primo et in secundo sæculo quatuor Evangelia nostra non magis habebantur ut authentica quam Evangelia quæ nunc cognoscuntur apocrypha.

R. Nego ant. Nam 1° Patres memorati quædam ex Evangeliiis apocryphis citare potuerunt, non quia in istis reperiiebantur Evangeliiis, sed quia aliunde sciebant ea esse vera. 2° Probabile est eos dicta quæ citant, per traditionem oralem ab Apostolis accepisse. 3° Non multi sancti Patres, sed unus aut alter nonnulla et pauca citant quæ ex Evangeliiis apocryphis excerpta esse videntur; *Fréret* enim, *Examen des Apologistes de la religion*, t. 19, vel potius auctor pessimi hujus libri, duo tantum commemorat loca ex S. Clemente Romano et ex aliis Patribus; e contra tota series Patrum, saltem a S. Justino, quatuor Evangelia nostra agnoscit et laudat. 4° Falsum est Patres Justino antiquiores de Evangeliiis nostris nihil dicere; multa namque citant quæ non solum quoad sensum, sed etiam quoad similitudinem verborum in Evangeliiis nostris leguntur: hæc igitur agnoscebant Evangelia. Papias, teste Eusebio, ipsos nominat Apostolos tanquam Evangeliorum nostrorum auctores. Plures quidem alii Patres eos non nominant; at non magis nominant Prophetas quorum sententias referunt: atqui tamen non dubitandum est quin eos agnoverint tanquam auctores prophetiarum quæ ipsis attribuuntur: ergo.

Obj. 3°. Apud Matth. xxiii, 35, fit mentio Zachariæ prophetæ filii Barachiz, qui inter templum et altare fuit occisus: at ille Zacharias fuit occisus in obsidione Jerusalem post mortem S. Matthæi, ut constat ex Josepho, de Bello Judaico, l. 4, cap. 19: ergo Matthæus non est auctor Evangelii quod ipsi tribuitur.

R. 1°. *Nego min.* Nam in II Paral. xxiv, 20, legitur quemdam Zachariam, spiritu Dei indutum, a Judæis in templo fuisse occisum; forte de illo Christus loquitur; erat quidem filius Joiadæ, sed Joiada poterat simul appellari Barachias: sæpius enim Judæi duo habebant nomina. Plures alii in scriptura Veteris Testamenti inveniuntur Zachariæ prophetæ; quamvis non legatur eos in templo fuisse occisos, non repugnat unum ex eis sic mortuum esse, et Judæos tale factum per traditionem agnovisse. Ergo.

R. 2º. Negari potest consequentia. Nam S. Matthæus non loquitur a semetipso, simpliciter vero refert sententiam Christi : at Christus per anticipationem loqui potuit de futura occisione illius Zachariæ, filii Barachiaë, qui a Josepho repræsentatur tanquam vir illustris, virtutis et libertatis suæ patriæ amantissimus, rectæ conscientiaë, et multis affluens divitiis : propter eximias suas qualitates odibilis factus est Judæis, qui occiderunt illum in medio templi. Ergo. Plures auctores hanc interpretationem admittunt. Vide Jans. in *Evang. D. Calmet; de Tillemont, t. 1 des Empereurs, etc.*

Obj. 4º. Soli Christiani authenticitatem librorum Novi Testamenti nobis testantur, sicque sunt testes in sua causa : atqui nullius testimonium in propria causa admittitur : ergo.

R. 1º. Nego maj. Nam ipsi pagani authenticitatem librorum Novi Testamenti agnoverunt, quamvis ipsorum maximi interesset eos negare. Unde *Duvoisin*, in opere cui titulus, *Autorité des livres du Nouveau Testament*, ait :

« Chose étrange ! les incrédules modernes osent con-
 » tester un fait dont les apostats et les philosophes du
 » quatrième siècle étaient obligés de convenir. Ont-ils
 » donc recouvré quelque ancien titre inconnu à l'empe-
 » reur Julien ? peuvent-ils se flatter de connaître mieux
 » que lui les monumens de l'histoire ecclésiastique ?
 » Non, sans doute ; mais, nous le disons à regret, dans
 » la manière dont Julien combattait le Christianisme,
 » on entrevoit encore un reste de pudeur et de bonne
 » foi qu'on chercherait en vain dans les écrits de nos
 » philosophes. »

R. 2º. Nego min. Omnes enim populi terræ solent audiri in his quæ ad eorum regimen, constitutiones et leges pertinent ; quia clare percipitur impossibile esse cunctos alicujus societatis homines simul ad hæc fingenda conspirasse : atqui libri Novi Testamenti ad regimen religionis Christianæ, ad illius constitutiones et leges pertinent ; in his enim continentur dogmata fide credenda, sacramenta suscipienda et præcepta adimplenda, ut cœ-

lestis obtineatur beatitudo, et summa vitetur miseria : ergo.

Præterea, antequam homines fierent Christiani, religioni paganæ vel Judaicæ erant addicti, proindeque multis imbuti præjudiciis adversus facta Evangelica et omnes libros Novi Testamenti : ergo in sua causa non judicarunt quando eorum authenticitatem admiserunt. Ergo.

ARTICULUS SECUNDUS.

DE LIBRORUM NOVI TESTAMENTI INTEGRITATE.

In memoriam hic revocanda sunt ea quæ diximus ubi de librorum Moysis integritate ; quæstio non est utrum libri Novi Testamenti aliquam subierint mutationem quoad verba, puncta, etc. sed an usque ad nos ita pervenerint integri, ut nulla in eis contingerit mutatio substantialis.

PROPOSITIO.

Libri Novi Testamenti nullam subierunt mutationem essentialem ab Apostolis usque ad nos, quoad facta vel doctrinam.

Prob. Si libri Novi Testamenti essentialem subiissent mutationem, vel ante, vel post mortem Apostolorum : atqui neutrum dici potest. 1º *Non ante mortem Apostolorum* ; Apostoli enim adhuc viventes, et fideles ab ipsis eruditi, statim reclamassent, et non permisissent fraudem ad posteros sine contradictione transmitti. Ergo 1º.

2º *Non post mortem Apostolorum* ; quidam enim Apostoli, et nonnulli ex primis eorum discipulis, per diu vixerunt, ut S. Joannes, qui circa centesimum annum post nativitatem Christi mortuus est, et S. Simeon frater, id est, consobrinus Domini et episcopus Hierosolymitanus, qui in persecutione Trajani, centum et viginti annis proventus, martyrio coronatus est. Verum post mortem hujusmodi sanctorum hominum nulla substantialis mu-

tatio in libros Novi Testamenti introduci potuit; ad hoc enim necesse fuisset ut cuncta exemplaria tunc existentia simul corrupta fuissent, et nemo contra hanc corruptionem reclamasset: atqui utrumque erat prorsus impossibile.

1° Impossibile erat cuncta exemplaria tunc existentia simul et eodem modo corrumpere. Nam ubique jam diffusi erant Christiani, in Judæa, in Syria, in tota Asia Minori, in Græcia, in multis insulis, in Alexandria, in Italia, etc. ubique eadem facta annuntiabantur, eadem doctrina prædicabatur, variæ ecclesiæ religiose servabant Epistolas B. Pauli; dubitare non possumus quin innumera tunc exstiterint librorum Novi Testamenti et præsertim Evangeliorum exemplaria, in diversis regionibus sparsa, in varias linguas conversa: atqui nemo non videt prorsus impossibile fuisse cuncta exemplaria simul colligere et eodem modo corrumpere: ergo 1°.

2° Non minus impossibile fuisset neminem contra talem corruptionem reclamasse; libri enim Novi Testamenti cunctis diebus dominicis per partes in publicis fidelium cœtibus legebantur; Tertullianus et S. Justinus testantur hoc ex antiqua consuetudine fieri, proindeque ab Apostolis: unde, si qua mutatio essentialis introducta fuisset, fideles novam doctrinam novaque miracula audiissent in ecclesiis; pontifices et presbyteri alique ministri, hos libros legentes et populo explanantes, fraudem advertissent et statim reclamassent: scimus quid contigerit quando Diocletianus sub pœna mortis jussit sacras tradi Scripturas: innumeri utriusque sexus fideles maluerunt mori, et traditores ab universa Ecclesia habiti sunt ut apostatæ. Porro supponi non licet homines doctrinæ catholicæ tam firmiter addictos patienter sustinuisse ut Scripturæ sacræ substantialiter corrumpere: ergo 2°, etc. aliunde, etc. Ergo.

Insuper, si libri Novi Testamenti essentialiter corrupti fuissent, eodem sensu corrumpi debuissent sanctorum Patrum conciones et homiliæ; innumeri namque reperiuntur in eis textus ex Evangeliiis et Epistolis Apostolo-

rum citati, qui, saltem quoad substantiam, omnino similes sunt Novo Testamento nunc existenti : at nemo dicet, nisi plane insaniat, possibile fuisse simul corrumpere omnia Novi Testamenti exemplaria, et cunctas Patrum conciones variis temporibus publice prolatas : ergo denique, etc.

Solvuntur objectiones.

Obj. 1°. SS. Patres plurima citant verba Christi quæ in Evangeliiis non leguntur : ergo ea nunc talia non habemus qualia ab initio erant.

R. Nego consequ. Nam 1° aliquando sancti Patres textus Evangelii in suis concionibus memoriter tantum citabant : itaque eos de verbo ad verbum in Evangeliiis nostris non invenimus, bene vero accurate quoad sensum. 2° Quædam verba Christi ex traditione cognoscere et referre potuerunt, sicut beatus Lucas, qui, in Act. xx, 35 hæc verba *Domini Jesu* refert : *Beatius est magis dare quam accipere*, quæ tamen in Evangeliiis nostris nunquam exstiterunt, ut semper observatum est. 3° Nonnulla etiam verba Christi depromere potuerunt ex Evangeliiis apocryphis, quæ ut nullum errorem continentia agnoscebantur ; multa enim dixit et fecit Christus quæ a quatuor Evangelistis nostris non fuerunt descripta ; S. Joan. cap. et v. ultimo.

Cæterum paucissimæ sunt hujusmodi sanctorum Patrum citationes, quæ in Evangeliiis saltem quoad sensum non reperiantur. Ergo.

Inst. 1°. Sancti Patres pluribus in locis conqueruntur exemplaria Evangelii fuisse adulterata ; idem objicit Celsus apud Origenem. Ergo.

R. Nego consequ. Sancti Patres conqueruntur hæreticos exemplaria Evangelii adulterasse, ut suos facilius tuerentur errores : at corrumpere non potuissent exemplaria catholicorum. Origenes respondebat Celso, lib. 3, contra dicta hujus philosophi : « Certe a nemine alio » Evangelium mutatum scio, præterquam a Marcionis, » Valentini et fortasse Lucani discipulis ; quod crimen

» non est Evangelii, sed eorum qui depravare audent. » Hinc videtur quanta semper fuerit vigilantia circa Scripturarum sacrarum integritatem : ergo illæ objectiones clarius demonstrant impossibile fuisse substantialem mutationem in libros Novi Testamenti inducere.

Cerinthus solum Evangelium Matthæi admittebat, Cerdo et Marcio illud rejiciebant, Evangelium S. Lucæ et plures ex Epistolis B. Pauli agnoscebant : at nihil inde contra integritatem et auctoritatem librorum Novi Testamenti inferri potest. 1° Enim illi auctores doctrinam Christi corrumpebant, et ideo rejiciebant libros ex quibus validiora adversus ipsos eruebantur argumenta. 2° Omnes Christiani undique contra illos insurrexerunt, et velut hæreticos et impostores semper habuerunt. 3° Etiam si unicum admitteretur Evangelium ut authenticum, verum et integrum, sufficienter ex illo confutarentur deistæ, siquidem tunc revelationis existentia et veritas religionis Christianæ nihilominus demonstrarentur. Ergo.

Obj. 2°. In pluribus antiquis Novi Testamenti exemplaribus non reperiuntur, 1° duodecim ultimi versus capitis decimi sexti Evangelii S. Marci, in quibus describitur resurrectio Christi; 2° sudor sanguineus Christi in agonia, de quo S. Lucas, xxii, 44; 3° historia mulieris adulteræ quam refert S. Joan. viii; 4° ille versiculus I Epist. B. Joan. v, 7: *Tres sunt qui testimonium dant in cælo, Pater, Verbum, et Spiritus Sanctus; et hi tres unum sunt* : at quatuor illi textus maximi sunt momenti : ergo saltem probabile est substantialem contigisse mutationem in libris Novi Testamenti.

R. 1°. *Nego min.* Maximi enim momenti non sunt illi textus, qui omitti possent absque ulla mutatione in doctrina Christiana : verum quatuor prædicti textus omitti possent absque ulla mutatione in doctrina Christiana; etiam si enim S. Marcus resurrectionem Christi non retulisset, non minus ex tribus aliis Evangelistis cæterisque Apostolis constaret illum a mortuis vere surrexisse; sudor sanguineus et mulieris adulteræ historia nihil

faciunt ad doctrinam Christi; quamvis textus I Epist. B. Joan. non parum inserviat ad demonstrandam mysterii sanctissimæ Trinitatis existentiam, aliunde tamen certitudo illius mysterii eruitur, et ex Evangelio ejusdem S. Joan. ergo illi textus omitti possent absque, etc. Ergo.

R. 2º. Nego conseq. Licet enim prædicti textus in pluribus antiquis exemplaribus non legantur, valde probabilius est illos genuinos esse et authenticos : ita saltem communiter sentiunt viri in antiquitate et in critices materiis peritiores, ut videre est apud celebriores Scripturæ sacræ interpretes.

Obj. 3º. Millius, doctor Anglus, triginta millia varietatum inter diversa Novi Testamenti exemplaria numeravit : at liber qui tot passus est varietates, integer dici non potest : ergo.

R. Nego min. Si enim illæ variantes quoad litteras vel interpunctiones omissas, additas, aut transmissas tantum se teneant, et substantiam factorum ac doctrinæ non afficiant, nihilominus liber ille est integer, *prout supra exposuimus* : atqui tales sunt omnes variantes quas doctor Millius notavit; iis enim non obstantibus, in quolibet exemplari et in quacumque lingua eadem leguntur facta, eadem miracula, eadem fidei dogmata, eadem morum præcepta, eadem denique doctrina : ergo.

Et vero, Millius innumera secum contulit exemplaria, innumeras versiones, innumeras ejusdem versionis editiones, innumeros codices manuscriptos, et quascumque etiam accentuum dissimilitudines minutatim recensuit : sed mirum videri non debet si in tanto diversorum exemplarium numero, tot hujus generis repertæ fuerint varietates : contrarium sine grandi miraculo advenire non potuisset; omnes enim libri, cujuscumque sint momenti et auctoritatis, tales subeunt mutationes, quæ eo frequentius contingere debuerunt quod per multa sæcula sola ope manuscriptorum multiplicari poterant exemplaria.

Unde doctissimus Bentley, qui præclaram Terentii de-

dit editionem, viginti millia varietatum observavit in diversis hujus poetæ editionibus et exemplaribus, paucis, in comparatione Millii, respectu Novi Testamenti : sic igitur concludere non dubitat : « Je suis moralement » assuré que, même sur la moitié moins d'exemplaires » (que n'en a comparé M. Mill), les variantes de ce poète » monteraient à cinquante mille. »

Nedum ingens varietatum numerus substantialem aliqujus libri integritatem afficiat, illam potius confirmat ; eo namque difficilius est aliquem librum substantialiter corrumpi quo in majori numero sunt ipsius exemplaria, versiones et editiones : atqui multæ varietates lectionum, versionum et editionum multitudinem exemplarium ostendunt ; ubi enim unicum est exemplar, ibi nulla esse potest lectionum diversitas : ergo.

Inst. Illæ varietates, licet ad substantiam factorum et doctrinæ non pertineant, libros divinos tamen dedecent : ergo Deus eas impedire debuisset, si prædicti libri essent divini.

R. 1°. Divinitatem librorum Novi Testamenti demonstrare hic non intendimus, illos enim consideramus velut libros historicos et humanos ; veritatem monumentorum quæ in ipsis continentur duntaxat inquirimus, ut ex illis noscamus principia, dogmata et præcepta religionis Christianæ, atque valida instituere possimus argumenta ad illius veritatem et divinitatem demonstrandam : ad hæc autem necesse non est ut libri Novi Testamenti divina inspiratione fuerint scripti : merito igitur a consideranda illorum divinitate hic abstinemus.

R. 2°. *Nego ant. et dico*, supra dictas varietates libros divinos non dedecere, quia repugnat Deum eas impedire teneri ; repugnat enim Deum teneri perpetuum et inutile operari miraculum : at in ea hypothesi teneretur, etc. 1° Perpetuum ; hujusmodi namque varietates præcaveri non possunt absque perpetuo miraculo, præsertim cum tot exemplarium millia per multa sæcula nonnisi manu fuerint scripta. 2° Illud miraculum prorsus inutile esset,

siquidem varietates istæ non impediunt quin religio maneat integra. Ergo.

ARTICULUS TERTIUS.

DE LIBRORUM NOVI TESTAMENTI VERITATE.

Hic spectamus Apostolos solummodo velut scriptores humanos : humani autem scriptores majorem vel minorem merentur fidem, pro indole aliisve qualitatibus, pro narrandi modo, natura factorum et variis circumstantiis in quibus constituuntur : quæstio est igitur an auctores librorum Novi Testamenti, horum habita ratione, omnimodam mereantur fidem in eis quæ narrant, adeo ut libri Novi Testamenti sint veri.

PROPOSITIO.

Libri Novi Testamenti sunt veri.

Prob. Illi libri sunt veri quorum auctores decepti non fuerunt, decipere noluerunt, nec decipere potuissent etiamsi voluissent : atqui librorum Novi Testamenti auctores decepti non fuerunt, decipere noluerunt, etc.

1^o *Decepti non fuerunt.* Plurimi enim homines sensati decipi non possunt circa facta sensibilia, publica et gravissimi momenti, quorum fuerunt testes saltem coævi : atqui auctores librorum Novi Testamenti sunt plurimi, nempe octo ; erant valde sensati, ut constat ex ipsorum scriptis ; referunt facta sensibilia, publica et gravissimi momenti, videlicet resurrectionem mortuorum, curationem ægrotorum, expulsionem dæmonum, multiplicationem panum, et sexcenta hujusmodi : horum fuerunt non solum testes coævi, sed plures fuerunt testes oculati, scilicet Matthæus, Joannes, Petrus, Jacobus et Judas frater ejus ; tres alii, Marcus, Lucas et Paulus, erant Christo coævi, millies primos viderunt discipulos et cum illis

locuti sunt : porro hujusmodi testes circa talia facta decipi non potuerunt : ergo 1°.

2° *Decipere noluerunt.* Necessario enim fatendum est auctores qui manifestos præ se ferunt sinceritatis characteres, decipere noluisse : atqui auctores librorum Novi Testamenti manifestos etc. erant enim pauperes, rudes, illitterati, inculti, tardioris ingenii : nonnisi ergo ridicule consilium tribueretur illis universum decipiendi orbem ; morum integritate ita erant conspicui, ut nullum in eis vitium deprehendere potuerint Celsus, Porphyrius et Julianus, licet religionis Christianæ hostes infensissimi ; in ipsis maxima eminet modestia et singularis animi candor ; suos nævos ingenue confitentur, suam animi imbecillitatem, ambitiosas contentiones olim inter eos exortas, incredulitatem a Christo sibi exprobratam : hæc simpliciter referunt ; innumera facta sensibus obvia, publica, gravissimi momenti, coram ingenti hominum multitudine peracta narrant ; nefandam Christi mortem placido sedatoque animo scribunt ; *et ibi*, inquiunt, *crucifixerunt eum.* In eos a quibus gravissime vexati fuerant, nulla jactant convicia, nihil querimoniam sibi permittunt, sed omnia nude et placide commemorant, sicut res omnino indifferentes et ad se non pertinentes.

Circumstantias locorum, temporis et personarum, fraudi detegendæ, si qua fuisset, aptissimas, fideliter describunt ; designant vicos, urbes, annum, mensem, diem et horam ; appellant testes adhuc viventes coram quibus res quas referunt gestæ sunt ; nominant imperatores, reges, proconsules, præsides et pontifices sub quibus hæc contigerunt : atqui evidentissime patet hujusmodi homines consilium decipiendi non iniisse.

Præterea, sanam prædicant doctrinam quam omnes semper demirati sunt ; sublimia proponunt fidei dogmata quæ, licet impenetrabilia, perfecte tamen sibi consentiunt, et in quibus acutissimi viri ne levissimum quidem unquam deprehendere potuerunt contradictionis indicium ; perfectissimas cunctarum virtutum tradunt regulas : atqui evidenter repugnat homines rudes, incultos

et illitteratos tam sublimem, perfectam, sapientem et demirandam excogitasse doctrinam : ergo, etc. Ergo 2°.

3° *Decipere non potuissent etiamsi voluissent.* Impossibile est enim decipere homines coævus circa facta quæ stricto subjiciuntur examini, et circa quæ fraus, si qua existeret, facile detegeretur : atqui facta quæ in libris Novi Testamenti referuntur stricto subjecta sunt examini, et fraus, si qua exstisset, facile detecta fuisset.

1° *Stricto subjecta sunt examini.* Agitur enim de factis gravissimi momenti, nempe de nova religione instituenda, quæ mysteria rationi impervia, et morum præcepta cupiditatibus adversa proponit; agitur de abroganda religione Judaica, de convellenda superstitione ethnica; agitur de innumeris prodigiis stupendis, de cæcis videntibus, de claudis ambulantes, de surdis audientibus, de mutis loquentibus, de dæmonibus ejectis, de mortuis ad vitam revocatis; agitur de doctrina quæ nihil in præsentī vita promittit præter jejunia, fletus, carnis afflictationes, odium et ludibria mundi, persecutiones tyrannorum, flagella, carceres, tormenta et mortem; multi tamen et Judæi et pagani hanc admiserunt doctrinam illique tam firmiter adhæserunt, ut pro ejus defensione mortem subire non dubitaverint : illam certe non admiserunt quin prius stricto examini subjecerint facta quibus veritas ejus innitebatur. Ergo 1°.

2° *Fraus circa hujusmodi facta facillime detegi potuisset.* Facillimum quippe esset detegere fraudem, si qua esset, circa facta gravissimi momenti, non in angulo vel in obscuritate peracta, sed splendida et publica; non præterita, sed coæva, et quodam modo præsentia; non quædam tantum et pauca, sed innumera; non semel aut iterum acta et quasi per transennam, sed diu perseverantia, sæpius repetita, coram multis testibus adhuc viventibus : atqui talia sunt facta Novi Testamenti : ergo si Apostoli ea supposuissent, statim fraus patens fuisset, et nemo ea admisisset ut vera : ergo 2°, etc. aliunde, etc. Ergo.

Unde *Rousseau*, civis Genevensis, *Emile*, lib. 4 : « J'a-

» vœue, que la majesté des Ecritures m'étonne, la sainteté
 » de l'Évangile parle à mon cœur. Voyez les livres des
 » philosophes, avec toute leur pompe ; qu'ils sont petits
 » près de celui-là ! Se peut-il qu'un livre à la fois si su-
 » blime et si simple soit l'ouvrage des hommes ? se peut-
 » il que celui dont il fait l'histoire, ne soit qu'un homme
 » lui-même ? Est-ce là le ton d'un enthousiaste ou d'un
 » ambitieux sectaire ? Quelle douceur, quelle pureté dans
 » ses mœurs ! quelle grâce touchante dans ses instruc-
 » tions ! quelle élévation dans ses maximes ! quelle pro-
 » fonde sagesse dans ses discours ! quelle présence d'es-
 » prit ! quelle finesse et quelle justesse dans ses réponses !
 » quel empire sur ses passions ! Où est l'homme, où est
 » le sage qui sait agir, souffrir et mourir sans faiblesse et
 » sans ostentation ? Quand Platon peint son juste ima-
 » ginaire, *de Rep. Dial. 1*, couvert de tout l'opprobre du
 » crime et digne de tous les prix de la vertu, il peint
 » trait pour trait Jésus-Christ : la ressemblance est si
 » frappante, que tous les Pères l'ont sentie, et qu'il n'est
 » pas possible de s'y tromper. Quel préjugé et quel aveu-
 » glement ne faut-il pas avoir pour oser comparer le
 » fils de Sophronisque au fils de Marie ! Quelle distance
 » de l'un à l'autre ! Socrate mourant sans douleur, sans
 » ignominie, soutint aisément jusqu'au bout son per-
 » sonnage ; et si cette facile mort n'eût honoré sa vie,
 » on douterait si Socrate, avec tout son esprit, fut autre
 » chose qu'un sophiste.

» Il inventa, dit-on, la morale. D'autres avant lui l'a-
 » vaient mise en pratique ; il ne fit que dire ce qu'ils
 » avaient fait ; il ne fit que mettre en leçons leurs exem-
 » ples. Aristide avait été juste avant que Socrate eût dit
 » ce que c'était que justice ; Léonidas était mort pour son
 » pays avant que Socrate eût fait un devoir d'aimer la
 » patrie ; Sparte était sobre avant que Socrate eût loué
 » la sobriété : avant qu'il eût défini la vertu, la Grèce
 » abondait en hommes vertueux. Mais où Jésus avait-il
 » pris chez les siens cette morale élevée et pure, dont lui
 » seul a donné les leçons et l'exemple ? Du sein du plus

» furieux fanatisme, la plus haute sagesse se fit entendre,
 » et la simplicité des plus héroïques vertus honora le
 » plus vil de tous les peuples. La mort de Socrate philo-
 » sophant tranquillement avec ses amis est la plus douce
 » qu'on puisse désirer; celle de Jésus expirant dans les
 » tourmens, injurié, raillé, maudit de tout un peuple,
 » est la plus horrible qu'on puisse craindre. Socrate pre-
 » nant la coupe empoisonnée, bénit celui qui la lui pré-
 » sente et qui pleure; Jésus, au milieu d'un supplice af-
 » freux, prie pour ses bourreaux acharnés. Oui, si la vie
 » et la mort de Socrate sont d'un sage, la vie et la mort
 » de Jésus sont d'un Dieu.

» Disons-nous que l'histoire de l'Evangile est inventée
 » à plaisir? Mon ami, ce n'est pas ainsi qu'on invente; et
 » les faits de Socrate, dont personne ne doute, sont moins
 » attestés que ceux de Jésus-Christ. Au fond, c'est recu-
 » ler la difficulté sans la détruire; il serait plus inconce-
 » vable que plusieurs hommes d'accord eussent fabriqué
 » ce livre, qu'il ne l'est qu'un seul en ait fourni le sujet.
 » Jamais des auteurs juifs n'eussent trouvé ni ce ton ni
 » cette morale, et l'Évangile a des caractères de vérité si
 » grands, si frappans, si parfaitement inimitables, que
 » l'inventeur en serait plus étonnant que le héros. »

Hæc eloquens confessio viri sua impietate contra om-
 nem revelationem notissimi, digna est ut ab omnibus
 memoria retineatur; ideo eam integram citare volui,
 licet cum illo fateri non debeamus populum Judaicum
 omnium populorum fuisse vilissimum. Ergo.

Solvuntur objectiones.

Obj. 1^o. Nulla fides adhibenda est scriptoribus qui
 aperte sibi contradicunt : atqui scriptores Novi Testa-
 menti in pluribus aperte sibi contradicunt, v. g. Mat-
 thæus et Lucas suo modo referunt genealogiam Christi
 omnino dissimilem, et alia hujusmodi quæ interpretes
 secum conciliare non possunt. Ergo.

R. Nego min. Nonnullæ quidem inter Evangelistas

reperiuntur discrepantiæ, difficultates et obscuritates, sicut inter diversos historiarum profanorum scriptores : hujusmodi autem discrepantiæ sinceritatem Apostolorum attestantur; si enim facta quæ narrant supposuissent, vel ex mutuo consilio, vel non : si prius, non reperirentur inter eos discrepantiæ quæ aptæ fuissent ad fraudem manifestandam ; si posterius, tam perfecte secum in substantia convenire non potuissent. Ergo.

Auctores librorum Novi Testamenti facta, prout memoriæ occurrunt, in magna simplicitate narrant ; in temporibus diversis scripserunt : S. Matthæus, anno sexto post mortem Christi ; S. Marcus, anno decimo ; S. Lucas, anno decimo nono ; S. Joannes, anno sexagesimo tertio, ut communiter tenetur. Unusquisque in narrando suum ordinem sequitur, suum stylum, suum scribendi modum ; unus has omittit circumstantias, alter eas describit ; hic tale factum non refert, iste non vult illud prætergredi. His autem positis, naturaliter plures inter quatuor Evangelia existere debent discrepationes, et etiam contradictiones apparentes, quæ eo difficilius sibi conciliari possunt, quo magis ab Apostolis sumus remoti, et alieni a cognitione locorum, personarum, consuetudinum aliorumque hujusmodi, quæ ad intelligentiam narrationis factorum publicorum præsentium aut cœvorum non parum inserviebant : istiusmodi ergo difficultates nos movere non debent, sed e contra auctoritatem Evangeliorum confirmant ; demonstrant enim nullam exstisise collusionem inter Evangelistas.

Cæterum de apparentibus contradictionibus istis singulatim hic agere non debemus ; pro eis recurrendum est ad Scripturæ sacræ interpretes, qui eas saltem plausibili conjectura solvunt. Vide Maldonat, Jansenium in *Evang. Calmet, Mauduit, Vence*, etc.

Quoad duas Christi genealogias, quæ primo visu sibi oppositæ videntur, *notandum* S. Lucam pluribus annis post S. Matthæum scripsisse, et Evangelium ejus ignorare non potuisse ; nihil ergo ipsi facilius erat quam eandem texere genealogiam ; aliam tamen valde diversam ordi-

nat : ergo contradictio est duntaxat in apparentia. Unde nec Judæi, nec pagani, nec hæretici eam in primis Ecclesiæ sæculis, ante Julianum Apostatam, objecerunt.

Juxta communioem sententiam, S. Matthæus genealogiam Joseph descripsit, et S. Lucas genealogiam Mariæ, sicque omnis contradictionis species evanescit. Constabat Mariam de eadem tribu esse ac Joseph : unde duo Evangelistæ, utriusque genealogiam texendo, pariter ostendebant Jesum ex tribu Juda et semine David descendere. Vide dissert. *Calmet, Mauduit, t. 1, et Bullet, Réponses critiques, t. 2, etc.*

Inst. Apostoli et Evangelistæ simplicitatem narrationis et apparentes contradictiones consulto finxerunt, ut fabulas tutius persuaderent. Ergo.

R. Nego ant. Nam 1° idem dici posset de omnibus aliis auctoribus historicis, sicque pyrrhonismus admittendus esset. 2° Quicumque Evangelia aliosque Novi Testamenti libros attente legit, clare videt et quasi sentit illorum auctores styli simplicitatem et apparentes contradictiones non affectasse, ut fucum facerent; impostores enim non ita scribere solent, ut ipse *Rousseau* supra citatus asserit. 3° Deistæ non cessant clamare Apostolos fuisse rudes et tardioris ingenii; at viri hujusmodi, in multis operibus, diversis temporibus peractis, veritatem tam solerter simulare non potuissent, ut ne unum quidem fraudis indicium ipsis excidisset. 4° Non finxissent facta publica, coætanea, coram testibus adhuc viventibus patrata. 5° Non tam alacriter mortem subiissent pro asserendis factis quorum falsitas ipsis notissima fuisset. Ergo.

Obj. 2°. Omnes librorum Novi Testamenti scriptores Christi erant sectatores : verum hujusmodi scriptores valde sunt suspecti. Ergo.

R. Nego min. Si enim librorum Novi Testamenti auctores ideo essent suspecti, quia Christi erant sectatores, a fortiori suspecti essent Cæsar, Josephus et plures alii, qui propria referunt facta : pari ratione suspecti forent omnes auctores qui leges, consuetudines et res præclare gestas suæ gentis describunt, ac proinde nulli fere histo-

riæ pofanæ adhibenda esset fides: id autem non admittunt increduli: ergo.

Testimonium igitur alicujus scriptoris non ideo rejciendum est, quia ea quæ narrat ipsius gentem, principem, dominum aut magistrum spectant: at sedulo perpendenda sunt momenta quæ illius testimonii veritatem ostendunt: porro si perpendatur testimonium Apostolorum, plurima statim occurrunt momenta quæ illius veritatem invincibiliter astruunt; testes enim qui in magna ingenuitate referunt facta sibi nociva, et in eorum confirmationem libenter moriuntur, fide sunt dignissimi: atqui tales sunt Apostoli, *ex supra dictis*. Pariter si falsum narrassent, nemini illusissent; attamen facta quæ narrant, innumeris Judæis et paganis persuaserunt: ergo.

Obj. 3º. Christiani non semel falsa narrarunt miracula in gratiam suæ religionis: ergo et Apostoli fingere potuerunt ea quæ narrant.

R. Nego conseq. et paritatem. Ratio disparitatis est, quod falsa miracula quæ identidem nonnulli Christiani ex ignorantia vel ex pia fraude narraverunt, semper quædam præ se ferant suppositionis indicia; unde, statim atque serio examini subjiciuntur, ut falsa agnoscuntur, aut saltem in legitimam falsitatis suspicionem veniunt: at nihil simile præ se ferunt miracula quæ in libris Novi Testamenti referuntur; contra vero, quo strictiori subjiciuntur examini, eo magis apparent vera, *ut jam diximus*. Ergo.

Obj. 4º. Judæi Christum persecuti sunt, illumque tanquam impostorem et malefactorem contumeliis affecerunt, ac per gravissima tormenta mortem illi intulerunt: porro, si cuncta miracula quæ in Evangeliiis narrantur essent verra, nunquam Judæi habuissent Christum ut malefactorem, nec eum tantis suppliciis affecissent, sed e contra omnes illi fidem adhibere debuissent: ergo.

R. Nego min. Constat enim homines ita constitutos esse, ut etiam apertissimas sæpe rejiciant veritates ipsorum cupiditatibus et præjudiciis adversas: atqui facta quæ in libris Novi Testamenti referuntur, cupiditatibus

Judæorum eorumque præjudiciis valde adversabantur; illi enim sibi fingeabant Messiam tanquam principem potentissimum qui eos potentes redderet, suamque gentem florentissimam et super alias gentes dominantem efficeret: nihil autem tale inveniebant in Christo. Arbitrabantur non licere morbos curare die sabbati: hinc habuerunt Christum ut impostorem, impium et blasphematorem; prodigia ejus diabolo tribuebant. Pontifices, odio erga eum semel imbuti, veritatem non inquirebant, nec ad eam attendebant, et vehementi zelo populum docebant nullam illi adhibendam esse fidem: non mirum ergo si Judæi obstinatos sese monstraverint.

Idem contigerat tempore Moysis. Quamvis enim Israelitæ testes oculati fuissent miraculorum ministerio ejus patratorum, et Deum coram ipsis alloquentem audissent, paucis tamen interjectis diebus ita facti sunt stolidi, ut vitulum aureum adorarent. Nonne nunc multi videntur homines persuasum habentes unicum peccatum mortale horrendam pœnarum æternitatem mereri, et qui tamen multis hujusmodi peccatis se inquinant? Ergo.

Præterea, multi Judæi Christum ut verum habuerunt Messiam. Nam, præter Apostolos et discipulos non paucos, qui omnes erant Judæi, tria millia una vice et quinque altera die ad prædicationem B. Petri conversi sunt, Act. 11, 41 et 14, 4: at testimonium eorum qui crediderunt plus valet quam testimonium eorum qui non crediderunt; qui enim credebant, omnia sua præjudicia deponere tenebantur, novam religionem admittebant; obligationem cupiditates coercendi sibi imponebant; qui vero non credebant, præjudicia sua sequebantur. Ergo.

Obj. 5°. Philo et Josephus Apostolis erant coætanei, ac proinde facta quæ in Novo Testamento referuntur non ignorassent: attamen nihil certum de illis dicunt, siquidem textus Josephi, qui profertur, a multis in dubium revocatur: ergo.

R. 1°. Philo prædicta facta ignorare potuit. Nam 1° sub Augusto probabilius scribebat: at verisimile est famam

Christi usque ad Alexandriam, ubi Philo demorabatur, tempore Augusti non pervenisse. 2^o Omnia fere ipsius opera versantur circa explicationem Veteris Testamenti et præcepta moralia : in hujusmodi vero operibus naturaliter locus non erat de miraculis Christi et Apostolorum loquendi; hæc enim miracula imperfecte ipsi primo innotescere debuerunt, cum longe abesset, et probabiliter ex mendacibus Judæorum relationibus ea didicisset: ergo in ipsa hypothesi quod post Tiberium scripserit, non mirum est si de factis quæ in Novo Testamento referuntur nihil dixerit. Aliunde ipsius silentium esset argumentum negativum: porro argumentum negativum contra rationes positivas prævalere non potest: ergo.

R. 2^o. Nego min. Sic enim se habet celebrer Josephi textus, qui ut testimonium de miraculis Christi proferatur, Antiq. lib. 18, cap. 4 : « Fuit autem hoc tempore » Jesus, vir sapiens, si tamen virum illum dicere deceat ; » erat enim stupendorum operum effector et magister » eorum qui vera libenter excipiunt, ac multos quidem » Judæos, plurimos etiam Græcos ad se adduxit. Hic erat » Christus; cumque eum a primorum e nobis virorum » accusatione cruci addixisset Pilatus, non tamen desti- » terunt qui ab initio ipsum dilexerant. Apparuit enim » eis tertia die redivivus, sicut Prophetæ hæc aliaque » quam plurima admiranda de eo prædixerant. Neque » ad hanc usque diem defecit denominatum ab eo Chris- » tianorum genus. » Unde sic. Authenticus est ille textus si decursu temporis operi Josephi insertus non fuerit: at rationabiliter dici non potest illum operi Josephi fuisse insertum, nam in omnibus reperitur exemplaribus etiam antiquissimis, sive impressis, sive manu scriptis; integre citatur, tanquam Josephi, ab Eusebio, a S. Hieronymo, Sophronio, Ruffinio, Sozomeno, Cedreno aliisque gravis ponderis auctoribus qui in diversis locis diversis utebantur exemplaribus, et eodem modo tamen prædictum textum legerunt: impossibile est autem in cunctis exemplaribus eum fuisse insertum, et nullum tamen suppositionis indicium unquam apparuisse: ergo.

Vide longam hujus textus discussionem apud *Houtteville*, t. 2, et apud *Bailly*, de Vera relig. t. 2.

Præterea, etiamsi concederetur hunc textum non esse authenticum, nihil contra nos sequeretur; sed, e contra, Josephi silentium facta evangelica confirmaret: nam ignorare non potuit numerosam existere sectam hominum qui profitebantur se cujusdam Christi Jesu esse discipulos, illum ut Messiam a Prophetis annuntiatum et a Judæis expectatum habebant, et miraculosa ejus opera ubique prædicabant: certe hæc naturaliter omittere non debuit; loquitur enim de Joanne Baptista ab Herode decollato, *Antiq. lib. 18, cap. 7*, et de Jacobo quem vocat fratrem Jesu qui dicitur Christus, *lib. 20, cap. 8*; eo ipso supponit se jam de Jesu locutum esse, et illum Jacobo fuisse celebriorem; loquitur etiam de variis pseudomessiis qui hoc tempore prodierunt, ortum eorum, facta et finem describit: prorsus incredibile est casu fortuito Jesum sic prætermisisse, ut ne quidem verbum de operibus et discipulis ejus dixisset; silentium ejus evidenter affectatum esset. Ergo.

Inst. Eodem tempore plures auctores profani scripserunt, et altum pariter servant silentium circa miracula Christi, licet aliquando de Christianis loquantur: at si miracula Christi essent vera, ea non ignorassent, nec tacuissent: ergo.

R. 1º. Illud argumentum est negativum: ergo nullius est roboris adversus rationes positivas.

R. 2º. Nego maj. et dico, auctores profanos non omnino siluisse circa facta Evangelica; apud eos enim plurima leguntur quæ hæc facta mirum in modum confirmant. Sic 1º Suetonius, in *Vita Vespasiani*, cap. 4, testatur tempore Christi in toto orbe percrebuisse famam de proximo Messiae adventu. « Percrebuerat Oriente » toto, *inquit*, vetus et constans opinio, esse in fatis ut » eo tempore Judæa profecti rerum potirentur. » Idem ferme habetur apud Tacitum, *Hist. lib. 5, c. 13*. Philosphus Chalcidius, *Commentario in Timæum Platonis*, extraordinariam commemorat stellam quæ in nativitate

Jesu Christi visa est a Magis; Tertullianus, in Apol. ad senatum Romanum, cap. 21, declarat stupendam solis eclipsim quæ moriente Christo accidit, paganis fuisse notissimam et in publicis archivis tunc esse consignatam : « Eum mundi casum relatum in arcanis vestris habetis. » Idem asserit Lucianus, apud Euseb. Hist. eccl. lib. 8. Celsus, Porphyrius, et præsertim Julianus Apostata, miracula Christi magicis artibus tribuunt : ergo illa saltem indirecte agnoscunt. Hæc et alia auctorum profanorum testimonia fusius legi possunt apud *Bullet, Histoire de l'établissement du Christianisme, tirée des seuls auteurs juifs et païens*, et apud *Houtteville*, t. 2.

Præterea, auctores profani facta Evangelica ignorare non potuerunt, siquidem fama eorum per orbem universum divulgabatur, innumeri homines ubique Christo nomen dabant, et ex Judæis vel paganis Christiani fiebant : at præfati auctores silentium non servassent circa talem errorem, quotidie latius serpentem et mundum universum inficientem, si ad illum confutandum rationes peremptorias habuissent : ergo silentium eorum facta Evangelica confirmaret.

Inst. Auctorum profanorum opera maxima ex parte perierunt : at in eis quæ perierunt forte peremptoria erant argumenta contra miracula Christi : ergo.

R. 1º. Modo objiciebant increduli auctores profanos omnino siluisse circa miracula Christi et Apostolorum ; nunc dicunt periisse opera in quibus hæc facta refellebantur ; sicque, pro more suo, sibi concordant religionis adversarii.

R. 2º. Nego min. Nam 1º cum hæc opera penitus sint ignota, nihil de illis affirmari potest ; imo quo jure affirmant increduli argumenta in eis exstitisse contra miracula Christi et Apostolorum, dicere possumus splendida in illis fuisse testimonia in gratiam eorundem factorum. 2º Sancti Patres, et præsertim Origines et S. Clemens Alex. plurima nobis transmiserunt fragmenta operum Celsi, Porphyrii et Juliani : in his fragmentis tam solidæ sunt quædam objectiones adversus religionem Christia-

nam, ut nullas validiores impii adinvenire potuerint. Sancti Patres eas non dissimulant, sed illis ingenue et simpliciter expositis solide respondent: atqui non magis dissimulassent argumenta factis Evangelicis opposita, si quæ fuissent; opera enim quæ refellebant erant tunc publica et in manibus adversariorum: ea igitur truncare aut graviora eorum argumenta declinare ausi non fuissent. 3^o Si in dictis operibus peremptoria exstitissent argumenta contra facta Evangelica, errore sic detecto, universus mundus ea velut fabulosa abjecisset: atqui mundus ea magis ac magis admisit et credidit, non obstantibus scriptis auctorum profanorum: nihil ergo erat in illis peremptorium adversus facta Evangelica. Unde concludendum est nihil solidum contra hæc facta dici potuisse. Ex diversis igitur objectionibus istis magis elucidatur propositionis nostræ veritas: constat igitur facta Evangelica omnimoda fide digna esse.

CAPUT SECUNDUM.

DE DIVINITATE RELIGIONIS CHRISTIANÆ.

Specialiter probaturi sumus religionem Christianam esse divinam, primum adversus Judæos, deinde adversus cæteros incredulos, quamvis utriusque generis probationes eandem veritatem respectu omnium demonstrent; religio enim non est vera relative, sed absolute.

ARTICULUS PRIMUS.

DE DIVINITATE RELIGIONIS CHRISTIANÆ ADVERSUS JUDÆOS.

Præcipuæ religionis nostræ probationes quibus uti possumus adversus Judæos, deducuntur 1^o ex oraculis Prophetarum quos agnoscunt et venerantur; 2^o ex com-

paratione inter miracula Christi et miracula Moysis ; 3^o ex connexione religionis Christianæ cum religione Judaica ; 4^o ex ultima clade Judæorum et præsentì eorum statu.

§ I. — De oraculis Prophetarum Veteris Testamenti, quos agnoscunt et venerantur Judæi.

Ex Veteris Testamenti prophetiis ostendimus legem Moysis fuisse abrogandam, et novum fœdus illi substituendum per ministerium alicujus mediatoris : si ergo demonstretur Jesum Christum esse mediatorem a Prophetis annuntiatum, eo ipso constabit religionem ab eo fundatam esse novum fœdus olim promissum, proindeque divinam : at pluribus argumentis, ex oraculis Prophetarum deductis, probatur Jesum Christum esse mediatorem seu Messiam annuntiatum.

ARGUMENTUM PRIMUM. — *Ex oraculis Jacob, Danielis, Aggæi et Malachiæ.*

In oraculis quatuor illorum Prophetarum Messias prænuntiatur, et tempus adventus ejus describitur, *ut supra probavimus*. Messias autem in his oraculis prænuntiatus, est Jesus Christus, si cuncti characteres quibus designatur, Christo et soli Christo competant : at cuncti characteres quibus in prædictis oraculis designatur Messias, Christo et soli Christo competunt ; quod paucis verbis ostensuri sumus.

De prophetia Jacob.

Ex celebri illa sancti Patriarchæ prophetia, Messias venire debuit antequam sceptrum vel præeminentia tribus auferretur de Juda, vel eo circiter tempore quo omnis præeminentia hujus tribus cessare debebat, vel saltem hæc præeminentia diu cessare non debuit antequam Messias veniret ; in Messia venturo omnes benedicendæ vel ad ipsum congregandæ sunt nationes : porro insignes hujusmodi characteres in Christo reperiuntur ; certum

est enim circa illius adventum omnem potestatem omnemque præcellentiam tribus Judæ cessasse; sceptrum proprie dictum jam cessaverat quando Judæa sub Pompeio facta fuerat provincia Romana, versus annum 63 ante Christum, aut saltem quando Herodes Magnus, Idumæus, hujus regionis principatum cum nomine regis, anno 40 ante Christum, obtinuit; Ant. Jud. l. 14, c. 26; hanc veritatem ipsi publice confessi sunt Judæi, cum exclamaverunt, dicentes : *Non habemus regem nisi Cæsarem*, Joan. xix, 15 : *Nobis non licet interficere quemquam*, ibid. xviii, 31. Verum, quidquid sit, omnis præeminentia tribus Judæ penitus evanuit in excidio Hierosolymitano, sub Vespasiano; tunc quippe templum fuit combustum, urbs eversa et tota gens destructa. Mediante Christo, omnes gentes e densissimis idololatriæ tenebris exsurgentes, ad ipsum conversæ sunt, in ipso speraverunt, in ipso benedictæ sunt; nullus autem alius proferitur in quo illi Messiæ characteres reperiri queant. Ergo.

De prophetia Danielis.

Juxta Danielis prophetiam, Messias futurus est *Sanctus sanctorum, Christus dux*; per ipsum consummanda est *prævaricatio*, finem accepturum est *peccatum*, adducenda est *justitia sempiterna* : in ipso implendæ sunt *visio et prophetia*; occidendus est, *et non erit populus ejus qui eum negaturus est*; vel, ut fert textus Hebraicus, occidendus est *non sibi*; confirmare debet pactum multis hebdomada una; in medio hebdomadis deficere debent hostia et sacrificium; *et ab exitu sermonis, ut iterum ædificetur Jerusalem*, septuaginta numerandæ sunt hebdomades. Porro cuncti illi Messiæ characteres optime in Christo et in solo Christo inveniuntur; præcipua enim difficultas est circa septuaginta hebdomades, quæ *ab exitu sermonis*, etc. usque ad Messiam impleri debent : atqui septuaginta hebdomades facile numerari possunt *ab exitu sermonis*, etc. usque ad Christum. Per illum sermonem intelligendum est edictum a rege Persarum emissum, ut

iterum ædificaretur Jerusalem, sub Nabuchodonosor destructa. Quatuor autem numerantur regum Persarum edicta de templi et urbis Jerusalem exstructione, scilicet : primum Cyri, de quo fit mentio I Esdræ, 1, anno ante baptismum Christi 566; secundum Darii Hystaspidis, quod ibidem, cap. vi, describitur, ante baptismum Christi anno 549; tertium est Artaxercis Longimani, anno regni ejus septimo, ante Christum 457, et ibidem, c. vii, refertur; quartum ab eodem Artaxerce editum fuit anno regni ejus vigesimo, II Esd. 11, ante baptismum Christi, ex probatissimis chronologiæ calculis, 475, ante æram vulgarem 445.

Investigandum est igitur quodnam ex quatuor illis edictis sit *sermo* de quo propheta Daniel loquitur. Non est primum; solius enim *templi* restaurationem permittit, et nihil dicit de urbe et mœnibus ejus. Secundum est tantummodo primi confirmatio, ut videre est in capite vi libri I Esdræ. Tertium optime quadrat cum septuaginta hebdomadis Danielis prophetæ; septimus enim regni Artaxercis annus respondet anno 457 ante nativitatem Christi: si huic numero 33 addantur anni quibus vixisse communiter crèditur Christus, habetur 490, numerus septuaginta hebdomadum annorum. Verum in illo edicto nulla etiam fit mentio de urbe et mœnibus ejus, sed tantum de libertate concessa Esdræ redeundi in Jerusalem, et secum eos ducendi de populo Israel et de sacerdotibus quibus ire placuerit, de sacrificiis Deo cœli offerendis, de auro, argento et vasis necessariis, etc. Non videtur igitur sermo ut *iterum ædificetur Jerusalem*. Quartum ejusdem regis edictum ipsam urbis exstructionem, portas et muros habet pro objecto, II Esdr. 11: probabilius ergo hoc est edictum a Daniele annuntiatum, ut multo communius censent eruditi: at illud prodiit anno vigesimo Artaxercis, et 445 ante Christum: si huic numero triginta tres adjiciantur anni, 478 erunt anni inter exitum hujus edicti seu sermonis et mortem Christi: 490 autem requiruntur ut septuaginta compleantur hebdomades; cum Christus occidi debuit in medio ultimæ hebdomadis,

tres, quatuor aut quinque anni numero 478 addi possunt; septem igitur vel octo supersunt anni qui impediunt ne adamussim computati 490 reperiantur anni, *ab exitu sermonis ut iterum ædificetur Jerusalem*, usque ad mortem Christi. Porro error tam parvus in obscura chronologiæ materia pro nihilo reputari debet, ut illust. ait *Bossuet, Hist. univ. part. 2, c. 9* : « Il n'y aurait rien de » surprenant quand il se trouverait quelque incertitude » dans les dates des rois de Perse; et le peu d'années » dont on pourrait disputer sur un compte de 490 ans, » ne feront jamais une importante question. Mais pour- » quoi discourir davantage? Dieu a tranché la difficulté, » s'il y en avait, par une décision sans réplique. Un évé- » nement manifeste nous met au-dessus de tous les raffi- » nemens des chronologistes; et la ruine totale des Juifs, » qui a suivi de si près la mort de Notre-Seigneur, fait en- » tendre aux moins clairvoyans l'accomplissement de la » prophétie. »

Aliunde non sibi consentiunt chronographi circa initium regni Artaxercis, nec circa annum nativitatis Christi, nec circa tempus quo in terra vixit. Hinc idem *Bossuet, 1^{re} part. 10^e époque, ibid.* : « On n'aurait pas be- » soin de tant de justesse, et rien ne force à prendre dans » cette extrême rigueur le milieu marqué par Daniel : les » plus difficiles se contenteraient de le trouver en quel- » que point que ce fût entre les deux extrémités; ce » que je dis, afin que ceux qui croiraient avoir des rai- » sons pour mettre un peu plus haut ou un peu plus bas » le commencement d'Artaxerce, ou la mort de Notre- » Seigneur, ne se gênent pas dans leur calcul, et que » ceux qui voudraient embarrasser une chose claire par » des chicanes de chronologie, se défassent de leur inu- » tile subtilité. » Accurate igitur numerantur septuaginta hebdomades ab exitu sermonis, etc. usque ad mortem Christi.

Cæteri vero Messiae characteres a Daniele depicti, eadem perfectione competunt Christo, qui dicitur et ex operibus suis ostenditur *Sanctus sanctorum* : destruxit

prævaricationem et peccatum, adduxit justitiam sempiternam; in ipso impletæ sunt visio et prophetiæ; occisus pro populo, ab illo negatus est; pactum pro multis confirmavit; defecerunt hostia et sacrificium legis, etc. Ergo.

De Aggæi et Malachiæ prophetiis.

Juxta Aggæi et Malachiæ prophetias, Messias visitare et illustrare debet templum a Zorobabel ædificatum; præcursor ante faciem ejus ibit et viam præparabit; in ipsius adventu commovenda sunt cælum et terra, mare et arida; cunctis gentibus futurus est *desideratus et pax*, etc. atqui hæc impleta sunt in Christo, præcursorem enim habuit Joannem Baptistam: in ipsius adventu commota sunt cælum et terra, mare et arida, tum per ejusdem miracula, tum per idolorum eversionem et omnium populorum conversionem. Secundum visitavit templum, illudque sua præsentia illustravit et sanctificandum jussit, tum verbis, tum actionibus; novum instituit sacrificium quod in omni loco nomini Dei offertur, Malachiæ 1, 11; *est pax et desideratus cunctis gentibus*, siquidem eas de tenebris eduxit, suo lumine recreavit, sua gratia sanctificavit: stupendam enim operatus est in mundo conversionem: omnes igitur characteres qui in dictis prophetiis de Messia prædicantur, apprime Christo competunt. Illi autem soli competunt. Judæi namque et celebriores rabbini frustra desudarunt ut aliquem invenirent hominem, a Christo diversum, cui hos Messiæ characteres applicare possent; in varias abierunt sententias, variasque finxerunt hypotheses ex adverso pugnantes et se invicem destruentes. Ergo.

Dices. Herodes templum a Zorobabel ædificatum demolivit, et aliud multo majus et perfectius, intra quadraginta sex annos, Joan. II, 20, suminis impensis extruxit; Joseph. Antiq. Jud. l. 15, c. 14: ergo Christus visitare non potuit templum a Zorobabel ædificatum.

R. Nego conseq. Quamvis enim legatur apud Josephum,

loco citato, Herodem vetus templum usque ad fundamenta demoliri jussisse, ut aliud multo splendidiori modo extrueretur, non censetur tamen novum reipsa ædificasse : ita saltem judicaverunt Judæi, qui in historiis suis illud vocant secundum, et aliud quod fingunt a Messia ædificandum appellant tertium; deberent tamen illud vocare quartum. Ipse Josephus, de Bello Judaico, l. 6, cap. 18, destructionem ingentis et exornatissimi hujus ædificii narrans, dicit illud ab Aggæo 639 annis et 45 diebus antea fuisse constructum : æstimat ergo ille scriptor templum ab Herode instauratum, a templo Zorobabel non fuisse diversum : Ergo Christus templum Zorobabel visitavit et gloria præsentis suæ illustravit. Ergo.

ARGUMENTUM SECUNDUM. — *Ex prophetiis quæ Messisæ originem et nativitatem respiciunt.*

1º Messias ex Abraham, Isaac et Jacob, ex tribu Juda et familia David, descendere debebat, ut pluribus in locis prædicitur et ipsi Judæi confitentur : atqui constat Christum ex tribu Juda, ex David, Jacob, Isaac et Abraham descendere, nempe ex utraque ejus genealogia a S. Matthæo et S. Luca descripta, et nunquam a Judæis in dubium revocata.

2º Messias in Bethleem Juda nasciturus erat, ex Michææ v, 2 : *Et tu, Bethleem Ephrata, parvulus es in milibus Juda : ex te mihi egredietur qui sit Dominator in Israel, et egressus ejus ab initio, a diebus æternitatis.... Et stabit, et pascet in fortitudine Domini, in sublimitate nominis Domini.... et convertentur, quia nunc magnificabitur usque ad terminos terræ. Et erit iste pax.* In illa enim prophetia Messias designatur, siquidem ille solus sub his characteribus designari potest, ut ipsi olim confessi sunt Judæi, Matth. II, 6 et 16 : atqui Christus natus est in Bethleem Juda, ut Apostoli et Evangelistæ scripserunt, Judæis non contradicentibus; fuit pax in populis, magnificatus est usque ad terminos terræ, ad ipsum conversæ sunt gentes, stat et pascit in fortitudine Domini, etc. Ergo.

3^o Ex virgine ortum Messias mirabiliter habere debebat, Isai. vii, 14 : *Ecce virgo concipiet, et pariet filium, et vocabitur nomen ejus Emmanuel*. Constat autem Christum de virgine mirabiliter et absque concursu hominis natum esse : id testatur Maria, quæ asserit, Luc. i, 34, se virum non cognoscere, et Joseph, qui, nolens eam velut adulteram traducere, voluit occulte dimittere eam, Matth. i, 19. Idem expresse testantur Evangelistæ, v. g. S. Matth. i, 18 et 25. Sola igitur difficultas est, utrum in illo textu Isaïæ, *Ecce virgo concipiet*, etc. vere de Messia agatur : at in illo textu de Messia vere agitur. Mam 1^o S. Matth. i, 22 et 23, illum sic interpretatur. 2^o Filius de virgine conceptus et natus vocatur Emmanuel, et infra, cap. ix, 6, dicitur de illo quod sit *admirabilis, consiliarius, Deus, fortis, pater futuri sæculi et princeps pacis*, quod *super humerum* ejus sit *principatus* : atqui hæc attributa proprie convenire non possunt nisi Messia. 3^o Conceptio et natiuitas pueri hic promissi annuntiatur tanquam signum divinum et extraordinarium : nullum vero esset signum nec prodigium in eo quod adolescentula viro conjuncta filium per viam naturalem conciperet et pareret. 4^o Vox Hebræa *alme*, virginem puram, integram, a viris absconsam significat, illamque sic verterunt Septuaginta interpretes et Chaldæi : ergo in ea prophetia prædicatur Messias.

Attamen Judæi communiter arbitrantur vocem Hebræam esse ambiguum, et tam juvenculam quam virginem significare posse ; illam per juvenculam interpretantur Symmachus, Aquila et Theodotio, in suis versionibus Græcis ; hodierni rabbini pertinaciter negant in illo textu de Messia sermonem haberi. Quamvis in illo puncto illis subscribere non debeamus, cum difficile vincantur, et per tempus nobis non liceat cum illis contendere, pro ista controversia remittimus ad dissert. D. Calmet, ad Bossuet, Duguet, Berthier et alios Scripturæ sacræ commentatores qui in caput vii Isaïæ scripserunt.

ARGUMENTUM TERTIUM. — *Ex prophetiis quæ vitam, passionem et mortem Messiae spectant.*

1º Messias habere debuit præcursores ad vias ejus præparandas : *Vox clamantis in deserto : Parate viam Domini, rectas facite insolitudine semitas Dei nostri*, Is. XL, 3 ; et Mal. III, 1 : *Ecce ego mitto angelum meum, et præparabit viam ante faciem meam* : porro Christus tam splendidum habuit præcursores in persona Joannis Baptistæ, ut legationem miserint Judæi ad eum interrogandum an esset Messias, Matth. III, 3 ; Luc. III, 4 ; Joan. I, 23.

2º Totum caput LIII Isaïæ de Messia intelligendum est, et Judæi, qui in alium sensum illud detorquere voluerunt, nihil nisi intricatum, tenebrosum et absurdum dicere potuerunt : at in illo capite historia passionum Christi describitur, Matth. VIII, 17 ; Act. VIII, 32, etc.

3º Zacharias de Messia sic habet, IX, 9 : *Exsulta satis, filia Sion, jubila, filia Jerusalem : ecce Rex tuus veniet tibi justus, et salvator : ipse pauper, et ascendens super asinam, et super pullum filium asinæ*, Matth. XXI, 5 ; Joan. XII, etc. et XI, 12 : *Et appenderunt mercedem meam triginta argenteos. Et dixit Dominus ad me : Projice illud ad statuarium, decorum pretium quo appretiatus sum ab eis* : hæc autem in Christo litteraliter adimpleta sunt, Matth. XXVII, 9.

4º Sic loquitur Messias apud David, Ps. XXI, 7 : *Ego sum vermis, et non homo..... Omnes videntes me, deriserunt me : locuti sunt labiis, et moverunt caput, et v. 18 : Foderunt manus meas et pedes meos ; dinumeraverunt omnia ossa mea : ipsi vero consideraverunt et inspexerunt me. Diviserunt sibi vestimenta mea, et super vestem meam miserunt sortem ; Ps. LXVIII, 22 : Dederunt in escam meam fel, et in siti mea potaverunt me aceto* : atqui de verbo ad verbum hæc in passione Christi contigerunt, Matth. XXVII, Joan. XIX, et nullus designari potest homo cui similiter conveniant : ergo.

ARGUMENTUM QUARTUM. — *Ex prophetiis quæ Messiae resurrectionem, triumphum et gentium conversionem prænuntiant.*

1º Si passio, ignominia et mors Messiae prænuntiatae fuerant, non minus clare annuntiata fuerat ipsius resurrectio. Isaïæ XI, 10 : *Ipsam gentes deprecabuntur, et erit sepulcrum ejus gloriosum.* Ps. XV, 10 : *Non dabis sanctum tuum videre corruptionem ;* Act. II, 13.

2º Ascensio pariter annuntiata fuerat. Ps. LXVII, 17 : *Ascendisti in altum, cepisti captivitatem, accepisti dona in hominibus ;* Eph. IV, 8 ; et Ps. CIX : *Dixit Dominus Domino meo : Sede a dextris meis.* Porro diversæ illæ prophetiæ naturaliter de Christo explicantur ; de nullo vero alio recte explicari possunt : ergo. Vid. Matth. XXII, 43 ; Luc. XX, 42.

3º Deus per Ezechielem, XXXVI, 26, prædixerat, dicens : *Et dabo vobis cor novum, et spiritum novum ponam in medio vestri : et auferam cor lapideum de carne vestra, et dabo vobis cor carneum. Et spiritum meum ponam in medio vestri...* Et per Joel, II, 28 : *Effundam spiritum meum super omnem carnem : et prophetabunt filii vestri et filiae vestrae..... Sed et super servos meos et ancillas in diebus illis effundam spiritum meum.* Atqui duæ illæ prophetiæ accurate completæ sunt in die Pentecostes, quando Spiritus sanctus corporali specie in Apostolos descendit, et in aliis circumstantiis in quibus ipsius effectus modo sensibili apparuerunt ; Act. II, 17.

4º Juxta diversos Prophetas, Messias futurus erat desideratus, exspectatio, dux, salvator gentium ; gentes in eo benedicendæ erant, et in lumine ejus ambulare debebant ; ipse autem earum legislator esse debebat ; Is. LXV, 4 ; et LX, 3 : verum omnes illæ qualitates Christo et soli Christo perfecte conveniunt ; ipsius enim ministerio Dei notitia universam inundavit terram, et omnes gentes in eo benedictionem acceperunt : ergo.

Multæ adhuc sunt aliæ prophetiæ plus minusve claræ, quæ similem applicationem habent in Christo : eas unus-

quisque videre potest apud D. *Huet*, *prop.* 7, vel apud varios Scripturæ sacræ interpretes : porro impossibile est tot prophetias adeo punctualiter casu fortuito in Christo fuisse impletas : non minus impossibile est aliquem impostorem ita se gessisse, ut cunctis divinorum oraculorum dispositionibus se conformaverit : ex diversis ergo prophetiis constat Christum esse Messiam, ac proinde ipsius religionem esse divinam.

§ II. — De comparatione miraculorum Christi cum miraculis Moysis.

Religionem Mosaicam admittunt Judæi ut divinam, quia persuasum habent divina esse miracula a Moyse patrata et in Pentateucho descripta : similiter igitur confiteri debent divinam esse religionem Christianam, si clare ipsis ostendatur miracula Christi majorem adhuc mereri fidem quam miracula Moysis : porro clare ostendere possumus miracula Christi majorem adhuc mereri fidem quam miracula Moysis : non sunt quidem in se certiora ; nam miracula Moysis sunt certo divina : at certiora sunt extensive, id est, ratione motivorum quibus ad ea admitenda impellimur, *ut in sequenti propositione ostendemus.*

PROPOSITIO.

Miracula Christi certiora sunt extensive quam miracula Moysis.

Prob. 1° Miracula Christi sunt extensive certiora quam miracula Moysis, si dubium circa illa magis sit impossibile : atqui dubium magis impossibile est circa miracula Christi quam circa miracula Moysis ; si quædam enim essent motiva dubitandi, repeterentur vel ex parte auctoris, vel ex parte testium, vel ex parte traditionis : at sub triplici hoc respectu magis impossibile est de miraculis Christi dubitare quam de miraculis Moysis.

1° *Ex parte auctoris.* Moyses enim, licet manifestos

sinceritatis et veracitatis characteres præbeat, fuit in aula regia institutus, ut filius filiæ Pharaonis publice habitus, omni scientia Ægyptiorum instructus, et arte politica imbutus : imo, juxta Josephum et Judæos, dux fuit Pharaonis exercitus : Christus vero in paupertate natus, externo habitu despectus, in officina patris et matris vitam degit per triginta annos, ut filius fabri habitus : at evidens est suspicionem fraudis multo difficilius cadere posse in hominem conditionis adeo ignobilis, nulla arte vel scientia instructum, quam in hominem aulicum, tanta cura instructum et arte politica imbutum.

Præterea, Moyses pluribus beneficiis affectionem Judæorum sibi conciliaverat, eos a dura servitute liberaverat, bona temporalia eis promittebat, gravissimas minabatur pœnas easque interdum divinitus infligebat : hæc autem maximam vim habent ad persuadendum. Christus, e contra, apparet in terra pauper, humilis et abjectus, omni ope et favore destitutus, sacerdotibus et magistratibus invisus ; mercedem quidem annuntiat percipiendam in cœlo, in præsentī vero vita nihil promittit sectatoribus suis, nisi probra, ignominias, odia, persecutiones, supplicia et mortem : nemo non videt quam hæc parum sint idonea ad captandam benevolentiam hominum. Ergo 1°.

2° *Ex parte testium*, et præsertim ex modo quo testimonium suum confirmarunt. Testes enim miraculorum Moysis fuerunt quidem Judæi, Ægyptii et Idumæi ; at soli Judæi fidem doctrinæ Moysis adhibuerunt, et illam credendo, nihil timendum habebant in præsentī vita ; contra vero Judæi et gentiles miraculorum Christi fuerunt testes, et simul doctrinam ipsius amplexi sunt ; imo ad testandum miraculorum existentiam et sanctitatem doctrinæ his miraculis confirmatæ, suppliciis et morti se devoverunt : verum hujusmodi testes majorem merentur fidem quam testes speculativi, quorum testimonium nullis confirmatur operibus. Ergo 2°.

3° *Ex parte traditionis* magis impossibile est dubitare de, etc. Etenim Pentateuchus, per quem miracula Moysis

ad nos usque pervenerunt, non fuit quidem suppositus, nec substantialiter adulteratus, *ut clare probavimus* : sed multo difficilius fuit libros Novi Testamenti supponere vel adulterare. Nam 1° unicus est auctor Pentateuchi, et octo sunt librorum Novi Testamenti auctores. 2° Pentateuchus unicum spectat populum, et illi soli commissus est custodiendus; libri vero Novi Testamenti ad omnes gentes pertinent et ubique statim fuerunt diffusi. 3° Soli Judæi fuerunt testes majoris partis miraculorum Moysis; non soli autem discipuli Christi ipsius miraculorum fuerunt testes; sed et Judæi et Romani, imo et universus orbis fuit testis eclipsis solis quæ moriente Christo supernaturaliter contigit in plenilunio. 4° Ex Judæorum adversariis soli Samaritani Pentateuchum admittebant : at innumeræ sectæ, tum a se invicem, tum a catholicis dissentientes, circa librorum Novi Testamenti veritatem et integritatem secum et nobis consentiunt. 5° Quando scripsit Moyses, rudes adhuc erant homines et omnino illitterati; et quando scripserunt Apostoli, scientiæ et artes ubique vigeant. 6° Quidam Judæi revera morti se devoverunt ne a fide Pentateuchi recederent, ut ex lib. Mach. constat et testatur Josephus, sed pauci admodum fuerunt; e contra, innumeri homines in primis Ecclesiæ sæculis sanguine suo facta Novi Testamenti confirmarunt : ergo 3°, etc. Ergo.

Prob. 2°. Illa miracula certiora sunt extensive quæ numero, splendore, communicatione, modo, universalitate et effectibus, aliis licet veris præstant : atqui talia sunt miracula Christi respectu miraculorum Moysis; illis videlicet præstant :

1° *Numero.* Quamvis enim Moyses multa patrauerit miracula, multo plura tamen patravit Christus, ut ex Pentateuchi et Evangelii lectione patet.

2° *Splendore.* Christus enim omne genus morborum curavit, cæcis visum, surdis auditum, mutis loquelam, claudis gressum restituit, supra mare ambulavit, panes multiplicavit, ventis imperavit, mortuos suscitavit, et, quod majus est, propria virtute tertia die post mortem

suam revixit : atqui Moyses tanta non fecit miracula.

3^o *Communicatione*. Non tantum enim Christus miracula patravit, sed facultatem alia similiter patrandi Apostolis et discipulis suis communicavit. *Infirmos curate*, inquit apud Matth. x, 8, *mortuos suscite, leprosos munde, dæmones ejicite*; ex libro Actuum Apostolorum constat hanc promissionem non fuisse vanam : Moyses autem multa ipse patravit miracula, sed nemini facultatem alia patrandi communicavit.

4^o *Modo*. Quoties namque volebat Christus et quomodo volebat miracula operabatur, sive præsens, sive absens, sive verbo, sive signo, sive solo voluntatis nutu : Moyses vero nulla unquam operatus est miracula nisi præsens, aliquo signo externo, et ordinarie ab ipso Deo determinato.

5^o *Universalitate*. Christus enim in omnem naturam supremam exercuit potestatem, in mare, in terram, in arbores, in elementa, in morbos, in vitam, in mortem ; non in corpora tantum, sed in animas : non in homines duntaxat, sed in dæmones qui ad illius præsentiam supplices erant et tremebundi, quosque reluctantes et invitos e corporibus obsessis ejiciebat et in profunda detrudebant tartara, ut ipsi confitebantur : *Venisti ante tempus torquere nos*, Matth. viii, 29 : tam varia autem non fuerunt miracula a Moyse patrata.

6^o Denique *effectibus*. Licet enim splendida et publica fuerint Moysis miracula, nulla tamen gens ethnica ope illorum ad religionem Judaicam fuit adducta : contra vero tam efficacia fuerunt Christi miracula, ut idololatriam ubique penitus everterint, et universum orbem, reluctantibus cunctis cupiditatibus et frementibus terrenis atque infernis potestatibus, ad Christianam religionem adduxerint. Ergo.

Solvuntur objectiones.

Obj. 1^o. Miracula Moysis a Judæis et a Christianis admittuntur : miracula vero Christi a solis Christianis admittuntur : ergo.

R. Nego conseq. Quamvis enim inter Judæos et Christianos de miraculis Moysis non disputetur et lis circa miracula Christi moveatur, non sequitur hæc prioribus non esse certiora : nam fieri potest ut inter litigantes res aliqua ab utraque parte admittatur, licet minus sit certa quam ea de qua litigatur, nempe quando utriusque partis interest ut admittatur : porro Christianorum sicut et Judæorum interest ut miracula Moysis admittantur, Judæorum vero refert quod miracula Christi sint falsa : non mirum ergo si, prioribus ab utraque parte admissis, de posterioribus licet certioribus disputetur. Itaque non quærendum est an hæc vel illa miracula a pluribus vel a paucioribus hominibus admittantur, ut merito judicetur quænam sint extensive aliis certiora ; sed attendendum ad vera eorum motiva : at *probavimus* miracula Christi ratione motivorum miraculis Moysis præcellere. Ergo.

Obj. 2º. Nunquam admittenda sunt miracula aliis veris miraculis opposita : atqui miracula Christi miraculis Moysis opponuntur : ergo.

R. Nego min. Miracula enim Christi miraculis Moysis non sunt opposita, si doctrina Christi nullo modo doctrinæ Moysis opponatur : atqui doctrina Christi nullo modo doctrinæ Moysis opponitur, sed illam perficit, implet et confirmat ; mirabilis namque inter utriusque Testamenti doctrinam percipitur harmonia et concordia : ergo.

§ III. — De mira connexione religionis Christianæ cum religione Mosaica.

Probavimus multas Veteris Testamenti prophetias accuratissime in Christo fuisse impletas ; certum est illam consensionem casui fortuito aut malæ fidei tribui non posse. Sed pluribus in aliis punctis mirabilis deprehenditur connexio inter utrumque Testamentum ; in utroque enim pura, sancta et perfecta est doctrina, minus tamen perfecta in Veteri et perfectior in Novo ; in multis figuris Christus adumbratur et mysteria ejus depingun-

tur. Sic 1^o Isaac ex muliere sterili per miraculum concipitur, Christus ex virgine; in Isaac omnes gentes benedicendæ sunt, in Christo ab Isaac descendente omnes de facto benedicuntur; Isaac immolandus lignum sacrificii sui in montem Moria super humeris portat, Christus ad mortem damnatus crucem bajulat in Calvariæ locum, qui est mons Moria : Joseph a fratribus venditur, et illorum omnisque terræ fit salvator, Christus a contribulibus damnatur, occiditur, et fit omnium salvator : Melchisedech, sacerdos Domini, oblationem panis et vini præsentat; Christus corporis et sanguinis sui sacrificium sub speciebus panis et vini instituit. Sic 2^o Agnus paschalis mactatur, sed nullum os ejus comminuitur : ita Christus a B. Joanne Baptista vocatur *Agnus*; velut agnus in paschate immolatur, et nullum os ejus confringitur : manna e cælo divinitus immissa populum mirabiliter nutrit in deserto; Christus de cælo descendens mirabilius corpus et sanguinem suum in sacramento vere et realiter nobis præstat in cibum : serpens ænæus in deserto exaltatus, sanat Hebræos illum aspicientes; Christus in cruce affixus gratia sua mundat eos qui viva fide ipsum aspi-ciunt; rupes percussa largas emittit aquas; Christus in latere percussus sanguinem et aquam dedit in remissionem peccatorum : varia offeruntur sacrificia, agnorum, hircorum, vaccæ rufæ, etc. in expiationem peccatorum multæ præcipiuntur corporeæ mundationes; sanguis autem et agnorum et hircorum auferre non poterat peccata; corporeæ mundationes animæ sordes non diluebant : ergo hæc erant figuræ. At illæ aliæque figuræ numero infinitæ apprime completæ sunt in Christo; nonnullas tantum ex hujusmodi figuris quasi per transennam notavimus; totum enim Vetus Testamentum sive in personis, sive in rebus, sive in eventibus et factis est velut ingens tabella in qua omnes Christi actiones, omnia ipsius facta, omnia sacramenta evidenter depinguntur : porro insanæ mentis esset dicere hæc casu fortuito contigisse; solus enim Deus potuit ea sic coordinare, disponere, adducere et perficere : ergo religio

Christiana necessarium est religionis Mosaicæ complementum : ergo est divina.

Qui mirabilem hunc inter utramque religionem concentum fusius evolutum legere intenderit, exquisitum adeat opus D. *Huet*, Abrincensis episc. vel etiam ornatissimum opus Gallicum *Comte de Valmont*, etc.

§ IV. — De ultima clade Judæorum et præsentī eorum statu.

PROPOSITIO.

Ex ultima clade Judæorum et præsentī eorum statu probatur divinam esse religionem Christianam.

Prob. Populus Israeliticus erat dilectus Deo et specialis ipsius hæreditas : promissæ illi fuerant pax, tranquillitas sempiterna, terræ Chanaan possessio, victoria de hostibus, perfecta denique temporalis felicitas, si fidelis erga Deum permaneret : hæc passim in Pentateucho leguntur, præsertim in Deuteronomio et in Prophetis, nec a Judæis negantur. Nunc autem ille populus omnis generis calamitatibus et miseriis a decem et octo sæculis subiacet; e patria ejectus, per orbem universum dispersus, in servitutem redactus, cunctis gentibus opprobrium et derisio factus est. *Unde sic argumentari licet.* Vel promissiones divinæ falsæ sint necesse est, vel Judæi propter grande aliquod scelus affliguntur : at prius dici non potest et ipsi Judæi illud velut impietatem rejiciunt : ergo propter grande aliquod scelus affliguntur : porro grande hoc scelus aliud esse nequit præter rejectionem et occisionem Messię in persona Christi; æquitas enim exigit ut pœna delicto sit proportionata; pœna igitur omnium gravissima gravissimum supponit delictum : at nullum in Judæis inveniri potest hujusmodi delictum præter rejectionem et occisionem Messię in persona Christi; illud enim delictum esset vel idololatria, vel gravis altera legis Mosaicæ infractio : atqui neutrum dici potest.

1^o *Non idololatria*; nec enim in Scripturis, nec in historia profana legitur gentem Judaicam in idololatriam prolap-

sam fuisse a reditu ex captivitate Babylonis. 2° *Non gravis alia legis Mosaicæ infractio*; nam ab illo tempore multo accuratius quam antea legem Mosaicam observaverunt, et etiam nunc illam, quantum fieri potest, observant. Ergo.

Aliunde, quoties Judæi in idololatriam vel in gravia alterius generis crimina prolapsi sunt, nunquam tam graves et tam longas subierunt pœnas. Nam 1° ipsa Babylonis captivitas nonnisi septuaginta fuit annorum. 2° Quoties sub manu Domini se humiliabant et ad ipsum suppliciter clamabant, statim a pœnis misericorditer eximebantur. 3° Frequenter Deus mittebat Prophetas qui eos in afflictionibus consolarentur, ut constat ex Scripturis: Judæi vero a tot sæculis sunt captivi et omni spe redeundi in patriam destituti, in miseria sua ingemiscunt, clamant ad Dominum, legem ejus observant, nec tamen exaudiuntur: ergo crimen eorum non est idololatria, nec alia legis infractio. Ergo. Hinc Prophetæ futuram Judæorum cladem soli Messiae rejectioni et ejus occisioni tribuebant, præsertim Daniel, cap. ix, 26.

Solvuntur objectiones.

Obj. 1°. Non ex odio, sed ex ignorantia Judæi occiderunt Christum, ut ipse testatur, Luc. xxiii, 34: *Pater, dimitte illis; non enim sciunt quid faciunt*; et B. Paulus, I Cor. ii, 8: *Si cognovissent, nunquam Dominum gloriæ crucifixissent*. At culpa ex ignorantia commissa non tantam meretur pœnam. Ergo.

R. Nego maj. et dico, Judæos Christum occidissee non tantum ex ignorantia vincibili, quæ tamen a culpa non excusat, sed etiam ex invidia et odio; id enim testantur Evangelistæ: v. g. Matth. xxvii, 18; Marc. xv, 10; et Christus pro eis rogans, quando dicit, *Non enim sciunt quid faciunt*, solummodo intendit Deo Patri suo aliquod allegare motivum quo efficacius eum impellat ad veniam eis concedendam; quicumque enim officium mediatoris pro delinquentibus suscipiunt, eos quantum possunt so-

lent excusare : sic Christus se gerit, Deum ut homo pro persecutoribus enixe rogans : ipsius autem persecutores, licet gravissimæ culpæ rei, aliquo modo tamen excusabiles erant; culpa namque eorum ex eo minuebatur quod actualiter Christum ut Filium Dei non agnoscerent; quia furore et malitia erant obcæcati. Eodem sensu intelligenda sunt B. Pauli verba : *Si cognovissent*, etc. et ista I Timoth. 1, 13 : *Misericordiam Dei consecutus sum, quia ignorans feci*. Ergo.

Inst. 1º. Repugnat Deum per tot sæcula universam Judæorum gentem punire propter quorundam privatorum scelus : atqui mors Christi fuit opus quorundam privatorum, non vero totius gentis : ergo.

R. Nego min. Illud enim crimen opus quorundam privatorum dici non potest, sed merito toti tribuitur genti, quod nomine totius gentis illud approbantis fuit patratum : atqui Christus in nomine totius gentis Judaicæ approbantis fuit occisus; nam fuit damnatus a Synagoga, a principibus populi, a scribis et Legis doctoribus : populus autem Judaicus ex omni parte in Jerusalem congregatus propter festum Paschæ videbat et applaudebat, clamabat et dicebat : *Tolle, tolle, crucifige eum*, Joan. xix, 15; *Sanguis ejus super nos et super filios nostros*, Matth. xxvii, 25. Ergo. Quinimo, etiam nunc tota gens Judaica occisionis Christi, quantum in se est, fit rea; factum enim majorum suorum approbat, Christum pertinaciter negat et blasphemat, damnationi ejus libenter subscribit, et sanguinem ejus imprecando postulare non cessat. Ergo.

Inst. 2º. Si Judæi tam dure tractarentur propter rejectum Christum, eodem modo tractari deberent cæteræ gentes quæ pariter Christum rejiciunt et detestantur : attamen illud non evenit : ergo.

R. Nego maj. quoad sequelam. Quamvis enim Judæi ita propter rejectum Christum tractentur, non sequitur, eodem modo tractandas esse cæteras gentes quæ pariter illum rejiciunt; quia respectu Dei grande est discrimen inter Judæos et alias gentes; Deus enim solemne cum

Judæis iniit pactum, et multo pluribus eos cumulavit beneficiis quam cæteras gentes : si ergo ingratos se ostendant, pactum sancitum infringant et transgrediantur, multo magis sunt rei, ac proinde multo maiorem merentur pœnam. Præterea, Judæi non tantum rejecerunt Christum, sed insuper illum contumeliis, suppliciis et crudelibus tormentis affecerunt, et turpissima morte perimerunt; quod nulla gens altera fecit. Ergo.

Inst. 3º. Si gens Judæa propter rejectum Christum sic affligatur, Christianorum regna deberent e contra jugiter florere et omnibus bonis abundare : atqui hoc non contingit : ergo.

R. Nego maj. In tota enim præsentī quæstione contra Judæos ratiocinamur per argumentum ad hominem, nempe ex variis Scripturæ textibus, in quibus, juxta ipsos, perfecta illis promittebatur temporalis felicitas, si jugiter fidele præstarent Deo obsequium : nos e contra contendimus totum Christi nobiscum fœdus in bonis duntaxat spiritualibus esse constitutum : ergo ex statu temporali Christianorum nihil adversum nos concludi potest.

Inst. 4º. Decem tribus Israel quæ in Media et in variis Assyriæ partibus remanserant, occisionis Christi non fuerunt complices : atqui tamen semper remanserunt in captivitate : ergo.

R. Nego min. Nam, post captivitatem Babylonicam, omnes Israelitæ facultatem habuerunt cum Judæis redeundi; plurimi quidem redierunt et unicam gentem cum Judæis composuerunt; cæteri vero qui apud Medas et Assyrios remanere voluerunt, cum illis commixti, religionem ac leges patriæ deseruerunt, et ab illo tempore ad populum Judaicum pertinere cessaverunt : dici ergo non potest eos in captivitate remansisse. Ergo.

Inst. 5º. Non Judæorum, sed Romanorum auctoritate crucifixus est Christus : ergo Judæi tantam non patiuntur cladem ob rejectionem et occisionem Christi.

R. Nego conseq. Judæi namque hanc cladem merito dicuntur pati ob Christi rejectionem et occisionem, si

revera mors Christi ipsis tribuenda sit : atqui mors Christi Judæis tribuenda est, licet auctoritate Romanorum fuerit crucifixus ; nonnisi enim accusante et constanter postulante Judæorum consilio, hæc damnationis sententia lata fuit ; ad eam Judæi quasi invitum duxerunt Pilatum, Romanorum præsidem ; damnatum Christum contumeliis affecerunt, morti ejus astiterunt ac feroci gaudio consenserunt, impiis dictæriis ei patienti et morienti illuserunt ; hanc patrum suorum agendi rationem approbaverunt quotquot ab illo tempore fuerunt Judæi : ergo deicidii merito omnes reputantur rei. Ergo.

Constat igitur præsentem luctuosam Judæorum calamitatem soli Messię rejectioni et occisioni in persona Christi tribuendam esse. Deus ipse uno saltem miraculo evidenti hanc interpretationem confirmavit.

Nam Julianus Apostata, potentissimus Romanorum imperator, in odium Christi, Judæos sub ægidio suo accepit eosque in pristino statu restituere voluit ; undique eos in Jerusalem convocavit et templum instaurare cœpit : at operantes breviter ab opere cessare coacti sunt, Deo contra eos evidenter pugnante : factum sic refert Ammianus Marcellinus, testis oculatus, ethnicus, Juliani amicus et laudator, ac proinde minime suspectus, lib. 23, cap. 1.

« Julianus imperii sui memoriam magnitudine operum
 » gestiens propagare, ambitiosum quondam apud Jero-
 » solymam templum instaurare sumptibus cogitabat im-
 » modicis, negotiumque maturandum Alpio dederat An-
 » tiochensi : cum itaque rei idem fortiter instaret Alpius,
 » juvaretque provinciæ rector, metuendi globi flamma-
 » rum prope fundamenta crebris assultibus erumpentes,
 » fecerunt locum, exustis aliquoties operantibus, inac-
 » cessum ; hocque modo, elemento destinatus repellente,
 » cessavit inceptum. » Factum istud a pluribus hujus
 temporis ecclesiasticis auctoribus relatum, v. g. a S. Am-
 brosio, a S. Chrysost. a S. Gregorio Nazian. a Rufino,
 Socrate, Sozomeno, Theodoretto, etc. certe in dubium
 revocari non potest : atqui evidenter est miraculosum :

ergo. Vide circa illud factum *Bullet, Histoire de l'établissement du Christianisme; Houtteville, et præsertim Dissert. de Warburton sur les tremblemens de terre arrivés à Jérusalem sous Julien l'Apostat.*

ARTICULUS SECUNDUS.

DE DIVINITATE RELIGIONIS CHRISTIANÆ ADVERSUS INCREDULOS.

Jam probatum est religionem Christianam esse divi-
nam : multæ adhuc solidissimæ ejusdem veritatis super-
sunt demonstrationes undique velut scaturientes. Cum
omnes specialiter evolvere non possimus, præcipuas tan-
tum seligemus easque educemus 1º ex prophetiis Christi;
2º ex miraculis ejus; 3º ex ipsius resurrectione; 4º ex
illius doctrinæ excellentia; 5º ex mira ejusdem doctrinæ
propagatione; 6º ex martyrum multitudine et constantia.

§ I. — De prophetiis Christi.

PROPOSITIO.

*Divinitas religionis Christianæ probatur ex prophetiis
a Christo editis.*

Prob. Multa enim Christus prænuntiavit, tum de
seipso, tum de discipulis, tum de religione sua, tum de
Judæis.

1º *De seipso.* Nam Matth. xvi, 21 : *Cœpit ostendere
discipulis suis quia oporteret eum ire Jerosolymam, et multa
pati a senioribus, et scribis, et principibus sacerdotum, et
occi- di, et tertia die resurgere. Cap. xx, 18 : Ecce ascendi-
mus Jerosolymam, et Filius hominis tradetur principibus sa-
cerdotum, et scribis, et condemnabunt eum morte, et tradent
eum gentibus ad illudendum, et flagellandum, et crucifigen-
dum; et tertia die resurget.*

2º *De suis discipulis.* Trinam enim prædixit negatio-
nem Petri cum horæ determinatione : *Amen dico tibi,
quia in hac nocte, antequam gallus cantet, ter me negabis,*

Matth. xxvi, 34; prodicionem Judæ annuntiavit, Joan. xiii, 21, 26: *Quia unus ex vobis tradet me.*

3° De sua religione. *Ubicumque prædicatum fuerit hoc Evangelium in toto mundo, dicetur et quod hæc fecit in memoriam ejus*, Matth. xxvi, 13. *Si exaltatus fuero a terra, omnia traham ad meipsum*, Joan. xii, 32. *Eritis mihi testes in Jerusalem, et in omni Judæa, et Samaria, et usque ad ultimum terræ*, Act. i, 8. *Euntes docete omnes gentes*, Matth. xxviii, 19.

4° De Judæis plurima prædixit, nempe urbis Jerusalem destructionem, templi eversionem, reipublicæ ruinam, totius gentis cladem, signa antecessura, circumstantias, tempus et modum descripsit; dicit enim vallandam esse civitatem undique, coangustandam et penitus evertendam, ita ut non remaneat *lapis super lapidem qui non destruat*, Matth. xxiv, 2. Declarat futuras esse seditiones, bella, terræ motus, famem, tribulationem *qualis non fuit ab initio mundi*, Marc. xiii, 7; Luc. xix, 43, et Matth. xxiv, 21. Verum diversæ illæ prædictiones divinæ sunt prophetiæ, si 1° ante eventum fuerint editæ, 2° si eventu sint confirmatæ; 3° si eventus viis naturalibus prævideri non potuerit; 4° si casui fortuito tribui non possit: atqui hæc quatuor certa sunt.

1° Illæ prædictiones *ante eventum fuerunt editæ*. Omnimoda enim fide digni sunt Apostoli eas referentes, et supponi non potest eos fingere voluisse prædictiones sibi probrosas, qualis est ea quæ trinam B. Petri negationem spectat; saltem, in illa hypothesi, non finxissent eas publice notas. Præterea, plures ex illis prophetiis in libris Novi Testamenti ante eventum erant consignatæ, v. g. illæ quæ generalem doctrinæ Christi diffusionem spectabant, et quæ ad destructionem Jerusalem attinebant; Evangelia enim SS. Matth. Marci et Lucæ ante gravissimam hanc cladem existebant: solus Joannes post eventum scripsit. Ergo 1°.

2° *Eventu fuerunt confirmatæ*, ut nemo diffiteri potest.

3° *Eventus annuntiati viis naturalibus prævideri non potuerunt*; sunt enim contingentes et a causis liberis dependen-

tes: v. g. fieri poterat ut Christus non flagellaretur, non crucifigeretur; ut Petrus illum non negaret, vel non ter negaret, vel non ante galli cantum; ut Judas non esset traditor; ut doctrina tam nova non ubique prædicaretur, vel non susciperetur: nulla via naturali omnes circumstantiæ luctuosissimæ Jerusalem obsessionis et eversionis depingi poterant eo præcise modo quo Josephus ipsum describit eventum in sua historia de Bello Judaico. Ergo 3°.

4° Absurde diceretur hujusmodi eventus cum suis circumstantiis, *casu fortuito* contingentes, prædictionibus sic adamussim congruisse: ergo 4°, etc. aliunde, etc. Ergo.

§ II. — De miraculis Christi et Apostolorum.

Miracula Christi et Apostolorum hic simul jungimus, quia eandem vim habent probandi.

PROPOSITIO.

Ex miraculis Christi et Apostolorum invicte probatur religionem Christianam esse divinam.

Prob. Illa religio est divina quæ divinis confirmatur miraculis: atqui religio Christiana divinis confirmatur miraculis; nam in libris Novi Testamenti multa leguntur miracula a Christo et ab Apostolis in gratiam religionis Christianæ patrata.

1° Jubente Christo, aqua in vinum convertitur, morbi contumaciores aufugiunt, cæci vident, surdi audiunt, muti loquuntur, claudi ambulant, paralytici sanantur, dæmones ejiciuntur, mortui ad vitam redeunt, panes multiplicantur: horrenda maris tempestas sedatur; Christo moriente, velum templi scinditur, terra contremiscit, saxa confringuntur, monumenta reserantur, sanctorum corpora resurgunt, ambulant et videntur, sol insolitam patitur eclipsim, ipse Christus vere mortuus ad vitam sese revocat, cœlos ascendit, Spiritum sanctum in Apostolos effundit, etc. porro hæc stupenda opera vera sunt miracula.

2° Ipsi pariter Apostoli, solo Christi nomine invocato, multa etiam operantur miracula ad religionis Christianæ confirmationem; sic enim B. Petrus hominem ex utero matris claudum sanat, Act. iii, 1; paralytico ab annis octo jacenti in grabato facilem membrorum usum restituit; Tabitham a mortuis suscitatur, Act. ix; Ananiæ et Saphiræ mendacium repentina morte plectit, et solo quidem imperio, Act. v; ægroti in plateis publicis expositi sola ejusdem Apostoli umbra sanantur, ibid. v, 15. Similiter B. Paulus Barjesum, insignem magum, subita cæcitate coram proconsule Sergio afficit, Act. xiii, 11; claudum Lystris sanat, ibid. iv, 7; juvenem gravi casu oppressum ad vitam revocat, ibid. xx, 9; et adeo stupenda sunt quæ operatur prodigia, ut pagani illum tanquam deum habeant, illique velint sacrificium offerre. Act. xiv, 11: certe hæc facta sunt miracula. Ergo.

Solvuntur objectiones.

Obj. 1°. Ipse Christus miracula adhibere noluit ad probandam missionis suæ divinitatem: ita *Rousseau*, 3^e *lettre de la Montagne*, *Mélanges*. Ergo.

R. Nego ant. Nam Christus Judæos et discipulos suos ad testimonium operum suorum revocat, ut eos ad sibi credendum impellat. Sic, apud Joan. x, 25: *Opera quæ ego facio in nomine Patris mei, hæc testimonium perhibent de me... et si mihi non vultis credere, operibus credite, ut cognoscatis et credatis quia Pater in me est, et ego in Patre.* Cap. xi, 42, in sua oratione antequam Lazarum suscitaret, ait: *Ego autem sciebam quia semper me audis, sed propter populum, qui circumstat, dixi, ut credant quia tu me misisti.* Manifestum est ergo Christum voluisse missionem suam miraculis confirmare.

Inst. 1°. Sæpius Christus secreto sua patravit miracula, silentium his quos sanaverat præscripsit, prodigia iis qui ea petebant denegavit, et coram credentibus ea fecit: atqui non ita se gessisset, si doctrinam suam miraculis confirmare intendisset: ergo.

R. Dist. maj. Christus nonnulla secreto patravit miracula; *concedo*, omnia, *neg. ant.* Equidem Christus nonnulla secreto operatus est miracula, et silentium circa illa commendavit, ut exemplum humilitatis nobis præberet. Sed omnia non sic operatus est; multa e contra publice fecit pæcise ut cognoscerentur, qualia sunt multiplicatio panum, Lazari resurrectio, tot infirmorum curationes, et liberatio hominis cui Christus dixit, Luc. viii, 39: *Redi indomum tuam, et narra quanta tibi fecit Deus; et abiit per universam civitatem, prædicans quanta illi fecisset Jesus*, etc. Ergo.

Si autem Christus miracula aliquando postulantibus, v. g. Herodi, scribis et pharisæis denegaverit, nihil inde concludi potest; non tenebatur enim curiositati impiorum hominum acquiescere: porro Judæi et Herodes ex sola curiositate vel ex incredulitate miracula postulabant a Christo, *tentantes eum*, Marc. viii, 11; sufficientia enim jam existebant prodigia ut in eum crederent, si veritatem sincere quæsiissent: ergo.

Obj. 2º. In templo Æsculapii quotidie sanabantur ægroti; Vespasianus duos curavit infirmos, tota conspiciente Alexandria civitate; Apollonius Thyenensis, inter multa prodigia, puellam Romæ suscitavit: attamen illa prodigia veram fuisse religionem paganorum non probabant: ergo *a pari*, etc.

R. 1º. Non qualiacunque prodigia vim habent probandi veram esse doctrinam in cujus gratiam patrantur, sed ea duntaxat quæ manifestis donantur divinitatis characteribus: at paganorum prodigia quæ nobis objiciuntur, manifestis non donabantur divinitatis characteribus; siquidem doctrina paganorum erat evidenter absurda, ut adversarii fatentur: ergo.

R. 2º. Nego maj. Illa enim prodigia admitti non debent ut vera, quæ sufficienter non sunt probata: at prodigia quæ nobis objiciuntur sufficienter non sunt probata, imo nullo fulciuntur monumento fide digno.

1º Sacerdotes Æsculapii erant medici, et naturalia

adhibebant remedia ut ægrotos sanarent; non vero solis verbis pellebant morbos etiam insanabiles, ut faciebant Christus et Apostoli: hoc ipsis publice exprobrare non dubitavit Arnobius, qui insuper declarat non omnes qui templum Æsculapii adibant sanari, sed multos in eodem statu mansisse, alios in peiori rediisse, et paucos fuisse sanatos. Origenes et Aristophanus, poeta Græcus et paganus, testantur mercede conductos fuisse egenos, ut fingerent se esse ægrotos, et deinde apparerent sanati. Ergo 1°.

2° Narrant quidem Suetonius, Vita Vesp. n. 7, et Tacitus, Hist. lib. 4, n. 81, Vespasianum duos viros ex plebe Alexandrina sanasse, et uni restituisse usum oculorum, alteri vero usum unius manus: at Suetonius et Tacitus non fuerunt testes oculati hujus facti; et præterea, ex modo quo illud referunt, legitima statim suboritur suspicio. Vespasianus enim tunc eo præcise tempore ad imperatoris dignitatem promovebatur, adulatores undique circumstantes illi gratulabantur, quærebant pro more illi placere, et aliquid ipsi gratum ostendere vel excogitare; interea duo infirmi ad genua ejus advolvuntur, et curationem ab illo exposcunt. « Vespasianus » primo irridere cœpit, aspernari, *inquit Tacitus*, atque » illis instantibus, modo famam vanitatis metuere, modo » obsecratione ipsorum et vocibus adulantium in spem » induci, etc. » Non ergo arbitrabatur se habere potestatem hos infirmos curandi: fecit tamen quod ab ipso postulabant aulici, et *statim*, ait Tacitus, *conversa ad usum manus, ac cæco reluxit dies*. Non sic Christus et Apostoli operabantur miracula. Nonne verisimile est aulicos Vespasiano adulari volentes, duos mercede conduxisse homines ut fingerent se esse infirmos, et deinde a novo imperatore sanatos? Ergo 2°.

3° Nullius auctoritatis est historia Apollonii Thyanensis; fuit enim scripta a Philostrato centum annis ad minus post Apollonium, ex nonnullis memorialibus cujusdam Damidis, Apollonii comitis et amici; non ipse Damis hæc memorialia tradidit Philostrato, sed Julia,

Severi imperatoris uxor, quæ ea a quodam viro ignoto acceperat : nemo autem non videt hujusmodi facta nullius esse auctoritatis ; a nullo teste oculato referuntur, nullo monumento fide digno fulciuntur. Ergo. Vide *Houtteville*.

§ III. — De Christi resurrectione.

Certissima est resurrectio Christi, eo ipso quod authenticæ, veri et integri sint libri Novi Testamenti : attamen, cum factum istud gravissimi sit momenti, paulo fusius illud explanare convenit ; præcipuum est enim totius religionis nostræ fundamentum, ut ait Apostolus, I Cor. xv, 14 : *Si autem Christus non resurrexit, inanis est ergo prædicatio nostra, inanis est et fides vestra.*

PROPOSITIO.

Ex resurrectione Christi invicte demonstratur religionem Christianam esse divinam.

Prob. 1º. Si Christus revera surrexit, ipsius religio, cunctis fatentibus, certo est divina : atqui Christus vere surrexit ; vere enim surrexit si testes ipsius resurrectionem referentes decepti non fuerint, decipere noluerint, et decipere non potuissent etiamsi voluissent : atqui hæc tria sunt certissima.

1º *Non fuerunt decepti.* Plurimi enim testes, ad credendum minime proclives, decipi non possunt circa factum sensibile, gravis momenti, quod ipsis multoties, conjunctim et unanimi sensuum testimonio manifestatur : atqui tales sunt testes qui resurrectionem Christi referunt.

1º *Sunt plurimi.* I Cor. xv, 4 et seq. *Christus..... resurrexit tertia die secundum Scripturas... et visus est Cephæ, et post hoc undecim : deinde visus est plus quam quingentis fratribus simul, ex quibus multi manent usque adhuc, quidam autem dormierunt. Deinde visus est Jacobo, deinde Apostolis omnibus : novissime autem omnium visus est et mihi,*

2° Ad credendum minime erant proclives; ex ipsorum enim narratione constat eos hac de re spem jam abjecisse, et mulieribus resurrectionem factam esse testantibus credere noluisse: *Visa sunt ante illos sicut deliramentum verba ista, et non crediderunt illis*, Luc. xxiv, 11; et ejusdem xxiv, 36: *Dum autem hæc loquuntur, stetit Jesus in medio eorum, et dixit eis: Pax vobis; ego sum, nolite timere: conturbati vero et conterriti, existimabant se spiritum videre. Et dixit eis: Quid turbati estis, et cogitationes ascendunt in corda vestra? videte manus meas et pedes meos, quia ego ipse sum; palpate et videte quia spiritus carnem et ossa non habet, sicut me videtis habere. Et cum hoc dixisset, ostendit eis manus et pedes. Adhuc autem illis non credentibus et mirantibus præ gaudio, dixit: Habetis hic aliquid quod manducetur?* Et apud Joan. xx, 24, S. Thomas qui erat absens quando Christus discipulis primo apparuit, cæteris dicentibus ei, *Vidimus Dominum*, respondit: *Nisi videro in manibus ejus fixuram clavorum, et mittam digitum meum in locum clavorum, et mittam manum in latus ejus, non credam.* Certe hujusmodi testes ad credendum non erant nimis proclives. 3° Factum quod testantur est sensibile, ut patet ex modo dictis et ex tota narratione; est gravis momenti, ut nemo diffidetur; multoties ipsis fuit manifestatum; Apostolis enim præbuit seipsum vivum post passionem suam, in multis argumentis, per quadraginta dies apparens eis, loquens de regno Dei, Act. i, 3; ipsis conjunctim apparuit, nempe undecim, omnibus Apostolis, et plus quam quingentis fratribus simul. 4° Hoc factum unanimi sensuum testimonio fuit comprobatum; Christum namque redivivum sæpe viderunt, audierunt, allocuti sunt, et sanctissimam ipsius carnem propriis manibus contrectaverunt: ergo, etc. Ergo.

2° *Decipere noluerunt.* Illi enim testes merito judicantur decipere noluisse, qui manifestos præ se ferunt sinceritatis characteres: atqui testes resurrectionis Christi manifestos præ se ferunt sinceritatis characteres: *id constat ex dictis* ubi de veritate librorum Novi Testam-

menti. Præterea, supponi non potest omnes Apostolos casu fortuito sibi consensisse ad decipiendum, fingendo Christum resurrexisse; si enim decipere voluissent, aliquid secum inire debuissent pactum ante vel post mortem Christi : atqui neutrum dici potest. 1° Non ante mortem Christi, quia Christus hujus fraudis particeps fuisset, quod evidenter repugnat; absurdum est enim ignominiosæ morti se devovisse, præcise ut futura ipsius resurrectio prædicaretur. Insuper, sperare non potuisset fore ut discipuli sui, imperiti, ignobiles et timidi, tale fictitium dogma insuperabili constantia prædicarent, periculo vitæ et sanguinis effusione confirmarent : aliunde non ita nuntiasset Judæis resurrectionem suam tertia die futuram esse, ultro enim aperiebat eis viam imposturam prohibendi. Ergo 1°.

2° Nec post mortem Christi. Si enim Christus tertia die, secundum promissionem, non resurrexisset, aperte vidissent discipuli se turpiter ab illo delusos fuisse, nihilque ab eo sperandum : repugnat autem tot homines; ita delusos et nulla spe emolumenti incitados, consentire ad fingendum factum cujus falsitatem norunt, propter gloriam impostoris a quo fuerunt decepti; repugnat eos factum ab ipsis excogitatum usque ad sanguinis effusionem ita testari, ut ex tot discipulis ac mulieribus nullus fraudem aperiat. Repugnat insuper Christi discipulos in summo gradu omnes habuisse dotes sibi contradictorias : at, si finxissent et prædicassent Christum resurrexisse, dum revera non surrexisset, dicendum foret illos in summo gradu habuisse, etc. ostendissent quippe in summo gradu simplicitatem et dissimulationem, timiditatem et audaciam, ignobilitatem et animi celsitudinem, fanatici delirium et altam sapientiam, crassam ignorantiam et exquisitam persuadendi artem, impiam et sacrilegam in cælos conspiracy et summam in Deum pietatem atque in proximum charitatem; denique fuissent simul monstra perversitatis et prodigia sanctitatis : ergo, etc. Ergo 2° decipere noluerunt.

3° *Decipere non potuissent etiamsi voluissent. Decipere*

enim non potuissent, nisi corpus Christi e tumulo sustulissent; alioquin, ostenso cadavere, fraus eorum statim patuisset: at nulla via Apostoli corpus Christi e tumulo auferre potuerunt; nam conditum erat in monumento in rupe exciso, cujus ostium lapide claudebatur et publico signatum erat sigillo, ibique præpositi erant milites, præcise ne discipuli furarentur corpus et dicerent: *Resurrexit a mortuis*, Matth. xxvii, 64: unde Apostoli illud auferre non potuerunt nisi vi aperta milites vincendo, vel dolo eos aliquo modo decipiendo, vel pecuniis eos corrumpendo, vel subterranea via ad sepulcrum perveniendo: atqui nihil horum dici potest.

1° Non vi aperta milites vincendo; nam adeo timidi erant ut, apprehenso Domino, statim fugerint, et eum adhuc vivum cum juramento et detestatione negaverit Petrus ad vocem unius ancillæ, licet cæteris constantior videretur: supponi autem non potest tales homines inermes ausos fuisse milites vi aperta debellare, et si id tentassent, certe hoc Judæos non latuisset, frausque statim detecta fuisset. Ergo 1°.

2° Non per dolum, custodes decipiendo et vigilantiam eorum fallendo; nam ibi positi fuerant custodes ne corpus ab Apostolis surriperetur: magna ergo cum circumspeditione invigilare debuerunt. Præterea, nulla fingi potest hypothesis in qua corpus sic per dolum ablatum fuisset; quomodo enim istud contingere potuisset? An dum omnes dormirent? Sed prorsus incredibile est custodes qui speciale mandatum caute invigilandi accipere debuerant, omnes simul correptos fuisse somno, et adeo gravi ut nullus strepitu fuisset excitatus; nam frangendum erat sigillum, ingens revolvendus erat lapis; insuper tam periculosum opus aggredientes discipuli, quam potissimum festinassent, ac proinde corpus statim abstulissent, nec sudarium solvissent, nec lintamina per ordinem in varias sepulcri partes posuissent. Aliunde, qui tantam adhibuerant curam ne tale accideret furtum, impunitam non reliquissent militum negligentiam et discipulorum fraudulentiam. An dicetur discipulos

opium militibus præbuisse sumendum, ut profundiori somno dormirent? At verisimile non est Apostolos, qui præ timiditate fugerant, hoc medium tentasse; incredibile est omnes custodes, sine exceptione et suspicione, soporiferum bibisse liquorem : si id fecissent, fraudem sibi illatam aperuissent, ut Judæorum animadversionem devitarent. Ergo.

3° Dici non potest discipulos corpus Christi abstulisse, custodes pecuniis corrumpendo; nam erant pauperrimi, et insuper naturali hominum indoli repugnat omnes custodes suo sic defuisse officio, dum religione et præjudiciis tam fortiter oppositi erant Apostolis, et extrema a Judæis pertimescenda haberent. Et certe, tanta infidelitas impunita remanere non debuisset: attamen nullibi legitur talem corruptionem fuisse punitam vel exprobratam, sive militibus, sive Apostolis aut Christianis. Ergo.

4° Dici non potest eos per viam subterraneam ad sepulcrum pervenisse, et corpus sic abstulisse; sepulcrum enim in petra erat excisum: via ergo subterranea impossibilis erat. Aliunde, spatium unius diei sufficiens non fuisset ad hujusmodi operationem; insuper talis via efodi non potuisset sine gravi strepitu, proindeque sensibilis remansisset, et totum artificium aperte patuisset: ergo 4°, etc. aliunde, etc. Ergo.

Prob. 2°. Nullo modo suspecti sunt testes qui factum quod narrant veris miraculis confirmant: sed Apostoli resurrectionem Christi narrantes, veris miraculis confirmarunt testimonium suum; dispersi sunt enim per orbem universum, et ubique resurrectionem Christi annuntiabant, ubique vera patrabant miracula, ut ex libro Actuum constat: ergo.

Prob. 3°. Quinquaginta dies post mortem Christi, cœperunt Apostoli prædicare publice et coram omni multitudine illum surrexisse; semper exprobraverunt Judæis quod illum interemissent, *quem vos crucifixistis, quem Deus suscitavit a mortuis*, Act. iv, 10. Confidenter asserebant principes Synagogæ pecunia induxisse milites ut dicerent se dormientibus supervenisse discipulos, et cor-

pus ejus e tumultu sustulisse; accusatio hæc fuit publica, constans et gravissima; attamen Judæorum principes, sacerdotes, scribæ et pharisæi nihil dixerunt ut accusationem adeo sibi injuriosam destruerent; vocaverunt duntaxat Apostolos seditiosos, rebelles, blasphemos, templi violatores, legis contemptores; *comminemur eis ne ultra loquantur in nomine hoc (Jesu) ulli hominum*; Act. iv, 17. Tacite ergo confitebantur veram esse resurrectionem, aut saltem nihil peremptorium contra illam se habere dicendum. Ergo.

Plures utilissime legi possunt auctores circa resurrectionem Christi, et imprimis Ditton, *La religion Chrétienne prouvée par le seul fait de la résurrection de J.-C.* Wost, *Observations sur l'histoire et les preuves de la résurrection de J.-C.* Sherlock, *Les témoins de la résurrection de J.-C. examinés suivant les règles du barreau*; Lyttlon, *Observations sur la conversion et l'apostolat de S. Paul.* Quatuor illi auctores sunt Angli, sed eorum opera citata in linguam Gallicam fuerunt conversa. Utilissime etiam legi potest opus dictum, *Triomphe de l'Evangile, lettre neuvième.*

Solvuntur objectiones.

Obj. 1º. Facta et circumstantiæ quibus probatio nostra ex resurrectione Christi desumpta nititur, a solis referuntur Apostolis: atqui testimonium eorum suspectum est: ergo.

R. Nego min. Hæc enim facta referunt Apostoli tanquam publica et præsentia, has circumstantias describunt tanquam omnibus notas: nullus autem impostor fabulas sic contexeret, nec eas tanta impudentia publice et iteratis vicibus annuntiare auderet, velut certissimas veritates ab omnibus cognitās; si autem adeo insaniret ut fictitias hujusmodi historias prædicaret, in derisum omnium ac ludibrium deveniret, et nemo fidem illi adhiberet: attamen multi ex Judæis fidem adhibuerunt Apostolis resurrectionem Christi annuntiantibus: certum est ergo Apostolos mentitos non fuisse quando publice retulerunt mortem Christi, ejus sepulturam in sepulcro

novo, et curas quas adhibuerunt Judæi ne corpus per furtum e tumulto auferretur, etc. Ergo.

Si vero Judæi firma quædam habuissent argumenta contra resurrectionem, ea de manu ad manum posteris transmisissent; in cunctis sæculis fraudem et mendacium exprobrassent, sicque impediissent ne tale dogma ab omnibus crederetur. Ergo.

Obj. 2º. Testibus ipsis Evangelistis, corpus Christi *evanuit ex oculis illorum*, Luc. xxiv, 31, tanquam merum phantasma: ergo non constat eos verum Christi corpus suscitatum vidisse.

R. Nego conseq. Nobis enim constare potest ex visu, tactu et auditu hunc vel illum hominem eundem esse quem heri vidimus, audivimus, etc. verum constat ex visu, tactu et auditu Apostolos judicasse corpus Christi idem fuisse post resurrectionem ac ante mortem: ipsum namque viderunt, cum illo multoties sermonem habuerunt, carnem illius contrectaverunt: ergo.

Quod autem dicit S. Lucas, ipsum ex oculis eorum evanuisse, id unum significat, scilicet, corpus Christi ex visibili factum esse invisibile, vel potius conspici ab eis desiisse, ut habetur in Græco: at nemo dubitat quin, auxiliante Dei potentia, corpus solidum ex visibili fieri possit invisibile. Ergo.

Nec proficerent increduli si dicerent Deum apparuisse visibiliter Abraham aliisque patriarchis, et tamen verum non habuisse corpus; nam certum erat apud omnes neque Deum neque angelos verum habere corpus: unde, sive Deus immediate apparuerit Patriarchis, ut quidam volunt, sive per ministerium angelorum, ut alii contendunt, nullus propterea in errorem inducebatur; post visionem, unusquisque satis advertebat phantasticum corpus sibi apparuisse; e contra, Christus ante mortem verum habebat corpus, et evidentibus indiciis manifestavit se idem habere corpus: ergo discipulos in errorem positive induxisset si phantasticum duntaxat habuisset corpus. Ergo.

Obj. 3º. Christus prædixerat, Matth. xxii, 40, se tribus

diebus et tribus noctibus futurum esse in sinu terræ, sicut Jonas tribus diebus et tribus noctibus fuit in ventre ceti : attamen, juxta narrationem Evangelistarum, Christus non fuit tribus diebus et tribus noctibus in sinu terræ. Ergo.

R. Nego min. Christus enim alibi et pluribus in locis prædixerat quod *tertia die* resurgeret : tres igitur dies et tres noctes de diebus noctibusque integris intelligi non debent ; sufficit vero ut tres dies in numero ordinali, prima, secunda et tertia, a sepultura Christi usque ad resurrectionem ejus computari possint : atqui, juxta narrationem Evangelistarum, tres dies in numero ordinali computari possunt ; sepultus est enim Christus die veneris, tota die sabbati mansit in tumulo, et die dominica, quæ erat tertia, surrexit. Tres similiter numerari possunt noctes ; licet enim per unam noctem physice sumptam, illud intelligatur spatium quod a vespere ad mane excurrit, in usu communi tamen dies integra a media nocte ad mediam noctem sequentem computatur : in hac autem supputatione, Christus fuit tribus noctibus in monumento sicut et tribus diebus, nempe per integram diem sabbati cum sua nocte a media nocte ad mediam noctem, per mediam noctem ad diem veneris pertinentem, et per aliam portionem noctis dominicæ. Ergo.

Insuper scripserunt Apostoli Christum die veneris mortuum, prima sabbati seu die dominica de monumento exiisse, et nihilominus affirmant illum tertia die surrexisse ; morem supputandi apud Judæos usitatum non ignorabant : ergo dici non potest eos tam aperte sibi contradixisse. Hoc aliunde ipsis non fuit exprobratum a Judæis neque a paganis. Sic quotidie apud nos octo dicitur esse dies ubi septem sunt tantum.

Obj. 4º. Si Christus vere surrexisset, scribis, pharisæis, Legis doctoribus et sacerdotibus se ostendere debuisset ut eos convinceret : atqui nedum id fecerit, perhibetur se manifestasse nonnullis mulieribus et suis discipulis : ergo.

R. 1º. Nego maj. Christus enim nihil scribis et phari-

sæis, doctoribus et sacerdotibus debebat; satis erat ut sufficientia illis præstaret motiva credendi: at, licet post resurrectionem ipsis non apparuerit, sufficientia illis præstitit motiva credendi; multi enim prædicabant resurrectionem, tanquam factum cujus testes oculati fuerant, splendidissima operabantur miracula quibus testimonium suum confirmabant, mortem inter acerbissima tormenta alacriter oppetebant: certe hujusmodi testes fide sunt dignissimi. Præterea, quando in causa civili et coram tribunalibus sufficientes producti sunt testes, nemo conqueritur quod alii non fuerint convocati: porro illi resurrectionis Christi testes quos protulimus, ad veritatem istiusmodi facti astruendam sufficiunt: ergo.

Forte dici posset Christum seipsum post glorificationem suam pharisæis, etc. manifestare noluisse, quia talis manifestatio insigne erat privilegium quo se constituerant prorsus indignos. Ergo.

R. 2º. Nego min. et dico, testimonium mulierum et discipulorum quibus Christus post resurrectionem suam se manifestavit, minime suspectum esse: *id ex prima responsione ad majorem, et ex dictis in probatione propositionis, sequitur.* Mulieres enim tam idoneæ sunt quam viri ad factum aliquod sensibile cognoscendum et testandum; testimonium earum admittunt iudices in causis criminalibus; quare igitur illud non admitteremus ubi de resurrectione Christi agitur? Ergo.

Inst. Apostoli in diversas abierunt regiones, sicque unus tantum erat testis resurrectionis respectu gentium: atqui testis unus testis nullus, juxta axioma: ergo resurrectio Christi non erat certo credibilis respectu gentium.

R. 1º. Etiam si resurrectio Christi primum non fuisset credibilis respectu gentium apud quas unus aut alter Apostolus eam annuntiabat, nihil adversum nos sequeretur; quæstio est enim an in se et respectu eorum qui Apostolorum et discipulorum testimonium cognoscunt, revera sit credibilis: atqui demonstravimus illam sic spectatam omnino credibilem esse. 2º Apostoli testimonium suum de resurrectione Christi veris confirmabant mira-

culis : at testis etiam unicus qui testimonium suum veris confirmat miraculis, dignus est fide. 3^o Ordinarie unicus non erat Apostolus in una regione, sed unusquisque plures secum habebat discipulos. 4^o Omnes gentes brevi tempore cunctorum Apostolorum testimonium, de resurrectione et aliis miraculis Christi, cognoscere potuerunt, sive per communem famam, sive per eorum scripta. Ergo.

Obj. 5^o. Testes qui sibi contradicunt nullam merentur fidem : at quatuor Evangelistæ resurrectionem Christi referentes, evidenter sibi contradicunt ; mulieres enim venerunt ad sepulcrum *vespere sabbati*, juxta Matth. xxviii, 1 ; *valde mane*, una sabbatorum,.... orto jam sole, juxta Marc. xvi, 2 ; *valde diluculo*, juxta Lucam, xxiv, 1 ; *mane*, cum adhuc tenebræ essent, secundum S. Joan. xx, 1. Ergo.

R. 1^o. *Dist. maj.* Testes qui sibi contradicunt in ipsamet facti substantia, nullam merentur fidem, *conc.* qui sibi contradicunt in quibusdam facti circumstantiis duntaxat, *negō maj.* Ubi enim plures testes circa substantiam alicujus facti sibi concordant, testimonium eorum a criticis non rejicitur, sub prætextu quod circumstantias eodem modo non referant ; imo testimonium eorum quodam modo inde firmatur, siquidem inde patet illos non esse impostores. Porro quatuor Evangelistæ perfecte sibi consentiunt in referenda resurrectione : etiamsi ergo admitteretur eos in assignanda hora qua mulieres venerunt ad sepulcrum sibi contradixisse, sequeretur duntaxat incertam esse horam qua Christus e monumento surrexit.

R. 2^o. *Negō min. et ejus probationem.* Dies enim religiosus apud Judæos a vespere ad vesperam computabatur, sicut dies festivi apud nos a primis vesperis ad secundas in usu ecclesiastico existimantur : dies hebdomadis vocabantur una seu prima, secunda, tertia, etc. sabbati. Unde, cum transiisset sabbatum, et incipiente prima die sabbati seu hebdomadis sequentis, quæ est dominica, mulieres emerunt aromata, paraverunt ea, profectæ sunt,

et diluculo ad monumentum advenerunt : est autem valde mane quando sol super horizontem incipit apparere, præsertim versus æquatorem, ubi minus sensibile est crepusculum, imo aliquo modo tenebræ adhuc sunt super terram. Aliunde, hæc verba S. Joannis, *cum adhuc tenebræ essent*, intelligi possunt de hora qua profecta est Maria Magdalena. Insuper, Evangelistæ non omnes nominant mulieres quæ venerunt ad sepulcrum, nec in eodem ordine; fieri potest ut plures diverso tempore advenerint, vel ut eadem pluries continuo iter fecerint : ergo minime constat Evangelistas sibi contradixisse.

Inst. Incredibile est quasdam mulieres ausas esse sepulcrum a militibus caute custoditum et signatum adire; incredibile est pariter milites benigne passos esse ut illæ ad sepulcrum accederent, omnia inspicerent, et libere redirent. Ergo.

R. Nego ant. Nam 1º mulieres ignorare potuerunt lapidem fuisse obsignatum et ibi appositos milites; Joseph ab Arimathæa et Nicodemus prompte ligaverant corpus Jesu, cum aromatibus illud sepelierant, *et saxum magnum ad ostium monumenti advolverant*; mulieres quæ venerant de Galilæa erant præsentibus, *et viderunt monumentum, et quemadmodum positum erat corpus ejus*, Luc. xxiii, 55. Postea omnes regressi sunt *et sabbato siluerunt secundum mandatum*, ibid. 56. Altera die post parasceven, principes sacerdotum petierunt a Pilato ut custodiretur sepulcrum, Matth. xxvii, 62. Ergo.

2º Ex narratione Evangelistarum, angelus descendit de cœlo ut lapidem revolveret, contremuit terra, fractum est sigillum, apertum est monumentum, egressus est Christus, et sedebat angelus super petram revolutam : *Erat autem aspectus ejus sicut fulgur, et vestimentum ejus sicut nix. Præ timore autem ejus exterriti sunt custodes, et facti sunt velut mortui*, Matth. xxviii, 3 et 4; abierunt postea custodes in civitatem *et nuntiaverunt principibus sacerdotum omnia quæ facta fuerant*, ibid. 11 : ergo custodes jam non erant ad sepulcrum quando huc advenerunt mulieres. Ergo.

Obj. 6°. Denique Christus forte adhuc erat vivus quando reconditus fuit in sepulcro : ergo naturaliter potuit inde surgere.

R. 1°. *Nego ant.* Nam 1° constat illum ut mortuum fuisse agnitum ; 2° ex latere ejus perfosso aquam cum sanguine effluxisse , quod signum est mortis , juxta medicos. 3° Incredible est Judæos et Pilatum permisisse ut de cruce tolleretur , nisi constitisset illum jam esse mortuum , sicut expresse dixerant qui crura ejus frangere debebant. 4° Si non fuisset mortuus , hoc advertisset Joseph ab Arimathæa , et illum non sepeliisset. Ergo.

R. 2°. *Nego conseq.* Etiam si Christus revera non fuisset mortuus quando in monumentum fuit depositus , ibi vivere non potuisset , et præterea , nulla via inde potuisset exire. Aliunde decipi non potuissent Apostoli ; repugnat illos decipere voluisse aut potuisse , *ut supra ostendimus.* Ergo.

§ IV. — De excellentia doctrinæ Christi.

PROPOSITIO.

Ex præcellentia doctrinæ Christi demonstratur religionis ejus divinitas.

Prob. Doctrina Christi est sanctissima , et aliunde constat doctrinam tam sanctam nonnisi a Deo venire posse.

1° *Est sanctissima.* Spectari potest ex parte auctoris , ex parte Dei , ex parte dogmatum , ex parte præceptorum , ex parte consiliorum et ex parte effectuum : atqui sub his respectibus summa relucet ejus sanctitas.

1° *Ex parte auctoris*, id est, Christi. Constanter apparet mitissimus, beneficus, patiens, soli Deo consecratus et de regno ejus sollicitus ; salutem hominum ardenti zelo quærit, divitias aspernatur, honores fugit, non disputat, non contendit, pacem commendat, pacificos laudat, discipulos a terrena dominatione deterret, humilitatem dictis et exemplis suadet : *Discite a me quia mitis sum et humilis corde* , Matth. xi , 29 ; ægrotos sanat , afflictos consolatur ,

ignaros edocet, infirmos sublevat, contumeliis sibi illatis indulget, lacrymas super Jerusalem effundit, Judam proditorem amica voce compellat, de judicibus inique ipsum damnantibus non conqueritur, percussus a militibus et sputis coopertus obmutescit, instar agni ad crucem ducitur, pro interfectoribus deprecatur, divinæ voluntati se subjicit et voluntarie pro peccatis hominum se offert : atqui nullus tam sanctus visus est homo super terram , ut fatetur *Rousseau* supra citatus : « Si la vie et la mort » de Socrate sont d'un sage, la vie et la mort de J.-C. sont » d'un Dieu. » Ergo 1°.

2° *Ex parte Dei*. Profundissima enim et lucidissima de Deo edocet, scilicet, eum esse unicum , omnium rerum creatorem , conservatorem , arbitrum et moderatorem potentissimum , sapientissimum , justissimum , virtutis remuneratorem et criminis vindicem , nostri amatorem , et largum benefactorem , etc. Ergo 2°.

3° *Ex parte dogmatum*. Altissima namque docet mysteria quæ nunquam ratio humana excogitare potuisset, in quibus tamen nullam deprehendere potest contradictionem : talia sunt mysteria Trinitatis , Incarnationis , lapsus hominis , Redemptionis seu satisfactionis Christi pro nobis , peccatorum remissionis , gratiæ operationis , etc. Ergo 3°.

4° *Ex parte præceptorum*. Sapientissima sunt ipsius præcepta, sive erga Deum quem præcipit adorare , toto corde diligere , fide et pietate colere , sive erga proximum etiam inimicum , quem vult a nobis ita amari , ut illi compatiamur , auxiliemur et omnia charitatis officia præbeamus ; sive erga nosmetipsos , jubet enim ut omnia fugiamus vitia , v. g. ambitionem , superbiam , avaritiam , luxuriam , intemperantiam , etc. et cunctas colamus virtutes his vitiis oppositas. Ergo.

5° *Ex parte Effectuum*. Statim enim atque doctrina Christi prædicata et credita fuit in mundo , undique apparuerunt eminentissimæ virtutes hucusque penitus ignotæ , et prodigia fortitudinis , temperantiæ , castitatis , abnegationis et sanctitatis : unde ipse *Plinius junior*,

lib. 10, epist. 97 ad Trajanum, post diligentem de moribus Christianorum inquisitionem, juxta mandatum imperatoris, aiebat : « Soliti statuto die ante lucem convenire... se sacramento, non in scelus aliquod obstringere, » sed ne furta, ne latrocinia et adulteria committerent, » ne fidem fallerent, ne depositum appellati abnegarent. » Et Julianus Apostata, in gremio Ecclesiæ educatus, sed infensissimus Christianorum inimicus, sic de moribus eorum loquitur apud Sozomenum, lib. 5, cap. 18 : « Turpe » fuerit impios Galilæos, præter suos pauperes, nostros » etiam alere; nostros autem mendicos nostra ope ac subsidio destitutos videre. » Novimus quid scriptores ecclesiastici de moribus primorum Christianorum scripserint; in cunctis postea sæculis semper emicuerunt miranda perfectionis exempla : si veromulti jugiter exstiterint qui suam vitam ad normam Evangelii non composuerint, id tribuendum cupiditatibus, non autem defectui doctrinæ. Ergo, etc. Ergo.

2º Doctrina tam perfecta *non nisi a Deo venire potuit*. Impossibile est enim hominem a parentibus pauperibus oriundum, nullo studio excultum, humanarum scientiarum adminiculo destitutum, talem excogitasse doctrinam sapientia philosophorum adeo superiorem, illam coordinasse, prædicasse et cuncto persuasisse mundo. Aliunde eam ab hominibus non accepit. Ergo. Hinc adhuc *Rousseau* : « L'Évangile a des caractères de vérité » si grands, si frappans, si parfaitement inimitables, que » l'inventeur en serait plus étonnant que le héros. » Hac de materia exquisitum citatur opus in Anglia nuper editum, *Principes fondamentaux de la religion chrétienne, par Hearn, an 1807*. Ergo.

Obj. Religio Christiana jubet 1º diligere inimicos, reddere bonum pro malo, et prohibet vindictam; 2º præcipit humilitatem, et sic exstinguit æmulationem ac stimulum gloriæ quo accenduntur homines et ad magnas incitantur actiones; 3º consulit paupertatem et bonorum hujus mundi contemptum : hoc autem producit ignaviam, commercii destructionem atque graviter nocet so-

cietati; 4^o virginitatem et perpetuam continentiam valde commendat, sicque propagationi generis humani, quantum in se est, opponitur: atqui hæc dici non possunt recta et sancta: ergo.

R. Nego min. Ad singula autem respondendum est: itaque

1^o Religio Christiana prohibet quidem ne vindicta propria auctoritate suscipiatur, sed recursum ad magistratus ut injuria repellatur vel illata reparetur non prohibet, modo ex odio et vindictæ desiderio id non fiat; *a fortiori* non prohibet ne publici debellantur hostes, et intra justos coerceantur limites: porro interest societatis ut privatæ prohibeantur vindictæ, et proximi ac etiam inimicorum præcipiatur dilectio; id nemo inficiabitur: ergo.

2^o Religio Christiana præcipit humilitatem, non vero animi demissionem; ingens enim est inter utramque discrimen. Vanæ gloriæ desiderium reprimit, sed animi fortitudinem non ideo frangit: illam potius accendit alia hujus virtutis incitamenta nobiliora et efficaciora suppeditando; docet enim pro patria injuste oppressa vel oppugnata fortiter moriendum esse, et infinitam a Deo propter hanc mortem expectandam remunerationem; docet principibus obtemperandum, vitam præsentem parvi pendendam, alteram felicitatem toto corde desiderandam esse: qui ergo his stabunt principiis, semper erunt animo fortes et constantes, nec pericula belli, nec ipsam mortem formidabunt. Et revera Christiani milites qui in exercitibus infidelium arma gerebant, nunquam ignaviæ fuerunt accusati, sed e contra virtus eorum plurimis monumentis commendatur. Ergo 2^o.

3^o Voluntaria paupertas laudatur in Evangelio tanquam perfectio: at simul præcipitur labor, ignavia et otiositas graviter reprobantur. Cuncta bona hujus mundi contemnere debemus, id est, paratos esse oportet ea abjicere et perdere potius quam Deum offendere; tene-mur tamen rationabilem de illis curam habere pro circumstantiis in quibus constituimur, et bono publico semper invigilare: atqui, nedum hæc animi dispositio societati noceat, disponit e contra ad memorandos

liberalitatis et abnegationis actus, qui semper sunt utiles et aliquando necessarii : ergo.

4^o Christus omnibus commendavit virginitatem et continentiam tanquam perfectionem a qua neminem excludere volebat : sed perfecte sciebat non multos hanc perfectionem amplexuros, ac proinde nullum inde futurum fore societati detrimentum. Ad bonum societatis non requiritur numerosior populus, qui aliquando vera est calamitas, nempe ubi sufficientia simul non existunt media quibus omnes convenienter occupari et sibi necessaria acquirere possint; tunc enim multiplicantur otiosi, vagabundi, fures et latrones, etc. multo magis ergo bonum societatis exigit ut omnes cives bene sint ordinati, recte educati, moribus integri, probitate conspicui, fidelitate in contractibus commendati, legibus obsequiosi, etc. atqui virginitas et continentia his virtutibus non nocent; multo e contra qui vitam cœlibem ducunt, aptiores sunt, saltem ordinarie, ad mores aliorum recte informandos, ut experientia constat.

Præterea, qui perpetuam paupertatem et castitatem profitentur, ut soli Deo sint consecrati et utilitati hominum addicti, multa facere possunt quæ patresfamilias ne quidem tentare auderent : v. g. Franciscus Xaverius, si propriam habuisset familiam regendam, nunquam Evangelium apud Indos, Japones, etc. prædicasset : Vincentius a Paulo nunquam tot et tanta charitatis opera exercuisset, etc. Insuper omnes sacerdotes ministerium sacrum exercentes, multo magis generis humani propagationi inserviunt, vera morum principia persuadendo, quam si singuli suam haberent uxorem.

Aliunde, qui contra cœlibatum religiosum impie clament, sæpius ipsi vitam cœlibem ducunt, non sanctitatis et perfectionis causa, sed ut facilius libidinibus suis indulgeant. Ergo.

§ V. De mira religionis Christianæ propagatione.

Quod religio Christiana per orbem celerrime annun-

tiata fuerit, est factum ab omnibus admissum. Legimus enim in Actibus Apostolorum, ipsos multas in diversis regionibus instituisse ecclesias; B. Paulus, Rom. I, 8, gratulabatur Romanis quod fides eorum annuntiaretur *in universo mundo*; secundo sæculo, S. Justinus in Dialogo cum Judæo Tryphone, asserebat confidenter, « nullum » esse genus hominum, sive barbarorum, sive Græcorum, » sive etiam aliorum populorum, quocumque nomine » appellentur, apud quos non fiant preces Patri et Creatori omnium per nomen Jesu Christi. » Antea jam dixerat Plinius, in sua epistola ad Trajanum citata, multos esse Christianos omnis ætatis, omnis ordinis, utriusque sexus, et addit: « Neque enim civitates tantum, sed » vicos etiam atque agros superstitionis istius contagio » pervagata est. » In tertio sæculo, Tertull. Apol. cap. 37, imperatorem et senatum Romanum alloquens, sic eos compellat: « Hesterni sumus, et vestra omnia implevi- » mus, urbes, insulas, castella, municipia, conciliabula, » castra ipsa, tribus, decurias, palatium, senatum, forum; » sola vobis relinquimus templa. » Serie non interrupta omnis generis monumentorum constat magis ac magis numerum Christianorum semper crevisse, et eos tempore Constantini Magni jam numero valde prævaluisse: unde sit

PROPOSITIO.

Divinitas religionis Christianæ ex mira ejus propagatione invicte demonstratur.

Prob. Illa religio est divina quæ sic propagari non potuit, nisi auxilio Dei corda hominum pro nutu inflectentis: atqui religio Christiana sic mirifice propagari non potuit nisi auxilio Dei; si quædam enim causæ naturales in illius propagationem influere potuissent, repeterentur vel ex parte doctrinæ quæ annuntiabatur, vel ex parte prædicatorum qui illam annuntiabant, vel ex parte eorum quibus annuntiabatur, vel denique ex parte mediolorum quibus utebantur præcones ad illam persuadendam: at-

qui sub diversis his respectibus nulla causa naturalis propagationi religionis Christianæ inservire potuit, sed omnia e contra illi adversabantur.

1° *Non ex parte doctrinæ quæ annuntiabatur.* Hæc enim doctrina proponebat dogmata et mysteria rationi impervia, imo et rationi apparenter valde repugnantia, ut adorare tanquam Deum hominem inopem, obscurum, turpissima morte a suis concivibus damnatum; austera tradebat morum præcepta, universis cupiditatibus adversa; præcipiebat divitiarum terræ contemptum, honorum mundi fugam, voluptatum abnegationem, injuriarum condonationem, inimicorum dilectionem, jejuniorum observantiam totiusque naturæ corruptæ mortificationem : sublimis quidem est hæc doctrina et seminibus veritatis homini ingentis valde conformis, ut sapienter observat et luculenter dicit *P. Thomassin* de Incarnatione. At nihilominus constat homines corruptos ad eam amplectendam naturaliter adduci non potuisse. Præterea, inde sequitur sublimem hanc doctrinam, rectæ rationi et naturæ hominis tam perfecte congruentem, meram non esse fabularum congeriem, sed a Deo omnis veritatis fonte originem ducere. Ergo 1°.

2° *Non ex parte prædicatorum qui doctrinam Christi annuntiabant.* Erant enim duodecim viri pauperes, illitterati, idiotæ, timidi, in infima conditione populi nati et educati, vilissimam exercentes artem ut victitarent; nullis divitiis, nulla eloquentia erant præditi, nulla consideratione inter homines gaudebant : atqui tales præcones naturaliter risum excitare debebant, potius quam persuasionem obtinere : ergo.

3° *Non ex parte eorum quibus doctrina Christi annuntiabatur.* Erant enim Judæi et pagani : atqui Judæi et pagani naturaliter non inclinabantur ad religionem Christianam amplectendam, multum vero ipsi opponebantur ; nam Judæi addictissimi erant legi Moysis et ritibus suis; Messiam sibi figurabant tanquam principem potentissimum. At fides Christiana religionem Moysis abrogabat, ritus et traditiones Judæorum reprobabat, hominem ab ipsis velut

malefactorem et impostorem morte damnatum proponebat ut Messiam promissum, ut Deum simul et hominem ab omnibus adorandum. Similiter paganissuadendum erat ut, tanquam inania simulacra suos abjicerent deos, sua everterent templa, patrum suorum religionem, cupiditatibus faventem, velut superstitionem abnegarent, et alteram profiterentur doctrinam, cunctas libidines et cupiditates coercentem, ut quemdam Jesum Nazarenum a Judæis cruci affixum sicut Deum haberent et adorarent : atqui hæc pagani naturaliter placere non poterant. Hinc B. Paulus, I Cor. 1, 23 : *Prædicamus Christum crucifixum : Judæis quidem scandalum, gentibus autem stultitiam.* Ergo 3°.

4° *Non ex parte mediorum quibus ad persuadendum utebantur primi Evangelii præcones.* Omnibus enim subsidiis humanis erant destituti, nulla spe boni aut emolumenti temporalis alliciebant homines, nihil in hac vita promittebant sectatoribus suis præter ignominiam, opprobrium, ærumnas, tormenta et mortem; patronos non habebant potentes et principes sæculi, sed e contra infensissimos eos experti sunt inimicos; Apostolorum enim eorumque discipulorum prædicatio omnibus modis fuit impugnata, a Judaismo et paganismo, invidia sacerdotum, perfidia Judæorum, subtilitate philosophorum, eloquentia rhetorum, prudentia politicorum, superstitione populorum, immanitate tyrannorum, omni genere suppliciorum, etc. Christiani atrocissimis persecutionibus istis per trecentos annos ubicumque immaniter fuerunt vexati, et nihilominus ita crevit eorum numerus, ut tandem omnino prævaluerint, et idolorum cultus penitus cessaverit : ergo 4°, etc. aliunde, etc. ergo nulla excogitari potest causa naturalis, etc. Ergo.

Solvuntur objectiones.

Obj. 1°. Illud divinam esse religionem non probat quod falsis competit religionibus : atqui celeritas propagationis

doctrinæ Christianæ falsis competit religionibus, nempe paganismo, Mahumetismo, Lutheranismo et Calvinismo : ergo.

R. Dist. maj. Illud non probat, etc. quod falsis competit religionibus eodem modo, *concedo*; diverso modo, *nego maj.* Similiter, *distincta minore, nego conseq.* Itaque libenter fateor quod celeritas propagationis non probaret divinam esse religionem Christianam, si eodem modo aliis competeret religionibus : sed falsum est illam aliis religionibus eodem modo et sub eodem respectu esse communem; divinam enim esse religionem Christianam non ideo concludimus quia celeriter per orbem fuit propagata, sed quia evidens est stupendam ejus propagationem nulli causæ naturali tribui posse : prompta vero aliarum religionum diffusio causis naturalibus tribui potest.

1° Paganismus, nedum sicut religio Christiana cupiditatibus adversaretur, illis e contra multum favebat, innatæ hominum propensioni ad libidinem blandiebatur, auctoritate principum nitebatur, etc. Ergo 1°.

2° Mahumetismus pariter multis cupiditatibus et præsertim luxuriæ habenas laxat, et ipsius institutor non persuasione, sed armis et bello illum propagavit : contra vero Apostoli et cæteri religionis Christianæ præcones, non bellando et interficiendo, sed moriendo, orbem ad Christum adduxerunt. Ergo.

3° Lutherana et Calviniana religio viis naturalibus suam debuit propagationem; ipsarum enim fundatores et prædicatores erant docti et eloquentes, plures ex principibus et aliis magnatibus habuerunt patronos, præcepta religionis Christianæ emolliebant, sicque cupiditatibus favebant; religiosos et moniales a votis solvebant, his et clericis connubia permittebant; confessionem peccatorum, abstinentiam, jejunia aliaque præcepta naturæ corruptæ importuna sustulerunt; bona ecclesiastica principibus concesserunt : his omnibus causis concurrentibus, non mirum si tam celeriter propagata fuerit illa reformatio. Ergo.

Inst. Principes Christiani plurima fecerunt edicta contra Judaismum, paganismum et hæreticos : ergo his edictis propagatio religionis Christianæ tribui potest.

R. Nego conseq. Probationem enim nostram ex propagatione religionis Christianæ ante conversionem Constantini deducimus : porro ante Constantinum nullus fuit princeps Christianus, nullum saltem prodit edictum temporalis auctoritatis in favorem religionis Christianæ ; sed e contra hæc religio multis modis a principibus fuit impugnata. Ergo.

Obj. 2°. Tempore Christi et Apostolorum, orbis erat litteratus, et vanitatem idolorum cognoscere incipiebat : ad Christum ergo naturaliter adduci potuerunt homines, sive propter idololatriæ absurditatem, sive propter perfectionem doctrinæ Christi, sive propter virtutes Apostolorum, sive propter eleemosynas quas elargiebantur Christiani, etc.

R. 1°. *Nego. ant. quoad secundam partem.* Plurimi quidem in sæculo Augusti erant homines litterati, sed non ideo orbis vanitatem idolorum agnoscebat ; multi enim erant philosophi Epicurei qui nihil credebant, nullum colebant Deum ; sed omnis populus idolis adhuc serviebat, suis antiquis superstitionibus addictus erat, et velut atheos persequabatur eos qui contrarium sentire videbantur. Ergo.

R. 2°. *Nego conseq.* Etiam si enim omnes vanitatem idolorum tunc cognovissent, non idcirco parati fuissent religionem Christianam amplecti, ut patet exemplo philosophorum et rhetorum qui difficilius et in minori numero eam amplexi sunt. Etenim qui cupiditatibus solent indulgere, naturaliter non amplectuntur doctrinam quæ eas severe cohibet : porro qui vanitatem idolorum intelligentes, nihil credebant, liberius adhuc cupiditatibus indulgebant : ergo.

Dici autem non potest, naturaliter adductos fuisse ad doctrinam Christianam propter ejus sanctitatem ; hæc namque doctrina multis in punctis captum vulgi superabat, et philosophis displicebat, quia superbiam eorum

conterebat : unde contra illam totis viribus insurrexerunt. Non propter virtutes Apostolorum ; si vera enim non fuissent facta quæ narrabant Apostoli , ut impostores et delirantes necessario habiti fuissent ; si e contra hæc facta sint vera, tunc eorum missio fuit divina. Non propter eleemosynas quas faciebant Christiani ; si abundantes enim elargirentur eleemosynas, apud eos igitur nonnulli saltem erant divites qui liberaliter donabant : at illi divites ad religionem sub spe eleemosynæ recipiendæ non adducebantur : ergo.

Obj. 3º. Sola plebs ignobilis et imperita primum religionem Christianam suscepit, ut ipse dicit Apostolus, I Cor. 1 , 26 : Non multi sapientes secundum carnem, non multi potentes, non multi nobiles : atqui solus amor novitatis potuit hanc plebem ad religionem Christianam impellere : ergo.

R. 1º. Nego maj. Ipse enim Christus, dum in terris degebat, plures habuit discipulos conditione, genere et doctrina conspicuos, Nicodemum scilicet, Judæorum principem, regulum Capharnaiticum, Jairum Synagogæ principem, Lazarum et sorores ejus, Zachæum publicanorum principem, Centurionem qui divinitatem Christi morientis confessus est, Josephum ab Arimathea nobilem decurionem, et plures alios sic generatim indicatos apud Joan. XII, 42 : Ex principibus multi crediderunt in eum. Paulo post mortem Christi, innumeri doctrinam ejus amplexi sunt, tum ex Judæis, tum ex gentilibus ; inter eos autem multi erant docti et nobiles, ut SS. Clemens, Ignatius, Irenæus, Justinus ; ut Arnobius, Athenagoras, Origenes, Tertullianus, Cyprianus, etc. Ergo.

R. 2º. Nego min. Nam plebs ignobilis et imperita multo magis suæ religioni, suis consuetudinibus suisque moribus adhærere solet quam viri nobiles et docti ; et, licet novitatis ordinarie sit amans, non libenter tamen ad ea fertur quæ ipsius præjudiciis, cupiditatibus et commodis temporalibus opponuntur : atqui religio Christiana præjudiciis, cupiditatibus et commodis temporalibus plebis ignobilis, sicut eruditorum et nobilium, erat opposita ;

nihil namque plebs poterat expectare nisi vexationes, gaudiorum profanorum privationes, supplicia et mortem : ergo.

§ VI. — De numero et fortitudine martyrum qui pro christo sanguinem fuderunt.

Martyr idem est ac testis ; martyrium igitur et testimonium sunt quid unum et idem. Quælibet facta non nisi per testes ad posteritatem transmitti possunt, sicut et ad absentes : unde Christus dixit apostolis suis, Act. I, 8 : Eritis mihi testes in Jerusalem, et in omni Judæa, et Samaria, et usque ad ultimum terræ. Ut firmitus esset eorum testimonium, sanguine suo illud signaverunt, et multi alii, eorundem sequentes exemplum, fecerunt similiter. Sit

PROPOSITIO.

Divinitas religionis Christianæ ex numero et fortitudine martyrum demonstratur.

Prob. Juxta historiæ monumenta fide digna, innumeri homines omnis ætatis viri et mulieres, juvenes et virgines, docti et indocti, divites et pauperes, quorum plerique in primis Ecclesiæ sæculis exstiterunt, mortem probrosam et crudellem pro fide Christi servanda subierunt : atqui factum istud probat religionem Christianam esse divinam.

Nam 1° est miraculosum, *ut patet ex variis rationibus* : 1° ex numero martyrum ; duodecim quippe millia millium numerantur ; 2° ex eorum conditione ; fuerunt enim, *ut diximus*, viri et mulieres, docti et indocti, etc. 3° ex tormentorum specie ; horret enim animus meminisse suppliciorum quæ in eos exercebantur ; omnes historici scriptores, ipsique pagani, commemorant cruces, equuleos, pectines, ungues ferreos, fustes plumbatos, picem bullientem, plumbum liquefactum, prunas ardentes, ferra candentia, bestiarum dilacerationes et quidquid crudelitatis malitia hominum excogitare potuit ; 4° ex modo patiendi ; inter horrenda hujusmodi tormenta, Christiani etiam debiliores, mulierculæ et teneræ virgines

erant placidi, tranquilli, alacres; pro tortoribus orabant, dicentes cum beato Stephano : *Domine, ne statuas illis hoc peccatum*, Act. VII, 59; 5º ex effectu persecutionis; nedum tanta crudelitas homines a Christiana religione averteret, eos e contra quasi alliciebat; pullulabant ubique Christiani : unde hæc famosa Tertulliani verba, *Semen est sanguis Christianorum*; Apolog. cap. 48. Acerrimæ autem huiusmodi persecutiones per trecentos annos duraverunt. Quis autem bona fide negare poterit tam mirandam constantiam inter tot horrenda supplicia opus esse divinum ac verum miraculum?

2º Martyres bona fide religioni Christianæ adhærebant, alioquin mortem immanem non ita subiissent : at circa divinitatem religionis Christianæ falli non potuerunt : non potuerunt enim falli circa illius religionis divinitatem, nisi defectu examinis, vel defectu mediorum ad ejus divinitatem cognoscendam idoneorum : atqui neutrum dici potest.

1º *Non defectu examinis*. Repugnat enim tot hominum millia levitate et sine examine aliquam gravis momenti amplecti opinionem; multo magis repugnat eos crudellem patienter et voluntarie subire mortem pro tuenda opinione temeraria et absque sufficienti motivo adoptata. Ergo 1º.

2º *Non defectu mediorum*, etc. Nam religio Christiana divina est si vera sint facta miraculosa quibus nititur : atqui multi saltem ex martyribus facile cognoscere potuerunt vera esse facta quibus religio Christiana nititur ; illa enim facta supponuntur publica, diuturna et sæpissime iterata ; multi autem martyres illorum fuerunt testes oculati aut coævi. Ergo 2º, etc. aliunde, etc. Ergo, etc. Unde *Pascal, Pensées*, cap. 28 : « Je crois volontiers » les histoires dont les témoins se font égorger : »

Solvuntur objectiones.

Obj. 1º. Nec defectu mediorum veritati detegendæ idoneorum, nec defectu examinis, sed fanatismo forsi-

tan abrepti, decepti sunt martyres : ergo ex eorum numero et fortitudine non probatur, etc.

R. Nego ant. Constantia enim qua martyres oppetebant mortem placida et tranquilla erat, per tria sæcula perseveravit, et etiam nunc perseverat in Ecclesia, in omnibus conditionibus inventa est, apud divites et pauperes, doctos et indoctos, juvenes et senes : porro hujusmodi determinatio tam constans, tam placida et tranquilla, fanaticismo tribui non potest; fanaticismus enim est quædam delirii species quæ mentem absque motivis et contra rationem abripit : at perabsurde diceretur constantiam martyrum quamdam fuisse delirii speciem; quis enim credet tot viros, quorum opera propter sapientiam et eloquentiam nunc demiramur, vere fuisse delirantes? Ergo.

Obj. 2°. Fieri potest ut martyres ex desiderio vanæ gloriæ mortem oppetierint, nempe ut celebre acquirerent nomen apud posteros. Ergo.

R. Nego ant. Nam 1° in primis Ecclesiæ sæculis probrosum et indecorum erat in mundo nomen Christianum; vanæ gloriæ igitur cupido ad illud desiderandum impellere non poterat. 2° Pauci admodum inveniuntur qui pro vana obtinenda gloria mortem libenter subeant. 3° Martyres nullo modo sperare poterant fore ut nomen suum celebre esset apud posteros; non ignorabant multos saltem ex iis qui pro fide Christi sanguinem effundebant, altissimæ oblivioni tradendos esse. Ergo.

Obj. 3°. Paganismus, Mahumetismus et diversæ hæreses suos etiam habent martyres : ergo ex numero et fortitudine martyrum nihil concludi potest in gratiam religionis Christianæ.

R. Dist. ant. Suos habent martyres, sed multum est discrimen ipsos inter et martyres religionis Christianæ in genere, *concedo*; et nullum est discrimen, *nego ant.* Nam 1° pauci sunt eorum martyres, nostri vero sunt innumeri; 2° pro opinionibus speculativis, in quibus facilis est illusio, moriebantur; nostri autem, præsertim in primis Ecclesiæ sæculis, pro asserendis factis publicis, sen-

sibilibus, iteratis, circa quæ decipi non potuerant, mortem oppetebant; 3^o multi ex martyribus Judaismum et paganismum deseruerant, ut fidem Christi amplecterentur, sicque pro nova religione moriebantur, quod saltem de plerisque falsarum religionum martyribus dici non potest: ergo ingens datur discrimen, etc.

Inst. Plerique martyres nostri non fuerunt testes factorum quibus veritas religionis Christianæ nititur, ac proinde pro opinione speculativa moriebantur: ergo eorum testimonium non plus probat in favorem religionis Christianæ quam testimonium aliorum in gratiam falsarum religionum.

R. Nego ant. Nam 1^o multi fuerunt testes oculati sive miraculorum Christi, sive miraculorum Apostolorum, sive effusionis Spiritus sancti aliorumque prodigiorum; alii fuerunt testes coævi, et facile cognoscere potuerunt prædicta facta esse vera: atqui tales testes omnimoda fide sunt digni. 2^o Qui deinde a falsis religionibus ad Christum conversi sunt, stricto examini subjecerunt facta quibus veritas religionis Christianæ nititur, et similiter multi ex iis qui in Christianismo nati sunt sedulo fundamenta suæ fidei discusserunt: sic utrique plenam acquisierant certitudinem de existentia illorum factorum; his ergo factis testimonium vere reddebant, quando pro tuenda fide Christiana supplicia tolerabant et sanguinem fundebant. 3^o Tot millia millium puerorum, juvenum, virginum, mulierum, senum, etc. tam crudelia et acerba tormenta tanta fortitudine et patientia naturaliter sufferre non potuerunt: in eis ergo divina agnoscenda est operatio.

Nobis adhuc objiciuntur incredibiles Brachmanum apud Indos et Dervicharum apud Turcas austeritates, quæ morte longe sunt acerbiores. Sed in illis manifesta apparent insulsitatis et fanatici signa, et aliunde motivis humanis inspirari possunt, v. g. fama inde apud populum oriente, pecunia quæ sic acquiritur, facilitate libidinibus sub velo sanctitatis securius indulgendi, etc. Idem dicendum est de mulieribus quæ in India vivæ

cum marito mortuo comburuntur; ad hanc enim combustionem a parentibus defuncti coguntur, et illam refugere non possunt quin perpetuam et intolerabilem sibi acquirant infamiam : atqui hujusmodi austeritates et supplicia nullo modo cum testimonio martyrum nostrorum comparari possunt, *ut patet* : ergo.

Obj. 4º. Plurimorum nefandorum criminum accusati sunt primi Christiani, v. g. infanticidii, comestus carnis humanæ, incestus, odii erga imperatores, et seditionis : ergo non mirum est si tanta severitate eos insectati sint principes et magistratus.

R. Dist. ant. Plurimorum accusati sunt nefandorum criminum, sed non fuerunt convicti, *concedo*; et fuerunt convicti, *nego ant.* Equidem rumore quodam identidem sparso, pluries dictitarunt pagani Christianos horrendorum scelerum esse reos; id concludebant ex imperfectis quas habebant notionibus mysteriorum nostrorum, præsertim sacrificii Missæ et Eucharistiæ, ex eo quod viderent eos ordinarie tempore noctis convenire, et ex absurdis principiis et perversis actionibus quorundam hæreticorum qui sub generali nomine Gnosticorum designati sunt. At nunquam veri Christiani prædictorum convicti sunt criminum, alioquin edicta imperatorum adversus eos lata et sententiæ judicum mentionem de hujusmodi criminibus facerent. Solummodo quærebatur a martyribus an essent Christiani; quod si confiterentur, ad mortem mittebantur : si vero Christum abnegarent, statim liberi fiebant : principes ergo et magistratus nullo modo persuasum habebant eos nefandorum criminum esse reos.

Nusquam autem rebellionis erga principes serio fuerunt accusati, nisi eo sensu quod legibus et mandatis contra jus divinum naturale aut positivum parere recusarent; in cæteris vero promptum imperatoribus præstabant obsequium : at in ea agendi ratione nulla est seditio vel rebellio, nisi dicatur principibus aliquid evidenter contra jus divinum præcipientibus obediendum esse; quisquis autem rectam consuluerit rationem, nunquam id affirmare audebit. Ergo.

Præterea, si martyres seditiosi et rebelles fuissent, legio Thebana, quæ 6,600 bellatores complectebatur, vim injustam sibi illatam repulisset, nec tanta patientia crudelem mortem subiisset : fortissimi illi milites non ultro, depositis armis, se trucidandos obtulissent. Insuper Tertull. in Apol. cap. 37, scribens ad senatum Romanum, asserit Christianos tanto tunc esse numero, ut ipsum imperium facile evertere possent, si arma contra suos persecutores suscipere vellent : nunquam tamen id tentarunt, licet immanissimis vexati tormentis. Nullibi denique legitur in historia Christianos fuisse rebelles; semper e contra in exercitibus, sicut in aliis publicis officiis, fidelissimos erga principes se præstiterunt. Ergo.

Plurima alia et invicta institui possent argumenta ad divinitatem religionis Christianæ demonstrandam, v. g. 1° ex testimoniis auctorum profanorum, quod fecit *Bullet*, in suo hac de re opere jam citato; 2° ex insigni victoria quam legio Militina, dicta *fulminante*, miraculose sub Marco Aurelio precibus suis obtinuit, circa quod legi potest dissertatio D. *Weston*; 3° ex singulari miraculo quo multi fidei confessores publice et diu perfecte locuti sunt, postquam lingua eorum, jubente Hunnerico rege Ariano, usque ad radicem fuit abscissa : factum istud in dubium revocari non potest. Vide *Fleury*, l. 30, n. 10; *Godescard*, et præsertim opus cui titulus, *la Religion Chrétienne prouvée par un seul fait*; 4° ex perpetua et mirabili religionis Christianæ conservatione, etc.

Multipliciter igitur divinitas religionis Christianæ demonstratur. Si autem unumquodque ex eis quæ protulimus argumentis seorsim sumptum sit invictum et plenam animi convictionem obtineat, quanto majorem omnia simul juncta pariunt certitudinem! Sese enim corroborant, mutuam vim sibi præstant, intellectum magis ac magis illuminant et firmiorem mentis adhæSIONem suadent : unde, quicumque bona fide hæc omnia fidei nostræ fundamenta attente considerat et sedulo pensat, clarissima luce undique coruscante velut perfunditur, et statim in hæc Psalmistæ verba ex intimis præcordiis erumpit : *Testimonia tua credibilia facta sunt nimis*; Ps. xcii, 5.

APPENDIX HISTORICA

DE SAMARITANIS.

Propter idololatriam aliaque Salomonis delicta, permisit Deus ut, regnante filio ejus Roboam, decem tribus a Juda separarentur, et aliud sub Jeroboam efformarent regnum, III Reg. xi : hinc prima regni Israel origo, anno ante Christum 972. Timens Jeroboam ne forte ipsius subditi ad Judæos redire vellent, statuit quod deinceps Jerusalem non ascenderent ut ibi coram arca immolarent, juxta præceptum Domini, Exod. xxiii, 17; Deut. xvi, 16; templa erexit in Dan et Bethel, ibique immolandum esse jussit : unde magnu^m cœpit existere schisma inter utrumque populum.

Amri, quintus post Jeroboam rex Israel, duobus talentis argenti optimum et spectabilem emit montem ¹ a quodam *Somer*, III Reg. xvi, 24; magnam super illum ædificavit civitatem quam nomine primi hujus loci possessoris vocavit *Samariam*, eamque caput regni sui fecit ². Ideo totum regnum istud antonomastice vocatum est *Samaria*, et ipsius incolæ dicti sunt Samaritani. Hi autem Pentateuchum retinuerunt religioseque servaverunt : at cunctos alios libros apud Judæos receptos et universas traditiones ab ipsis probatas constanter rejecerunt.

Anno mundi 3283, ante Christum 724, Salmanasar, rex Assyriæ, invasit regnum Israel, Samariam per tres annos obsedit, eam cepit, et Israelitas in captivitatem conversos Ninivem transtulit. Assarhad-don, Sennacherib successor, versus annum mundi 3294 regnare incœpit; paulo post Samariam iterum depopulavit et reliquos ejus habitatores in Assyriam deportavit; alios vero eduxit populos de Babylone, Cutha aliisque regionibus, *et collocavit eos in civitatibus Samariæ pro filiis Israel*, IV Reg. xvii, 24, ut terram hanc desertam occuparent et excolerent.

Cum autem ibi habitare cœpissent, non timebant Dominum, et immisit in eos Dominus leones qui interficiebant eos, ibid. 25. Nuntiatum est regi Assyriorum has gentes a leonibus interfici, eo quod legitima Dei terræ ignorarent; tunc ad eos misit rex unum de sacerdotibus

Leucis quindecim circiter a Jerusalem distantem.

² Anno ante Christum 924.

captivis qui doceret eos *legitima Dei terræ*, id est, legem Moysis. Nihilominus extranei illi populi speciales suos habebant deos, sicque, profanos ritus cultui veri Dei commiscentes, quoddam religionis monstrum sibi constituerunt.

Quando Judæi, permittente Cyro, templum Jerusalem instaurare cœperunt, anno ante Christ. 535, eos perturbare et impedire conati sunt Samaritani. I Esdr. iv, 23, fortius adhuc obstiterunt illis, ubi viderunt eos mœnia civitatis sub Nehemia extruere tentantes, anno 434 ? illos tamen ab incœpto opere cohibere non potuerunt.

Esdras autem de captivitate redux sacras sedulo collegit atque ordinavit Scripturas, easque novis scripsit characteribus, Chaldæis videlicet; in longa enim captivitate mos invaluerat apud Judæos vulgaribus utendi litteris, et veteres penitus obliti fuerant. Samaritani vero, invidia erga eos accensi, hanc innovationem ipsumque novatorem semper detestati sunt, et etiam nunc detestantur, veteresque characteres, licet informes et valde injucundos, jugiter retinuerunt integros.

Vehementi zelo pro lege Dei inflammatus Nehemias, plurimos corrigere studuit abusus inter populum grassantes; voluit in primis ut omnes qui alienigenas duxerant uxores, absque misericordia statim eas dimitterent¹. Quidam sacerdos nomine Manasses, II Esdr. xiii, 28, filiam Sannaballat, viri potentis inter Samaritanos, uxorem habebat; eam dimittere nolens, Judæos per veram apostasiam deseruit, et ad socerum suum aufugit.

Sannaballat, pro rege Persarum Samariæ gubernator, licentiam obtinuit ingens ædificandi templum super montem *Garizim* prope Samariam, ibique generum suum summum constituit sacerdotem; ex tunc² cœperunt fieri quodidie in novo hoc templo sacrificia et cæremoniæ, quæ juxta legem Moysis fieri consueverant in Jerusalem: irreligiogi, impii et omnes perditii homines qui censuram aliasve pœnas incurrebant apud Judæos, confugiebant ad Samaritanos, et, more ab eis recepto, Deo in monte Garizim serviebant: sic, altare contra altare erecto, excrevit divisio inter utrumque populum; obfirmatum est schisma, et multum invaluit odium jam existens.

Paulatim tamen ab idololatriæ ritibus recesserunt Samaritani, nec ad eos unquam postea redierunt. Verum Deum, secundum cæremonias per Moysen præscriptas, colebant, excepto quod Jerosolymam non ascenderent. At sacerdotes Judæi schismaticum hujusmodi cultum abominantes, tantam pronuntiaverunt excommunicationem contra Samaritanos, ut nulla similis unquam visa fuerit; nequidem volebant ut communissima eis præstarentur humanitatis officia.

Samaritani ex sua parte maximo odio prosequentes Judæos, eos

¹ Anno ante Christum 422.

² *Prideaux*, t. 2, p. 288.

quantum poterant semper vexabant; hac de causa, in violenta Antiochi persecutione, impio regi adhæserunt et auxilium ei præbuerunt. Sed Joannes Hircanus, Simonis Machabæi filius, eos persecutione finita, debellavit ¹, vicit, Samariam cepit, et templum Garizim funditus everlit: schisma tamen non exstinxit, nec impedire potuit quin in eodem loco sacrificaretur et religiosus celebraretur cultus.

Gabinus, consul Romanus et præses Syriæ, anno 58 ante Christum, Samariam reedificare cœpit. Herodes Magnus omnino eam instauravit, et vocavit Sebastam, in memoriam Augusti, a quo eam titulo proprietatis acceperat; Σεβαστε enim in idiomate græco idem significat ac *Augusta* in Latino. Forte collocavit præsidium in Turri Stratonis quæ in honorem ejusdem Cæsaris Augusti appellata est Cæsarea.

Prope hanc urbem, ad pedes montis Garizim, erat pateus Jacob in quem Jesus colloquium habuit cum muliere Samaritana de civitate *Sichar*, quæ est vetus *Sichem*, Joan. iv. Ex illo autem mirabili colloquio et ex pluribus aliis locis Novi Testamenti, evidenter constat summum adhuc hoc tempore exstitisse odium inter Judæos et Samaritanos, Joan. iv, 9, et viii, 48.

In universa clade Judæorum sub Vespasiano, valde oppressa est tota gens Samaritana, multa perpessa est mala; per orbem, sicut Judæi, dispersa est, eandem subiit conditionem, et nihilominus constanter ab illis fuit separata. Ejus reliquiæ adhuc supersunt pluribus in plagis atque urbibus Orientis, præsertim in Cairo Ægypti, in Gaza et in Neapoli ² vel Naplosa, ubi magnum suum habent sacrificatorem. Summa veneratione adhuc servant Pentateuchum primis characteribus exaratum, de quo mentionem faciunt Origenes et Hieronymus. Hujus exemplar quidam viator ad nos detulit; eruditissimus P. *Morin*, de congregatione Oratorii, illud typis mandandum curavit ac in lucem edidit, anno 1631. Qui plura de Samaritanis noscere voluerit, consulat Josephum, de Antiq. Jud. *Prideaux*, *Histoire des Juifs*; *Basnage*, idem, etc.

¹ Anno ante Christum 130.

² Neapoli, antiqua Sichem ab Herode instaurata, est sic dicta, id est, civitas nova.

APPENDIX HISTORICA

DE MAHUMETISMO.

Nobis dicendum est 1° de Mahumete et successoribus ejus; 2° de ipsius doctrina.

De Mahumete et successoribus ejus.

Mahumetes seu Mohammed vel Mohammedus natus est Meccæ in Arabia Deserta, anno æræ nostræ 570, juxta communio-rem opinionem, ex tribu *Coraisch*, nobilissima Ismaelitarum Abrahæ posterorum. Parentibus orbatus adhuc puer, et bonis fortunæ destitutus, ab *Abdal-Mothalleb*, avo suo, susceptus est, et deinde a patruo suo *Abou-Thaleb*, *Abdal-Mothalleb* filio, educatus fuit. Anno ætatis suæ vigesimo mercaturam cœpit exercere et emporia publica frequentare. Redux Meccæ, et annis 25 provectus, munus institoris apud *Kadidjah*, ditissimi mercatoris viduam, obtinuit: tam perfecte res ejus curavit tamque ei placuit, ut ab illa in matrimonium ductus et amplissimis facultatibus donatus fuerit.

Tantas opes tantamque fortunam, præter spem suam, adeptus, desiderium superius ascendendi et ad primum imperii fastigium perveniendi concepit; propterea de nova religione instituenda attente et serio cogitavit.

Hoc tempore multis superstitionibus imbuti erant Arabes, intestinis atque civilibus bellis quatiebatur Persia, divisionibus et imperitia debilitatum in ruinam tendebat imperium Græcum; totum Occidens ingentibus barbarorum turmis coopertum, densissimis ignorantiae tenebris jam incipiebat obvolvi.

Mahumetes autem, cum sæpe iter fecisset per Syriam, Palæstinam et Ægyptum, colloquia frequenter habuisset cum Judæis et variis Christianorum sectis, multa de religione Moysis et Christi didicerat, licet imperfecte. Aliunde naturalibus egregie præditus erat dotibus, ingenio callidus, memoria felix, eloquentia premens, præsentia animi pollens, fortitudine constans, statura præstans, sanitate robustus, arte fingendi ac decipiendi peritus; morum austeritatem diu simulavit; in speluncas montis *Hara*, prope urbem, unoquoque anno per mensem integrum secedere ibique meditationi vacare solebat, et ita singularem pietatis opinionem sibi conciliabat.

Annis 40 natus, in consuetam solitudinem per mensem *ramadan* ivit, et hac vice totam familiam suam secum duxit. Quodam die nar-

ravit uxori suæ Gabrielem Archangelum nocte præcedenti sibi apparuisse, apostolum Dei eum vocasse, et nomine Dei æterni jussisse ut legeret ¹ et veritates sibi revelandas homines doceret. Primam hanc imposturam persuasit *Kadidjah*, consanguineo ejus *Varaca*, qui Vetus ac Novum Testamentum legerat et doctores Judæos et Christianos frequentaverat; *Aly* patrueli suo, qui gener ipsius fuit; *Aboubekr* viro magnæ auctoritatis in Mecca, cujus filiam postea duxit; *Otheman*, *Abdalrahman*, *Saad*, *Zabair* et *Talha*. Per decem primos annos sat parvos tamen obtinuit successus; imo, propriis concivibus eum deridentibus, et magistratibus civitatis eum persequentibus ac mortem illi parentibus, exiens nocte fugit et petiit *Yathreb*, alteram Arabiæ Deserti civitatem nonaginta leucis a Mecca distantem, quæ dicta est *Medinat-ab-Naby*, civitas Prophetæ, vel simpliciter *Medina*. Tam celebris evasit hæc Mahumetis fuga, ut ab omnibus populis Mahumetanis assumpta fuerit tanquam æræ eorum initium quod diei veneris 46 julii anni 622 æræ nostræ respondet, et dicitur Hegira, *Hégire*, a voce Arabica *Hedjrah*, id est fuga.

Hactenus sola persuasionis via usus fuerat Mahumetes; ex tunc vero pactum cum discipulis suis pro mutua defensione iniit, omnem prohibuit disputationem cum extraneis circa doctrinam suam, declaravit eam ex mandato divino gladio defendendam et victoriis persuadendam esse. Statim reipsa cœpit arma gestare, infideles, id est, religioni suæ adversantes debellare, urbes expugnare, fidem longe lateque igne et ferro prædicare: solebat dicere singulos prophetas specialem suæ auctoritatis habuisse notam, Christum cum mansuetudine, se ipsum vero cum fortitudine missum fuisse.

Plurimas celebres præsertim contra Judæos reportavit victorias, Meccam occupavit et civibus captis imperavit credere aut mori. Alias immensas sibi adjunxit provincias, ita ut ipsius imperium 400 leucis tam ad meridiem quam ad orientem Medinæ dilataretur. Puella autem Judæa, scientiam ejus tentare volens, veneno infecit armum ovīs ipsi apponendum. Nefariam machinationem non suspicans falsus propheta, de armo bona fide comedit, et veneno lento confectus, obiit anno ætatis suæ 62, hegiræ 10 et æræ nostræ 632. Sepultus est sub lecto in quo mortuus erat. Tumulus ejus nunc conspicitur in magno templo (*mosquée*) Medinæ cancellis ferreis circumvolutus. Falsum est illum ope adamantis lapidum in aere esse suspensum. Testamento suo statuerat ut *Aly*, gener suus, sibi immediate succederet: at duces exercitus *Aboubekr* socerum ejus elegerunt, et califum seu Prophetæ vicarium constituerunt. Ipsius cura et jussu prima vice Alcoranus, de quo infra dicemus, ope *Zaib-ben-Thabet*, scribæ, in lucem prodiit.

Eo mortuo, *Omar* I electus est califus, et maximus omnium fuit populorum domitor: intra decem annos triginta sex millia urbium

¹ Communis opinio est apud Musulmanos Mahumetem legere non scivisse.

vel castellorum per duces suos cepit, quatuor millia templorum Christianorum vel paganorum evertit, et alia mille quadraginta religioni suæ ædificavit: ille est qui celeberrimam bibliothecam Alexandrinam comburi jussit, anno 642¹; occisus est anno 644, hegiræ 22; successorem habuit *Otheman*, qui occisus est et ipse anno 656. Post eum *Aly* tandem obtinuit califatum, et sedem imperii a Medina transtulit *Gouffa* super Euphratem. Traditiones observationesque in Alcorano non scriptas abolevit; hinc magna facta est divisio inter Mahumetanos, aliis quippe veram doctrinam Prophetæ per *Aboubekr* promulgatam sectantibus, aliis vero reformationi ab *Aly* factæ adhærentibus.

Hispania a Carthaginensibus, Romanis, Gothis et Vandalis successive occupata, a Mahumetanis Arabibus, dictis *Mauris* propter nigritudinem, vel quia per Mauritaniam Africæ provinciam venerant, fuit invasa, anno 711, et ab eis penitus liberari non potuit ante finem decimi quinti sæculi.

Decem et novem sibi successerunt califi ex *Omar* descendentes, qui idcirco vocati sunt *Omniadi*. Versus annum 752 alia cœpit existere dynastia califorum ex *Abbas*, Mahumetis patruo, ortorum, qui propterea dicti sunt *Abbassidi*. *Abou-Giasar-Almanzor*, secundus hujus dynastiæ califus, caput sui imperii fecit Bagdad ad Tigrim ædificatam, ibique ipsius successores usque ad initium decimi quinti sæculi sedem habuerunt: at circa nonum aut decimum æræ nostræ sæculum omnem temporalem auctoritatem amiserunt, et solam potestatis umbram retinuerunt. Imperium successive divisum est; varii optimates in diversis locis auctoritatem de facto exercebant, et cœperunt vocari *Sultani*, *Sultans*, id est, domini.

In undecimo sæculo, Turci, ex Scythia oriundi, a multo tempore jam existentes, adversus Græcos et Saracenos prævalere incœperunt, et in Oriente potentes facti sunt. Circa annum 1300, *Ottoman* vel *Othman*, ex illa gente oriens, summus factus est dominus vel sultanus: hinc successores ejus dicti sunt *Ottomani*. Mahumetes II, unus ex illis, cujus cognomen Magnus, Constantinopolim anno 1453 obsedit, vi aperta eam cepit atque sedem imperii fecit. Eam hucusque possederunt Turci et principes Ottomanii. Puram et integram Mahumetis doctrinam se retinere glorianur, sicut Tartari et Africani; et dicuntur Sunniti (*Sunites* vel *Sonites*), quia adhærent Sunitæ, id est, traditioni Alcorano superadditæ: maximo odio prosequuntur Persas aliosque populos Orientales, præsertim in Indiâ, quia reformationem *Aly* sectantur; et vocantur etiam Fatimiti (*Fatimites*) a *Fatiméh*, Mahumetis filia et *Aly* uxore, eosque appellant Shiitos (*Shiites* vel *Chiites*), id est, separatos, schismaticos, hæreticos, etc. Hi autem

¹ Cuncta hujus bibliothecæ volumina distribuenda esse voluit *Amrou*, dux exercitus *Omar*, balneis publicis quæ, licet numero 4,000 per sex menses ope prædictorum librorum calefacta sunt.

Aly discipuli adeo divisi sunt, ut jam plus quam septuagenæ duæ sectæ inter eos numerentur.

De doctrina Mahumetis.

Doctrina religionis Mahumetanæ continetur præcipue in libro cui titulus *Alcoran*, a duabus vocibus in lingua Arabica usitatissimis, scilicet *al*, articulus, Gallice *le*, et *coran*, nomen substantivum idem sonans ac collectio vel liber : sic antonomastice propter excellentiam suam simpliciter dicitur *liber*, sicut apud nos codex Scripturarum sacrarum vocatur sine addito *Biblia*, a verbo Græco *βιβλος*.

Juxta Mahumetanorum traditiones, singularis ille liber, omnium perfectissimus et cunctas hominum facultates longe superans, e conspectu throni Dei quadam nocte mensis *ramadan*, in infimum cælum, id est, in cælum lunæ descendit, in membrana ex pelle arietis quem occidit Abraham loco Isaac confecta descriptus.

Archangelus Gabriel Mahumetem frequenter visitans, divinum et incomparabilem hunc librum per partes intra viginti tres annos ad eum detulit ; cum autem Propheta, secundum vulgarem Arabum opinionem, scribendi legendique gnarus non esset, ministerio scribarum utens, sententias sibi revelatas in chartulis scribendas curabat.

Post ipsius obitum, *Aboubekr*, primatum adeptus, summam statim adhibuit curam ut omnes chartulæ sedulo collectæ in unum coalescerent : ipso jubente, scriba *Zaid-ben-Tabet* hunc suscepit laborem ; chartulis adjungens fragmenta quæ reperiit in omoplatis ovium, in lapidibus albis, in foliis palmarum, in frustulis corii vel panni scripta, sententias memoria solum retentas et varie sibi narratas, hæc omnia promiscue et sine ullo ordine coadunans, sat grande, sed omnino informe composuit volumen : illud tamen divisit in capita, et singulis capitibus speciales annexuit titulos ordinarie vagos, vel sensu carentes, et sæpe ridiculos, v. g. de *ape*, de *formica*, de *vacca*, de *aranea*, de *fumo*, de *stercoribus*, etc.

Nullus unquam visus est liber adeo vagus et obscurus, tot nugis, repetitionibus et contradictionibus refertus, tam fastidiosus et omni vero sensu destitutus. Solis ignorantiae tenebris et cupiditatum illecebris explicari potest quomodo fidem ei adhuc præbeant Mahumetani ; in crassa ignorantia enim cuncti illi populi versantur, ut neminem latet ; et carnis voluptatibus, adeo vehementer allicientibus in his regionibus, multum favet *Alcorani* doctrina : hæc namque, quantum colligi potest, summa est illius libri doctrina quæ ad dogmata, præcepta moralia et leges cæremoniales reducitur.

1° *Quoad dogmata*, hæc præcipue habentur, scilicet : 1° Unus est Deus summe perfectus qui similem sui generare non potest, proindeque trinitas in Deo admitti nequit. 2° Sunt angeli qui subtilissima ex igne composita habent corpora ; non manducant tamen neque bibunt,

nec diversi sunt sexus. Alii Deum adorant, alii laudes divinas canunt, alii pro hominibus intercedunt, et alii thronum Dei portant. Quatuor frequentius nominantur, nempe *Gabriel*, *Michael*, *Azrael* et *Ifrasil*. Singulis hominibus adsunt angeli custodes qui quotidie uniuscujusque actiones accurate describunt. Angelus *Azazil* Deo erat proximus; sed jussus Adamum adorare, vel coram illo procumbere, recusavit; ideo ab excelsa statione sua decidit, et factus est diabolus : nunc totus est ut hominibus noceat. Præter angelos et dæmones, sunt genii boni et mali ex crassiori substantia compositi, qui manducant, bibunt, speciem propagant et morti sunt obnoxii. 3° Libri sacri sunt Pentateuchus, Evangelium et Alcoranus. Per Pentateuchum intelligunt Mahumetani omnes libros Veteris Testamenti; et per Evangelium, Actus et Epistolas Apostolorum, necnon Apocalypsim : asserunt tamen hos libros a Judæis et Christianis esse corruptos, et cunctas leges positivas tum Veteris tum Novi Testamenti per legem Mahumetis fuisse abrogatas, ita ut soli Alcorano nunc plena fides adhibenda sit. 4° Altera futura est vita beata et æterna pro bonis, mala vero pro malis, sed forte non æterna saltem pro omnibus; inter doctores enim Mahumetanos plurimi censent reprobos, post certum temporis lapsum, admitteudos esse ad felicitatem eisque apponendas esse in convivium reliquias convivii justorum. Futuram esse generalem mortuorum resurrectionem admittunt, et extremum atque solemne judicium quod sic exercebitur : prægrandis erit statera totam cœli et terræ superficiem adæquans, cujus lanx una erit lucis et altera tenebrarum; in utraque per omnipotentiam Dei ponderabuntur cuncta opera hominum, videlicet bona opera in lance lucis et mala in lance tenebrarum. Narrant insuper omnino credendum esse vere existere pontem *Sarat* vel *Sirath*, qui est corpus acutius gladio et subtilius capillo supra medium gehennæ extensum; omnes super illud transire debent : infideles ex judicio Dei titubabunt et in gehennam cadent; fideles vero constanter ambulabunt et in domum requiei ducentur. Paradisi felicitas tota fere sita est in arboribus, fontibus, pomis, vestibus pretiosis, in comedendo et bibendo, in lectulis, puellis et venereis oblectamentis : hæc sæpissime refricantur et nonnunquam coloribus minime pudicis exprimuntur. 5° Fundamentale dogma est apud Mahumetanos, omnia absoluta Dei voluntate esse prædeterminata, ac proinde necessario fieri.

2° Præcipua Mahumetanorum *præcepta moralia* sunt : 1° omnem disputationem de religione esse prohibitam, et unumquemque sine ulla hæsitazione credere debere in Pentateuchum, Evangelium et Alcoranum, in Deum et in Mahumetem ejus prophetam; 2° cunctis infidelibus apertum inferendum esse bellum donec veram amplectantur fidem, et fideles in bello hujusmodi occumbentes veros esse martyres; 3° quatuor uxores ducere licitum esse, aut unam et usque ad tres ancillas concubinas : ab hac lege dispensatus fuit Mahumetes, qui quindecim habuit uxores et decem vel duodecim concubinas; 4° licere pariter uxores duabus vicibus repudiare et assumere; tertio etiam recipi posse

uxorem repudiatam, modo vir alter eam prius duxerit et repudiaverit. Multæ sunt aliæ leges de juramentis, de vindicta privata, de pœna talionis, de usu feminarum, etc. a spiritu Evangelii non minus remotæ.

3^o *Leges cæremoniales sunt*, 1^a purificationes seu lotiones : in aliquibus circumstantiis extraordinariis totum corpus immergendum est in aquam; ad id tenentur mulieres post partum, et quicumque mortuum tetigerunt : in aliis casibus solummodo lavantur facies, manus et pedes. Deficiente aqua, purificatio præscripta fit cum arena. 2^a Circumcisio, quæ libere fieri potest a sexto usque ad decimum sextum annum : in hac cæremonia requiritur ut puer professionem fidei apud Mahumetanos usitatam distincte pronuntiare valeat : *Non est Deus præter Deum, et Mohammed est legatus ejus*. 3^a Oratio, quæ quinques per singulos dies fieri debet a Mahumetanis, faciem versus faciem Meccanum habentibus, scilicet, ante solis ortum, statim post meridiem, ante solis occasum, post solis occasum, ante finem crepusculi et post crepusculum. Usus campanarum omnino prohibetur, et ideo publici præcones in templorum turribus stantes alta voce clamant : *Maximus Deus, Maximus Deus*, etc. et populum statutis horis ad orationem vocant. 4^a Eleemosyna, quæ duplex est, alia scilicet spontanea, ad quam valde excitat Mahumetes, et ad moralia præcepta pertinet; et altera lege præscripta, quæ bellorum expensis potissimum destinata est, et sic verum est tributum. 5^a Jejunium, quod etiam duplex est, unum supererogatorium et ad privatorum devotionem exercendum, et alterum obligatorium, quod per mensem lunarem *ramadan* strictissime observari debet ¹; id est, nihil omnino, durante die, sumere licet, nequidem guttulam aquæ, et a cunctis voluptatibus abstinendum est; at post solis occasum ea omnia licent quæ alio tempore permissa sunt. Solemne hoc jejunium ideo in mense *ramadan* observatur, quia eo tempore Alcoranus demissus est de cælo, et terminatur festo solemniter dicto parvo *Beyram* : tribus subsequentibus celebratur diebus, et vulgo dicitur Pascha Turcarum; septuaginta diebus post hoc festum, magnum celebratur *Beyram* per quatuor dies. His duntaxat septem diebus in toto anno negotium omneque opus servile prohibentur; nam laborare licet die veneris cultui religioso specialiter consecrato. 6^a Abstinencia a vino, ludo et musica, item a morticino, sanguine, carne suilla, idolothyto, suffocato, occiso percussione, mortuo ex casu, occiso cornu alterius animalis, ab eo de quo fera comederit. 7^a Est peregrinatio Meccana ex usu ethnicorum Arabum a Mahumete accepta et ipsius asseclis præscripta, quæ ab omnibus legitime non impeditis saltem semel in vita fieri debet. Opinantur Arabes hanc peregrinationem ab ipso Adam incœptam esse, templum nunc exstans tempore diluvii as-

¹ Cum annus Mahumetanorum sit lunaris, mensis *ramadan*, varia successive percurrit tempora, et intra triginta tres annos circulus perficitur; sæpe ergo magnum jejunium in æstate celebratur

sumptum esse in cœlum, Abraham vero aliud omnino simile ex jussu Dei ædificavisse.

Patet ex modo dictis, totam Mahumetanorum religionem informem esse congeriem veterum traditionum Arabum ab Abraham per Ismaelem descendentium, factorum Veteris et Novi Testamenti, fabularum Thalmudistarum, et errorum Arii, Nestorii aliorumque hæreticorum vel catholicorum ignorantia crassa laborantium.

Singularis hæc Mahumetis religio seria confutatione minime indiget; a perfectione enim religionis Christianæ longe abest, et nullis characteribus veritatis fulcitur; præcipui namque veritatis religionis positivæ characteres sunt miracula et prophetiæ: atqui religio Mahumetis neque miraculis vere divinis neque prophetiis innitur.

1° *Non miraculis vere divinis*; pluribus enim Alcorani locis proficitur Mahumetes se ad miracula patranda missum non fuisse, penes Deum esse signa, se vero manifestum esse prædicatorem, etc. Dat tamen suum Alcoranum ut prodigium vere divinum, utpote opus eximium a se idiota conscriptum, cui eloquentissimi viri a se rogati nihil simile condere potuerunt: at certe ille liber, ex compendio ipsius doctrinæ supra exposito, sub nullo respectu videtur esse quid divinum, bene vero quoddam delirii portentum. Doctores quidem Mahumetani multa Prophetæ suo tribuunt miracula, usque ad tria millia, quæ dicunt esse splendidissima; verum tam ridicula sunt ut vix serio referri queant: v. g. bos Alcoranum inter cornua gestit; columba ad aurem Prophetæ advolat; magna pars lunæ in manicam ejus delabitur, et ille eam remittit ne sideri sua desit rotunditas; fontes e digitis ejus scaturiunt; montes et lapides eum prætereuntem salutant, dicentes: *Salve, Propheta Dei*; arbores cacumina inclinant, dux præ cæteris eum ad nutum sequuntur, se mutuo jungentes, umbraculum super eum, dum ventrem solvit, extendunt; in ictu oculi a Mecca Jerosolymam iter facit, insidens dorso jumenti cujus lora Archangelus Gabriel tenet; splendente scala in cœlum ascendit, septem cœlos visitat, etc. Quis autem in hujusmodi prodigiis characteres veritatis et divinitatis reperiet? ergo 1°.

2° Religio Mahumetis *veris prophetiis non innitur*; nullas quippe prophetias edidit Mahumetes, sed tantum, Pentateuchum et Evangelium corrumpens, exhibet Deum, in cap. 7 et 61 Alcorani, ut singularem annuntiantem prophetam qui multa juberet honesta, inhonesta vero prohiberet, et prætendit se hunc esse prophetam: at nemo non videt talem allegationem, omni ratione positiva destitutam, nulla fide esse dignam: ergo.

Religio Mahumetana dicitur Gallice *Islamisme*, a voce *islam* quæ in lingua Arabica exprimit actionem plene Deo se committendi: ex illa voce Persæ fecerunt *Muslim* et in numero plurali *Muslimim*; unde Mahumetani dicuntur *Musulmans*. Olim vocati sunt etiam Sarraceni (*Sarrasins*), a populo qui Medinæ et circa Medinam tempore Mahume-

tis habitabat, qui novæ religioni subscripsit, et cunctis eam profitentibus nomen suum dedit : nomen istud obsolevit quando Turcæ primatum obtinuerunt.

Ministri religionis Mahumetanæ vocantur imanni, *imans* ; præsumt orationibus, quæ a solis privatis nunquam fieri debent in templo, publice ac solemniter, sine cantu tamen, celebrantur die veneris : hac die publicas habent conciones ad populum. Unus specialiter præpositus est unicuique templo (*mosquée*), sicut parochus apud nos, et plures sub se habet imannos. Primus omnium in toto Turcarum imperio dicitur *mufti* vel *muphti* ; solus infallibiliter Alcôranum interpretatur. Quidam sunt etiam religiosi seu monachi *dervis* vel *derviches* appellati, qui vitam ducunt cælibem, pauperem et valde austeram, saltem apparenter : at hujusmodi professionem pro nutu relinquere possunt.

Vide Lectiones theologicas ad usum diœcesis Rothomagensis, t. 5 ; *Hooke*, Religionis naturalis, etc. Principia, t. 2 ad calcem ; *Biographie universelle*, art. *Mahomet* et *Aly* ; *Exposition de la foi Musulmane traduite du turc par M. Garcin de Tassy*, etc.

TRACTATUS

DE

ECCLESIA CHRISTI.

In præcedenti tractatu nostro demonstravimus solam religionem Christianam esse veram et divinam, solamque admittendam : omnes igitur homines tenentur, quantum in se est, eam cognoscere et amplecti.

At religio ista, qualis nunc existit, in varias dividitur sectas quæ plurimis in punctis sibi contradicunt : earum igitur doctrina æqualiter vera non est ; quia Deus non potest revelare falsum : unde vel omnes a vera Christi doctrina recesserunt, et in errorem plus minusve impigerunt ; vel unica ex illis genuinam Christi doctrinam in sua integritate servat. Apertissimam hanc veritatem nemo inficiatur.

Maxima ergo cum diligentia nobis investigandum est an vera Christi religio in sua integritate adhuc existat, quomodo a diversis erroribus circa illam existentibus secerni possit et cognosci debeat, ad salutem consequendam.

Hæc religio ab omnibus vocatur Ecclesia, et idcirco tractatus noster inscribitur : DE VERA CHRISTI ECCLESIA.

In tres partes eum dividemus, quarum 1^a erit de veræ Ecclesiæ notis, seu attributis constitutivis ; 2^a de ejus auctoritate, et 3^a de ipsius capite et membris. His tria præmittenda sunt capita : 1^{um} de genere argumentorum quibus in præsentis tractatus decursu utendum est ; 2^{um} de notione Ecclesiæ, et 3^{um} de necessitate ipsi adhærendi.

I CAPUT PRÆVIUM.

DE GENERE ARGUMENTORUM QUIBUS IN PRÆSENTIS
TRACTATUS DECURSU UTENDUM EST.

Existentia et constitutio veræ Ecclesiæ sunt facta a libera Dei voluntate provenientia : in his ergo tractandis non utendum est argumentis ex sola ratione depromptis ; sed consulenda sunt monumenta in quibus continentur libera Dei consilia : porro hæc monumenta sunt Scriptura sacra et traditio.

ARTICULUS PRIMUS.

DE SCRIPTURA SACRA.

1° Adversarii quos in decursu hujus tractatus impugnaturi sumus, agnoscunt Scripturam tanquam genuinum Dei verbum continentem : supposita igitur, et non probata *inspiratione* librorum divinorum, argumenta ex ipsis merito colligemus ad stabiliendas defendendasque propositiones nostras.

2° In præcedenti tractatu probavimus libros, tum Veteris, tum Novi Testamenti esse authenticos, veros et integros, proindeque omnimoda fide dignos : porro in eis referentur Dei Christique verba : ergo.

3° Demonstravimus religionem Christianam esse divinam : ergo libri qui primæva ejus monumenta continent, semper sunt veri ; alioquin vera Christi doctrina perire, vel saltem adulterari posset : hoc autem Deus permittere nequit.

4° Vel auctores librorum Novi Testamenti, de quibus præsertim nunc agitur, propria Christi verba referunt, vel non : si prius, nulla est difficultas ; si posterius, ergo

mentiti sunt : porro dici non potest eos mentitos esse; nam plurima ediderunt miracula in confirmationem doctrinæ quam verbis et scriptis prædicabant; repugnat autem Deum operari miracula, sive per se, sive per ministros suos, ad confirmandos errores : ergo.

ARTICULUS SECUNDUS.

DE TRADITIONE.

Certum est Christum multa dixisse et fecisse quæ in Evangelio non fuerunt scripta, ut ipse S. Joannes testatur, XXI, 25 : hæc autem via traditionis ad nos pervenire potuerunt : igitur traditio ista recte definitur, *Doctrina divina in libris canonicis non scripta*, sive viva voce transmittatur, sive in aliis scriptis reperiatur.

Quæstio est an hujusmodi traditio tutissima sit via qua doctrina Christi et Apostolorum ad nos pervenire possit. *Negant* protestantes, *affirmant* vero omnes catholici, quibuscum sit

PROPOSITIO.

Traditio est via tutissima qua doctrina Christi et Apostolorum usque ad nos certo pervenire potest.

Prob. 1º ex ipsa Scriptura sacra. II Thessal. II, 14 : Itaque, fratres, state, et tenete traditiones quas didicistis, sive per sermonem, sive per epistolam nostram. II Tim. I, 13 : Formam habe sanorum verborum quæ a me audisti, in fide et in dilectione in Christo Jesu. Bonum depositum custodi per Spiritum sanctum qui habitat in nobis. Ibid. II, 1 : Tu ergo, fili mi, confortare in gratia quæ est in Christo Jesu, et quæ audisti a me per multos testes, hæc commenda fidelibus hominibus qui idonei erunt et alios docere. Porro in his textibus agitur de doctrina sola voce transmissa, velut deposito custodienda et alios docenda : ergo, juxta Apostolum, doctrina sana et divina sic transmitti potest.

Prob. 2º ex sanctis Patribus. Quidquid dicant protestantes de sanctis Patribus eorumque scriptis, saltem negare non possunt eos fuisse testes doctrinæ quæ ipso-
rum tempore in variis ecclesiis suis docebatur : merito igitur consulendi sunt, et si fuerint unanimes in admit-
tenda traditione divina, hinc firmissimum eruitur argu-
mentum : porro sancti Patres fuerunt unanimes, etiam in primis Ecclesiæ sæculis, in admittenda traditione divina ; ex innumeris eorum testimoniis quæ citari pos-
sent, quædam tantum seligemus.

Tertull. lib. de Corona, post enumeratas varias tra-
ditiones de cæremoniis baptismi, de signo crucis, de oblationibus pro defunctis, etc. addit, cap. 4 : « Harum
» disciplinarum si legem expostules Scripturarum, nul-
» lam invenies. Traditio tibi prætendetur auctrix, con-
» suetudo confirmatrix et fides observatrix. »

Origenes, in cap. vi Epist. ad Rom. lib. 5 : « Ecclesia
» ab Apostolis traditione suscepit etiam parvulis baptis-
» mum dare. »

S. Basilius, lib. de Spiritu sancto, cap. 27, n. 66, ait : « Ex asservatis in Ecclesia dogmatibus et prædica-
» tionibus, alia quidem habemus e doctrina scripto pro-
» dita, alia vero nobis in mysterio tradita recepimus ex
» traditione Apostolorum. »

S. Chrysost. in cap. ii Epist. II ad Thessal. ad verba quæ retulimus, dicit : « Hinc est perspicuum quod non
» omnia tradiderunt per epistolam, sed multa etiam
» sine scriptis ; et ea quoque sunt fide digna. Quam-
» obrem Ecclesiæ quoque traditionem censeamus esse
» fide dignam. »

S. Epiph. Hæresi 61 : « Sed et traditione quoque
» opus est. Neque enim ex scripturis peti possunt omnia.
» Idcirco alia scripto, traditione alia sanctissimi Apostoli
» reliquerunt. »

S. Aug. de Bapt. lib. 5, cap. 23 : « Sunt multa quæ
» universa tenet Ecclesia, et ob hoc ab Apostolis præ-
» cepta bene creduntur, quanquam scripta non repe-
» riantur. »

S. Hieronymus, Dialogo contra Luciferianos, cap. 4 :
 « Etiam si Scripturæ auctoritas non subesset, totius or-
 » bis in hanc partem consensus instar præcepti obtine-
 » ret; nam et multa alia quæ per traditionem in Ecclesiis
 » observantur, auctoritatem scriptæ legis sibi usurpa-
 » verunt. »

Clara sunt hujusmodi testimonia, et multo clariora
 apparerent si uniuscujusque integer legeretur contextus.
 Unde eruditus *Casaubon*, protestans, fatebatur omnes
 sanctos Patres esse pro catholicis; *Obreths*, non minus
 eruditus, testatur quod opera illorum legendo, antequam
 in sinum Ecclesiæ Romanæ rediisset, pluries tentatus
 fuerit ea projicere in terram, quia plena sibi videbantur
papismo. Ergo Patrum testimonio evidenter constat ad-
 mittendas esse divinas traditiones.

Hinc concilium Trident. merito definiit, sess. 4, de-
 cret. de Canonicis script. « Omnem salutarem veritatem
 » et morum disciplinam contineri in libris scriptis; et
 » sine scripto traditionibus, quæ ipsius ore Christi ab
 » Apostolis acceptæ, aut ab ipsis Apostolis Spiritu sancto
 » dictante, quasi per manus traditæ, ad nos usque per-
 » venerunt. »

Prob. 3º ratione. Ab Adam usque ab Moysen tradi-
 tione habebatur fides de creatione mundi, de lapsu
 primæ parentis, de vita futura, de redemptore venturo,
 de remedio peccati originalis, etc. A Moyse usque ad
 Christum, sola iterum traditione habebatur fides de
 remedio peccati originalis pro feminis, de canonicitate
 librorum sanctorum et de multis aliis; in nova autem
 lege viva voce tantum primo docuerunt Apostoli, plures
 ecclesiæ diu exstiterunt absque scriptis, et etiam nunc
 plura docentur et ubique velut divina creduntur, licet in
 Evangeliiis nec aliis Apostolorum scriptis inveniantur :
 sic ipsi protestantes admittunt beatam Deiparam semper
 fuisse virginem, baptismum parvulis esse conferendum,
 ab hæreticis rite collatum non esse iterandum, quatuor
 tantum esse Evangelia, etc. porro hæc omnia aliaque
 multa sola traditione constant : ergo.

Et vero Apostoli per orbem dispersi varias fundaverunt ecclesias, quæ vice sua alias genuerunt eisque traditiones suas transmiserunt: sic prodire omnes ecclesiæ Christianæ in mundo existentes. Si ergo omnes sint moraliter unanimes in admittenda aliqua doctrina ut divina, licet non scripta, certe negare non possumus eam esse reipsa divinam. Vel enim est divina, vel ab aliquo impostore fuit excogitata: at posterius dici non potest; quis namque rationis compos credat aliquem impostorem, quantumvis in arte fallendi peritus supponatur, cunctis fidelibus ac pastoribus universarum ecclesiarum, locis, moribus et usu sermonis a se discrepantium, persuasisse, velut divinam, a Christo et Apostolis venientem, doctrinam supposititiam de qua nihil unquam audiissent? Manifestum est talem hypothesim esse prorsus absurdam: igitur admittenda est traditio ut via tutissima qua doctrina divina ad nos usque certo pervenire queat.

Inter alia opera quæ utiliter consuli possunt, vide *Bossuet*, variis in locis, et præsertim *Défense de la tradition*; *la Discussion amicale*, lettre 4; *Excellence de la religion catholique*, ouvrage traduit de l'anglais de *M. Milner*, lettre 10, etc.

Hinc sequitur quod traditio constans et universalis tantam mereatur fidem quantam ipsa Scriptura sacra; ergo validissima subministrat argumenta ad dignoscenda fidei dogmata, et inprimis divinam veræ Ecclesiæ constitutionem; etenim quæ vera traditione constant ut divina, tam certa sunt ac ea quæ in libris sacris describuntur. Ergo.

II CAPUT PRÆVIUM.

DE NOTIONE ECCLESIAE.

Vox *Ecclesia*, a verbo Græco ἐκκληῶ, *evoco*, oriens, idem

significat ac cœtus. In ipsis Scripturis sacris promiscue usurpatur pro cœtu, sive religioso, v. g. *Si Ecclesiam non audierit, sit tibi sicut ethnicus et publicanus*, Matth. xviii, 17; sive profano, ut in Act. xix, 32: *Erat enim ecclesia confusa*; sive etiam iniquo: *Odivi ecclesiam malignantium*, Ps. xxv, 5. Mos autem prævaluit ut vox illa pro cœtu religioso duntaxat sumeretur, imo ad designandum societatem religionem Christi profitentem consecraretur.

In triplici statu catholici considerant Ecclesiam Christi, videlicet, in cœlo triumphantem, in purgatorio patientem, et in terra militantem.

De sola ecclesia prout est in terra militans, hic nobis agendum est.

Bellarminus eam definit, *societatem hominum viatorum ejusdem fidei professione eorundemque sacramentorum participatione conjunctorum sub regimine legitimorum pastorum ac præsertim summi Pontificis*. Omnes theologi catholici hanc definitionem unanimiter admiserunt; est enim accurata et naturam Ecclesiæ catholicæ perfecte describit, *ut ex dicendis in decursu tractatus patebit*: sed hæretici quibuscum nobis dimicandum est, eam rejiciunt. Requiritur tamen ut commune cum illis habeamus principium extra dubium positum; ex quo procedentes, methodicam instituamus discussionem. Bossuet Ecclesiam sic definivit in exordio famosissimi sui cum ministro Claude colloquii: *Societas hominum viatorum, veram Christi doctrinam profitentium*. Fatentur ipsi protestantes definitionem istam esse veram et accuratam: hanc igitur admittimus.

III CAPUT PRÆVIUM.

DE NECESSITATE ADHÆRENDI VERÆ ECCLESIAE.

Sensus quæstionis est utrum extra communionem cum vera Christi Ecclesia salus obtineri possit.

PROPOSITIO.

Extra veram Christi Ecclesiam nulla est salus.

Prob. 1º. B. Paulus, Eph. v, 23 : *Christus caput est Ecclesiæ, ipse salvator corporis ejus.* Col. 1, 18 : *Et ipse est caput corporis Ecclesiæ.* Unde sic. Nemo potest salvari sine Christo, Christus est salvator corporis sui mystici, id est Ecclesiæ ; nonne sequitur extra Ecclesiam nullam esse salutem ?

In aliis locis Ecclesia dicitur *domus Dei, columna veritatis*, sponsa et amica Christi : porro repugnat salutem reperiri extra domum Dei, columnam veritatis et sponsam Christi : ergo.

Prob. 2º ex Patribus. S. Cypr. de Unitate Eccl. « Ha-
» bere jam non potest Deum patrem qui non habet
» Ecclesiam matrem..... Si potuit evadere quisquam qui
» extra arcam Noe fuit, et qui extra Ecclesiam fuerit
» foris evadet. » Multa alia citari possent testimonia non
» minus clara et splendida. Ergo.

Propositionem nostram libenter admittunt ipsi protestantes ; cum enim hic agatur de vera Christi Ecclesia in genere, fatentur extra eam nullam obtineri posse salutem. Vide *Bossuet, Histoire des Variations*, l. 15. Calvinus aiebat, Institut. l. 4, c. 1 : « Extra Ecclesiæ gre-
» mium nulla est speranda remissio peccatorum, nec
» ulla salus. » *Jurieu*, celebris minister in secta calviniana, idem confessus est, et hodierni protestantes ab ea sententia minime recedunt. Frustra igitur hanc quæstionem fusius tractaremus. Nunc summa cum diligentia quærendum est ubi sit vera Ecclesia extra quam nulla est salus.

PARS PRIMA.

DE NOTIS SEU ATTRIBUTIS VERÆ ECCLESIAE CONSTITUTIVIS.

Notæ Ecclesiæ sunt signa quibus eam a sectis pseudo-christianis tuto secernere possumus. Certum est apud omnes quod hujusmodi signa existere debeant; Deus enim omnes homines vult salvos fieri, et ad agnitionem veritatis venire, I Tim. II, 4: porro extra veram Ecclesiam nulla est salus: ergo.

Duplicis generis distinguuntur notæ Ecclesiæ; aliæ scilicet negativæ, et aliæ positivæ: unde hanc partem in duo capita dividemus.

CAPUT PRIMUM.

DE NOTIS ECCLESIAE NEGATIVIS.

Notæ negativæ sunt proprietates veræ Ecclesiæ essentielles, quæ in aliis societatibus inveniri possunt: dicuntur negativæ, quia earum absentia probaret quidem talem Ecclesiam esse falsam, sed earundem præsentia non demonstraret illam esse veram. Quatuor præcipue numerantur, videlicet visibilitas, indefectibilitas, invariabilitas et auctoritas in docendo. De singulis paucis verbis disseremus, et postea examinabimus cuinam societati Christianæ competant.

ARTICULUS PRIMUS.

DE VISIBILITATE ECCLESIAE.

Professio veræ doctrinæ Christi debet esse externa, ut

omnes conveniunt. Similiter contineri debent in illa virtutes internæ a Christo præscriptæ, nempe fides, spes, charitas, etc. Id apud omnes in confesso est.

Externa professio doctrinæ Christi corpus Ecclesiæ dicitur; virtutes internæ ipsius anima vocantur, quia respectu societatis religiosæ sunt sicut anima respectu corporis humani. In hoc protestantes nobis iterum consentiunt. Externa autem doctrinæ Christi professio reddit Ecclesiam visibilem, et quæstio est an Christus voluerit ut ipsius Ecclesia esset visibilis. Duplici modo potest esse visibilis, scilicet, eo ipso quod sit externa; et eminenter, quatenus videlicet doctrinam Christi publice profiteatur et multis innotescat.

PROPOSITIO.

Vera Christi Ecclesia eminenter visibilis esse debet.

Prob. Illud ab omnibus Christianis ut certum haberi debet quod prædixerunt Prophetæ, docuit Christus, confirmaverunt Apostoli, tradiderunt sancti Patres et astruit ratio: atqui prædixerunt Prophetæ, docuit Christus, etc. Ecclesiam debere esse eminenter visibilem.

1^o *Prædixerunt Prophetæ.* In Isai. II, 2, legitur: *Et erit in novissimis diebus præparatus mons domus Domini in vertice montium, et elevabitur super colles, et fluent ad eum omnes gentes.* Mons ille domus Domini naturaliter explicari non potest nisi de Ecclesia Christi, et sic intellectus est a S. Hieronymo, ab aliis Patribus, a Scripturæ sacræ interpretibus et ab omnibus theologis: at societas sic designata, ad quam omnes gentes fluent, certe eminenter visibilis esse debet.

Legitur in Dan. II, 34 et 35: *Abscissus est lapis de monte sine manibus, et percussit statuam in pedibus ejus.... et factus est mons magnus, et implevit omnem terram.* Celebris illa prophetia quæ integra legenda est, communiter de Ecclesia Christi intelligitur, et revera aliter explicari non

potest : porro Ecclesia sic designata essentialiter est visibilis : ergo 1^o.

2^o *Christus docuit Ecclesiam debere esse evidenter visibilem*; illam enim variis in locis designat sub figuris *civitatis et regni*, v. g. Matth. v, 14 : *Vos estis lux mundi ; non potest civitas abscondi supra montem posita* ; ibidem xiii, 33 et alibi : *Simile est regnum cœlorum*, etc. at illæ figuræ prorsus inconvenientes essent si Ecclesia eminenter visibilis esse non deberet : ergo 2^o.

3^o *Confirmaverunt Apostoli* ; sic enim habet B. Paulus, Eph. iv, 11 : *Ipse dedit quosdam quidem apostolos, quosdam autem prophetas, alios vero evangelistas, alios autem pastores et doctores, ad consummationem sanctorum, in opus ministerii, in ædificationem corporis Christi*. Corpus Christi de quo hic agitur, est procul dubio ipsius Ecclesia, juxta hæc verba, Col. i, 24 : *Pro corpore ejus, quod est Ecclesia* : porro Ecclesia in qua sunt apostoli, prophetæ, evangelistæ, pastores et doctores in opus ministerii, est necessario visibilis : ergo 3^o.

4^o *Sancti Patres eamdem tradiderunt veritatem*.

S. Chrysost. in c. ii Isaïæ n. 2 : « Neque sol ita splendidus, neque lux ejus ita clara est ut sunt res ad Ecclesiam spectantes. » S. Aug. 1 Tract. in Epist. Joan. n. 13, 2 part. « Numquid sic ostendimus Ecclesiam, fratres mei? » nonne aperta est? nonne tenuit omnes gentes?... Ecce » mons implens universam faciem terræ; ecce civitas de » qua dictum est : *Non potest civitas abscondi supra montem posita*. » Ex illo textu constat S. Aug. prophetiam Danielis de Ecclesia intellexisse, et eam eminenter visibilem credidisse. Ergo.

5^o *Idem rationibus theologicis astruitur*.

1^o Ecclesia nihil aliud est quam societas hominum veram Christi doctrinam profitentium : talis societas essentialiter est visibilis; nulla enim intelligitur societas hominum in terra viventium, nisi aliqua inter eos existat connexio; id evidenter sequitur ex ipso societatis nomine : at nulla hujusmodi connexio existeret inter membra Ecclesiæ invisibilis. Ergo.

2º Omnes Ecclesiam ingredi tenentur, quia veram Christi doctrinam profiteri debent : porro repugnat eos teneri ingredi societatem invisibilem : ergo.

3º Ipsi protestantes in prioribus fidei confessionibus agnoverunt Ecclesiam Christi debere esse visibilem, ut clare demonstrat illustrissimus *Bossuet*, *Histoire des Variations*, lib. 15; sed, cum graviter premerentur a catholicis ut ostenderent societatem quæ ipsorum doctrinam ante Lutherum profiteretur, tunc invisibilem fuisse veram Ecclesiam et in sinu Ecclesiæ Romanæ delituisse, maluerunt dicere quam se victos confiteri. Ergo 5º.

Hinc sequitur Ecclesiam dici non posse societatem justorum, nec *a fortiori* prædestinatorum; nam justi et prædestinati soli Deo noti sunt, et societatem visibilem efficere nequeunt. Attamen virtutes Christianæ quibus homo justus necessario est ornatus, sunt forma Ecclesiæ et velut illius anima, *ut jam observavimus* : mirum igitur nobis videri non debet si cultus internus et illæ virtutes specialiter commendentur in Scripturis.

Qui autem veram Christi religionem exterius duntaxat profitentur, ad corpus Ecclesiæ pertinent, non vero ad ipsius animam.

ARTICULUS SECUNDUS.

DE PERPETUITATE SEU INDEFECTIBILITATE VISIBILITATIS ECCLESIAE.

Christus Ecclesiam suam instituit usque in finem sæculorum permansuram : id nobiscum libenter fatentur protestantes, ex his verbis : *Ecce ego vobiscum sum omnibus diebus usque ad consummationem sæculi*, Matth. xxviii, 28, et ex aliis Scripturæ locis ac rationibus; sed cum ostendere non possent ubi ipsorum ecclesia visibiliter existeret ante reformationem, systema defectionis, obscuritatis et momentaneæ invisibilitatis excogitaverunt. Contra quos sit

PROPOSITIO.

*Visibilitas Ecclesiæ Christi debet esse perpetua
et indefectibilis.*

Prob. Hæc indefectibilitas Ecclesiæ tribuenda est quam prædixerunt Prophetæ, promisit Christus, docuerunt Apostoli et agnoverunt sancti Patres : atqui perpetuam et indefectibilem futuram esse visibilitatem Ecclesiæ prædixerunt Prophetæ, etc.

1º *Prædixerunt Prophetæ.* Sic enim superius citata Danielis prophetia, II, 44. Lapis de quo loquitur Propheta designat Ecclesiam, et quidem visibilem; atqui de illo lapide legitur : *Suscitabit Deus cœli regnum quod in æternum non dissipabitur; et regnum ejus alteri populo non tradetur... et ipsum stabit in æternum.* Porro regnum illud seu Ecclesia dissiparetur, ac proinde in æternum non staret, si desineret esse visibile : ergo 2º.

2º *Promisit Christus;* dixit enim apud Matth. XXVI, 18 : *Tu es Petrus, et super hanc petram ædificabo Ecclesiam meam, et portæ inferi non prævalebunt adversus eam :* atqui portæ inferi prævalerent adversus Ecclesiam si cessaret esse visibilis; societas enim quæ desiit esse visibilis, jam periit et dici non potest vera societas : ergo 2º.

3º *Idem docuerunt Apostoli.* Eph. IV, 18 : *Ipsæ dedit quosdam quidem apostolos,* etc. Apostolus hic loquitur de ministerio publico per pastores exercendo, *ad consummationem sanctorum, in ædificationem corporis Christi :* tale autem ministerium nunquam deficere debet, ut ipsi fiant adversarii; deficeret tamen si desineret esse visibile : ergo 3º.

4º *Eandem veritatem agnoverunt sancti Patres.* S. Chrys. Homilia cum de expulsionem ejus ageretur : « Homini si bellum inferas, fortasse vinces, aut forte vinceris; Ecclesiam vincere nulla vis poterit. »

S. Hil. de Trinitate, l. 7, nº 4 : « Hoc Ecclesiæ proprium est, ut tunc vincat cum læditur, tunc intelligatur cum arguitur, tunc obtineat cum deseritur. »

S. Hieronymus in cap. iv Isai. « Super petram fundata Ecclesia nulla tempestate concutitur, nullo turbine ventisque subvertetur. » Unde sic. Hi aliqui sancti Patres manifeste loquuntur de Ecclesia visibili, siquidem variis modis agitur et impugnatur : asserunt tamen illam nullo modo vinci, concuti aut subverti posse : ergo 4°.

Prob. 2° ex Symbolo fidei quod admittunt protestantes. Dicimus enim quotidie in illo Symbolo : *Credo sanctam Ecclesiam catholicam*. Objectum fidei nunquam mutari potest : unde Christi fideles semper tenebuntur credere existere Ecclesiam catholicam : atqui Ecclesia catholica, juxta sensum naturalem et obvium, est societas universalis, ac proinde essentialiter visibilis : ergo.

Vide iterum opus jam laudatum, *Histoire des Variations*, lib. 15.

Errant igitur contra fidem Janseniani et Quesnellistæ, a protestantibus non multum sub hoc respectu recedentes ; tenent enim Ecclesiam tam densa caligine aliquando obscurari posse, ut a rectis corde solum dignosci possit : excogitaverunt systema illud ut opiniones suas contra bullam *Unigenitûs* ejusque defensores tuerentur. Itaque clerus Gallic. in comitiis anni 1715 merito damnavit librum cui titulus, *le Témoignage de la vérité*, etc. Eundem obscuritatis errorem, in synodo Pistoriensi adoptatum, iterum proscripsit Pius VI, in bulla *Auctorem fidei*, anno 1794.

Notandum quod ibi de Ecclesia, prout eam Christus instituit, agamus, non vero prout erat ante Christum : nullius igitur sunt roboris plurimi textus Veteris Testamenti quos nobis objiciunt Reformati.

Aliunde facile probant auctores ipsam Synagogam nunquam penitus defecisse, nec visibilem esse aliquando desiisse, etiam tempore majoris idololatriæ et persecutionis, v. g. sub impiis regibus Achaz et Manasse ; tunc enim plures prædicabant Prophetæ, inprimis Isaias, et multi adhuc existebant fideles, siquidem *sanguinem innoxium fudit Manasses multum nimis, donec impleret Jerusalem*

usque ad os, IV Reg. xxi, 16. Non ita sanguinem innoxium effudisset Manasses, si omnes impietatibus ejus adhæsissent. Ergo. Vide *Bossuet* in exordio Colloquii cum *D. Claude*.

ARTICULUS TERTIUS.

DE INVARIABILITATE VERÆ ECCLESIAE.

Ut status præsentis quæstionis recte intelligatur, *notandum est* ingens dari discrimen inter fidem et opinionem. Objectum fidei est quid certo revelatum, dum opinio versatur circa id quod non est definitum tanquam de fide.

Varietas in opinionibus invariabilitati fidei minime nocet; qui enim opiniones tuentur, eas non admittunt nisi aliquo modo conditionate, quamdiu scilicet Ecclesia contrarium non definierit, sicque nihilominus in eadem fide uniuntur.

PROPOSITIO.

Vera Ecclesia est invariabilis in fide sua.

Prob. 1º ex Scriptura sacra. I Tim. vi, 20 : *O Timothee, depositum custodi, devitans profanas vocum novitates.* Depositum istud fideliter custodiendum est fides : porro si Ecclesia fidem suam mutaret, certe depositum sibi commissum non custodiret : ergo.

Matth. xxviii, 20 : *Docentes eos servare omnia quaecumque mandavi vobis* : ergo voluit Christus ut omnia quæ docuit servarentur ac docerentur, proindeque ut fides invariabilis esset.

Prob. 2º ex traditione. Quicumque historiam ecclesiasticam saltem percurrit, ignorare non potest quod in omni antiquitate minimæ novitates in fide semper habitæ fuerint ut hæreses : omnibus ergo persuasum erat fidem Ecclesiæ futuram esse invariabilem. Unde sancti Patres semper invocabant traditionem adversus hæreticos, eosque sic refellebant : *Nihil innovetur, nisi quod traditum est,*

niebat beatus Stephanus papa contra rebaptizantes ; apud S. Cypr. Epist. 74.

Vincentius Lirinensis dicebat, I Commonitorio, n° 22 :
 « Depositum, inquit, custodi : quid est depositum ? id
 » est quod tibi creditum est, non quod a te inventum ;
 » quod accepisti, non quod excogitasti ; rem non in-
 » genii, sed doctrinæ, non usurpationis privatæ, sed pu-
 » blicæ traditionis. » Ergo.

Prob. 3° ratione. Ecclesia quæ fidem suam mutat, jam convincitur errasse in præcedenti : si autem semel erraverit, nullam meretur fidem ; tam enim bis et ter errare potest quam semel. Aliunde religio Christi non est complexio humanarum inventionum quæ quotidie corrigi et perfici possint, sed tota est in revelatione a Deo accepta : ergo invariabilis manere debet.

ARTICULUS QUARTUS.

DE METHODO AUCTORITATIS IN DOCENDO.

Christus dixit Apostolis suis eorumque successoribus :
Euntes docete omnes gentes... docentes eos servare omnia quæcumque mandavi vobis (Matth. xxviii, 19). Ergo quæ Christus docuit semper docenda sunt in vera ipsius Ecclesia.

Cum autem ratione constitutionis mentis humanæ necesse sit ut frequenter oriantur dubia circa res credendas aut faciendas, sequitur aliquem in Ecclesia admittendum esse judicem cui competat jus docendi, dubia solvendi et cunctas controversias dirimendi. Sequentes igitur statuemus propositiones : duas priores libenter admittunt protestantes.

PROPOSITIO PRIMA.

In Ecclesia existere debet supremus controversiarum fidei judex.

Prob. 1° ex Scriptura sacra. Matth. xviii, 17 : *Dic Ecclesiæ ; si Ecclesiam non audierit, etc.* Hæc verba supponunt existere in Ecclesia judicem qui controversias

dirimat. B. Paulus, Tit. III, 10 : *Hæreticum hominem, post unam et secundam correptionem, devita*. Porro hæreticus devitari non potest nisi cognoscatur, nec cognosci nisi talis manifestetur : ergo.

Prob. 2º ex traditione. Constat enim semper et ubique creditum esse in antiquitate dari in Ecclesia supremum judicem, cujus auctoritas controversias fidei dirimebat et contumaces declarabat hæreticos.

Prob. 3º ex ratione. Ecclesia est societas perfecta : porro in omni societate perfecta supremus est judex qui suborientes controversias ultima sententia definiat. Nisi enim talis existeret judex, finem non haberent disputationes, multiplicarentur opiniones, et in proximam ruinam societas Christiana mox abiret; quemadmodum societas civilis diu subsistere non posset si lites nulla via ultima componi possent. Ergo.

PROPOSITIO SECUNDA.

Supremus ille controversiarum judex debet esse obvius, clarus, communis et infallibilis.

Prob. 1º Debet esse obvius, id est, cognitu facilis. Talis enim esse debet ut omnes illum audire queant facile, et nullus causam ignorantiae allegare possit : porro innumeri homines cognoscere non possunt nisi quod ipsis est prorsus obvium, quia magni studii et diuturnæ attentionis sunt incapaces.

2º Debet esse clarus, adeo ut nulla sit amphibologia, hæsitatio aut dubitatio in definitionibus ejus : alioquin finem suum non assequeretur; tunc enim de sententia ejus multi dubitarent disputarentque, et sic nova lis alteri liti succederet ac perpetuæ forent controversiæ.

3º Debet esse communis, id est, omnes fideles sub jurisdictione sua complectens ; si enim quidam auctoritati ejus non subjicerentur, definitiones ipsius rejicere possent, ac proinde invariabilitas fidei non servaretur.

4º Debet esse infallibilis. Quod enim a judice controversiarum fidei ultima sententia definitur, fit objec-

tum fidei : porro repugnat illud esse objectum fidei, si sententia qua fuit definitum haberi non debeat ut infallibilis : ergo.

His de necessitate et qualitate judicis fidei præmissis, nunc quærendum est quis ille sit ex institutione Christi. Protestantes assignant Scripturam sacram interpretatam spiritu privato seu libero examine, ut aiunt hodierni Calvinistæ, vel spiritus sancti illuminatione, instinctu aut gustu, quò unusquisque verum a falso tuto secernit : « Comme on sent la lumière quand on la voit, la chaleur » quand on est auprès du feu, le doux et l'amer quand » on en mange. » Sunt verba ministrorum *Claude et Jurieu. Bossuet, Sixième avert. 3^e part. n. 23.*

Ad priorem classem pertinent Sociniani, *Rationalistæ* seu *Latitudinarii*, et plerique hodierni protestantes, qui non tantum solam agnoscere volunt rationem privatam in interpretanda Scriptura sacra et in ipsamet admittenda, sed cuncta rejiciunt dogmata rationi impervia : ad posteriorem vero ordinem revocantur *Quaqueri* seu *Tremuli*, *Anabaptistæ*, *Moravi* et varii *Methodistæ*, qui admittunt quamdam Spiritus sancti infusionem unicuique specialiter, licet diversis modis, communicatam.

Catholici autem, præter Scripturam et traditionem, quæ sunt velut codices in quibus omnes veritates revelatæ continentur, unanimiter tenent existere in Ecclesia tribunal eminens, semper accessibile, a Christo institutum, cujus auctoritate cunctæ fidei ac religionis controversiæ infallibiliter dirimantur. Quid de his omnibus sentiendum sit clare demonstraturi sumus per sequentes propositiones.

PROPOSITIO TERTIA.

Scriptura sacra, spiritu privato interpretata, non est supremus controversiarum fidei iudex.

Prob. Ille non est supremus controversiarum fidei iudex qui est incompetens, insufficiens, insolitus et in absurda ducens : atqui talis est Scriptura sacra spiritu privato intellecta.

Primo est incompetens. Est enim incompetens si non habeat dotes supremo controversiarum fidei judici necessarias : atqui Scriptura sacra, spiritu privato interpretata, has dotes non habet; dotes enim iudicis fidei sunt, *ex dictis*, ut sit obvius, clarus, communis et infallibilis : verum Scriptura sacra spiritu privato interpretata has dotes non habet. 1° *Non est obvia*, id est, omnium captui accommodata; in ea enim hypothesis, unusquisque deberet proprio iudicio libros sacros detegere, fidelitatem versionum agnoscere, et sensum eorum genuinum assignare : porro hæc plerisque fidelibus, imo et omnibus sunt impossibilia. 1° Ipsis impossibile est libros sacros detegere : ad hoc quippe necesse foret ut examini subicerent cunctos libros qui olim a pluribus exhibiti sunt ut canonici, momenta hinc et inde propria ratione discuterent, ponderarent et singulari sententia pronuntiarent hos esse authenticos et illos apocryphos, hos veros et istos falsos, hos divinos et istos profanos. Calvinistæ admittunt in canone Scripturarum Epist. B. Pauli ad Hebræos, Epist. B. Jacobi et Apocalypsim; Lutherani eas rejiciunt : catholici tenent duos priores libros Machabæorum esse canonicos; omnes protestantes contendunt illos esse profanos. Numquid fideles sola ratione privata ducti gravissimas hujusmodi controversias tuto dirimere possunt? Nemo non videt quantum istud sit absurdum. 2° Non minus plerisque fidelibus impossibile esset fidelitatem versionum privato examine agnoscere; hoc enim fieri non potest quin versiones conferantur textui originali : libri autem tum Veteris tum Novi Testamenti scripti sunt, alii in lingua Hebraica et alii in lingua Græca : igitur necesse foret ut cuncti fideles has linguas antiquas perfecte scirent, et cunctos libros sacros in his linguis non solum legerent, sed regulis accuratæ critices stricto examini subicerent : porro quis dicet tale examen captui fidelium esse proportionatum? 3° Canone Scripturarum determinato et fidelitate versionum certo cognita, res nondum esset finita; tunc enim assignandus esset genuinus saltem præcipuorum textuum sensus : at plerique

fideles id præstare nequeunt; doctiores enim protestantes sibi non concordant in explicandis textibus etiam gravioris momenti, qui primo intuitu clariores esse videntur. Sic, v. g. per hæc verba, *hoc est corpus meum*, Lutherani intelligunt præsentiam realem per *consubstantiationem*; Calvinistæ vero contendunt ea intelligenda esse de figura corporis Christi: ita de multis aliis. Quomodo ergo mulieres, pueri, rustici et omnis multitudo fidelium totas Scripturas recte interpretari possent? Etenim, tradatur exemplar bibliorum meditationi eorum, et postea quærat ab eis quid credant, quodnam corpus doctrinæ collegerint, qua ratione illi adhæreant: quid respondebunt? Certe experientia impossibilitatem hujusmodi examinis ipsiusque absurditatem superabundanter demonstrabit. Ergo 1^o Scriptura sacra spiritu privato interpretata non est cunctis obvia.

2^o *Non est clara.* Multa enim continet obscura et intellectu difficillima; id constat 1^o ex ipsamet Scriptura. B. Petri II Epist. III, 16: *In quibus (in Epistolis B. Pauli) sunt quædam difficilia intellectu quæ indocti et instabiles depravant, sicut et cæteras Scripturas, ad suam ipsorum perditionem.* 2^o Ex SS. Patribus. Vincentius Lirin. Com. monit. 1, n. 2: « Scripturam sacram, pro ipsa sua altitudine, non uno eodemque sensu universi accipiunt, sed » ejusdem eloquia aliter atque aliter, alius atque alius » interpretatur; ut pene quot homines sunt, tot illinc » sententiæ erui posse videantur. Aliter namque illam » Novatianus, aliter Sabellius, aliter Novatus exponit... » 3^o Experientia. Namque hæretici omnium sæculorum errores suos in Scriptura esse fundatos contendebant, et ipsi protestantes solam Scripturam audire volentes, fere in nullo puncto sibi consentiunt: pauca hæc verba Christi, *hoc est corpus meum*, octoginta diversis modis interpretantur; parabolam villici infidelis quæ legitur apud S. Lucam XVI, in octoginta quinque sensibus accipiunt: horum pariter B. Pauli verborum, *Mediator autem unius non est, Deus autem unus est*, Gal. III, 20, centum et quinquaginta interpretationes distinctas numerat doctor Thiess, pro-

testans, apud Starck. Vide *la Discussion amicale*, t. 1; *l'Excellence de la religion catholique*, par M. Milner, t. 1. Ergo 2°.

3° *Non est communis*. Scriptura quidem in se spectata est auctoritas communis, sed spiritu privato interpretata hanc auctoritatem non habet; nam ratio unius hominis nihil potest in rationem alterius; omnes sunt æqualiter independentes in judicando, proindeque in fide sua efformanda, ut continuo jactitabant primi reformatores et aiunt hodierni protestantes. Ergo.

4° *Non est infallibilis*. Certum est enim tot sententias sibi ex adverso pugnantes, non esse simul veras: quisquis igitur fidem suam efformat, judicare debet omnes qui aliter sentiunt simul errare: quomodo autem pronuntiare potest se sua ratione innixum veritatem infallibiliter percipere, dum omnes alii eamdem viam sequentes errant? Aliunde judex qui multos decipit, privilegio infallibilitatis non gaudet: porro Scriptura spiritu privato interpretata multos decipit, ut patet exemplo antiquorum hæreticorum, hanc regulam sequentium et tot sententias sibi oppositas defendentium. Ergo 4°; aliunde, etc. Ergo primo Scriptura spiritu privato interpretata, est judex controversiarum fidei incompetens.

Secundo est insufficiens. Etiam si enim Scriptura esset judex controversiarum fidei competens, non ideo sufficeret, si cunctas veritates revelatas non contineat: atqui Scriptura sacra cunctas veritates revelatas non continet, ut notum fecimus ubi de traditione. Præterea, Scriptura est respectu fidelium in Ecclesia sicut leges respectu subditorum in regno: at leges etiam perfectissimæ non sufficerent ad componendas lites, nisi existeret tribunal visibile ab eis distinctum: ergo *a pari* nec sola sufficit Scriptura ad controversias fidei dirimendas. Ergo secundo, etc.

Tertio est insolitus. Judex namque a Christo institutus semper existere et in usu esse debuit in Ecclesia: verum Scriptura sacra spiritu privato interpretata, non semper habita est in Ecclesia ut supremus controversiarum fidei

jūdex, nam 1^o Christus nullam scripturam Apostolis suis reliquit; non præcepit eis ut scriberent, bene vero ut irent per orbem universum, prædicarent Evangelium omni creaturæ, fidem exigerent, credentes baptizarent, et docerent servare quæcumque ipse mandaverat eis. Plerique Apostoli nihil scripserunt; nullos libros revelationes Christi continentes prius fidelibus exhibuere; qui scripserunt, quasi per occasionem et accidentaliter scripsisse videntur, et nullus sibi proposuit corpus doctrinæ Christi per ordinem exhibere; integrum Novum Testamentum nonnisi longe post mortem Christi exstitit: ergo primæ ecclesiæ formatæ sunt et diu exstiterunt, sine scripturis Novi Testamenti; imo solo ecclesiarum testimonio libri Novi Testamenti habiti sunt ut doctrinam Christi et Apostolorum continentes, proindeque ut canonici. Testatur S. Irenæus, in secundo sæculo, plures suo tempore existere ecclesias quæ nullas habebant Scripturas. Ergo. 2^o Negare non possunt protestantes cunctas fidei controversias, saltem in primis Ecclesiæ sæculis, non via examinis privati, sed via auctoritatis semper diremptas fuisse. 3^o Mulieres, infantes et multitudinem fidelium ad interminabiles privati examinis discussiones ipsi non remittunt, sed positive eos docent quid credere, quid agere debeant; sua habent symbola quorum fidem a tyronibus exigunt. Ergo tertio ille judex est insolitus.

Quarto ad absurda ducit. Via enim privati examinis admissa ut solo fidei judice, hinc sequitur 1^o actum fidei saltem plerisque per totum vitæ eorum curriculum esse impossibilem, quia examinis necessarii sunt incapaces, *ut jam ostendimus*; 2^o unumquemque, sive doctum, sive ignarum, debere rationi suæ arrogare infallibilitatem quam doctioribus et universæ Ecclesiæ denegat; 3^o destrui omnia religionis Christianæ dogmata: nam si unusquisque propriæ rationi stare debeat, quidquid credat aut dicat, jam redargui non potest; 4^o totam religionem ruere: si quis enim articulos fidei et principia morum unum post alterum denegat, affirmando se ea non invenire in Scriptura sacra; si Scripturam rejiciat, dicendo se

percipere non posse illam esse divinam, aut nulla ratione firma convinci potest: tota igitur religio penitus evellitur, quod quidem exemplo suo confirmarunt multi protestantes. Statim enim atque Lutherus, primus reformator, regulam privati examinis instituit, alii prodierunt reformatores qui, ex eodem principio incedentes, ipsam reformationem variis modis reformarunt, ut Carlostadt, Zuingle, OEcolampade, Muncer et innumeri alii. Frustra Lutherus, ira inflammatus, graviter eos increpavit, tormenta inferni eis minando; nihilominus magis ac magis inter se divisi sunt et in præceps abierunt. Calvinistæ, eandem regulam admittentes, facilius adhuc in ruinam fidei prolapsi sunt. *Jurieu* solos Socinianos excludebat a salute; sed quæsitum est ab illo cur illos potius quam alios sic excluderet, et nihil solidum respondere potuit: hinc latissimus natus est *tolerantismus* qui nunc ubique viget; in Anglia et in America via salutis Mahumetanis, deistis ipsisque paganis aperitur; in Germania, etiam in universitatibus, fere nulla remanent Christianismi vestigia, ut videre est apud de Starck, in opere jam citato, et in alio opere dicto, *Histoire des sectes religieuses*, auctore Grégoire. Hinc variis in locis, et præsertim in Prussia, ecclesiæ Lutheranæ et Calvinistæ simul conjunctæ sunt anno 1817, absque ulla mentione dogmatum, quæ exhibentur velut subtilitates scholæ. Ecclesia Genevensis jam non tenet peccatum originale, nec divinitatem Christi profitetur; et jubet ut pastores ab hujusmodi quæstionibus abstineant in docendo. In opere periodico, *la Revue protestante*, a Calvinistis singulis mensibus emisso, t. 1, p. 201, an. 1825, sic exprimitur professio fidei de divinitate Christi: « Tous, nous admettons qu'il y a eu dans la » personne du Sauveur et de la divinité et de l'humanité; » mais le mode d'union de ces deux choses est resté un » mystère, comme celui de l'union de l'âme et du corps. » Nolunt aperte dicere Christum esse Deum. Multa insuper adjici possent, sed hæc abundanter sufficiunt: ergo quarto, etc. aliunde, etc. Ergo.

Solvuntur objectiones.

Obj. 1º. Christus ipse remittit Judæos ad Scripturas, Joan. v, 39 : *Scrutamini Scripturas; illæ sunt quæ testimonium perhibent de me.* Ergo admittit Scripturas esse judicem fidei.

R. 1º Verbum *scrutamini* non in imperativo, sed in indicativo sensu intelligendum est, juxta nonnullos interpretes : in eo autem casu Christus non remittit ad Scripturas, sed supponit Judæos quotidie eas legere et perscrutari.

2º Nego consequentiam. Christus enim missionem suam Judæis manifestare tunc intendebat, et ideo plurima operabatur miracula : *Ipsa opera quæ ego facio, testimonium perhibent de me, quia Pater misit me*, ibid. 36. Porro Scripturæ, quibus addictissimi erant Judæi, ex sua parte testimonium reddebant Christo : merito igitur Christus dicere poterat Judæis, *per argumentum ad hominem*, *Creditis Scripturis, scrutamini eas, illæ testimonium perhibent de me.* Inde autem concludi non potest solam Scripturam esse judicem cunctarum circa fidem controversiarum. Ergo.

Obj. 2º. Act. xvii, 11, de Berœensibus sic legitur : *Hî autem erant nobiliores eorum..... qui susceperunt verbum cum omni aviditate quotidie scrutantes Scripturas, si hæc ita se haberent.* Ergo Scriptura tunc habebatur ut sola fidei regula.

R. Nego conseq. Nam infidelis cui fides Christiana proponitur amplectenda, potestati ecclesiasticæ nondum est subjectus; potest, imo et debet perpendere motiva quibus innuitur, ut rationabiliter sese determinet : probabilius est discipulos Berœenses nondum fuisse baptizatos. Ergo.

Præterea, qui mysteria fidei Christianæ credunt, nihilominus licite perpendere possunt momenta quæ ea credibilia efficiunt, non quidem ut depellantur dubia, sed ut in fide constantiores et ad alios docendos aptiores

fiant : ergo, etiamsi Berœenses tunc fuissent baptizati, licite tamen scrutari potuissent Scripturas, *si hæc ita se haberent*, et inde concludi non posset solam Scripturam controversiarum fidei supremum esse judicem.

Obj. 3°. II Tim. III, 16: Omnis Scriptura divinitus inspirata utilis est ad docendum, ad arguendum, ad corripiendum, ad erudiendum in justitia, ut perfectus sit homo Dei, ad omne opus bonum instructus. Ergo.

R. Nego conseq. Ex illo enim textu sequitur quidem Scripturam esse utilem et necessariam, quod nemo inficiatur ; at inferri non potest eam sufficere, et in se sumptam controversiarum fidei esse judicem. Ergo.

Obj. 4°. Si Scriptura ad dirimendas controversias fidei non sufficiat, admittenda erit auctoritas verbo Dei superior : atqui hoc est absurdum : ergo.

R. Nego maj. Sæpissime enim leges principis interpretatione magistratuum indigent : atqui auctoritas magistratuum auctoritate legum non ideo præstat : ergo *a pari*, licet Scriptura sacra interpretatione indigeat, non idcirco alia requiritur auctoritas ipsa superior ; ipsius enim auctoritas est divina et necessario infallibilis ; sed requiritur ut legitimus illius sensus certo assignetur : porro Ecclesia, juxta catholicos, legitimum sensum Scripturæ infallibiliter determinat : auctoritas igitur Ecclesiæ, quamvis infallibilis, nullo modo auctoritati Scripturæ opponitur, nec illa superior dici potest.

PROPOSITIO QUARTA.

Spiritus privatus, quocumque donetur nomine, sive inspirationis, sive illuminationis, sive gustus, legitimus esse non potest controversiarum fidei judex.

Prob. Ille haberi non debet ut legitimus controversiarum fidei judex, qui 1° dotes requisitas non habet, 2° cunctis erroribus viam aperit et confutationi januam præcludit, 3° multis contradictionibus implicatur, 4° du-

cit ad absurda : atqui omnibus his vitiis laborat spiritus privatus, etc.

1° *Dotes requisitas non habet.* Supremus enim controversiarum fidei judex debet esse obvius, clarus, communis et infallibilis : atqui spiritus privatus sensu præfato intellectus has dotes evidenter non habet. 1° Non est obvius, cum nulla sit regula qua tuto a spiritu erroris discerni possit. Dicunt quidem adversarii illum esse lumen internum quo veritas menti ostenditur, quemdam spirituales gustum quo verum a falso sicut dulce ab amaro secernitur : at hujusmodi regulæ sunt illusoriæ ; unusquisque enim illuminatur sicut sibi placet, et gustat quod se magis delectat : sic Lutherani gustant præsentiam realem, eam vero non gustant Calvinistæ, etc. 2° Non clarus est, id est, non clare loquitur. Qui enim illum admittunt ut supremum controversiarum fidei judicem, multa tenent dogmata sibi contradictoria : multi ergo ex ipsis falluntur : ergo ille judex clare non loquitur. 3° Non est communis, eo ipso quod sit privatus, ex hypothesi ; 4° non infallibilis, cum illius existentia certo probari non possit, et insuper verus illius sensus tuto discerni nequeat, ut abundantius exemplo suo probant protestantes contradictoria docentes : ergo, etc. Ergo ille spiritus non habet dotes requisitas ut sit supremus, etc.

2° *Cunctis erroribus viam aperit.* Nam, in principiis hujus doctrinæ, quilibet homo cuncta imaginationis suæ deliramenta velut totidem divinas revelationes suscipere et ubique prædicare potest, *ut patet* : nullo modo confutari poterit ; quidquid enim ipsi opponatur, semper respondebit se a Spiritu sic illuminari, se veritatem ita gustare ; imo sibi persuadere poterit se a spiritu Dei ad cædes et immaniora scelera impelli. Ergo 2°.

3° *Multis contradictionibus implicatur illud systema.* 1° Namque Spiritus Dei sic intellectus, simul datur et non datur omnibus : datur quidem, cum ex hypothesi unumquemque privatum doceat : non datur tamen omnibus, quia contradictoria dictare non potest. 2° Cum infantes et multitudinem virorum ac mulierum erudiunt

protestantes, eos ad lumen internum et Spiritus Dei gustum non remittunt, quod tamen facere deberent, si sibi consentirent. 3° Redarguunt eos qui non credunt vel qui, ut arbitrantur, errant in credendo : attamen eos redarguere non deberent si principiis suis starent. Ergo 3°.

4° *Ducit ad absurda.* Admisso enim prædicto systemate, sequitur 1° ignaros et simplicem mulierculam credere debere se melius totam intelligere posse Scripturam quam Patres, doctores et cuncta concilia, tum particularia, tum etiam universalia, ut fateri coactus est D. Claude, in colloquio cum Bossuet : porro illud est cumulus absurditatis : ergo 4°, etc. aliunde, etc. Ergo.

Dices, Joan. I Epist. II, 27, ait : Non necesse habetis ut aliquis doceat vos : sed sicut unctio ejus (Christi) docet vos de omnibus, et verum est, et non est mendacium. Ergo B. Joannes agnoscit solum spiritum esse audiendum.

R. Nego conseq. Etenim si B. Joannes persuasum habuisset solum spiritum privatum, ad sensum adversariorum, esse audiendum, cur ipse Epistolas ad fideles scripsisset? cur præcepta nova ac mandata dedisset? quomodo B. Paulus dixisset : *Fides ex auditu*, Rom. x, 17; *Prædica verbum*, etc. II Tim. iv, 2?

Genuinus autem sensus verborum quæ nobis objiciuntur, est, quod in nova lege multo abundantiora sint auxilia gratiæ quam in antiquo fœdere ; Apostolus enim intendit avertere fideles ab erroribus qui tunc incipiebant grassari ; hortatur eos ut firmiter maneant in doctrina quam ab initio acceperant, quam unctio Spiritus Dei intus eos docuerat, occasione prædicationis et sacramentorum baptismi et chrismatis susceptionis : igitur non indigent ut novus doctor aliquid novi eos doceat : quid inde concludere possent Enthusiastæ in gratiam systematis sui? ergo.

Sequentia adhuc objiciuntur B. Pauli verba : *Animalis homo non percipit ea quæ sunt Spiritus Dei... spiritualis autem judicat omnia, et ipse a nemine judicatur*, I Cor. II, 25; sed nullatenus adversarios juvant : ibi enim Apostolus

redarguit Corinthios, qui, in fide adhuc recentes et imperiti, affectibus carnalibus nimis adhærentes, inter se de ministris Christi vane disputabant, dicentes : *Ego quidem sum Pauli... ego Apollo*, ibid. iii, 4. Affirmat Paulus spiritualem hominem non sic insanire, sed omnia quæ sunt Dei multo rectius judicare, seu potius discernere, ut fert textus Græcus; et ipsum, cum sit spiritualis, a nemine merito judicari, id est, condemnari posse, quia nihil est in eo quod merito reprehendi queat. Ergo. *Vide Estium in hunc textum.*

Sic pariter facillime refelluntur cunctæ objectiones quas adversarii ex aliis Scripturæ sacræ textibus, plus minusve contortis, male nobis opponunt.

PROPOSITIO QUINTA.

Christus instituit in Ecclesia corpus docens, cui competit jus dirimendi controversias circa fidem; sicque sola admittenda est via auctoritatis.

Prob. 1º. Vel Christus quoddam instituit in Ecclesia tribunal visibile ad dirimendas fidei controversias, vel sola agnoscenda est Scriptura sacra, vel admittendus est Spiritus Dei unicuique infusus; nullus enim alius excogitari potest supremus controversiarum fidei iudex: atqui, *ex probatis*, duo posteriora sunt falsa et absurda: ergo.

Prob. 2º. Illud pro certo tenendum est quod constat Scriptura sacra, traditione et rationibus theologicis: atqui triplici hac via constat Christum instituisse in Ecclesia tribunal visibile ad, etc.

1º *Scriptura sacra.* Matth. x, 14: *Quicumque non receperit vos, neque audierit sermones vestros, exeuntes foras de domo vel civitate, excutite pulverem de pedibus vestris. Amen dico vobis: tolerabilius erit terræ Sodomorum et Gomorrhæorum in die iudicii, quam illi civitati.* Luc x, 16: *Qui vos audit, me audit; et qui vos spernit, me spernit: qui autem me spernit, spernit eum qui misit me.* Matth. xviii, 17:

Quod si non audierit eos, dic Ecclesiæ: si autem Ecclesiam non audierit, sit tibi sicut ethnicus et publicanus. Unde sic. Ex his textibus stricta est obligatio audiendi Apostolos prædicantes et Ecclesiam docentem: ergo Christus voluit ut haberent supremam auctoritatem cunctas fidei controversias dirimendi.

Multo clarius hanc supremam auctoritatem contulit illis post resurrectionem suam, quando dixit, *Matth. xxviii 18: Data est mihi omnis potestas in cælo, et in terra: euntes ergo docete omnes gentes... docentes eos servare omnia quæcumque mandavi vobis: et ecce ego vobiscum sum omnibus diebus, usque ad consummationem sæculi.* Certum est Christum his verbis Apostolos constituisse corpus docens, et specialem ad hoc ipsis concessisse potestatem: atqui hæc verba non solos spectabant Apostolos, sed eorum successores *usque ad consummationem sæculi*, ut fert textus et ipsi fatentur protestantes: igitur successores Apostolorum eandem habent potestatem docendi, et eadem existit obligatio eos audiendi.

B. Paulus, *Eph. iv, 11: Et ipse dedit quosdam quidem apostolos, quosdam autem prophetas, alios vero evangelistas, alios autem pastores et doctores.... ut jam non simus parvuli fluctuantes, et circumferamur omni vento doctrinæ, in nequitia hominum, in astutia ad circumventionem erroris.* Unde sic: Christus pastores et doctores in Ecclesia instituit ad opus ministerii, ne sicut parvuli feramur omni vento doctrinæ, ne astutia et nequitia hominum circumveniamur et in errorem dejiciamur: at, nisi constituisset corpus pastorum, et doctorum ad dirimendas cunctas fidei controversias, tanquam parvuli essemus fluctuantes, omni vento doctrinæ ferremur in astutia et nequitia hominum, etc. *ut patet.* Ergo 1º constat Scriptura sacra Christum instituisse, etc.

Idem constat traditione. Quod enim constanter creditum est ab Apostolis usque ad nos, in dubium revocari non potest: sed ab Apostolis usque ad nos semper creditum est Christum instituisse corpus docens in Ecclesia; namque a primis Ecclesiæ sæculis usque ad protestantium

tempora, quaecumque exortæ sunt quæstiones circa fidem, sive apud Ecclesiam Romanam, sive apud sectas ab ea separatas, ad tribunal pastorum docentium delatæ sunt, et eorum definitionibus adhærendum esse plebs Christiana semper credidit. Sic in controversia de legalibus observationibus inter fideles Antiochenos exorta, Act. xv, miserunt Paulum et Barnabam Jerusalem, ut Apostolos consularent: tunc Apostoli et seniores *conven-
nerunt videre de verbo hoc*, suamque sententiam in hanc formam tulerunt: *Visum est Spiritui sancto et nobis*. Defunctis Apostolis, dum adhuc sævirent persecutiones, pastores Ecclesiæ frequenter congregati sunt, dogmata fidei definierunt atque hæreses proscripserunt. Sic concilium Antiochenum adversus Paulum Samosatenum fuit congregatum, sic in causa Rebaptizantium, multa concilia, sive Romæ, sive in Africa, celebrata sunt, et in omnibus pastores velut iudices definierunt: pace data Ecclesiæ, frequentiora et solemniora habita sunt concilia, non solum apud catholicos, sed etiam apud sectas hæreticas aut schismaticas: sic Arianæ concilia agebant, et definitiones fidei edebant; Græci schismatici aliæque sectæ Orientales auctoritate pastorum ducuntur: ergo a primis Ecclesiæ sæculis usque ad protestantium tempora et usque ad nos semper creditum fuit, etc. Post praxim tam constantem et tam universalem, superfluum foret Patrum testimonia, quæ numero sunt infinita, hic congerere.

Ut aliquod remedium contra perpetuas divisiones suas invenirent protestantes, ad auctoritatem quam tantopere suggillaverunt, recurrere coacti sunt. *Consistoria, colloquia, synodos provinciales et nationales* instituerunt Calvinistæ: in famosa quæ apud eos orta est controversia inter Arminianos seu Remonstrantes et Gomaristas, celebrem convocaverunt synodum generalem Dordrace-nam, an. 1618, in qua ex auctoritate dissidia componere frustra tentaverunt. Vide super hanc synodum *Bossuet, Hist. des variat.* lib. 14, n. 21.

In cæteris ecclesiis reformatis etiam nunc existit ali-

qua species auctoritatis, cui subscribere tenentur ministri. Ergo 2°.

3° *Rationibus theologicis.*

1° Omnes societates humanæ auctoritate semper rectæ sūnt; sola auctoritate filii parentes cognoscunt, subditi huic vel illi principi obediendum esse sciunt, cives jura sua distinguunt, patres familiam suam regunt, reges status suos gubernant, magistratus et quilibet superiores inferiores suos moderantur, etc. Ergo.

Omnis ordo in qualibet societate ita pendet ab auctoritate, ut, ea sublata, sempiternus sit horror: ergo *a fortiori* necesse est ut in societate religiosa existat auctoritas a qua omnia pendeant. 3° Deus statuerat in veteri Lege ut omnes controversiæ sacerdotum auctoritate dirimerentur: *Qui autem superbierit, nolens obedire sacerdotis imperio, et decreto judicis, morietur homo ille, et auferes malum de Israel, Deut. xvii, 12.* Ad hanc auctoritatem alludebat Christus quando Judæis dixit: *Super cathedram Moysis sederunt scribæ et pharisæi: omnia ergo quæcumque dixerint vobis, facite; Matth. xxiii, 2.* Tota autem religio Christiana, sicut religio Judaica, nititur factis, scilicet scripturis, miraculis, prophetiis, verbis a Christo et ab Apostolis prolatis: atqui nonnisi viâ auctoritatis hæc cognosci, transmitti et in vero sensu accipi possunt: ergo, etc. ergo 3°, etc. aliunde, etc. ergo.

Multi protestantes confessi sunt auctoritatem in Ecclesia necessariam esse. Vide *la Discussion amicale*, t. 1.

COROLLARIUM.

Sequitur ex dictis, distinguendum esse in Ecclesia corpus docens et corpus audiens, id est, fideles qui pastoribus subjici tenentur.

Fatentur protestantes Ecclesiam subsistere non posse nisi sint in ea pastores et ministri qui verbis et sacramentis populum Dei pascant; imo plerique nunc admittunt Ecclesiam universam quadam infallibilitate passiva donari; dicunt enim fieri non posse ut error adversus fidem essentialem prævaleat, idque concludunt ex ver-

bis Christi, *Ecce ego vobiscum sum*, etc. At, impudenter sibi contradicentes, pertinaciter negant infallibile esse corpus docens in Ecclesia : catholici, e contra, utrumque firmiter credunt, scilicet, Ecclesiam universam infallibilem esse in credendo, et corpus pastorum similiter infallibile esse in docendo.

PROPOSITIO SEXTA.

Corpus docens in Ecclesia, cui competit jus controversias circa fidem dirimendi, est infallibile in docendo.

Prob. 1º. Illud corpus pastorum est supremus controversiarum fidei iudex : atqui supremus controversiarum fidei iudex debet esse infallibilis : ergo.

Et vero, Ecclesia est infallibilis in credendo, id est, habet infallibilitatem passivam, juxta adversarios : at infallibilis esse non potest in credendo quin corpus pastorum sit infallibile in docendo ; fideles enim tenentur audire pastores, ex propositione quinta : si ergo pastores errarent in docendo, fideles inducerent in errorem. Ergo.

Prob. 2º. Illud velut dogma fidei tenendum est quod demonstratur ex Scriptura sacra, ex Symbolo Apostolorum et ex unanimi Patrum testimonio : at manifeste demonstratur ex Scriptura sacra, etc. Ecclesiam docentem esse infallibilem.

1º *Ex Scriptura sacra.* Illa enim infallibilis est quam Spiritus sanctus nunquam deserit, quæ est veluti columna et firmamentum veritatis, quam si quis non audierit, habendus est sicut ethnicus et publicanus, contra quam portæ inferi prævalere non possunt, quæ impedire debet ne simus tanquam parvuli fluctuantes, et omni vento doctrinæ circumferamur : atqui his dotibus Ecclesia docens prædita est a Christo.

1º Nunquam Spiritus sanctus eam deserit. Sic enim habet Christus apud Joan. xiv, 16 : *Ego rogabo Patrem, et alium Paracletum dabit vobis, ut maneat vobiscum in*

æternum, spiritum veritatis... 26 : Ille vos docebit omnia, et suggeret vobis omnia quaecumque dixerō vobis.

2° Est veluti *columna et firmamentum veritatis* : sunt ipsamet verba B. Pauli de Ecclesia Dei vivi loquentis, I Tim. III, 15.

3° Qui Ecclesiam docentem non audit, habendus est *sicut ethnicus et publicanus*. Matth. XVIII, 17.

4° Portæ inferi adversus illam prævalere non possunt ; Matth. XVI, 18.

5° Impedire debet ne simus tanquam *parvuli fluctuantes, et ne circumferamur omni vento doctrinæ, in nequitia hominum, in astutia ad circumventionem erroris*, Ephes. IV, 11.

6° Denique Ecclesiam docentem Christus speciali modo semper dirigit : *Ecce ego vobiscum sum omnibus diebus*. Ergo, etc. Ergo 1° ex Scriptura, etc.

Prob. 2° ex Symbolo Apostolorum. In eo enim dicimus : *Credo Ecclesiam*. Unde vel hæc verba significant, *credo Ecclesiæ*, ut cuncti contendunt catholici, et tunc definitionibus ejus semper credendum erit, ac consequenter illa erit semper infallibilis ; vel significant, *credo Ecclesiam*, id est, Ecclesiam existere, ut volunt protestantes, et tunc in æternum Ecclesia stabit ; nam semper verum debet esse symbolum : porro Ecclesia non staret in æternum si tota in errorem decideret. Ergo 2°.

3° *Ex testimonio SS. Patrum*.

Origenes, Hom. 5 in Jerem. « Ecclesia Dei viventis » *veritate verbi munita est.* »

S. Basilius, Epist. 114 : « Nullam vocem in ea (fide Nicæna) rejiciatis, sed sciatis trecentos decem et octo » *patres qui citra contentionem convenerunt, non sine » Spiritus sancti afflatu locutos esse.* »

S. Chrysost. ait : « Nihil Ecclesia potentius. O homo, » *ne inferas cælo bellum ; si Ecclesiam oppugnes, vincere » nequis.* »

S. Joannes Damasc. « Portus animarum est Ecclesia. » *Per hanc siquidem fere omnes compressæ sunt... Nihil » Ecclesia valentius, rupe fortior est... nunquam senes- » cit, sed semper viget.* »

S. Cyprianus, Epist. 69 ad Pupianum : « Etsi contumax » et superba obaudire nolentium multitudo discedat, » Ecclesia tamen a Christo non recedit. »

S. Aug. de Symb. « Ecclesia sancta, Ecclesia una, Ecclesia vera, Ecclesia catholica, contra omnes hæreses pugnans : pugnari potest, expugnari tamen non » potest... portæ inferorum non vincent eam. » Et lib. contra Epist. Fundamenti : « Ego Evangelio non crederem, nisi me catholicæ Ecclesiæ commoveret auctoritas. »

Vincentius Lirin. Com. 1, n. 23 : « Christi vero Ecclesia, sedula et cauta depositorum apud se dogmatum » custos, nihil in his unquam permutat, nihil minuit, » nihil addit. »

Innumera alia citari possent testimonia Patrum, tum Græcorum, tum Latinorum. *Ex citatis sic argumentari licet.* Illa Ecclesia infallibilis est in docendo, quæ veritate verbi munita est, cujus pastores sub afflatu Spiritus sancti loquuntur, quæ nihil potentius est, quæ oppugnari potest, sed vinci non potest, quæ rupe fortior est, quæ portus est animarum, quæ nunquam senescit sed semper viget, quæ habitaculum est Patris et Filii et Spiritus sancti, quæ a Christo nunquam discedit, quæ contra omnes hæreses pugnans expugnari non potest, quæ in dogmatibus a Christo acceptis nihil permutat, nihil minuit, nihil addit : atqui talis est Ecclesia docens, ex constantibus testimoniis Patrum : ergo, etc. aliunde, etc. Ergo revera est infallibilis. Ita nunc sentiunt et aperte fatentur plurimi protestantes. Vide de Starck.

Solvuntur objectiones contra utramque propositionem simul.

Obj. 1°. Fides tam impossibilis est idiotis et simplicibus per viam auctoritatis quam per viam privati examinis : ergo rejicienda est via auctoritatis.

R. 1°. Ex hoc argumento sequeretur fidem omnino impossibilem esse idiotis et simplicibus, imo et doctis ; siquidem constat, ex dictis, eam via privati examinis obtineri non posse.

R. 2°. *Nego ant.* Quod enim de facto existit dici non potest impossibile : at multi via auctoritatis edocti veram habent fidem : multi enim sunt qui Scripturas non examinauerunt, non comparauerunt, imo non legerunt, nec legere possent, et nihil omnino sciunt, nisi quod a parentibus, magistris et parochis didicerunt, sicque sola via auctoritatis fuerunt edocti : attamen veram habent fidem. Fides enim, juxta omnes, est actus supernaturalis quo firmiter adhæremus veritatibus a Deo revelatis propter revelantis auctoritatem : porro talis fides sæpe invenitur in iis qui sola via auctoritatis fuerunt edocti, namque in iis inveniuntur, 1° firma mentis adhæsiō veritatibus sibi propositis ; 2° adhæsiō supernaturalis, siquidem a gratia procedit et circa objectum supernaturale versatur ; 3° adhæsiō veritatibus a Deo revelatis, nempe veritatibus quas docet Ecclesia, continent Scripturæ aut traditio, et credunt doctores ; 4° adhæsiō propter Dei auctoritatem ; dicunt enim : *Credo quæ revelasti, quia revelasti et non potes falli nec me fallere.* Ergo ii omnes, etsi idiotæ aut simplices, veram habent fidem. Ergo, etc.

Et vero, in primis sæculis plures exstiterunt Ecclesiæ quæ nullas adhuc habebant Scripturas : tunc ergo fideles non via privati examinis, sed sola via auctoritatis edocebantur et fidem obtinebant. Ipse Christus docuit, et misit Apostolos ad docendum, non vero ad disputandum, nec ad præbendas Scripturas legendas et discutiendas. Merito igitur B. Paulus dixit (Rom. x, 17,) *Fides ex auditu*, non autem ex lectione, ex examine. Ergo, etc.

Inst. 1°. Auctoritas docens tuto audiri non potest nisi ejus existentia certo cognoscatur : at existentia auctoritatis docentis certo cognosci non potest nisi examine privato ; ergo simplices et idiotæ non sola via auctoritatis docentur.

R. *Dist. maj.* Auctoritas docens.... Nisi ejus existentia aliquo modo noscatur, concedo, idque patet ; nisi perfecte noscatur antequam doceat, *negō maj.* Fides enim supernaturalis eodem modo acquiritur ac fides naturalis. Porro fidem naturalem acquirunt pueri, simplices et idiotæ a matre, a patre, a circumstantibus, antequam

perfecte sciant quæ sit matris, patris, nutricis aliorumque auctoritas, et ideo credunt quia natura impelluntur ad credendum : sed postea , quando vident alios homines easdem credere veritates, quando illarum veritatum concordantiam percipiunt, agnoscunt se prudenter egisse, matri, patri, nutrici credendo, quamvis rationem hujusmodi fidei sibi tunc non redderent. Eadem via pueri et simplices ad fidem supernaturalem ducuntur; primo veritatibus a parentibus, parochis aliisque hominibus circumstantibus sibi propositis, simpliciter adhærent, nequidem cogitantes de ratione qua ad credendum determinantur. Postea vero, ipsorum intelligentia crescente, Ecclesiam audiunt, veritates ab ea edoctas sibi concordare percipiunt, fundamenta ejus auctoritatis perlustrant, læti agnoscunt quanta prudentia ei credatur, et quo magis jura illius considerant, eo plenius firmantur in fide. In ea autem fide efformanda minime ducuntur examine privato. Ergo pueri et simplices, etc.

Hinc ruit celebris objectio ministri *Claude*. Cum enim *Bossuet* eum fortiter premeret, in publico quod inter se habuerunt colloquio, anno 1675, asserens quod, admissa privati examinis necessitate, infans ad ætatem discretionis perveniens actum fidei circa librorum sacrorum canonicitatem elicere non posset, imo et in aliquo instanti de omnibus articulis fidei positive dubitaret, *D. Claude* idem argumentum contra illustrem adversarium suum statim retorquere conatus est his verbis, referente *Bossuet* : « Le fidèle à qui on propose l'autorité de l'Eglise, » ou la croit sans examiner, ou il en doute; s'il doute, il » est infidèle; s'il ne doute pas, par quelle autorité est-il » assuré? L'autorité de l'Eglise: est-ce une chose évidente par elle-même? et ne faut-il pas la trouver par » quelque examen? Voilà votre difficulté que vous avez » à résoudre aussi bien que moi: ou quittons-la tous » deux, ou résolvons-la ensemble. Je vous déclare, pour » moi, que je répondrai pour l'Ecriture ce que vous me » répondrez pour l'Eglise. » Hæc autem gravis difficultas manet soluta per responsionem modo datam.

Differentia inter modum quo ad fidem per examen privatum deveniendum esset, et modum quo ad eam per viam auctoritatis ducimur.

Actus fidei per viam privati examinis impossibilis est, saltem respectu puerorum et simplicium, facilis vero per viam auctoritatis.

1° Actus fidei per viam privati examinis impossibilis est pueris et simplicibus : *id sequitur ex dictis*. Imo, infans, cum ad annos discretionis pervenerit, debet primo de divinitate Evangeliorum aliorumque librorum canonicorum positive dubitare, ac proinde de tota religione ; nam, his libris sibi oblatis, actum fidei circa illorum canonicitatem elicere non potest quin prius eos legerit, comparaverit et genuinum eorum sensum obtinuerit, siquidem profitetur nullam existere auctoritatem infallibilem qua regi debeat : ergo constituitur in dubio circa divinitatem Scripturæ : porro repugnat hominem baptizatum, fide habituali imbutum, de religione positive dubitare teneri. Quod fatebatur *Claude* : ergo 1°.

2° Admissa via auctoritatis, pueri et idiotæ actum fidei facile elicere possunt : *quod ut melius intelligatur, quædam sunt prænotanda.*

1° Certum est apud protestantes sicut et apud catholicos, infantes baptizatos esse filios Dei, Spiritum sanctum per gratiam sanctificantem in eis habitare, et fide habituali, sine qua *impossibile est placere Deo*, Hebr. xi, 6, eos informare.

2° Certum est fidem actualem divinam esse pariter donum Spiritus sancti. At existere non potest in nobis quin veritates revelatas certo cognoscamus. Ordinarie autem Spiritus sanctus non immediate notiones istas in nobis infundit, sed quibusdam utitur mediis externis ad illas in mentibus nostris inculcandas. An autem sola Scriptura, ut volunt protestantes ; an vero Ecclesia, per quam Scriptura aliæque fidei veritates noscuntur, ut dicunt catholici : en nodus difficultatis.

Notandum est, in actu fidei distinguenda esse, 1° objec-

tum, id est, res revelatas quæ credendæ proponuntur; 2º principium fidei, quod est gratia divina voluntatem nostram ad credendum impellens; 3º motivum fidei proprium, quod est ultima ratio propter quam credimus, id est auctoritas Dei revelantis et summe veracis; 4º motiva credibilitatis quibus existentia revelationis evidenter constat; 5º regula qua sensus revelationis nobis certo innotescat. Hæc regula, juxta reformatos, est sola Scriptura; juxta catholicos, est Ecclesia Scripturæ libros infallibiliter tradens, et docens quænam veritates a Deo sint revelatæ.

His prænotatis, sic explicari potest quomodo pueri et illitterati apud catholicos actum fidei prudenter elicere possint.

Fidem habitualement divinitus sibi infusam habent; Spiritus sanctus in eis habitat, agit et operatur, illos paulatim disponit ad veritates revelatas explicite credendas statim atque certo noscuntur; illa fides est, respectu fidei actualis sicut sunt radices respectu arboris.

Præcipuæ autem veritates revelatæ sic noscuntur.

Primo infantes et imperiti discunt a parentibus, a parrocho, ab aliis magistris et a circumstantibus, se fuisse baptizatos, ac baptismo factos filios Dei et Ecclesiæ; deinde Symbolum Apostolorum memoriter retinent, quotidie recitant, et in eo simul agente Spiritu sancto, discunt Ecclesiam, unam, sanctam, catholicam et Apostolicam, discunt se in ea fuisse baptizatos, se in ea vivere et doceri; discunt illam a Christo Filio Dei esse fundatam, speciali ipsius assistentia semper duci, privilegio infallibilitatis donari, et in omnibus esse audiendam. Hæc semina veritatis primo germinant in cordibus, radices producunt, crescunt et plenam ac perfectam tandem informant fidem divinam in Ecclesiam, absque ulla discussione proprie dicta, sine ullo ratiocinio, sine ullo dubio interposito. Tam facile enim pueri et simplices fidem in Ecclesiam habere possunt, Spiritu sancto divinitus in eis agente, quam fidem naturalem in Deum in aliasque veritates naturales et evidentes. Fidem natura-

dem in has veritates sic habent pueri et simplices : primas earum notiones a parentibus accipiunt, eas paulatim percipiunt, deinde clare vident ac firmiter credunt. *Nec dici potest*, illos prævia discussione indignisse, vel in dubio circa illas veritates constitutos fuisse : ergo similiter catholici non necessario constituuntur in dubio circa primas fidei veritates ; necessitatem auctoritatis facile percipiunt vel potius sentiunt ; existentiam Ecclesiæ cum auctoritate docentis quasi naturaliter credunt, modo diligenter instruuntur in fide ; accedentibus aliis notitiis, quotidie obfirmantur, sicque paulatim ad *rationabile obsequium* perveniunt : hoc autem articulo semel admissio, nihil facilius est quam cæteras veritates fide divina credere. Unde sic lucide et egregie D. *Fénelon*, *Lettre sur la religion* :

« Représentons-nous un paralytique qui veut sortir de son lit, parce que le feu est à la maison ; il s'adresse à cinq hommes qui lui disent : Levez-vous, courez, percez la foule, sauvez-vous de cet incendie. Enfin il trouve un sixième homme qui lui dit : Laissez-moi faire, je vais vous emporter entre mes bras. Croira-t-il les cinq hommes qui lui conseillent de faire ce qu'il sent bien qu'il ne peut pas ? ne croira-t-il pas plutôt celui qui est le seul à lui promettre le secours proportionné à son impuissance ? Il s'abandonne sans raisonner à cet homme, et se borne à demeurer souple et docile entre ses bras. Il en est précisément de même d'un homme dans son ignorance ; il ne peut écouter sérieusement les sectes qui lui crient : Lisez, raisonnez, décidez, lui qui sent bien qu'il ne peut ni lire, ni raisonner, ni décider ; mais il est consolé d'entendre l'ancienne Église qui lui dit : Sentez votre impuissance, humiliez-vous, soyez docile, confiez-vous à la bonté de Dieu, qui ne nous a point laissés sans secours pour aller à lui. Laissez-moi faire, je vous porterai entre mes bras. »

Inst. 2°. Pueri et simplices fidem auctoritati docenti adhibere non debent quin ipsius auctoritatis existentiam

et jura sedulo examinaverint; ergo ad fidem pervenire nequeunt absque privato examine.

R. Nego ant. Eodem modo enim pueri et simplices, ut jam diximus, fidem supernaturalem suscipiunt ac fidem naturalem. Porro fidem naturalem suscipiunt a matre et a circumstantibus sine ullo prævio examine, sicque firmiter credunt, v. g. talem principem regno præesse, tales leges nos regere, etc. ; ita parentes, magistros, parochos aliosque de rebus supernaturalibus loquentes audiendo, paulatim suscipiunt fidem, in ea firmantur et ne ullo quidem instanti privato utuntur examine. Ergo, etc.

Inst. 3º. Rationabilis esse debet fides nostra : at rationabilis non esset, si existentia et jura auctoritatis docentis stricto subjecta non fuissent examini ; ergo, etc.

R. Nego min. Rationabilis quippe est ea fides quæ via naturali unicuique proportionata efformatur : at talis est fides puerorum et simplicium auctoritate matris, patris, magistri, parochi, etc. credentium, licet fundamenta et jura hujusmodi auctoritatis non exploraverint. Rationabilis enim est fides, qua veritates naturales et facta humana admittunt ; ergo a pari et fides qua veritates supernaturales credunt.

Inst. 4º. Qui fundamenta fidei auctoritate parentum, magistrorum, parochorum susceptæ explorare voluerint, ut tenentur adulti ratione præditi, dubitare incipient ; ergo fides sic suscepta non est firma.

R. Nego ant. Filius qui titulos a patre sibi transmissos perfectius cognoscere intendit, eos legit, perlustrat, examini subjicit, sicque rationabilem acquirit certitudinem eosdem esse authenticos, veros, gloriosos, tutos, et ne uno instanti dubitat de iis quæ adhuc puer a parentibus didicit ; sic et christianus bene edoctus, in scientia religionis proficiens, historiam Ecclesiæ percurrit, fundamenta et jura auctoritatis ejus examinat, rationes fidei suæ quærit, veritatibus a Deo revelatis sibi antea traditis magis ac magis firmiter adhæret et eas nunquam habet ut dubias. Ergo, etc.

Inst. 5º. Fides quæ non est omnino certa non est vera fides : atqui fides puerorum et simplicium non est omnino certa. Ergo, etc.

R. Nego min. Illa enim fides est omnino certa quæ habet veritatem supernaturalem pro objecto, omnem excludit formidinem errandi et infallibili nititur fundamento seu motivo : atqui talis esse potest fides puerorum et simplicium : potest enim 1º habere veritatem supernaturalem pro objecto, si nempe accurata fuerit instructio ; 2º omnem errandi formidinem excludere, quando scilicet est firma, ut sæpe contingit ; 3º infallibili motivo inniti, videlicet auctoritate Dei. Ergo, etc.

Inst. 6º. Fides puerorum et simplicium auctoritate parentum et parochi nititur ; ergo non nititur motivo infallibili.

R. Nego ant. Pueri enim et simplices ducuntur quidem ad fidem auctoritate parentum et parochi : at fides eorum ipsamet Dei auctoritate per parentes et parochum eis manifestata innititur, ac proinde motivo infallibili. Sedulo igitur distinguenda sunt in fide, ut supra diximus, 1º objectum, id est, veritates a Deo revelatæ ; 2º principium, scilicet gratia Dei ; 3º motivum proprium, quod est auctoritas Dei summe veracis, et 4º media quibus ad fidem ducimur, et sunt motiva credibilitatis.

Inst. 7º. Certitudo ad fidem requisita debet esse absoluta : atqui certitudo qua pueri et simplices veritates a parentibus et parochis sibi traditas credunt est tantum relativa : ergo pueri et simplices auctoritate parentum et parochi credentes veram non habent fidem.

R. Nego min. Media quibus pueri et simplices ducuntur ad fidem, sunt quidem relativa ; unum convincunt et ad alium convincendum non sufficiunt. At certitudo his mediis acquisita est absoluta : importat enim conformitatem cum suo objecto, firmam mentis adhæSIONem et infallibilitatem in motivo adhæSIONis, videlicet in auctoritate Dei revelantis ac summe veracis. Sicut ergo ex fallibilibus individuorum testimoniis ad testimonium collectivum infallibile ducimur, sic et mediis relativis ad certitudinem absolutam pervenimus.

Inst. 8º. Ædificium firmitus esse non potest fundamento; ergo repugnat nos motivis relativis ad absolutam fidei certitudinem duci.

R. Nego conseq. Fides enim non nititur motivis credibilitatis sicut ædificium suo fundamento: fundamentum enim fidei est auctoritas Dei revelantis. Porro ad notitiam Dei revelantis variis ducimur mediis, et ubi auctoritatem ejus noscimus, ea firmiter nitimur, in ea quiescimus, parum solliciti de mediis quibus ad ejus notitiam pervenimus. Supponamus multos homines diversis mediis flumen pertransiisse, alios per pontem, alios in scapha, alios in rate, alios natando: omnes æqualiter securi erunt in ripa opposita, etsi mediis plus minusve periculosus usi fuerint; sic et qui diversis motivis credibilitatis in se fallibilibus ad notitiam Dei auctoritatis pervenerunt, in ea tuto quiescunt.

Inst. 9º. Fieri potest ut parochus impius oves sibi commissas in errorem inducat etiam circa dogmata magis essentialia: ergo fideles hac via prudenter credere non possunt.

R. Nego conseq. Fideles enim prudenter agunt quando sola via quam divina providentia eis dedit utuntur, et consuetas intelligentiarum regulas sequuntur: at sic agunt fideles in casu proposito, et fides naturalis qua totum societatis humanæ subsistit ædificium, non aliter formatur. Ergo, etc.

Aliunde vix contingere potest ut parochus oves suas, saltem diu, circa fidei essentialia decipere possit: mox enim reprehenderetur ab episcopo, ab aliis parochis aut sacerdotibus; vel etiam a suis parochianis, qui facile comperirent illum non eandem prædicare doctrinam quam alii pastores annuntiant, sicque error detegere-tur. Ergo, etc.

Inst. 10º. Pueri et simplices eadem habent motiva credendi apud Græcos aliasque sectas quæ auctoritate ducuntur, ac apud nos: atqui tamen non prudenter credunt; ergo, etc.

Ita adhuc minister *Claude* contra *Bossuet* in colloquio.

R. 1º. Negari potest major. Eo magis enim lucidior est Ecclesiæ Romanæ auctoritas, quo attentius consideratur, dum Ecclesia Græca aliæque orientales sectæ, si stricto subjiciantur examini, principio unitatis, caractere universitatis destitui videntur : hæc autem sufficiunt ut quædam saltem exsurgant dubia.

R. 2º. Nego min. Pueri enim et simplices apud Græcos aliasque sectas in quibus admittitur auctoritas docendi, prudenter agunt parentibus et pastoribus credendo, cum aliam non habeant viam sibi proportionatam qua de religione doceri queant : si falluntur, hoc per accidens evenit.

Cæterum, non repugnat eos saltem frequenter veram habere fidem : illi enim veram habent fidem qui veritatibus a Deo revelatis firmiter ob ipsam Dei summe veracis auctoritatem adhærent : atqui fieri potest et sæpe fit ut, apud Græcos et alias sectas quæ auctoritate ducuntur, pueri et simplices veritatibus a Deo revelatis firmiter et ob ipsam Dei summe veracis auctoritatem adhæreant. Quod ut melius intelligatur, notandum est cum *Bossuet*, in colloquio citato, apud schismaticos et hæreticos vera a falsis accurate discernenda esse : qui apud illos valide baptizati sunt, eandem habent gratiam sanctificantem, eadem dona Spiritus sancti, eandem fidem infusam ac ii qui apud nos baptizantur. Spiritus sanctus in eis habitans similiter eos impellit ad credenda mysteria SS. Trinitatis, Incarnationis, Redemptionis et alia vera, clare sibi exposita ; eos adhuc impellit ad credendam Ecclesiam, illius auctoritatem et infallibilitatem ; hucusque non errant et veram habent fidem. Quando autem præjudiciis attracti, aut falsis documentis decepti, notiones veræ Ecclesiæ sectis suis applicant, tunc incipiunt errare, et sub hoc respectu verum fidei actum elicere non possunt ; nam Spiritus sanctus eos impellere non potest ad falsa. Ergo. Attamen, si in hunc in aliosve errores invincibiliter inducantur, non peccant, nec virtutem fidei amittunt. Unde si alia non habeant peccata, salvabuntur.

Inst. 11º. In his principiis puer et simplex, apud schismaticos et hæreticos, peccarent suam societatem deserendo ut veram Chrsiti Ecclesiam amplecterentur: atqui hoc repugnat: ergo.

R. Dist. maj. Peccarent contra conscientiam, si falsitatem sectæ suæ nondum adverterent, *concedo*; peccarent contra fidem, *nego*. *Ratio hujus distinctionis patet.*

Inst. 12º. Nunquam puer catholicus auctoritati parentum et parochi fidem denegare potest absque peccato: at auctoritas parentum et parochi eadem est respectu pueri Græci, v. g. ac respectu catholici: ergo.

R. 1º. Nego maj. Si enim contingat puerum catholicum ex bona fide sibi persuadere quod parentes et parochus falsum dixerint, non peccabit fidem eorum auctoritati denegando.

R. 2º. Nego min. Qui enim in vera Ecclesia erudiuntur, eo clarius judicant eam esse veram quo magis in illius notitia proficiunt. Contra vero, qui alias sectas cum Ecclesia catholica comparant, ex qua parte stet veritas non difficile intelligunt. Ergo.

Inst. 13º. Catholicus non majori zelo veritatem prosequitur quam Græcus aut alius Orientalis, qui auctoritate parentum et parochi simpliciter credit quidquid sibi proponitur: ergo non facilius salvari potest.

R. Nego conseq. Meritum enim non ex solo hominis arbitrio deducitur, sed præcipue ex gratia Christi: at catholicus multo pluribus donatur gratiis, præsertim ad credendum, quam hæreticus aut schismaticus; solam enim veritatem circa fidem docetur, etiam in teneris annis, dum alter, e contra, errorem sugit cum lacte, et ab illo postea nonnisi difficile sese expedit. Ergo.

Obj. 2º. Ex una parte auctoritatem Ecclesiæ per auctoritatem Scripturæ probamus, et ex altera parte contendimus auctoritatem Scripturæ per Ecclesiam esse cognoscendam: ergo admittitur circulus vitiosus.

R. 1º. Retorqueo argumentum. Si a protestantibus quæritur cur hos vel illos libros esse canonicos credant, respondebunt se id compertum habere ex Spiritu sancto,

vel ex privato examine; si vero ab ipsis petatur unde sciant unctionem Spiritus sancti aut privatum examen viam esse tutam ad cognoscendas Scripturas canonicas, affirmabunt se id cognoscere ex Scripturis illud aperte docentibus : ergo in circulo vitioso implicantur.

R. 2º. Distinguo ant. Ex una parte auctoritatem Ecclesiæ per auctoritatem Scripturæ probamus, et ex altera parte, etc. sub diverso respectu, *conc.* sub eodem respectu, *nego ant.* Itaque, vel adversarii admittunt Scripturas, vel non. Si prius, ipsis probare possumus auctoritatem Ecclesiæ per Scripturam, nempe *per argumentum* quod vocatur *ad hominem* : hinc secundum strictas logicæ regulas argumentamur contra protestantes, dum ex Scripturis quas admittunt ut divinas, infallibilem Ecclesiæ auctoritatem astruimus.

Si autem cum iis qui divinitatem Scripturæ non cognoscunt disputandum sit, aliam instituimus methodum : primo libros divinos considerantes velut monumenta humana, eorum authenticitatem, integritatem et veritatem, sicut aliorum cujusvis generis operum, demonstramus; deinde eos attente legentes, videmus celebrem exstitisse hominem qui per evidentissima signa probavit se esse Deum, et religiosam instituisse societatem cui plures concessit prærogativas, et in primis auctoritatem infallibilem : inde concludimus definitiones hujus societatis absque ulla errandi formidine audiendas esse : postea ostendimus eam nobis tradere Scripturas ut divinas, in hoc vel in illo sensu intelligendas : eas ergo ut tales accipere, venerari et intelligere debemus : porro in hac utraque argumentandi methodo nullus instituitur circulus vitiosus, *ut patet* : ergo.

Præterea, ex sola traditione et ratione auctoritas Ecclesiæ demonstrari potest; ejus necessitatem fortiter sentiunt fideles, *ut supra ostendimus*. Unde quando erudiuntur non proponitur ipsis Scriptura perscrutanda, sed fides *in unam, sanctam, catholicam et Apostolicam Ecclesiam*. Ergo.

Obj. 3º. Hæc verba Christi quibus præcipue nititur in-

fallibilitas Ecclesiæ, *Ecce ego vobiscum sum*, etc. intelligi possunt de promissione gratiæ ad bene docendum : atqui gratia finem suum non obtinet infallibiliter : ergo.

R. Dist. min. Gratia gratum faciens non obtinet finem suum infallibiliter, *concedo* ; gratia gratis data, *nego min.* Itaque duplex distinguitur gratia ; alia enim quæ immediate ad sanctificationem recipientis tendit : talis est gratia concessa peccatori ut convertatur, et justo ut perseveret ; a theologis vocatur gratia gratum faciens. Aliæ sunt gratiæ quæ ad spiritualem recipientis utilitatem non conceduntur, sed ad gloriam Dei aut ad salutem populi ordinantur : talis est facultas operandi miracula et potestas administrandi sacramenta. Revera fatemur gratias gratum facientes suum non obtinere effectum nisi dependenter a libero hominis arbitrio ; sed gratiæ gratis datæ sunt independentes a dispositione recipientis et a bono aut malo usu libertatis : id omnes fatentur. Porro gratia pastoribus ad bene docendum collata, est gratia gratis data ; siquidem ad Ecclesiæ utilitatem ordinatur. Ergo.

Et vero, promissa Dei circa visibilitatem et perpetuitatem Ecclesiæ a nulla pendent conditione, alioquin nihil esset certum in prophetiis : at eodem sensu accipienda sunt hæc verba, *Ecce vobiscum sum*, etc. perpetua enim visibilitas Ecclesiæ pendet a ministerio pastorum. Insuper de promissione his verbis expressa idem dicendum est ac de promissione facta Judæis de mittendo Salvatore : atqui hæc promissio irritari non potuit ob multorum Judæorum malitiam : *Numquid incredulitas illorum fidem evacuabit ? absit* ; Rom. III, 3 : ergo a pari promissio facta Ecclesiæ per hæc verba, *Ecce vobiscum sum*, etc. malitia pastorum evacuari non potest.

Inst. 1º. Non solum infallibilitate, sed et aliis privilegiis Apostolorum, v. g. dono miraculorum, gauderent episcopi, si prædicta Christi verba ad eos extenderentur : atqui *falsum antecedens* : ergo et *consequens*.

R. Nego maj. Prædicta enim verba nihil aliud per se exprimunt quam auxilium efficax ad recte docendum ; cætera privilegia quibus gaudebant Apostoli alio niteban-

tur fundamento : vi ergo illius textus , *Ecce ego vobiscum sum* , etc. successoribus eorum tribui non possunt. Præterea, hæc verba non ad singulos Apostolos , sed ad totum collegium Apostolorum diriguntur : si ergo alia privilegia his verbis exprimerentur , ad corpus pastorum solummodo pertinerent , non vero ad singulos pastores seorsim sumptos. Ergo.

Inst. 2º. Singuli episcopi seorsim errare possunt : ergo et eorum collectio.

R. Nego conseq. Nam privilegium infallibilitatis , de quo hic loquimur , a voluntate libera Christi pendet : potuit ergo Christus illud corpori pastorum tribuere , et singulis pastoribus seorsim sumptis denegare : porro id fecit , *ut patet* tum ex verbis citatis , tum ex constanti traditione. Sic in ordine naturali multa quæ individuis tribui nequeunt , collectioni competunt : v. g. multi collective sumpti possunt exercitum debellare ; urbem obsidere , factum aliquod infallibiliter testari : hæc autem privati efficere non possunt : ergo.

Inst. 3º. Fideles uniuscujusque diœcesis tenentur , in principiis catholicorum , judicio doctrinali proprii episcopi obedire : at judicium unius episcopi non est infallibile : ergo.

R. Distinguo maj. Fideles judicio episcopi sui obedire tenentur , obedientia subjectionis externæ et reverentiæ , *concedo* ; obedientia interna intellectus et voluntatis , *subdistinguo* : si judicium episcopi doctrinam Ecclesiæ manifeste contineat ; *concedo ant.* si judicium episcopi non contineat manifeste doctrinam Ecclesiæ , *nego ant.* Et enim omnes fideles tenentur , juxta catholicos , episcopo suo judicanti , definienti et docenti externam subjectionem , v. g. abstinere a legendo libro qui prohibetur , a propugnanda opinione quæ damnatur , quia episcopus legitimam habet potestatem docendi , præcipiendi , prohibendi et obligandi : quotiescumque igitur potestate sua manifeste non abutitur , fideles ipsi obedire tenentur. Debent illi pariter obedientiam reverentiæ ; quia donec contrarium evidenter appareat , præsumitur recte do-

cere. Item absolutam intellectus et voluntatis obedientiam illi præstare tenentur, si ipsius iudicium doctrinam Ecclesiæ clare contineat; tunc enim non præcise episcopo fallibili, sed Ecclesiæ infallibili se subjiunt.

Si autem episcopus errorem aperte doceat, vel meras opiniones pro dogmatibus proponat, tunc in hoc puncto nulla subjectio ipsi debetur; imo contra huiusmodi iudicium plures insurrexerunt doctores et simplices fideles. Ubi vero clare non advertitur an iudicium ejus doctrinæ Ecclesiæ consentiat vel dissentiat, fideles actum fidei circa illud elicere nec tenentur, nec possunt; actum enim fidei elicere non possumus nisi circa propositionem certo revelatam: at, in casu præsentis, propositio quam enuntiat episcopus non est certo revelata, siquidem auctoritas ejus est fallibilis. Ergo.

Obj. 4^o. Deus expressis verbis, Deut. xvii, 8 et 9, Synagogam constituerat supremum controversiarum fidei iudicem: atqui tamen Synagoga non erat infallibilis: ergo nec Ecclesia.

R. 1^o. *Nego maj.* Verbis enim allatis Deus constituit Synagogam iudicem inter sanguinem et sanguinem, causam et causam, lepram et lepram, id est, in causis criminalibus, civilibus et cæremonialibus: illæ autem causæ non pertinebant ad fidem: immerito igitur concluderetur Deum constituisse Synagogam supremum controversiarum fidei iudicem.

R. 2^o. *Negari posset minor.* Multi enim contendunt Synagogam privilegio infallibilitatis fuisse donatam, et contrarium nullo facto demonstratur. Præcipuum quippe factum allegari solitum, quod minister *Claude* objecit *Bos-suet*, est juridica Christi condemnatio: at factum istud non probat Synagogam infallibilitate fuisse destitutam. Etenim Deus eam instituerat ad tempus duraturam, prædixerat eam fore abrogandam, et novum fœdus ei substituendum: at protestantes nobiscum admittunt Christum hoc fœdus instituisse, Synagogam abrogasse, et evidentibus signis missionem suam probasse: splendida ergo tunc existebat auctoritas, nempe ipsa veritas

hominibus facta visiblis. Protestantes igitur hoc factum nobis objicere nequeunt. Unde *Bossuet*, contra *Claude* :

« Avant Jésus-Christ nous avions la Synagogue : au point que la Synagogue devait défailir, Jésus-Christ parut lui-même ; quand Jésus-Christ s'est retiré, il a laissé son Eglise à qui il a envoyé son Saint-Esprit. Faites revenir Jésus-Christ enseignant, prêchant, faisant des miracles, je n'ai plus besoin de l'Eglise : mais aussi ôtez-moi l'Eglise, il me faut Jésus-Christ en personne, enseignant, parlant, prêchant, décidant avec des miracles et une autorité infallible. »

R. 3°. Nego conseq. Etiam si ambæ concederentur præmissæ, nihil adversus propositionem nostram concludi posset. Nam 1° sub lege Moysis paucissimæ erant veritates fide necessario credendæ ; scilicet, Deum esse remuneratorem et Messiam venturum : facillimum igitur erat duas veritates istas conservare et transmittere integras. 2° Synagoga non erat sola controversiarum fidei judex ; Deus enim sæpe extraordinario Prophetarum ministerio suas manifestabat voluntates : si ergo Synagoga errorem docuisset, mox contra illam insurrexissent Prophetæ ; e contra, in Ecclesia multæ sunt veritates fide credendæ, sive explicite, sive saltem implicite ; nihil facilius est quam errare in intelligendis Scripturis et in doctrina Christi spiritu privato interpretanda, et tamen nulla est in illa extraordinaria auctoritas. 3° Tandem institutio Synagogæ et Ecclesiæ fuit opus Dei externum et liberum : ergo Deus potuit uni infallibilitatem conferre et non alteri, ac proinde *admitti non potest argumentum a pari*, ut prætendit *Claude*.

Obj. 5°. B. Paulus, II Cor. 1, 23, ait : Non quia dominamur fidei vestræ : attamen Ecclesia fidei nostræ dominaretur, si quæstiones circa fidem cum infallibili auctoritate definiat et internum a nobis exigeret obsequium. Ergo. Sic iterum Claude contra Bossuet.

R. Distinguo textum B. Pauli. Non dominamur fidei vestræ, id est, eam non instituimus aut reformamus pro arbitrio nostro, concedo ; id est, non decernimus quæ sint

credenda, *nego*. Itaque Apostolus fidei Corinthiorum priori sensu non dominabatur; sed noluit affirmare se non decernere quid esset revelatum aut non revelatum, quid proinde credendum vel non credendum; totus enim est in Epistolis suis ut sanam doctrinam Christi ostendat, abusus reprimat, errores avertat aut destruat. Porro non alio sensu Ecclesia fidei nostræ dominatur: decernit quid sit revelatum, quid igitur credi debeat; et sicut fideles credere tenebantur quidquid B. Paulus ipsos docebat, sic credere debemus quidquid Ecclesia nobis proponit ut revelatum; quia, ex speciali Spiritus sancti assistentia, tam infallibilis est in interpretando revelationem, quam B. Paulus alique scriptores sacri in eam promulgando et divina inspiratione scribendo. Unde S. Gregorius Magnus, Epist. ad Savinum subdiaconum, sic habet: « Quatuor synodos sanctæ universalis Ecclesiæ » sicut quatuor libros sancti Evangelii recipimus. »

Cum tamen Ecclesia nihil novi possit revelare, sed tantum revelationem interpretari, ipsius definitiones non sunt verba Dei, licet eadem gaudeant infallibilitate: inter eas igitur et Scripturam sacram notabile existit discrimen.

Obj. 6º. Omnes Christiani auctoritatem Scripturæ admittunt, de auctoritate vero Ecclesiæ disputatur: ergo methodus protestantium certior est methodo catholicorum.

R. Nego conseq. Nam infallibilitas auctoritatis Ecclesiæ evidenter probatur, tum indirecte, confutatis aliorum opinionibus; tum directe, ut ex probationibus nostris constat. Imo hanc Ecclesiæ auctoritatem sæpe confessi sunt protestantes, sive expressis verbis, ut Grotius, Leibnitz, de Starck, etc. sive sua agendi ratione, v. g. in synodo Charentona, anno 1644, in qua error Independentium proscriptus est. Ergo.

Præterea, omnes Christiani conveniunt quidem infallibilem esse auctoritatem Scripturæ generatim sumptæ, sed inter se non consentiunt de divinitate talis aut talis libri in particulari, et multo minus de genuino sensu

librorum quos venerantur ut sanctos : ergo falsum est methodum protestantium certiorē esse methodo supremæ auctoritatis quam admittunt catholici.

ARTICULUS QUINTUS.

DE SOCIETATE CUI PRÆDICTÆ NOTÆ NEGATIVÆ
COMPETUNT.

Societas quæ vel una ex quatuor præcedentibus notis careret, eo ipso convinceretur non esse veram Christi Ecclesiam. Non necesse est cunctas societates Christianas sub hoc respectu perlustrare : sit statim sequens

PROPOSITIO.

Constat Ecclesiam Romanam quatuor prædictas notas habere.

Prob. 1º Eminenter est visibilis. Alias enim societates Christianas longe superat, et in mundo tanquam lux splendens fulget, ut ex dicendis ubi de catholicitate, clarius patebit.

2º Visibilitas ejus nunquam defecit, fatentibus adversariis, qui dicunt ecclesiam suam in sinu Ecclesiæ Romanæ ante reformationem delituisse.

3º Fuit invariabilis in fide sua. Constat enim, ex historia, eam cunctas novitates semper detestatam fuisse, et novatores velut hæreticos aut schismaticos omni tempore damnavisse.

4º Via auctoritatis in docendo semper usa est. Gloriatur se speciali Spiritus sancti assistentia donari, et in ferendis decretis suis infallibilem esse : ergo de facto habet auctoritatem. Imo habet auctoritatem a Christo institutam, et hoc solo probari potest eam esse veram Ecclesiam. Enimvero constat ex probatis, sola via auctoritatis fideles in negotio salutis ducendos esse : unde sequitur omnes majorem auctoritatem amplecti debere ; qui enim, majori auctoritate relicta, minori adhæret, eo ipso viam auctoritatis deserit. Porro in Ecclesia Romana præstantior semper viguit auctoritas quam in aliis societatibus Christianis ; siqui-

dem semper fuit in ea major numerus pastorum vinculo ejusdem doctrinae unitorum, legitima praescriptione jus sibi vindicantium docendi et controversias fidei infallibiliter definiendi: igitur simplices fideles, necessitatem auctoritatis sentientes, concludere debent societatem Romanam esse veram Christi Ecclesiam. Itaque haec nota sic spectata non negativa, sed positiva est, et soli Ecclesiae Romanae competit.

Protestantes plures ex praedictis notis sibi vindicare non possunt: 1° non indefectibilitatem visibilitatis, siquidem lateri coguntur se ante Lutherum in sinu Ecclesiae Romanae latentes fuisse; 2° non invariabilitatem, cum fidem suam variis in punctis saepius mutaverint; 3° non auctoritatem, ut ipsi palam dicunt: ergo jam victi sunt, et tamen vix eos aggressi sumus.

CAPUT SECUNDUM.

DE NOTIS VERAE ECCLESIAE POSITIVIS.

Notae positivae illae dicuntur quae verae Ecclesiae ita conveniunt, ut ecclesiae falsae applicari nequeant; quibus igitur vera Ecclesia ab aliis sectis tuto secernitur.

Tribus specialiter dotibus gaudere debent, ut ad propositum finem nos perducere queant, videlicet: 1° debent esse notiores ipsa Ecclesia, alioquin immerito dicerentur notae; 2° cognitu faciles, quia necesse est ut rudiores sicut et docti veram Ecclesiam cognoscere valeant: non necesse est tamen omnes notas captui idiotarum et ingenio peritorum esse simul proportionatas; 3° verae Ecclesiae propriae; si enim aliis sectis competere, jam illarum ope vera Ecclesia discerni non posset.

Dari hujusmodi notas ambigi non potest; nam vera Ecclesia existit: ita vero existit, ut ab omnibus inveniri possit: ergo. Has igitur notas assignare debemus.

Lutherus, Calvinus et Ecclesia Anglicana duas admittunt Ecclesiae notas, scilicet rectam doctrinae Christi pra-

dicationem, et legitimam sacramentorum administrationem; nonnulli addiderunt legitimam disciplinam recte administratam. Illæ notæ ad unicam reducuntur, nempe ad veram Christi doctrinam, examine privato ex Scriptura sacra cognitam: ita nunc omnes protestantes, ut ipsi dicunt in recentioribus libris et in opere jam citato, *la Revue protestante*.

Catholici vero unanimiter affirmant in Ecclesia necessario quidem esse rectam doctrinæ Christi prædicationem, legitimam sacramentorum administrationem et rectam disciplinam; sed negant has qualitates assignari posse tanquam Ecclesiæ notas, et quatuor assignant notas positivas quæ a concilio Constantinopolitano traditæ sunt his verbis: *et unam, sanctam, catholicam et Apostolicam Ecclesiam*. De his et illis seorsim nobis dicendum est in sequentibus articulis.

ARTICULUS PRIMUS.

DE FALSIS NOTIS A PROTESTANTIBUS ASSIGNATIS.

PROPOSITIO.

Recta doctrinæ Christi prædicatio et legitima sacramentorum administratio immerito assignantur ut notæ Ecclesiæ.

Prob. Illæ enim qualitates immerito assignantur ut notæ Ecclesiæ, quæ non habent conditiones Ecclesiæ notis necessarias: atqui notæ a protestantibus assignatæ non habent conditiones Ecclesiæ notis necessarias. Prima namque conditio est, *ut sint ipsa Ecclesia notiores*: atqui notæ a protestantibus assignatæ non sunt Ecclesia notiores. Quærimus enim ubi sit vera Ecclesia, seu societas quæ veram Christi religionem profiteatur: protestantes respondent eam esse in qua vera est Christi doctrina: porro hæc responsio idem significat ac si diceretur, veram Ecclesiam esse veram Ecclesiam: ergo.

Secunda conditio est, *ut illæ notæ sint cognitu faciles*: atqui notæ a protestantibus assignatæ non sunt cognitu faciles; sunt e contra cognitu impossibiles, et captum

fere omnium superant; ad hanc enim unicam reducuntur notam, nempe ad veritatem doctrinæ Christi sola discussionis methodo cognitam: at communiter homines veritatem doctrinæ Christi sola discussionis methodo certo cognoscere non possunt, *ut supra ostendimus: ergo.*

Omnia argumenta quibus demonstravimus Scripturam spiritu privato interpretatam, non esse regulam fidei, similiter probant rectam doctrinæ Christi prædicationem, etc. constat igitur falsas esse notas hic a protestantibus assignatas. Ergo.

Solvuntur objectiones.

Obj. 1º. Res aliqua per essentielles proprietates suas innotescit: atqui veritas doctrinæ Christi est proprietas Ecclesiæ Christi essentialis: ergo. Ita minister *Dumoulin.*

R. Dist. maj. Res per essentielles proprietates suas innotescit, quoad naturam, *conc.* quoad locum vel modum existentiae, *subdist.* per aliquas proprietates, *conc.* per omnes, *nego maj.* Etenim naturam alicujus rei cognoscere non possumus, nisi per essentielles illius proprietates; sed illius existentiam et existentiae modum cognoscere possumus, quamvis omnes qualitates ejus essentielles non noscamus: sic existentiam luminis, motus, frigoris, etc. novimus, licet plerasque eorum qualitates essentielles nesciamus. Porro de existentia Ecclesiæ, vel potius de illius distinctione in præsentī quæstione agitur, non vero de ejus essentia. Ergo.

Obj. 2º. Solæ veritates fundamentales sufficiunt ut vera Ecclesia certo distinguatur: atqui illæ veritates ex lectione Scripturarum facile noscuntur: ergo.

R. Nego maj. Mox enim demonstraturi sumus distinctionem inter veritates fundamentales et non fundamentales admitti non posse.

R. 2º. Nego min. Si enim fundamentales illæ veritates ex sola Scripturarum lectione tam facile noscerentur, omnes protestantes eas unanimiter cognoscere deberent: at, nedum unanimiter cognoscant veritates quas vocant fundamentales, nunquam eas determinare et sibimetip-

sis consentire potuerunt, sed in multiplices abeunt sententias sibi contradictorias : ergo.

Obj. 3º. Ecclesia cognosci non potest nisi per characteres a Christo assignatos : at illi characteres in ipsa Christi doctrina continentur : ergo.

R. 1º. Nego maj. Ecclesia enim cognosci potest per characteres ex illius institutione et existentia fluentes, qui a Christo revelati non fuerunt, sed solo lumine naturali cognoscuntur, ut sunt illius antiquitas, ministerii successio, miracula evidenter patrata. Ergo.

R. 2º. Distinguo conseq. Doctrina Christi est nota Ecclesiæ, id est, in doctrina Christi quædam reperiuntur notæ Ecclesiæ, *conc.* doctrina Christi est nota Ecclesiæ, ad sensum protestantium, *nego conseq.* Equidem in doctrina Christi quædam traduntur regulæ ad veram Ecclesiam discernendam illiusque auctoritatem astruendam, *ut postea monstrabimus* : at inde concludere non licet veritatem doctrinæ Christi esse notam Ecclesiæ, ad sensum protestantium; ingens enim est discrimen inter solvere unam quæstionem ex uno aut altero Scripturæ sacræ testimonio ab omnibus admissio, et cunctas doctrinæ Christi veritates sola discussionis via inquirere, distinguere, ab objectis vindicare et integras conservare. Prius est possibile, et non posterius, *ut ostendimus.* Ergo.

Hinc facile explicantur nonnulli textus S. Aug. adversus Donatistas, in quibus dicit nos dicere Ecclesiam in Scripturis, Ecclesiam in verbis Christi quærendam esse. Sensus est, in Scripturis quærendas esse notas Ecclesiæ; ostendit enim, ex Scripturis, Ecclesiam Christi debere esse catholicam; ostendit postea Ecclesiam Romanam esse catholicam; deinde concludit Donatistarum sectam non esse veram Christi Ecclesiam. Ergo.

ARTICULUS SECUNDUS.

DE VERIS ECCLESIE NOTIS.

Quatuor, *ut diximus*, assignantur veræ Ecclesiæ notæ, nempe unitas, sanctitas, catholicitas et apostolicitas. De his seorsim nobis dicendum est.

§ I. — De unitate Ecclesiæ.

Quadruplex distinguitur unitas respectu Ecclesiæ, videlicet unitas fidei, quæ in eo consistit, ut omnes fideles eandem fidem profiteantur; unitas regiminis, qua iisdem pastoribus subjiuntur; unitas facti, quæ potest esse tum doctrinæ, tum regiminis, tum actualis, tum perpetua; et unitas juris, ex qua unitas facti necessario sequatur.

Omnes conveniunt Ecclesiam aliquo sensu debere esse unam; dicitur enim corpus Christi, sponsa Christi. Christus dixit: *Ædificabo Ecclesiam meam*, non vero *ecclesias*. Sed in definienda unitate ista protestantes et catholici longe a se dissentiunt.

Ut ab objectis quibus cum urgebant catholici sese expediret *Jurieu*, excogitavit systema articulorum fidei fundamentalium et non fundamentalium; duplicem unitatis speciem distinguit: unam generalem, quæ consistit in professione omnium articulorum fundamentalium; et alteram specialem, quæ singulis sectis Christianis propria est: sita est in eadem professione quorundam articulorum non fundamentalium. Contendit veram Ecclesiam debere esse unam priori sensu, ac proinde esse *aggregatum* omnium sectarum in articulis fundamentalibus non errantium, licet in cæteris sibi adversentur. Ideo, juxta ipsum, societates particulares membra ejicere possunt extra unitatem sibi propriam, non vero extra unitatem generalem Ecclesiæ: nec proinde extra viam salutis. Hæc unitas essentialis solo errore in articulis fundamentalibus amitti potest. Tale est in substantia famosum systema de quo tractat auctor in opere cui titulus, *Vrai système de l'Eglise*, l. 4, ch. 6 et seq. quod a cunctis protestantibus admissum est, et nunc ubique ab eis proclamatur.

Catholici autem distinctionem articulorum fundamentalium et non fundamentalium procul rejiciunt, contenduntque unitatem Ecclesiæ Christi essentialem consistere in professione ejusdem fidei, sine distinctione, in

participatione eorundem sacramentorum et in subjectione iisdem pastoribus, et præsertim Romano pontifici. Hinc requirunt unitatem fidei et unitatem ministerii seu regiminis : qui unitatem fidei disrumpunt, aliquem fidei articulum pertinaciter negantes, dicuntur hæretici ; qui vero a subjectione legitimis pastoribus debita se retrahentes, unitatem regiminis scindunt, appellantur schismatici, a verbo Græco σχίζω *dilacero*. Quibus notatis, sit

PROPOSITIO PRIMA.

Distinctio articulorum fundamentalium et non fundamentalium a Jurieu excogitata, admitti non potest, ac proinde ruit ipsius systema.

Prob. 1º. Illa distinctio admitti non potest quæ nullo nititur principio, et impossibilis est in praxi : atqui distinctio articulorum, etc.

1º Nullo nititur fundamento. Fundamentum enim hujus distinctionis reperiri deberet in Scriptura sacra, siquidem protestantes nihil admittere volunt nisi quod ex Scriptura probatur, et latentur veritates quas vocant fundamentales a voluntate Christi pendere : quærendum est ergo ex Scriptura utrum Christus voluerit has vel illas futuras esse fundamentales : atqui nullus assignari potest textus in Scriptura quo illa distinctio nitatur ; multi, e contra, ei adversantur, quando nempe Ecclesia assimilatur regno, domui, sagenæ, navi, sponsæ, etc. quando dicitur unam esse fidem sicut unum baptisma, quando Christus decernit eum qui non audit Ecclesiam habendum esse sicut ethnicum et publicanum : prædicta igitur distinctio est arbitraria et nullo innixa fundamento.

2º Impossibilis est in praxi. Illa enim distinctio impossibilis est in praxi, si certæ non dentur regulæ quibus articuli fundamentales a non fundamentalibus tuto discernantur : atqui nullæ dantur hujusmodi regulæ. Fatetur *Jurieu* hanc quæestionem esse difficillimam : unde eo ipso plerisque hominibus fit solutu impossibilis.

Tres tamen assignat regulas, ad distinguendos articulos fundamentales a non fundamentalibus : illi nam-

que, juxta ipsum, sunt fundamentales, 1° qui absque dispendio salutis negari non possunt, 2° qui cum gloria Dei et beatitudine hominis connectuntur, 3° qui perpetuo et consensu universali crediti sunt : atqui tres illæ regulæ sunt prorsus insufficientes.

1° Ad nihil inservit prima regula. Asserit enim eos articulos esse fundamentales qui absque dispendio salutis negari non possunt : verum quæretur ab eo quinam articuli absque dispendio salutis possint vel non possint negari. Catholici quidem docent fidem explicitam nonnullorum articulorum, v. g. SS. Trinitatis et Incarnationis, ad salutem esse necessariam; sed negant licere vel unum articulum rejicere. Debent ergo protestantes declarare utrum hi vel illi tuto negari possint, et ob quas rationes : porro illud non faciunt : ergo 1°.

2° Non plus inservire potest secunda regula a *Jurieu* assignata. Necesse enim foret ut clare definiretur quinam articuli cum gloria Dei et beatitudine hominis connectantur, vel non connectantur : at illud nec a *Jurieu* nec ab aliis protestantibus determinatur : ergo 2°.

3° Nec pariter sufficit tertia regula ab eodem ministro tradita, scilicet universalis et perpetua Christianorum populorum consensus. Nam, vel requiritur consensus metaphysice universalis, et tunc nullus articulus erit fundamentalis; nullum quippe est dogma quod non fuerit saltem aliquoties impugnatum : vel sufficit consensus moraliter universalis, et tunc fundamentales sunt omnes articuli quos rejiciunt protestantes; nam facile ostenditur illos consensu moraliter universali ante reformationem fuisse admissos. Ergo 3°. Tres igitur regulæ quas tradit *Jurieu* sunt prorsus insufficientes.

Quartam regulam adjecit idem *Jurieu*, quam vocabat regulam *sensationis* seu *gustus*; dicebat enim fideles solo sensu interno bonum a malo et verum a falso discernere, sicut per gustum dulce ab amaro distinguimus : sed nemo non videt quam hæc regula sit arbitraria, fundamento destituta et in praxi illusoria; unusquisque enim sentit et gustat quod vult.

Hoc persentientes hodierni protestantes, solam ad-

mittunt rationem ad intelligendam Scripturam et ad fundamentales articulos a non fundamentalibus distinguendos, *ut supra diximus* : in talem prolapsi sunt indifferentiam, ut apud eos multi theologi, ministri et doctores nullum fere dogma revelatum tanquam fundamentale habeant, nequidem divinitatem Christi. Luctuosam hanc indifferentiam circa omnes religiones prædixerat *Bossuet*, variis in locis, præsertim 6^e *Avertissement*, 3^e *partie* ; eandem præsentiebat *Leibnitz*, licet protestans, *Exposition de la doctrine de Leibnitz sur la religion, ouvrage inédit, traduit par M. Emery, et publié en 1819*. Illam universaliter existere innumera facta invicte demonstrant. Vide *Essai sur l'indifférence*, t. 1, c. 6 et 7; *l'Ami de la Religion et du Roi*, n. 184 et 295; *Discussion amicale*, t. 1; *Excellence de la Religion catholique*, de *M. Milner*, t. 1, et *Entretiens philosophiques*, D. de *Starck*, celebris Lutherani prædicatoris. Eruditus ille doctor probat ex professo et demonstrat *protestantismum* nihil aliud nunc esse in Germania quam purum *deismum*; eadem indifferentia nunc viget in Anglia et in America, etiam apud presbyteros, doctores, professores et episcopos, ut testimoniis fide dignis probat *D. Milner*. Ergo 2^o distinctio articulorum fundamentalium et non fundamentalium est chimærea et in praxi impossibilis. Ergo.

Prob. 2^o ex traditione. Certum est prædictam distinctionem ante *Jurieu* fuisse inauditam; fatetur ipse auctor, evidentiâ coactus, dogma catholicum a tempore *S. Cypriani* semper admissum esse in Ecclesia : ergo semper creditum est. Vel enim semper creditum est, vel post Apostolos fuit introductum : at posterius dici non potest : tunc enim hæretici qui per illud a via salutis exclusi fuissent, statim reclamassent ; illud saltem non admisissent : atqui tamen illud admiserunt : ergo.

Præterea, vox *Ecclesia* semper usurpata est ab hæreticis sicut a catholicis, pro unica societate omnes hæreticos excludente : hinc semper dictum est : *Ecclesia loquitur*; *Ecclesia præcipit* ; *Ecclesia definit*, etc. Porro hæc verba

convenientia non essent, si Ecclesia Christi esset aggregatum omnium sectarum, juxta beneplacitum *Jurieu* et hodiernorum protestantium : ergo.

Solvuntur objectiones.

Obj. 1º. Judæi ad fidem conversi, qui post decretum concilii Hierosolymitani ritus Mosaicos adhuc sequebantur, erant hæretici : attamen ab Apostolis fuerunt tolerati : ergo.

R. Nego ant. Illi enim Judæi non erant hæretici, si decreto concilii Hierosolymitani non fuerint oppositi : atqui decreto concilii Hierosol. non fuerunt oppositi ; in illo namque concilio definiebatur observationem rituum Mosaicorum non esse necessariam, et jugum istud gentibus conversis non imponendum esse ; sed non fuerat pronuntiatum ritus illos esse malos et fugiendos : atqui Judæi conversi non arbitrabantur eosdem ritus ad salutem esse necessarios ; eos ex consuetudine et ex devotione observabant : Apostoli vero per aliquod tempus hanc consuetudinem toleraverunt, ut Synagoga cum honore sepeliretur. Ergo.

Obj. 2º. Sadducæi apud Judæos erant hæretici ; Samaritani erant schismatici : attamen ad Ecclesiam tunc existentem, seu ad religionem Mosaicam, pertinebant. Ergo.

R. 1º. Sadducæi negabant alteram vitam et animæ immortalitatem : porro animæ immortalitas, juxta protestantes, est dogma fundamentale : debent ergo fateri Sadducæos ad Ecclesiam non pertinuisse.

R. 2º. Samaritani erant quidem schismatici ; sed nonnulli apud eos poterant esse in bona fide circa schisma. Alii vero apud eos exstantes schismati illorum non adhærebant : tales fuerunt Elias, Eliseus et septem millia virorum qui genua ante Baal non flexerunt. Ergo.

Obj. 2º. In I Cor. iii, 11 : *Fundamentum aliud nemo potest ponere, præter id quod positum est, quod est Christus Jesus. Si quis autem superædificat super fundamentum hoc, aurum, argentum, lapides pretiosos, ligna, fenum, stipulam, unius-*

cujusque opus manifestum erit : dies enim Domini declarabit, quia in igne revelabitur : et uniuscujusque opus quale sit, ignis probabit. Si cujus opus manserit, quod superædificavit, mercedem accipiet. Si cujus opus arserit, detrimentum patietur : ipse autem salvus erit : sic tamen quasi per ignem. Unde sic argumentabantur *Jurieu* et ejus discipuli. Per *aurum, argentum et lapides pretiosos*, clare designantur articuli essentialia qui a fundamento, scilicet a Christo separari non possunt; per *ligna, fenum et stipulam*, alii exprimuntur articuli minus essentialia qui absque dispendio salutis negari possunt, vel doctrinæ falsæ articulis fundamentalibus adjectæ; quæ tamen fundamentum non destruunt, nec ideo salutem nocent. Ergo.

R. Nego ant. Nam 1º si distinctio articulorum fundamentalium et non fundamentalium clare in illo B. Pauli textu exprimeretur, certe ante *Jurieu* cognita fuisset : atqui nemo ante *Jurieu* hunc textum B. Pauli sic intellexerat.

2º S. Aug. S. Gregor. et multi alii in Scripturis sacris periti, contendunt ibi de doctrina non agi, sed de operibus. Per *aurum*, etc. bona designantur opera; per *ligna, fenum*, etc. designantur opera minus recta, seu venialiter mala : qui ea faciunt, detrimentum patientur; nihilominus salvi erunt, *quasi per ignem* : in illa autem interpretatione nihil est quod opinioni *Jurieu* faveat. Ergo.

3º Si de doctrina ibi agatur, ut probabilius est et contextui magis consentaneum (vide Estium in hunc locum), per fundamentum intelligitur Christus quem B. Paulus prædixerat; per *aurum, argentum et lapides pretiosos*, sana intelligenda est doctrina quam Evangelii præcones annuntiant, sicque super fundamentum recte ædificant; per *ligna, fenum et stipulam*, intelligenda est doctrina eorum qui, a Christo non recedentes in docendo, super legitimum fundamentum etiam ædificant, sed minus recte, quia futiles et curiosas opiniones aut vana eloquii humani ornamenta prædicationi verbi divini inserunt, et ideo, licet salvi fiant, pœnam tamen merentur. Hæc interpre-

tatio, quæ est communior, opinioni *Jurieu* non favet, ut patet. Insuper, si textus ille ad sensum *Jurieu* intelligendus esset, sequeretur solam fidem in Christum esse articulum fundamentalem, non vero fidem in Spiritum sanctum, in immortalitatem animæ, etc. porro hanc consequentiam non admittit *Jurieu*: immerito igitur præsentem B. Pauli textum in gratiam sui systematis allegat.

Obj. 4º. Catholici suos etiam habent articulos fundamentales qui a nemine negari possunt, et articulos non fundamentales, v. g. immaculatam B. Mariæ conceptionem, ejusdem in cælum assumptionem, etc. Ergo.

R. Nego ant. Catholici habent quidem articulos quorum fides explicita ad salutem necessaria est, ut jam observavimus; sed fides implicita qua unusquisque pia affectione credit quidquid credit Ecclesia, est necessaria quoad omnes articulos ad fidem pertinentes, ita ut vel unus voluntarie et cum advertentia rejici nequeat absque dispendio salutis: ergo apud ipsos nullus est articulus non fundamentalis, ad sensum protestantium.

Plurimæ vero sunt quæstiones in scholis eorum agitatæ, v. g. circa B. Mariæ virginis conceptionem, ejus mortem et assumptionem, etc. sed, juxta omnes, illæ opiniones, quamvis communiter acceptæ, ad fidem non pertinent, quia non clare in revelatione continentur, nec ab Ecclesia fuerunt definitæ. Unusquisque igitur, absque labe hæresis, potest eas non admittere. At inde non sequitur quædam apud catholicos esse dogmata fundamentalia, ad sensum protestantium. Catholici enim invariabilem habent regulam, nempe Ecclesiæ auctoritatem qua tuto noscunt quid sit de fide, quid vero de opinione; dum protestantes, ut jam ostendimus, nullam hujusmodi habent regulam.

Obj. 5º. Diversæ sectæ Christianæ valide sacramenta administrant, ut omnes saltem de plurimis sacramentis admittunt: atqui sacramenta valide non administrarent, inquit *Jurieu*, si de Ecclesia non essent: ergo.

R. Nego min. Nam validitas sacramentorum a sola voluntate Christi pendet: atqui Christus voluit ut quædam

sacramenta a schismaticis, hæreticis, apostatis aliisque hominibus valide administrarentur. Sic tota intellexit et tradidit antiquitas de baptismo et de ordinatione; sed nihilominus illæ sectæ ut schismaticæ et hæreticæ constanter habitæ sunt. Non sua sic administrant sacramenta, sed sacramenta veræ Ecclesiæ, pro quibus conferendis sunt instrumenta; nam, ut observat S. Aug. contra Donat. de Bapt. lib. 1, c. 10, separantur quidem a vinculo charitatis et pacis, sed quibusdam in punctis adhuc junctæ esse possunt cum vera Ecclesia, possunt retinere characterem et ritum externum cui, ex institutione Christi, annexa est gratia: in illo autem casu, vi characteris et ritus externi, valide conferuntur sacramenta: præfatum ergo argumentum quod tantopere ventitat *Jurieu*, nihil probat.

Obj. 6°. Rejicienda est doctrina quæ facit Deum crudelem: atqui doctrina quæ tenet minimum errorem circa fidem a salute excludere, Deum facit crudelem: ergo.

R. Nego min. Illa enim doctrina Deum non facit crudelem, si minimus error culpabilis circa fidem gravis sit injuria erga Deum: atqui minimus error culpabilis circa fidem gravis est, etc. Qui enim voluntarie errat circa fidem, Deum facit mendacii auctorem, vel illi veritatem dicenti credere recusat: atqui utrumque Deo valde est injuriosum, *ut patet*. Ergo.

Et vero, si concedatur aliquem errorem circa fidem a salute non excludere, universa brevi rejicietur revelatio, et tota subvertetur religio Christiana: nulla namque est ratio cur potius Deo credatur in hoc puncto quam in altero, cur ille articulus magis ad salutem requiratur quam iste; sic omnes articuli unus post alium negabuntur, revelatio suggillabitur, deismus admittetur, imo et atheismus; nam talem esse naturalem hujus principii consequentiam nimia nunc probat experientia.

Non contendimus tamen omnes qui circa fidem errant, necessario esse damnandos: nam fieri potest ut illorum error non sit mortaliter culpabilis: in eo casu autem non damnabuntur præcise propter hunc errorem. De infidelibus qui religionem Christianam invincibiliter

ignorant, jam diximus in philosophia morali et dicemus in tractatu de Gratia. Christiani vero de quibus hic agitur, vel gratiam baptismatis conservant, vel non : si prius, salvi erunt, cum vere sint Dei amici ; si posterius, salvari possunt, modo remissionem peccatorum obtineant : porro ut remissionem peccatorum obtineant, duo requiruntur et sufficiunt, nempe vera fides et contritio perfecta. 1° *Vera fides* ; nam *sine fide impossibile est placere Deo*, Hebr. xi, 6 ; probabilius requiritur fides explicita SS. Trinitatis et Incarnationis : at fides implicita in cæteros articulos sufficit, *ut alibi probatur*. 2° Extra pœnitentiæ sacramentum, justificatio obtineri potest, per *contritionem perfectam*. Porro illæ conditiones absolute inveniri possunt in sectis hæreticis et schismaticis : nam fieri potest ut quidam præcipue fidei dogmata propter solam Dei auctoritatem credant, et parati sint alia credere si ea cognoscerent ut revelata, hæresique vel schismati bona fide adhæreant ; in illo casu materialiter tantum sunt hæretici vel schismatici : ergo si de peccatis propter Dei amorem doleant, statim justificabuntur, ad mentem Ecclesiæ pertinebunt, ac proinde, si in eo statu moriantur, salvi erunt. Nulli ergo damnabuntur præcise quia in hæresi vel schismate existunt, sed quia in errore culpa sua remanent : porro illud non repugnat : ergo. Hanc doctrinam communiter docent theologi, post S. Aug. qui sic se habet, Epist. 43, alias 162, ad quosdam Donatistas episcopos : « Qui sententiam suam, quamvis falsam atque perversam, nulla
 » pertinaci animositate defendunt, præsertim quam non
 » audacia præsumptionis suæ pepererunt, sed a seductis
 » atque in errorem lapsis parentibus acceperunt, quærunt
 » autem cauta sollicitudine veritatem, corrigi parati cum
 » invenerint, nequaquam sunt inter hæreticos deputandi. » Ergo doctrina nostra Deum non facit crudelem.

PROPOSITIO SECUNDA.

Unitas Ecclesiæ Christi essentialis consistit in professione ejusdem doctrinæ, ita ut minima hæresis a via salutis per se excludat.

Prob. Illa propositio evidenter sequitur ex præcedenti :

probatur insuper Scriptura sacra, traditione et ratione.

1° *Scriptura sacra.* Postulat enim Christus pro omnibus qui in ipsum credituri sunt, ut sint unum in Deo, sicut Pater est in Filio, et Filius in Patre, Joan. xvii, 21 : *Ut credat mundus, inquit, quia tu me misisti* : porro talis non existit unio inter sectas dogmata contradictoria docentes et se invicem anathematizantes : ergo.

B. Paulus, Eph. iv, 4, sic habet : *Solliciti servare unitatem spiritus in vinculo pacis. Unum corpus, et unus spiritus, sicut vocati estis in una spe vocationis vestræ. Unus Dominus, una fides, unum baptisma.*

Philip. ii, 2 : *Implete gaudium meum, ut idem sapiatis, eamdem charitatem habentes, unanimes, idipsum sentientes, nihil per contentionem, neque per inanem gloriam.*

Tit. iii, 9 : *Stultas autem quæstiones, et genealogias, et contentiones, et pugnas legis devita; sunt enim inutiles et vanæ. Hæreticum hominem, post unam et secundam correptionem, devita.* Porro evidenter affirmari non potest sectas in doctrina sibi oppositas, servare unitatem spiritus in vinculo pacis, unam profiteri fidem, eamdem charitatem habere, esse unanimes, idipsum sentientes, nihil per contentionem dicere, hæreticum hominem devitare, etc. Ergo.

2° *Traditione.* Constat enim, ex sanctis Patribus et toto historiæ ecclesiasticæ decursu, errantes in fide, etiam in articulis qui protestantibus minus essentielles visi sunt, semper exclusos esse ab Ecclesia velut hæreticos. S. Aug. nonaginta numerat hæreses ab Apostolis usque ad tempus suum : inter eas saltem plurimæ articulos a protestantibus velut fundamentales assignatos procul dubio tenebant; attamen divus Aug. omnes similiter damnat; idem fecerant S. Epiph. et S. Irenæus, lib. contra Hæreses. A tempore S. Aug. usque ad Lutherum, idem fere numerus hæreseon computatur, et omnes pari modo sine ulla exceptione, proscriptæ sunt. Ergo.

3° *Ratione.* Qui solverit unum de mandatis etiam minimis, Matth. v, 19, non intrabit in regnum cœlorum; nam qui peccat in uno, factus est omnium reus, Jacobi ii, 10. Ergo similiter, qui unam negat veritatem a Christo revelatam, salvari non potest; eo ipso enim quod Christus

has veritates revelaverit et jusserit ut Apostoli eas docerent, voluit ut omnes eadem animi submissione crederentur : ergo 3°, etc. aliunde, etc. Ergo, etc.

PROPOSITIO TERTIA.

Vera Christi Ecclesia ita est una ratione regiminis, ut a via salutis excludantur schismatici, etiamsi in doctrina non errent.

Prob. Illud pro certo tenendum est quod constat Scriptura sacra, traditione et ratione : atqui constat, etc.

1° *Scriptura sacra.* Ecclesia enim variis in locis Scripturæ comparatur ovili, regno, civitati, domui, familiæ, corpori, etc. at illæ figuræ unitatem regiminis denotant : qui ergo a regimine ecclesiastico per schisma separantur, jam de Ecclesia non sunt, sicut oves a regimine pastoris sejunctæ non sunt de ovili, subditi a ductu regis separati non sunt de regno, etc. hoc ipso extra viam salutis sunt positi. Ergo 1°.

2° *Id constat traditione.* Novatianus, contra regulas legitimas pontifex Romanus consecratus, et Donatus similiter in sede Carthaginensi intrusus, erant tantummodo schismatici; attamen ipsi ipsorumque sectatores semper habiti sunt ut extra Ecclesiam positi solo facto schismatis : unde S. Cyprianus, Epist. 76 : « Novatianus in Ecclesia non est, nec episcopus computari potest, qui » Evangelica et Apostolica traditione contempta, nemini » succedens, a seipso ortus est. » Idem affirmat S. Augustinus pluribus in locis de Donatistis.

S. Ignatius, in Epist. ad Philadelphos, dicit « eos non » esse cum Christo qui non sunt in unitate Ecclesiæ cum » episcopo; et eos qui schisma facientem sequuntur, regnum Dei non hæreditare. » Idem habent S. Polycarpus, S. Justinus, S. Hieronymus, etc. Ergo 2°.

3° *Idem constat ratione.* Vel enim Ecclesia est unica ratione regiminis, vel duo aut plura ministeria a se independentia simul existere possunt in Ecclesia : atqui posterius dici non potest; nam si plura ministeria a se independentia simul existerent, vel a Christo instituta,

vel post Christum formata fuissent : atqui neutrum supponi potest. Non prius ; quia certum est Christum unicam instituisse societatem sub unico regimine , sicut ovile est sub unico pastore , regnum sub unico rege , civitas sub unico magistratu , domus sub unico patrefamilias , etc. Non posterius : nam hæc ministeria ab hominibus formata essent , et tunc vitam spiritualem non haberent ; forent quippe sicut membrum a corpore separatum , vel ramus a trunco arboris sejunctus ; statim arescit et perit. Ergo 3º , etc. aliunde , etc. Ergo. Vide exquisitum opus D. Nicole , *Unité de l'Eglise* , c. 10 , etc.

PROPOSITIO QUARTA.

Vera Ecclesia non tantum unitatem facti , tum doctrinæ , tum regiminis , sed et unitatem juris necessario habet.

Prob. Unitas est proprietas veræ Ecclesiæ essentialis , ut patet ex dictis : ergo non sufficit ut hic et nunc existat , nec ut semper exstiterit , sed requiritur insuper ut existat principium fixum et invariabile ex quo hæc unitas necessario sequatur ; alioquin semper timendum foret ne aliquando deficeret.

PROPOSITIO QUINTA.

Unitas doctrinæ et regiminis , prout eam explicuimus , est nota veræ Ecclesiæ positiva.

Prob. Ad notam positivam tres requiruntur conditiones , nempe ut sit notior Ecclesia , cognitu facilis , et soli Ecclesiæ propria : atqui unitas fidei et ministerii tres habet conditiones istas. 1º Notior est Ecclesia. Multo facilius est enim cognoscere an societas aliqua talem habeat unitatem , quam illius veritatem per viam discussionis attingere , cum in prima hypothesis unica sit quæstio facti ; in secunda vero multæ solvendæ essent quæstiones juris intricatissimæ. 2º Est cognitu facilis. Omnes etenim facile comperient veram Christi Ecclesiam *unam* esse debere ; aliunde non difficile cognoscent an hæc vel illa societas prædictam unitatem habeat , cum sit factum cognitu fa-

cile. 3° Soli Ecclesiæ est propria. Repugnat enim dari societatem quæ ab Apostolis usque ad nos unitatem sub nullo respectu fregerit, et tamen non sit vera Ecclesia. Ergo.

§ II. De sanctitate Ecclesiæ.

Multiplici modo Ecclesia dici potest *sancta* : videlicet, 1° ratione fundatoris et primarii capitis, nempe Christi, 2° ratione finis, id est, sanctificationis hominum; 3° ratione mediorum quibus hæc sanctificatio producitur, scilicet, doctrinæ credendæ, præceptorum servandorum et cultus quo Deum honorari jubet; 4° ratione sanctificationis realiter existentis, saltem in pluribus membris.

Sub diversis his respectibus *sanctam* esse debere veram Ecclesiam libenter nobiscum fatentur protestantes, excepto quod velint omnia ipsius membra esse sancta, et peccatores ad eam non pertinere. Nos vero demonstrabimus infra nimiam hanc sanctitatis extensionem esse errorem.

Certum est ergo *sanctitatem*, sensibus modo expositis spectatam, *notam* esse veræ Ecclesiæ *negativam*, proindeque omnem societatem ea carentem, quæ videlicet aliquid doceret rationi, revelationi vel bonis moribus contrarium, quæ fundatores vel reformatores evidenter peccatores haberet, etc. veram non esse Christi Ecclesiam. Merito itaque canimus : *Credo sanctam Ecclesiam*.

Sed quæritur utrum sanctitas possit esse *nota* Ecclesiæ *positiva*?

Notandum est, iterum duplicem adhuc distingui sanctitatem : internam scilicet, quæ soli Deo perfecte nota est; externam, quæ nonnullis signis, v. g. miraculis et prophetiis exterius manifestatur.

Certum est sanctitatem internam assignari non posse ut *notam* Ecclesiæ *positivam*.

Certum est, e contra, sanctitatem signis divinis exterius manifestatam, veram indicare Ecclesiam, ac proinde ipsius esse *notam positivam*; repugnat enim Deum talibus signis homines in errorem inducere.

An vero Deus hujusmodi signa sanctitatis in Ecclesia perpetuo exhibere teneatur, definire non audemus, nec idcirco affirmamus sanctitatem sic intellectam essentialiter esse *notam Ecclesiæ positivam*. Sic ferme *de la Luzerne, Dissertation sur les églises catholique et protestante*, t. 2.

§ III. De catholicitate Ecclesiæ.

Catholicitas idem significat ac universitas. Triplici modo Ecclesia dici potest catholica, videlicet ratione doctrinæ, ratione temporum et ratione locorum. Est catholica ratione doctrinæ, si omnem profiteatur doctrinam a Christo traditam; est catholica ratione temporum, si semper sit duratura. De duplici hac catholicitate jam sufficienter diximus ubi de perpetuitate et de unitate veræ Ecclesiæ: de catholicitate doctrinæ iterum dicemus quando de Apostolicitate nobis tractandum erit.

Ecclesia est catholica ratione locorum, si ubique sit diffusa: sub hoc respectu dici potest catholica, primo successive, si diversas orbis partes successive percurrat; secundo simultanee, si de facto per orbem universum diffundatur, quod triplici modo fieri potest, scilicet physice, si reipsa totum orbem impleat; moraliter, si per maximam orbis partem extendatur; et relative, si diffusionem suam alias societates Christianas vincat.

Nonnulli theologi dixerunt solam catholicitatem successivam veræ Ecclesiæ esse essentialem: sic Melchior Canus, de Locis theologicis, l. 4, cap. postremo, resp. ad 13^m argumentum; Bellarm. l. 4 de Notis Eccl. c. 7. Alii vero communiter docent catholicitatem simultaneam, sensu morali intellectam, veræ Ecclesiæ necessariam esse: hanc sententiam amplectentes, contendimus veram Ecclesiam debere esse 1^o catholicam seu moraliter universalem; 2^o constanter catholicam; 3^o simultanee catholicam; 4^o sufficere ut sit moraliter catholica, seu per orbem diffusa; 5^o necessarium esse ut diffusionem suam cæteras societates Christianas vincat. *His notatis*, sint propositiones sequentes.

PROPOSITIO PRIMA.

Vera Christi Ecclesia debet esse catholica seu universalis.

Notandum eam non potuisse dici universalem in suo exordio : fuit enim et debuit esse sicut granum sinapis , primum exigua , et deinde velut arbor magna.

Prob. adversus ministrum *Claude* , qui Ecclesiæ durationem in tres dividit ætates : eam quippe considerat ut crescentem sicut pueri crescere solent , ut aliquandiu in eodem statu manentem sicut viris consuetum est , et ut senescentem atque in senio catholicitate privatam.

Illud pro certo tenendum est quod probatur ex Scriptura sacra , ex Symbolo fidei et ex traditione : atqui ex Scriptura sacra , etc.

1^o *Ex Scriptura sacra.* Gen. xxii , 18 , Deus dicit Abraham : *Benedicentur in semine tuo omnes gentes terræ.* Unde sic. Ut ex illa promissione concludi possit Ecclesiam debere esse catholicam , duo sufficiunt : 1^o ut benedictio hic prænuntiata per Christum sit diffundenda ; 2^o ut gentes illius participes fieri non possint nisi Ecclesiam ingrediantur : atqui hæc duo certa sunt.

1^o Benedictio hic prænuntiata per Christum est diffundenda. Nam eo præsertim textu nitebatur fides Judæorum de adventu futuro Messiae , et ejusdem expectatio. Præterea , B. Paulus ad hunc locum allusionem faciens , Gal. iii , 16 , ait : *Abrahæ dictæ sunt promissiones et semini ejus. Non dicit : Et seminibus , quasi in multis ; sed quasi in uno : Et semini tuo , qui est Christus.* Ergo.

2^o Gentes benedictionis hujus participes fieri non possunt nisi Ecclesiam ingrediantur. Ideo enim promissus erat Messias , et in eo benedicendum erat genus humanum , ut deleteretur maledictio per serpentem inducta , et salus obtineri posset : atqui , ex dictis , nulla est salus extra Ecclesiam : ergo nec benedictio in Christo. Porro omnes gentes benedicendæ sunt in Christo , ex prophetia : omnes igitur ingredi debent Ecclesiam. Ergo.

Idem probatur ex Danielis textu jam allato : *Lapis qui percusserat statuam factus est mons magnus , et implevit universam terram. Hic agitur de Ecclesia , ut notavimus.*

Ps. II, 8 : *Postula a me , et dabo tibi gentes hæreditatem tuam , et possessionem tuam terminos terræ.*

Malach. I, 11 : *Ab ortu enim solis usque ad occasum , magnum est nomen meum in gentibus , et in omni loco sacrificatur et offertur nomini meo oblatio munda.*

Act. I, 8 : *Et eritis mihi testes in Jerusalem , et in omni Judæa et Samaria , et usque ad ultimum terræ ; et XIII , 46 : Vobis oportebat primum loqui verbum Dei , sed quoniam repellitis illud... ecce convertimur ad gentes ; sic enim præcepit nobis Dominus : Posui te in lucem gentium , ut sis in salutem usque ad extremum terræ. Ex his textibus manifestum est Ecclesiam Christi debere esse catholicam , seu ubique diffusam.*

Prob. 2º ex Symbolo fidei. Talis debet esse Ecclesia qualem eam esse profiteamur : atqui profiteamur , et protestantes nobiscum profitentur in Symbolo , eam esse ubique diffusam ; profiteamur enim eam esse catholicam , nam vox catholica obvio sensu accepta , significat extensionem ubique moraliter diffusam , ut ex innumeris SS. Patrum testimoniis probari posset.

Prob. 3º ex traditione. S. Cyrillus Hierosol. Catech. 18, n. 11 : « Catholica igitur vocatur (Ecclesia), quia per » universum sit orbem terrarum diffusa , a finibus terræ » usque ad extrema. »

S. Optatus , lib. 2 in initio , contra Parm. « Ubi ergo » proprietas catholici nominis , cum Ecclesia dicta sit catholica , quod sit ubique diffusa ? »

S. Cyprianus , de Unitate Ecclesiæ , fere in initio : « Ecclesia luce Domini perfusa , per orbem totum radios » suos porrigit. Unum tamen lumen est quod ubique » diffunditur , nec unitas corporis separatur ; ramos suos » in universam terram copia ubertatis extendit , profluentes largiter rivos latius expandit. » Ergo.

PROPOSITIO SECUNDA.

Vera Christi Ecclesia debet esse perpetuo catholica.

Prob. 1º ex Scriptura sacra. Daniel, II, 44 : Suscitabit Deus cœli regnum quod in æternum non dissipabitur, et regnum ejus alteri populo non tradetur : comminuet autem et consumet universa regna hæc, et ipsum stabit in æternum. Hæc prophetia intelligenda est de Ecclesia, ut jam diximus et omnes conveniunt : atqui ex illa sequitur catholicitatem Ecclesiæ debere esse perpetuam ; nam regnum illud a Deo suscitandum *non dissipabitur, alteri populo non tradetur, sed stabit in æternum* ; regnum autem quod ex universali fieret debile et tenue, jam esset dissipatum, vel alteri populo saltem aliquo modo traditum. Ergo.

Matth. XVI, 15, portæ inferi prævalere non possunt adversus Ecclesiam : at si Ecclesia ex universali fieret exigua et constricta, jam portæ inferi adversus eam prævaluissent : ergo.

Prob. 2º ex Symbolo Apostolorum. Christi fideles semper tenebuntur profiteri Ecclesiam esse catholicam : atqui repugnat eos teneri credere articulum qui posset esse falsus : ergo.

Prob. 3º ex SS. Patribus. S. Aug. Epist. contra Donatistas, vulgo de Unitate Eccl. cap. 6, multa congerit testimonia quibus demonstrat Ecclesiam ubique diffusam esse oportere ; deinde ostendit sectam Donatistarum exiguam esse, et extra limites Africæ non extendi, et statim concludit : « Date mihi hanc Ecclesiam, si apud vos » est : ostendite mihi vos communicare omnibus gentibus. » Eodem modo loquuntur S. Optatus Milevitanus et multi alii : porro ille argumentandi modus probat omnibus persuasum fuisse Ecclesiam Christi jugiter catholicam esse debere absque obnubilatione ; alioquin hæretici sic pressi respondissent, se hic et nunc catholicos quidem non esse, sed tales postea futuros esse. Ergo.

Dices. LUC. XVIII, 8, *Filius hominis veniens, putas inveniet fidem in terra?* Certe ubi non est fides, ibi non est Ecclesia: ergo saltem in ultimis temporibus Ecclesia non erit catholica.

R. 1°. Etiam si concederemus Ecclesiam in ultimis temporibus non futuram esse catholicam, nihil contra nos sequeretur; nam de illa tractamus prout debet esse usque ad consummationem sæculi, non vero prout erit in ipsamet sæculi consummatione.

R. 2°. *Nego consequ.* Juxta communio rem enim et probabiliorem sententiam, verba Christi non sunt intelligenda de professione fidei, sed de fide efficaci et per charitatem formata: at fieri potest ut fides per charitatem formata decrescat et rara inveniat, licet Ecclesia maneat catholica. Unde, vel illa verba referenda sunt ad destructionem Jerusalem, ut multi volunt, et sensus est quod eo tempore Christus paucos invenire debuerit qui in ipsum crediderint; vel referri debent ad ultima tempora, ut alii docent, et sensus erit quod tunc pauci futuri sint sancti: at, in utraque hypothesis, nihil adversus propositionem nostram concludi potest. Ergo.

PROPOSITIO TERTIA.

Ecclesia non tantum successive, sed simultanee catholica esse debet.

Hæc propositio, licet non de fide, ut certa habetur, et sequentibus probatur argumentis. 1° *Vox catholica* sumi debet sensu obvio: atqui sensu obvio accepta, simultaneam et non successivam designat extensionem. 2° Christus regnaturus est a mari usque ad mare, nomen ejus futurum est magnum ab ortu solis usque ad occasum, Ecclesia ejus futura est mons magnus totam implens terram: atqui hæc simultaneam et non successivam expriment dominationem. 3° SS. Patres diversos urgebant hæreticos, dicentes eos non habere veram Ecclesiam, quia non erant catholici; si persuasum habuissent catholicitatem Ecclesiæ promissam esse successivam et

non simultaneam, hoc argumentum nullius fuisset roboris, *ut patet*. 4^o Profitemur in Symbolo Ecclesiam catholicam : singulis igitur diebus catholica esse debet. Ergo.

PROPOSITIO QUARTA.

Ut Ecclesia Christi sit catholica, sufficit quod per magnam orbis partem diffundatur.

Pro. 1^o. Ea sufficit diffusio qua verificantur verba quibus catholicitas promittitur Ecclesiæ : atqui verificantur hæc verba, si Ecclesia per magnam orbis partem diffundatur; legitur enim in Scriptura, I Mach. 1, 2, Alexandrum obtinuisse omnium munitiones, interfecisse reges, pertransisse usque ad fines terræ, accepisse spolia multitudinis gentium; idem fere dicitur de Nabuchodonosor, Daniel. 11, 38; dicitur Romanos possedisse mundum..... atqui hæc omnia non sunt vera nisi sensu morali, et de sola extensione per magnam orbis partem intelligenda sunt : ergo *a pari* sufficit ut Ecclesia, etc.

2^o Prophetiæ de catholicitate Ecclesiæ mendaces esse non possunt : attamen mendaces essent, nisi in sensu morali supra exposito intelligerentur; nulla enim est societas Christiana, nec ulla fuit unquam quæ extensionem metaphysice universalem habuerit, imo nec eam habent omnes sectæ Christianæ simul junctæ.

3^o Sancti Patres dicebant Ecclesiam esse ubique diffusam : verum Ecclesia tunc non erat diffusa, nisi per magnam orbis partem. Ergo.

PROPOSITIO QUINTA.

Necesse est ut vera Ecclesia cæteras societates Christianas diffusionem suam vincat.

Prob. Ut certissimum illud admitti debet quod ex Scriptura sacra et ex sanctis Patribus constat : atqui ex Scriptura sacra, etc.

1^o *Ex Scriptura sacra.* In textibus enim allatis, Ecclesia

prænuntiatur ut *mons magnus implens universam terram, ut a mari ad mare, ab ortu solis usque ad occasum, vel usque ad extremum terræ* dominaturā, ut in omni loco existens, etc. Porro talis figura alium excludit montem majorem vel æqualem, terram pariter implentem, aliam societatem similem, ubique pariter dominantem. Certe immerito dictum fuisset imperium Romanum totum occupare mundum, si aliud simul exstitisset regnum notum majus vel æquale. Ergo 1°.

2° *Ex sanctis Patribus.* Unanimiter enim sancti Patres assignant catholicitatem velut characterem veræ Ecclesiæ distinctivum, ut videre est in testimoniis eorum supra citatis et in multis aliis quæ citari possent, v. g. S. Cyrilli Hierosol. Cat. 18 : « Catholica Ecclesia; hoc » enim proprium est nomen sanctæ matris omnium » nostrum, quæ est sponsa Domini nostri; » S. Paciani, Epist. 1 ad Sympronianum Donatistam : « Christianus » mihi nomen est; Catholicus vero cognomen. » Antea in eadem epistola dixerat : « Catholicum istud nec Marcio- » nem, nec Apellem, nec Montanum sonat, nec hære- » ticos sumit auctores. » At sancti Patres catholicitatem velut proprium veræ Ecclesiæ characterem non assignassent, si eam universalitate sua cæteras societates Christianas necessario vincere non credidissent. Ergo.

PROPOSITIO SEXTA.

Catholicitas est nota veræ Ecclesiæ positiva.

Prob. Est enim *nota positiva*, si tres habeat conditiones ad rationem *notæ positivæ* requisitas : atqui tres illas habet conditiones. 1° Notior est ipsa Ecclesia; nihil enim facilius est quam noscere quænam societas Christiana magis sit diffusa. 2° Cognitu est facilis, *ut patet.* 3° Soli veræ Ecclesiæ convenire potest : *id ex præcedenti propositione constat.* Ergo.

§ IV. — De Apostolicitate Ecclesiæ.

Illa Ecclesia dicitur Apostolica quæ ab Apostolis ori-

ginem ducit; id est, doctrinam eorum profitetur integram, et habet ministerium ab eis legitima successione derivatum. Duplex igitur est Apostolicitas: una scilicet doctrinæ, et altera ministerii. De utraque per sequentes propositiones dicemus.

PROPOSITIO PRIMA.

Vera Christi Ecclesia debet esse Apostolica ratione doctrinæ.

Prob. Vera Ecclesia puram Christi doctrinam profiteri debet, ut omnes fatentur: atqui puram Christi doctrinam profiteri non potest quin sit Apostolica ratione doctrinæ; Apostolis enim Christus dixit: *Docete omnes gentes... servare quaecumque mandavi vobis*, Matth. xxviii, 20. Apostoli doctrinam Christi discipulis suis commiserunt tanquam depositum fideliter custodiendum: hi autem depositum acceptum suis successoribus transmittere debuerunt absque ulla vocum novitate, I Tim. vi, 20. Ergo.

Hanc propositionem admittunt protestantes, qui contendunt Ecclesiam Romanam esse deserendam, quia in pluribus a doctrina Apostolorum defecit.

Quæritur utrum Apostolicitas doctrinæ sit *nota Ecclesiæ positiva*?

R. 1°. Juxta multos, Apostolicitas doctrinæ per argumentum præscriptionis probata, est *nota Ecclesiæ positiva* saltem pro doctis; est enim character veræ Ecclesiæ essentialis, *ut jam diximus*: ut igitur sit *nota positiva*, sufficit quod sit notior Ecclesia, omnibus obvia et veræ Ecclesiæ propria: atqui talis est Apostolicitas doctrinæ, per argumentum præscriptionis probata.

1° *Est notior Ecclesia.* Longe enim facilius est cognoscere in quam societate ab Apostolorum tempore usque ad nos nullum reperiatur mutationis vestigium, quam detegere via examinis quænam societas integram religionem a Christo institutam profiteatur. Ergo 1°.

2° *Est omnibus obvia.* Facile enim constare potest nullum existere mutationis vestigium in societate quoad doc-

trinam, nempe legendo attente historiam Ecclesiasticam, et audiendo pastores illam manifestantes. Omnes sectæ a vera Ecclesia separatæ quemdam ferunt in fronte novitatis characterem quo facile discernuntur; contra vero, in doctrina veræ Ecclesiæ, mira semper conspicitur immutabilitas. Ergo 2º.

3º *Veræ Ecclesiæ est propria.* Christus enim unicam tradidit doctrinam, quæ integra in falsa ecclesia inveniri non potest. Ergo.

R. 2º. Plurimi tamen contendunt Apostolicitatem doctrinæ non esse notam veræ Ecclesiæ propriam : nam, inquit, existere potest societas schismatica quæ doctrinam ab Apostolis acceptam retineat integram, et solummodo communionem cum legitimis pastoribus fregerit : sed talis societas intra limites schismatis non diu sisteret ; ubi enim vincula unionis cum legitimis pastoribus soluta sunt, auctoritas eorum mox in dubium revocatur.

PROPOSITIO SECUNDA.

Vera Christi Ecclesia debet esse Apostolica ratione ministerii.

Notandum, duas requiri conditiones ut ministerium pastorale sit Apostolicum, scilicet, 1º successionem ab Apostolis non interruptam, 2º legitimam missionem, quæ etiam consecrationem importat; alibi enim probatur ordinationem ad validitatem sacramentorum necessariam esse. His præmissis,

Probatur propositio Scriptura sacra, testimoniis Patrum et ratione.

1º *Scriptura sacra.* Matth. xxviii, 18 : *Data est mihi omnis potestas in cælo et in terra : euntes ergo, docete omnes gentes... Ecce ego vobiscum sum omnibus diebus usque ad consummationem sæculi*; et apud S. Joan. xx, 21 : *Sicut misit me Pater, et ego mitto vos.* Unde sic : Christus mittit Apostolos ad prædicandum Evangelium, et promittit se cum illis docentibus adfuturum esse usque ad consum-

mationem sæculi : ergo successores sine interruptione habere debent.

Eph. iv, 11 : *Ipse dedit quosdam quidem apostolos... alios autem pastores et doctores in opus ministerii...* Pastores igitur venire debent a Christo : at semper debent esse pastores in opus ministerii : ergo.

Hebr. v, 4 : *Nec quisquam sumit sibi honorem, sed qui vocatur a Deo tanquam Aaron ; sic et Christus non semetipsum clarificavit, ut pontifex fieret...* In veteri Lege nullus poterat esse sacerdos aut levita nisi secundum ordinem a Deo præscriptum ; ipse Christus non potuit esse pontifex nisi a Deo vocatus : ergo a fortiori nulli possunt esse legitimi pastores in Ecclesia, nisi secundum ordinem a Christo institutum et per Apostolos transmissum. Ergo.

Apostoli, verbis Domini innixi, passim instituebant episcopos qui sua vice alios præficerent episcopos et presbyteros. Sic Paulus et Barnabas per singulas ecclesias constituiebant presbyteros, Act. xiv, 22. Idem B. Paulus ordinaverat Timotheum, illi tradebat regulas ad alios ordinandos, I Tim. v, 22 ; Titum reliquerat Cretæ ut presbyteros constitueret, Tit. i, 5. Ergo 1°.

2° *Testimoniis SS. Patrum.* Tert. l. de Præscrip. c. 32, sectas suo tempore existentes invicte debellat ex Apostolicitatis ministerii privatione : « Illis, inquit, possumus » dicere : Edant ergo origines ecclesiarum suarum ; evolvant ordinem episcoporum suorum, ita per successiones ab initio decurrentem, ut primus ille episcopus » aliquem ex Apostolis vel Apostolicis viris, qui tamen » cum Apostolis perseveraverit, habuerit auctorem et » antecessorem. » Ergo a solis Apostolis vel ab Apostolicis viris legitima derivatur missio pastorum.

S. Irenæus, contra Hæreses, l. 3, c. 3, n. 2 : « Per successionem episcoporum usque ad nos pervenientes, » confundimus eos omnes qui quoquo modo præterquam » oportet colligunt. »

S. Cyprianus, Epist. ad Magnum, de rebaptizandis Novatianis, ait : « Novatianus in Ecclesia non est, nec

» episcopus computari potest, qui, Evangelica et Apostolica traditione contempta, nemini succedens, a seipso ortus est; habere namque aut tenere Ecclesiam nullo modo potest, qui ordinatus in Ecclesia non est. »

S. Optatus, lib. 2 contra Parmenianum, sic probat episcopos Donatistarum legitimos non esse pastores : « Vestrae cathedrae vos originem reddite, qui vobis vultis sanctam Ecclesiam vindicare. »

S. Aug. de Baptismo contra Donatistas, lib. 3, cap. 2 : « Unde Donatus apparuit? de qua terra germinavit? de quo mari emersit? de quo cœlo cecidit? » Ergo quicumque suam originem per legitimam successionem ab Apostolis non ducunt, veri pastores esse nequeunt. Ergo.

3^o *Ratione*. In ordine civili nemo potest legitime aliquod exercere officium, nisi illud mediate vel immediate suscipiat a rege, vel ab eis quibus suprema conceditur auctoritas : ergo *a fortiori* in ordine ecclesiastico nullus officium pastoris suscipere potest, nisi ad illud legitime fuerit vocatus, scilicet, ab eis quibus suprema spiritualis potestas fuit concessa : atqui solis Apostolis eorumque successoribus legitimis suprema spiritualis potestas fuit concessa ; solis enim Apostolis Christus dixit : *Sicut misit me Pater, et ego mitto vos*, Joan. xx, 21. Ergo.

Hinc sequitur, 1^o eos qui seipsos constituunt pastores, vel institutionem accipiunt ab eis qui legitimam non habent missionem ab Apostolis descendente, legitimos non esse pastores, sed *intrusos* et schismaticos ; 2^o legitimos non esse pastores in pluribus societatibus a se invicem communione sejunctis, quia Christus missiones sibi contradictorias non dedit ; 3^o ministros extraordinarie a Deo suscitatos aut non futuros esse pastores, sed nuntios vel prædicatores sicut olim Prophetas, aut ministerio pastorum non derogaturos ; quia Christus, ministerii ordinarii et perpetui auctor, *ut vidimus*, sibi contradicere non potest : qui autem ut ministros extraordinarios se exhiberent, missionem suam signis evidenter divinis probare tenerentur, alioquin nulla fides ipsis deberetur.

Quæritur utrum Apostolicitas ministerii sit nota Ecclesiæ positiva ?

R. Adæquate sumpta, id est, unita Apostolicitati doctrinæ, et quatenus eadem est societas quam fundarunt Apostoli, est *nota positiva*. 1° Enim notior est ipsa Ecclesia, quia est factum publicum : facilius est autem huiusmodi factum cognoscere quam examine privato singula dogmata et præcepta discutere. 2° Cognitu est facilis. Verba enim Christi, Symbolum fidei apud omnes receptum et ipsamet ratio clarissime dictant veram Ecclesiam eandem nunc esse debere quam fundarunt Apostoli : aliunde non difficile est judicare quænam ex societatibus Christianis per seriem ministrorum non interruptam usque ad Apostolos ascendat. 3° Veræ Ecclesiæ est propria. Si absolute enim fieri possit ut societas spuria doctrinam Christi conservet, saltem impossibile est societatem in qua doctrina Christi integra et ministerium ab Apostolis per legitimam successionem descendens reperiuntur, non esse veram Ecclesiam. Ergo.

CAPUT TERTIUM.

DE NOTARUM VERÆ ECCLESIE APPLICATIONE.

Probavimus veram Ecclesiam debere esse unam, sanctam, catholicam et Apostolicam. Quæcumque igitur societas Christiana aliqua ex illis *notis* est destituta, vera non est Ecclesia ; dum, e contra, societas quæ quatuor illis *notis* est donata, certissime vera est Ecclesia. Nunc itaque nobis investigandum est quænam societas Christiana his *notis* gaudeat.

Certum est sectas præteritas aut fere extinctas, v. g. Arianorum, Pelagianorum, Nestorianorum, Eutychianorum, etc. veram non fuisse Ecclesiam ; nam vera Ecclesia perire non potest, et semper debet esse eminenter visibilis.

Præcipuæ autem societates Christianæ nunc existentes sunt protestantes, Ecclesia Græca et Ecclesia Romana : itaque examinandum est in sequentibus articulis quænam ex illis vera sit Ecclesia.

ARTICULUS PRIMUS.

UTRUM SOCIETAS PROTESTANTIUM VERA SIT CHRISTI ECCLESIA.

Cum edictum conventus Spirensis, anni 1529, Lutheranis displiceret, solemniter contra illud per scriptum protestati sunt, dicentes se ad concilium generale appellare. Hinc dicti sunt *protestantes*. Calvinistæ, quia ex prima reformatione ortum duxerunt, eodem nomine donati sunt; versus annum 1560, cœperunt etiam vocari in Gallia *Huguenots*, cujus nominis clara etymologia non assignatur. Aliæ sectæ, ex Lutheranis et Calvinistis in tanto numero exortæ, ut cardinalis Hosius, anno 1579 vita functus, ducentas et septuaginta jam computaret, communi denominatione appellantur *protestantes*. Hoc generali nomine gloriuntur, et contendunt se pertinere ad veram Ecclesiam, quæ ex variis sectis coalescit. De his ergo collective sumptis merito loquentes, in sequentibus propositionibus demonstraturi sumus eas characteres veræ Ecclesiæ essentielles non habere.

PROPOSITIO PRIMA.

Protestantes non habent unitatem veræ Ecclesiæ Christi essentialem.

Prob. Vera Ecclesia necessario habere debet unitatem doctrinæ, unitatem regiminis et unitatem juris : atqui protestantes hanc triplicem non habent unitatem.

1^o *Non unitatem doctrinæ.* Variæ enim numerantur inter eos fidei confessiones, in punctis gravissimi momenti dissimiles, scilicet Augustana, a Melanchtone edita, quam alii admittunt et alii rejiciunt; Saxonica, Vittember-

gensis, Argentinensis, Belgica, plures Helveticæ, duæ Anglicæ, duæ Scoticæ, Genevensis aliæque non paucae. Apocalypsim et Epistolam ad Hebræos admittunt Calvinistæ, hos libros rejiciunt Lutherani; item credunt Lutherani Christum esse realiter præsentem in Eucharistia, hoc dogma negant Calvinistæ; et sic in multis aliis. Sæpe etiam in sua doctrina sententiam mutaverunt, ut unusquisque videre potest in eximio opere jam citato, *Histoire des variations*, a principio usque ad finem; ab illo tempore multiplices novas mutationes admiservunt, et magis ac magis a se discrepant in credendo, *ut supra ostendimus*. Ergo 1°.

2° *Non unitatem regiminis*. Singulæ enim sectæ suum regimen habent: Calvinistæ nec episcopos, nec proprie sacerdotes agnoscunt; Lutherani hos et illos retinent; Angli regem vel etiam reginam caput Ecclesiæ faciunt, et plenitudinem potestatis ecclesiasticæ illi tribuunt; quidam ex illis admittunt presbyteros et episcopos, alii solos presbyteros; alii nullam hierarchiam agnoscunt, etc. Ergo. 2°.

3° *Non habent unitatem juris*, nec quoad doctrinam, cum examen privatum, palmare eorum principium, sectas e contra in infinitum multiplicare debeat, *ut monstravimus*: nec quoad regimen; qua enim ratione a regimine Ecclesiæ Romanæ se separaverunt, a se invicem se separare possunt: hinc innumeræ natæ sunt sectæ, tam regimine quam doctrina diversæ. Ergo 3°, etc. Ergo.

PROPOSITIO SECUNDA.

Protestantes non habent sanctitatem veræ Ecclesiæ Christi essentialem.

Prob. Illa societas merito judicatur non sancta, cujus doctrina non est sancta, morum principia non ducunt ad sanctitatem et auctores non sunt sancti: atqui doctrina protestantium non est sancta, principia morum apud eos accepta non ducunt ad sanctitatem, et eorum auctores non fuerunt sancti.

1° *Eorum doctrina non est sancta.* Nam doctrina falsa non potest esse sancta : atqui doctrina protestantium multis in punctis est falsa, cum in multis sibi contradicant : ergo 1°.

2° *Morum principia apud eos recepta non ducunt ad sanctitatem.* Tenent enim protestantes justitiam in electis amitti non posse, cum criminibus horrendis esse compatibilem, bona opera ad salutem non esse necessaria, sola incredulitate hominem damnari posse ; dicunt leges, sive ecclesiasticas, sive civiles, conscientiam non ligare ; affirmat Calvinus hominem a Deo necessitari ad peccatum : illa morum principia, nedum ad sanctitatem ducant, latissimam aperiunt viam cunctis cupiditatibus. Vide *l'Histoire des variations*, l. 14, n. 38 et seq. Ergo 2°.

3° *Primi reformatores non fuerunt sancti.* Præcipui enim protestantium auctores fuerunt Lutherus, Carlostadt, Zuingle, Calvinus, Theodorus de Bèze, Melanchton, Æcolampadius, Ochin, etc. qui fere omnes erant sacerdotes aut monachi apostatæ, superbia tumentes, se invicem conviciis impetentes, regulas abstinentiæ et jejunii subvertentes, legem cælibatus contemnentes, scandalosa et sacrilega matrimonia celebrantes, etc. Porro tales auctores haberi non possunt ut sancti ; et revera, si audiantur testimonia quæ alii de aliis in scriptis suis reddiderunt, ut sanctos se invicem non æstimarunt. Vide solidum opus Gallicum dictum *Discussion amicale*, t. 1. Ergo 3°, etc. aliunde, etc. Ergo.

Et vero, sanctitas alicujus societatis præcipue per miracula demonstratur : atqui protestantes nulla in sui gratiam afferunt miracula apud ipsos peracta ; miracula enim in sinu Ecclesiæ Romanæ patrata, antequam ab illa separarentur, in gratiam sui vindicare nequeunt, siquidem corpus distinctum tunc non constituebant. Ergo.

PROPOSITIO TERTIA.

Protestantes non habent catholicitatem veræ Ecclesiæ promissam.

Prob. Duplici modo vera Ecclesia debet esse catholica, ex dictis, videlicet ratione temporum et ratione locorum : atqui 1º protestantes non habent catholicitatem *ratione temporum*; manifestum est enim eos non exstitisse ante initium decimi sexti sæculi, quo tempore Lutherus, Calvinus aliique novatores adversus Ecclesiam insurrexerunt, dogmata sua divulgare cœperunt, prout ipsis placebat, omne jugum auctoritatis excusserunt, nulli Ecclesiæ tunc existenti adhæserunt, sed novas societates secundum regulas arbitrarias vel potius absque regulis instituerunt.

Hæc protestantium origo omnibus notissima, a nemine in dubium revocari potest; frustra eorum defensores insudaverunt ut illis invenirent antecessores; assignaverunt Hussitas, Wiclefitas, Valdenses, Albigenses, Berengarios, Manichæos, etc. At impuræ illæ sectæ nec eandem tenebant doctrinam, nec immediate sibi successerunt, nec nobiliorem habuerunt originem, nec legitimum acceperunt ministerium, nec proinde illud transmittere potuerunt. Vide *Bossuet, Hist. des variations*, lib. 11 et præsertim n. 207 ejusdem libri. Ergo 1º constat protestantes non habere catholicitatem ratione temporum.

2º Nec eam habent *ratione locorum*. Ad hoc enim requireretur ut eorum societas per magnam orbis partem extenderetur, cæterasque societates Christianas diffusionem vinceret : atqui protestantes talem non habent præstantiam super alias societates Christianas, nec eam ausi sunt sibi etiam collective sumptis tribuere; systema articulorum fundamentalium et non fundamentalium excogitaverunt, et Catholicos, Græcos aliasque sectas Orientales sibi adjunxerunt, ut catholicitatem Ecclesiæ Christi necessariam invenirent.

Porro talis societatum diversarum aggregatio veram

Ecclesiam constituere non potest, *ut probavimus*; imo, cum unitas non minus sit essentialis Ecclesiæ Christi quam catholicitas, requireretur ut una societas protestantium hanc universitatem obtineret: porro nulla ex societatibus protestantium tale privilegium sibi arrogare potest, cum omnes simul spectatæ illud non habeant: ergo 2º, et aliunde, etc. Ergo.

PROPOSITIO QUARTA.

Protestantes Apostolicitatem Ecclesiæ Christi essentialem non habent.

Prob. 1º. Non Apostolicitatem doctrinæ. Nam 1º multa sibi contradictoria docent, proindeque falsa; Apostoli autem non docuerunt falsa. 2º Multos renovant errores jam pluries in antiquis hæreticis et schismaticis proscrip-tos, v. g. vanam esse orationem pro defunctis, nullam admittendam distinctionem inter presbyteratum et episcopatum; imagines venerari, sanctos orare, sacram Eucharistiam adorare non licere, etc. 3º Nulla ratione ostendere possunt se doctrinam quam docent integram accepisse ab aliqua societate ante eos existente, cum e contra constet eos plures sumpsisse articulos ex diversis antiquis sectis, alios excogitavisse, mutavisse, reformavisse, etc. Porro absurdum est dicere, talem doctrinam esse Apostolicam: ergo 1º.

2º *Non habent Apostolicitatem ministerii.* Hanc enim Apostolicitatem sibi attribuere nequeunt, nisi habeant pastores legitima successione per seriem non interruptam ab Apostolis descendentes: atqui hujusmodi seriem pastorum sibi vindicare non possunt; tunc enim eorum fundatores missionem suam accepissent ab Ecclesia Romana, vel ab alia secta: atqui neutrum dici potest: 1º non ab Ecclesia Romana, quæ eos e sinu suo rejecit et anathematizavit; 2º non ab alia secta, siquidem nulli sectæ tunc existenti adhæserunt: ergo non habent pas-

tores qui legitima successione ab Apostolis descendant. Ergo 2°.

Solvuntur objectiones.

Obj. 1° cum *D. Claude*, *Défense de la Réf.* 4^a part. et *Jurieu*, *Vrai système de l'Eglise*, liv. 3, c. 1 et 20. Sola electio populi essentialis est ad constituendos legitimos ministros : ergo non necesse est ut primi reformatores missionem ab Ecclesia Romana aut ab altera secta acceperint.

R. Nego antecedens. Illud enim systema admitti non potest quod nullo nititur fundamento, Scripturæ sacræ et constanti traditioni adversatur : atqui systema *Claude* et *Jurieu* his vitiis laborat.

1° *Nullo nititur fundamento.* Illi namque celebres Reformationis ministri hoc unico nituntur fundamento, scilicet, omnem societatem habere jus sibi constituendi ministros. 1° Illud principium minime est certum; est enim famosissimum de suprema auctoritate populi principium, contra quod tot sunt homines et rationes. 2° Etiam si societas haberet jus sibi constituendi gubernatores in rebus civilibus, non inde sequeretur Ecclesiam legitimos sibi constituere posse ministros; Ecclesia enim non elegit Christum, sed Christus eam elegit, instituit et formavit, semper est ipsius auctor et moderator; illam regit et gubernat per ministros, qui metaphorice dicuntur pastores, quia populum pascunt : non sunt ergo præcise ministri Ecclesiæ, sed ministri Christi in Ecclesia et pro Ecclesia : at repugnat populum hujusmodi ministros constituere posse; apprime enim intelligimus eos instituendos esse secundum ordinem a Christo statutum, sicut ministri regis a rege vel juxta ordinem a rege determinatum eligi debent, et non aliter. Ergo, etc. 3° Necesse foret ut aliquis proferretur Scripturæ textus quo expresse declararetur solam populi electionem ad constituendos ministros essentialem esse; nam protestantes nihil admittere volunt nisi quod est in Scriptura sacra : atqui nullus profertur hujusmodi Scripturæ textus : ergo 1°.

2° *Illud systema Scripturæ adversatur.* Nam ubi de constituendis ministris agitur, manus ab Apostolis aut ab eorum successoribus semper illis imponuntur. Fideles concurrerunt quidem ad electionem septem primorum diaconorum; sed Apostoli, impositis illis manibus, constituerunt eos super opus viduarum, Act. vi. Mathias per sortem cum oratione fuit designatus, non vero a populo electus, ut *Claude* male affirmat. Alia jam memora-
vimus facta quibus ex Scriptura constat populum ministros sibi non constituere. Ergo 2°.

3° *Traditioni adversatur.* Constanti enim traditione patet ministros Ecclesiæ nunquam, ante Calvinistas, constitutos fuisse sine ordinatione ab episcopo collata, ut videre est apud Patres et in toto historiæ ecclesiasticæ decursu. Facta hujusmodi adeo sunt clara, ut protestantes ea negare nequeant : ergo 3°, etc. aliunde, etc. Ergo.

Obj. 2°. Primi reformatores missionem substantialiter legitimam acceperant apud catholicos, et extraordinarie a Deo suscitati sunt, ut Ecclesiam multis erroribus fœdatam in pristinum statum restituerent : ergo habuerunt missionem partim ordinariam, partim extraordinariam. Ita jam citati *Claude* et *Jurieu*.

R. 1°. Nihil magis idoneum est ad falsitatem systematis adversariorum cunctis oculis patefaciendam, quam perpetua quæ inter eos conspicitur fluctuatio et incertitudo. Modo dicunt solam populi electionem esse necessariam et primos reformatores sic legitime constitutos fuisse; modo ordinariam in eis requirunt missionem, modo extraordinariam, modo utramque simul affirmant, negant, admittunt, rejiciunt, et nullam proferunt rationem firmam qua singulares opiniones suas fulciant. Ergo.

R. 2°. *Nego conseq. et dico,* primos reformatores neque ordinariam neque extraordinariam habuisse missionem. 1° *Non ordinariam.* Nam si Ecclesia Romana ordinariam illis contulisset missionem, eam ipsis auferre potuisset, et de facto abstulisset, siquidem illos indignanter rejecit et anathemate percussit. 2° *Non extraordinariam.* Non sufficit

enim dicere tales aut tales homines extraordinarie a Deo missos fuisse, alioquin latissima cunctis impostoribus aperiretur via; sed requiritur ut talis missio signis evidenter divinis manifestetur: atqui nulla hujusmodi signa subministrant protestantes, ut extraordinariam missionem primorum reformatorum demonstrent. Singulares quidem eorum qualitates allegat D. *Claude*, scilicet fortitudinem, audaciam, amorem studii, eruditionem, artem persuadendi et populos ad reformationem adducendi: at quis impostor, sufficienti audacia præditus, similia argumenta missionis suæ exhibere non posset? Ergo. Vide *Nicole, les Préjugés légitimes*, etc. c. 5 et 6.

PROPOSITIO QUINTA.

Protestantes vere sunt schismatici.

Prob. Nam 1º vel sunt schismatici, vel sunt vera Ecclesia: atqui non sunt vera Ecclesia; si enim unica ex *notis* positive requisitis carerent, eo ipso pronuntiandum foret illos veram non constituere Ecclesiam: atqui, *ex probatis*, non unica, sed omnibus *notis* ad veram Ecclesiam requisitis carent: ergo.

2º Schisma præcipue locum habet quando solvitur vinculum subjectionis pastoribus legitimis: atqui vinculum subjectionis pastoribus legitimis solverunt protestantes, siquidem novum et illegitimum sibi constituerunt ministerium.

3º Qui a vera Ecclesia separantur, eo ipso fiunt schismatici: atqui protestantes a vera Ecclesia separati sunt; nam, ipsis fatentibus, vera Ecclesia et legitimum ejus ministerium erant in Ecclesia Romana tempore Lutheri et Calvinii. Vel ergo illam reliquerunt, vel secum asportaverunt, ut ait minister *Claude* in colloquio cum *Bossuet* et posterius admitti non potest; omnes enim hæretici pariter dicere possent se a vera Ecclesia non recessisse, sed eam secum asportasse. Aliunde, fatentur Calvinistæ Ecclesiam Romanam adhuc continere ea quæ ad salutem

sunt necessaria, scilicet ministerium substantialiter legitimum, doctrinam veram quoad substantiam; admittunt Lutheranos, Anglos, Sacramentarios, Græcos, etc. ad veram Ecclesiam pertinere: atqui omnes illæ sectæ in multis sibi oppositæ, veram Ecclesiam secum asportare non potuerunt: ergo absurda est illa responsio. Restat ut protestantes a vera Ecclesia se separaverint: ergo vere sunt schismatici. Plures aliæ et evidentes afferri possent rationes ad eandem veritatem confirmandam. Vide opus D. Nicole, *les Prétendus Réformés convaincus de schisme*, c. 1, 2, 3, et alterum jam citatum, *les Préjugés légitimes*, etc. c. 7, 8 et 9.

Solvuntur objectiones.

Obj. 1°. Protestantes non sunt schismatici, si legitimam habuerint causam ab Ecclesia Romana se separandi: atqui legitimam habuerunt causam, etc. ergo.

R. Nego min. Nam in societate Romana tunc erat vera Christi Ecclesia, ut ipsi fatentur: atqui nulla existere potest causa legitima a vera Ecclesia se separandi et vinculum unitatis frangendi; Ecclesia quippe Christi essentialiter una est, *ut probavimus*, et extra illam nulla est salus: unde S. Aug. l. 2 contra epist. Parmeniani, c. 11, dicit: « Præscindendæ unitatis nulla est justa necessitas. » Ergo.

Inst. Tempore reformationis, Ecclesia Romana plena erat corruptela, erroribus et idololatria: ergo non solum licitum, sed necesse erat ab illa recedere. Ita Claude et Jurieu.

R. 1°. *Nego ant.* Alibi enim probabimus doctrinam Ecclesiæ Romanæ semper fuisse puram, sanctam et ab omni erroris labe alienam; non negamus tamen frequentem exstitisse morum corruptelam in ipsius membris, et usque in sanctuario: at nunquam Ecclesia hanc morum corruptelam docuit aut approbavit; illam e contra semper condemnavit, reprobavit et prohibuit. Ergo.

R. 2º. Nego conseq. Nam 1º ante omnia necesse fuisset ut errores et abusus definiti, condemnati et proscripti fuissent per legitimum iudicium : atqui res non ita evenit; sed quidam monachi apostatæ et nonnulli sacerdotes superbia tumentes, ambitiosi, omnis jugi impatientes, et cum eis opifices, rustici, mulieres, pueri, etc. conclamarunt Ecclesiam Romanam esse collapsam, ideoque reformandam; statim prædicaverunt audacter virginitatem esse chimæram, cælibatum contra naturam, vota castitatis nulla, matrimonium licitum religionis, monialibus et sacerdotibus, leges abstinentiæ et jejunii injustas et tyrannicas, confessionem auricularem superstitionem, solam fidem justificare, bona opera ad salutem non necessaria, etc. Quis autem, a præjudiciis expeditus, bona fide existimabit tale iudicium esse legitimum, et iudicio papæ, cardinalium, episcoporum, abbatum, doctorum totiusque Ecclesiæ Romanæ anteponendum?

2º. Vel Ecclesia Romana desierat esse vera Christi Ecclesia, vel non : si prius, frustra protestantes ab illa se separaverunt, veram Christi Ecclesiam de novo instaurare non potuerunt; sicut enim membrum a corpore mortuo separatum reviviscere nequit, ita nec membra ab Ecclesia mortua sejuncta, nisi societati viventi adhæreant : atqui protestantes, ab Ecclesia Romana exeuntes, aliæ societati viventi non adhæserunt : ergo. Si posterius, id est, si Ecclesia Romana vera adhuc erat Ecclesia, ab ea protestantes se separare non potuerant, sub prætextu quod errores et abusus in ea prævaluissent : potius expectandum erat ut Deus opus suum reformaret, si reformatione indigeret. Quamvis Judæi sæpe in gravissima prolapsi sint peccata, in errores et in idololatriam, nunquam ab eorum communione sejuncti sunt Prophetæ et sanctissimi viri tunc existentes; nunquam arbitrati sunt se habere potestatem reformandi ministerium et novam instituendi societatem religiosam. Protestantium societates communionem inter se conservant, licet habeant confessiones fidei valde diversas; Calvinistæ communicant cum Lutheranis quos habent ut idololatrias;

dicunt se vinculum unitatis cum societatibus Orientalibus semper servasse : at illæ societates credunt omnia dogmata quæ a protestantibus nobis exprobrantur, scilicet præsentiam realem, invocationem sanctorum, cultum imaginum, etc. Non ex persuasione igitur, sed ex invidia ab Ecclesia Romana se separaverunt, et nullis principiis a schismatis reatu se defendere possunt.

Inst. 2°. Non seipsos ab Ecclesia Romana separaverunt, sed ab illa fuerunt excommunicati et rejecti : ergo separatio ista ipsis imputari non potest.

R. 1°. Altare contra altare jam erexerant antequam excommunicarentur; Lutherus enim cœperat nova dogmata prædicare anno 1517; Leo X pluries eum admonuit; sed videns se nihil proficere, illum contumacem excommunicavit anno 1520. Concilium Tridentinum, quod anno 1545 celebrari incœpit, plurima decrevit quidem anathemata contra omnes protestantes; sed diversas jam formaverant sectas ab Ecclesia Romana separatas; tandem in sinu Ecclesiæ non remansissent, etiamsi ab illa excommunicati non fuissent, ut confessus est *Claude*, in colloquio cum *Bossuet* : ergo sub illo prætextu se excusare nequeunt.

R. 2°. *Nego conseq.* Nam 1° eadem ratione Ariani aliique hæretici a schismatis crimine se purgare potuissent, dicendo se excommunicatos fuisse, et separationem ab Ecclesia Romana ipsis imputandam non esse; non excommunicantur enim nisi rebelles : ergo eorum separatio ipsis imputanda est. 3° Etiamsi per errorem aut abusum quidam excommunicarentur innocentes, non idcirco jus haberent privatas instituendi ecclesias, sed hanc injuriam patientissime pro Ecclesiæ pace sufferre deberent, ait S. Aug. de vera Religione, n. 11, *neque ullas novitates schismatis vel hæresis moliri*, et sic coronam in occulto a Patre cœlesti mererentur accipere : unde iterum, *præscindendæ unitatis nulla est justa necessitas*. Ergo.

PROPOSITIO SEXTA.

Non tantum schismatici, sed hæretici sunt protestantes.

Prob. Illi enim sunt hæretici qui dogmata revelata pertinaciter negant, vel nova admittunt ut revelata quæ revelata non sunt : atqui protestantes plurima rejiciunt dogmata revelata, vel nova admittunt ut revelata quæ, etc. siquidem in multis sibi contradicunt. Insuper societas protestantium non est Ecclesia, *ut probavimus* : ergo necesse est ut altera existat societas Christiana quæ sit vera Ecclesia : atqui nulla est societas Christiana quæ eandem profiteatur doctrinam ac protestantes : ergo protestantes sunt hæretici.

ARTICULUS SECUNDUS.

UTRUM ECCLESIA GRÆCA SIT VERA ECCLESIA.

Per ecclesiam Græcam illæ intelliguntur ecclesiæ Orientales quæ schismati a Photio incœpto, versus finem noni sæculi, et a Michaelæ Cerulario in medio undecimi sæculi consummato, adhæserunt. Dispersæ sunt in regionibus olim imperio Græco seu Constantinopolitano subjectis, et in Moscovia seu Russia. Quatuor agnoscunt patriarchas, scilicet Constantinopolitanum, Alexandrinum, Antiochenum et Jerosolymitanum. Ecclesia Constantinopolitana Moscovitas ad fidem adduxerat ante schisma, et aliquam in eos semper servaverat auctoritatem usque ad decimum septimum sæculum. Moscovitæ habebant patriarcham in urbe *Novogorod*, qui confirmatione patriarchæ Constantinopolitani indigebat. Hæc confirmationis necessitas primo suppressa est; deinde Petrus Magnus, initio decimi octavi sæculi, dignitatem patriarchalem abolevit, et quamdam synodum ecclesiasticam ab ipso pendentem instituit, ad omnes causas spirituales definiendas. *Quibus notatis, sit unica*

PROPOSITIO.

Ecclesia Græca non est vera Christi Ecclesia.

Prob. Societas quæ vel una caret *nota* ad veram Ecclesiam requisita, dici non potest vera Ecclesia : atqui ecclesia Græca non una tantum, sed pluribus certe et probabiliter omnibus caret *notis* veræ Ecclesiæ necessariis.

1º *Non habet unitatem requisitam.* Hæc enim unitas est doctrinæ, regiminis et juris : verum hanc triplicem unitatem non habet ecclesia Græca. 1º *Non unitatem doctrinæ* ; nam archiepiscopus Zwer, anno 1805 vita functus, in opere Latino auctoritate sacræ synodi edito, testatur plurimos ex clero Græco in Russia ad disciplinam Calvinianam inclinare ; vocat Calvinum magnum virum, libros Calvinistarum laudat, auctoritatem eorum in testimonium fidei Moscovitarum invocat. Alia ejus generis testimonia legi possunt apud D. de Maistre, *du Pape*, t. 2. Præterea, ecclesia Græca plurimis in punctis doctrinam suam mutavit : sic olim primatum summi Pontificis admittebat, Spiritum sanctum a Filio procedere credebat, *ut alibi probatur* ; nunc autem hæc dogmata rejicit : non habet igitur unitatem doctrinæ perpetuam, quod tamen necessarium esset. Ergo 1º.

2º *Non habet unitatem ministerii.* Nam quatuor patriarchæ a se invicem sunt independentes, et præsertim ecclesia Moscovitarum ab aliis ecclesiis minime pendet : ergo dici non potest ecclesiam Græcam collectivè sumptam, esse unam sicut ovile sub uno pastore, regnum sub uno rege, domum sub uno patrefamilias, etc. Aliunde, unitas ministerii debet esse perpetua : atqui ecclesia Græca talem unitatem sibi vindicare non potest ; certum est enim illam tempore Photii et Michaelis Cerularii ab Ecclesia Romana discessisse, et quidem sine legitima causa, cum Græci non postulaverint a catholicis ut aliquid in fide aut in disciplina sua mutarent, quando tentata est unio inter utramque ecclesiam. Ergo 2º.

3° *Multo minus habet unitatem juris.* Hæc enim unitas supponit auctoritatem supremam et infallibilem : atqui talis auctoritas alicujus patriarchæ, vel auctoritas concilii generalis : at neutrum dici potest. Non prius, cum patriarchæ sint independentes. Non magis posterius ; nam quis concilium generale convocare posset ? quis ei præesse deberet ? quis executionem illius premendi facultatem haberet ? Hodierni Græci contendunt, ait D. *de Maistre*, t. 2, septem tantum concilia generalia fuisse possible, quæ omnia ante ipsorum separationem fuerunt celebrata : ergo 3° etc. aliunde, etc. Ergo 1°.

II° *Probabiliter non habet sanctitatem veræ Ecclesiæ Christi essentialem.* Nam hæc sanctitas per miracula præsertim demonstranda est : atqui nullis miraculis demonstrare possent Græci se hanc habere sanctitatem. Cum enim a tempore separationis eorum vera existant miracula in Ecclesia Latina, *ut infra dicemus*, miracula Græcorum deberent esse numerosiora aut splendidiora, juxta regulam quam in tractatu de Vera Religione exposuimus : atqui nulla hujusmodi apud eos celebrantur miracula ab initio schismatis patrata. Insuper hæc sanctitas exterius non fuit manifestata in primis illius Ecclesiæ fundatoribus, nec in Photio, nec in Michaelæ Cerulario ; omnibus enim notum est lugendam hanc separationem causam habuisse immoderatam ambitionem patriarcharum, qui titulum patriarchæ œcumenici usurpabant. Nulli memorantur viri apud Græcos sanctitate et zelo conversionis animarum conspicui, qui sanctissimis viris nostris comparari possint. Ergo 3°.

III° *Non habet catholicitatem.* Catholicitas enim veræ Ecclesiæ Christi essentialis, est diffusio in magnam orbis partem, et præstantia supra omnes alias societates Christianas : atqui ecclesia Græca hanc certe non habet diffusionem per orbem, et præstantiam super Ecclesiam Romanam : ergo 3° non habet, etc.

IV° *Non habet Apostolicitatem veræ Ecclesiæ necessariam.* Illa enim ecclesia non habet Apostolicitatem veræ Ecclesiæ necessariam, quæ manifesta præ se fert muta-

tionis indicia : atqui ecclesia Græca manifesta præ se fert mutationis indicia ; negari enim non potest illam per multa sæcula Ecclesiæ Romanæ fuisse subjectam. Ab illa autem recessit, deinde bis utriusque ecclesiæ coadunatio fuit non solum tentata, sed conventa et perfecta, in concilio Lugdunensi secundo, anno 1274, et in concilio Florentino, anno 1438; et bis Græci ab hac unione iterum discesserunt. Certum est episcopum Byzantinum nullam olim suprematiam habuisse, et etiam ad patriarchalem dignitatem evectum, non nisi post tres Orientis patriarchas, nempe Antiochenum, Alexandrinum et Hierosolymitanum sedisse : ergo etc. Ergo 4^o, etc. aliunde, etc. Ergo ecclesia Græca non est vera Ecclesia, sed ad minus schismatica.

A fortiori aliæ sectæ Orientales, ut Nestoriani, Euty-chiani, Jacobitæ, Cophitæ, etc. non sunt vera Ecclesia. Nam ecclesia Græca singulis illis sectis multo præstat, et tamen non habet *notas* ad veram Ecclesiam requisitas. Ergo.

ARTICULUS TERTIUS.

UTRUM ECCLESIA ROMANA SIT VERA CHRISTI ECCLESIA.

Ex dictis jam concludi potest Ecclesiam Romanam esse veram Ecclesiam. Certum est enim veram Ecclesiam existere : probavimus autem præcipuas societates Christianas ab Ecclesia Romana separatas carere *notis* veræ Ecclesiæ necessariis : restat ergo ut Ecclesia Romana sit vera Ecclesia. Veruntamen, ad majorem veritatis illustrationem, et ad animos etiam rebelliores convincendos, ostensuri sumus per partes illam omnes *notas* veræ Ecclesiæ necessarias habere.

PROPOSITIO PRIMA,

Ecclesia Romana habet unitatem veræ Ecclesiæ necessariam.

Prob. Unitas veræ Ecclesiæ necessaria, est unitas doc-

trinæ, unitas regiminis et unitas juris : atqui Ecclesia Romana triplicem hanc unitatem habet.

1° *Unitatem doctrinæ.* Quicumque enim vel unum fidei articulum negat, eo ipso ab illa separatur, et velut hæreticus habetur : non datur locus examini vel disputationi ; docti et indocti eidem definitioni semel emissæ statim ex animo se submittere tenentur, sub pœna anathematis : ergo impossibile est unitatem fidei inter eos non servari. Ergo 1°.

2° *Habet unitatem regiminis.* Nam inter pastores ejus artissima existit communio, et quicumque eam frangit tanquam schismaticus e sinu ejus præciditur, et extra viam salutis errare putatur. Ergo 2°.

3° *Habet unitatem juris.* Illa enim unitas requirit principium inconcussum quo unitas doctrinæ et ministerii infallibiliter servetur : atqui Ecclesia Romana tale habet principium, siquidem agnoscit tribunal infallibile cui omnes docti et indocti, exterius et interius submitti debent. Illud autem tribunal, ex omnium confesso, est saltem in corpore episcoporum capiti suo junctorum. Ergo 3°.

Solvuntur objectiones.

Obj. 1°. Plurimi inter catholicos contendunt, 1° corpus episcoporum summo Pontifici præstare, dum alii tenent summum Pontificem esse concilio superiorem. 2° Alii auctoritatem conciliorum Constantiensis et Basileensis venerantur ; alii e contra eam rejiciunt : ergo non habent principium ex quo unitas necessario sequatur.

R. Nego conseq. Nam 1° fieri potest ut major episcoporum numerus in re aliqua definienda summo Pontifici consentiat, sive in concilio legitime coadunato, sive absque concilio : atqui omnes catholici fatentur definitionem summi Pontificis et episcoporum in eo casu infallibilem esse, et cunctos obligare fideles. An autem summus Pontifex sit concilio superior, vel non, acriter inter theologos disputatur : at omnes fatentur hanc quæstionem ad fidem non pertinere. Ergo.

2° Nullus catholicus negat concilium œcumenicum esse infallibile; sed multi dubitant utrum concilia Constantiense et Basileense sint œcumenica, saltem in iis sessionibus in quibus de summo Pontifice tractatum est: porro nemo non videt quod ista dubitatio principium unitatis non destruat: ergo.

Obj. 2°. Ecclesia Romana multos in sinu suo patitur homines qui tenent dogmata fidei opposita; imo inter sanctos cultu publico honorandos, nonnulli reperiuntur viri qui docuerunt hæreses, v. g. S. Cyprianus, etc. Ergo.

R. 1°. *Dist. ant. quoad primam partem.* Ecclesia multos in sinu suo patitur homines, etc. id est, eorum personam tolerat, *conc.* id est, eorum errores approbat, *nego ant.* Equidem non semper Ecclesia sævit contra hæreticos, eos anathemate percutiendo et de sinu suo expellendo; nonnunquam eorum personas prudenter tolerat, tum quia illi fraudulenter errores suos velant, tum quia severitas magis nocitura prævidetur quam prudens tolerantia: sed nego Ecclesiam Romanam errores contra fidem positive approbare; semper enim confessiones fidei absque ulla ambiguitate proposuit, semper docuit ne unam quidem veritatem revelatam negari posse absque dispendio salutis. Ergo.

2°. *Dist. secundam partem ant.* Illi viri qui inter sanctos numerantur, docuerunt hæreses materiales, *concedo*; docuerunt formales atque in hæresi mortui sunt, *nego ant.* Itaque nonnulli sunt inter sanctos cultu publico honoratos, qui materiales docuerunt hæreses: at nulli ab Ecclesia Romana inter sanctos numerantur qui hæreses formales docuerint atque in hæresi mortui sint; ad hæresim enim formalem non sufficit adhæsiō errori, requiritur insuper pertinax rebellio adversus Ecclesiam docentem et præcipientem: porro viri de quibus hic agitur non fuerunt rebelles adversus Ecclesiam, nam veritates quas impugnabant nondum ab Ecclesia fuerant definitæ. Ergo.

PROPOSITIO SECUNDA.

Ecclesia Romana vere est sancta.

Prob. miraculis, zelo propagationis et conversione errantium.

1^o *Miraculis.* Negari enim non potest Ecclesiam Romanam esse sanctam, si series miraculorum vere divinorum in ea semper exstiterit, quia repugnat Deum miraculis societatem minime sanctam ita confirmare : at in Ecclesia Romana semper fuit series, etc. Protestantes enim, qui revelationi adhærent, tria priora sæcula libenter nobis concedunt, et fatentur nobiscum doctrinam Christi per tria hæc sæcula ope miraculorum fuisse propagatam : atqui non minus certa in sequentibus sæculis existunt miracula in sinu Ecclesiæ Romanæ peracta : habemus namque in quarto sæculo miracula S. Antonii apud S. Athanasium, miracula S. Martini apud Sulpicium Severum ; in quinto sæculo, testatur S. August. l. 22 de Civitate Dei, c. 8, se Mediolani et Carthagine propriis oculis plura conspexisse miracula ; in septimo, octavo et nono sæculo, miracula in Historia Ecclesiastica *Fleury* consignata, quæ ad cultum sanctarum imaginum contra Iconoclastas commendandum peracta sunt, v. g. l. 43 n. 40 ; decimo sæculo, miracula in gratiam præsentiae realis, apud S. Bernardum de vita S. Malachiæ ; in undecimo et duodecimo sæculo, habemus miracula ipsius S. Bernardi coram infinitis testibus patrata, ita ut in historia hujus sæculi nihil habeatur certius ; demum in ultimis Ecclesiæ sæculis, multa in sinu Ecclesiæ Romanæ patrata sunt miracula a S. Francisco Xaverio, a S. Carolo Borromæo, a S. Francisco Salesio, a S. Vincentio a Paulo, etc. Atqui hæc miracula sunt certa ; illa enim miracula ut certa haberi debent, quæ omnibus gaudent conditionibus quibus certissima historiæ facta constant : atqui talia sunt quæ modo retulimus miracula aliaque similia ; sunt enim facta sensibilia, publica, omnibus obvia, a multis referuntur auctoribus fide dignissimis,

qui sæpe fuerunt testes non tantum coævi, sed oculati, qui adversarios in testimonium advocant; ad eorum fulgorem conversæ sunt gentes, in eorum memoriam publica erecta sunt monumenta; plurima ex illis stric-
tissimo examini sedis Apostolicæ, quod ante solemnem sanctorum canonizationem fieri solet, subjecta sunt. Serio attendant protestantes, et fateri cogentur prædicta miracula esse certissima. Quidam ex ipsis, ut *Kœmpfer* et *Tavernier*, laudabiliter de miraculis S. Francisci Xaverii locuti sunt. Porro hæc miracula probant Ecclesiam Romanam esse sanctam; illa enim, præcipue quæ fiunt ad tumulos defunctorum, ostendunt evidenter eos esse sanctos, ac proinde sanctam esse Ecclesiam cui adhærebant. Ergo.

2^o *Zelo propagationis*. Testatur enim historia ecclesiastica Romanam Ecclesiam in cunctis ætatibus et ubique novos filios semper Christo peperisse. Sic variis temporibus ad Christum adduxit Anglos, Francos, Germanos, Suetas aliosque populos; sic vastissimas fundavit ecclesias in America; florentissimas creavit missiones fere in omnibus Asiæ regnis: multos semper habuit viros spiritu apostolico repletos, qui per cunctas orbis partes fidem divinam sudoribus et immensis laboribus plantatam, sanguine suo confirmarunt; et, quod sane mirum est, ex omnibus sectis Christianis, sola Ecclesia Romana hunc zelum vere apostolicum indesinenter servavit. Hodierni protestantes catholicos imitari voluerunt; suas etiam habent missiones, et ingentes pecuniæ summas expendunt ut sacram Scripturam in linguas vulgares conversam, per omnes gentes spargant; verum missionarii eorum zelum, pietatem, sui abnegationem aliasque virtutes heroicas quæ in missionariis catholicis re-
lucent, nondum exhibuerunt, nec miracula unquam patnaverunt, nec Christianos doctrina recte imbutos, fide stabiles et opere perfectos genuerunt. Atqui Deus permittere non potest ut societas non sancta, schismatica, vel hæretica, sola jugiter impleat munus Evangelium prædicandi. Unde merito dici potest cum Hugone

a S. Victore, l. de Trinitate : « Domine, si error est, a » teipso decepti sumus; ista enim in nobis tantis signis et » prodigiis confirmata sunt, et talibus quæ nonnisi per » te fieri possunt. » Ergo, etc.

3^o *Conversione errantium.* Adeo quippe sancta et divina judicatur Ecclesia Romana, ut nonnulli homines qui rem maturiori examini subjiciunt, cupiditates refrenare intendunt, sanctius vivere cupiunt, et in periculo constituti, salutem æternam diligentius inquirunt, ex aliis sectis quotidie ad eam confugiant : e contra, si paucos aliquoties ab Ecclesia Romana ad alias sectas confugere videamus, illi sunt, saltem ordinariæ, qui mundi illecebris illecti, libidinibus subjecti, liberius vivere sibi proponunt, v. g. monachi disciplinæ impatientes, presbyteri uxorem ducere volentes, etc. omnes igitur persuasum habent Ecclesiam Romanam cæteris societatibus Christianis sanctitate præcellere. Ergo denique, etc.

Solvuntur objectiones.

Obj. 1^o. Multi errores in Ecclesia Romana docentur, multæ superstitiones in ea existunt. Ergo.

R. 1^o. *Nego ant.* Nam 1^o doctrina Ecclesiæ Romanæ nullam subiit mutationem et Apostolica est, *ut infra probaturi sumus.* 2^o In diversis theologiæ tractatibus ostenditur præfatas superstitiones toties a protestantibus nobis objectas, mera esse figmenta nullis rationibus innixa : unde sic ratiocinamur adversus protestantes. Doctrina Ecclesiæ Romanæ non est evidenter falsa aut impia; in illius gratiam vera existunt miracula nullis miraculis oppositis impugnata : hæc igitur miracula veniunt a Deo, juxta regulam quam in tractatu de Vera Religione dedimus : porro Deus miraculis confirmare non potest doctrinam quæ non est sancta : ergo.

R. 2^o. *Negari possunt consequens et consequentia.* Errores enim et superstitiones de quibus hic agitur, saluti non officiunt, juxta protestantium principia : ergo non impediunt quin illa Ecclesia sit sancta.

Obj. 2º. Miracula superius allata forte mera sunt mendacia aut dæmonum præstigia : ergo non probant sanctam esse, etc.

R. Nego ant. Hæc enim miracula tam certo probantur quam facta historica, quam miracula Christi et Apostolorum : atqui protestantes non concedunt miracula Christi et Apostolorum fuisse mendacia aut dæmonum præstigia; contendunt, e contra, illorum ope divinitatem religionis Christianæ clare demonstrari : ergo *a pari*.

Obj. 3º. Concilium Trid. sess. 25 de Invocatione sanctorum, prohibuit ne nova deinceps admitterentur miracula, aut susciperentur sanctorum reliquiæ, nisi recognoscente et approbante episcopo : ergo ex una parte sanctitas Ecclesiæ per miracula astruitur, et ex altera parte miracula per Ecclesiam probantur; sicque circulus vitiosus instituitur.

R. Nego conseq. Nullo modo enim concilium Trident. sibi proposuit adimere miraculis vim quam naturaliter habent probandi veram esse doctrinam in cujus gratiam patrantur, sed præcavere voluit superstitiones, et impedire ne falsa miracula aut falsæ reliquiæ pro veris admitterentur : at talis agendi ratio est prudens et sapiens : ergo.

Præterea, fatemur Ecclesiam per miracula et miracula per Ecclesiam probari posse, et tamen dicimus nulum tunc institui circulum vitiosum. Si enim auctoritas Ecclesiæ nobis probanda sit adversus infideles, ope miraculorum illam demonstramus; si controversia nobis instituenda sit cum adversariis auctoritatem Ecclesiæ admittentes, merito dicere possumus hæc aut illa miracula absque ullo examine rejicienda esse præcise quia Ecclesiæ auctoritati adversantur, vel admittenda quia ut vera ab Ecclesia agnoscuntur : porro concilium Trident. tulit decretum suum pro catholicis qui Ecclesiæ auctoritati adhærent : ergo.

Eo sensu intelligendus esse videtur S. Aug. qui Donatistas mirabilia jactantes deridet, affirmatque, lib. de Unitate Ecclesiæ, c. 19, causam catholicorum et hære-

ticorum non ex miraculis, sed ex Scripturis esse dijudicandam. Clare enim demonstrat ex Scripturis illos non esse veram Ecclesiam : ergo merito concludit eorum mirabilia esse mendacia vel dæmonum præstigia. Potuit etiam ab isto argumentandi genere consulto abstrahere, et illos schismaticos ex solis Scripturis quas admittebant confutare : inde non sequitur S. Aug. credidisse sanctitatem Ecclesiæ per miracula probari non posse.

Obj. 4º. Narrat Socrates historicus, lib. 7, c. 17, quemdam Paulum episcopum Novatianum evidens miraculum patrasse : ergo miracula etiam ab hæreticis patrari possunt, ac proinde non probant sanctam esse Romanam Ecclesiam.

R. Nego conseq. Nam 1º Socrates plurima refert facta quæ saltem dubia judicantur. 2º Novatianis ordinarie nimis favet in historia sua. 3º Etiam si verum esset miraculum quod refert, nobis non noceret; nam, juxta ipsius narrationem, Paulus miraculum illud operatus est coram Judæo qui baptismum Christi deridebat : in gratiam igitur religionis Christianæ, vel alicujus puncti illius doctrinæ, non autem in gratiam schismatis Novati peractum est prodigium istud : porro non repugnat Deum operari miracula in gratiam suæ religionis per hæreticos aliosve doctores, sicut veram edidit prophetiam per Balaam : ergo.

Obj. 5º. Multo plures sunt peccatores in sinu Ecclesiæ Romanæ quam justi : ergo immerito dicitur sancta.

R. Nego conseq. Denominatio enim corporis moralis non deducitur ex majori numero, sed ex parte quæ dominatur et excellentior reputatur : sic civitas dicitur opulenta, quamvis pauperum numerus longe sit major ; sic homo dicitur vivere, licet plurima ipsius membra sint mortua : justi autem sunt pars nobilior Ecclesiæ : ergo propter illos Ecclesia merito dicitur sancta. Insuper vocatur sancta non tantum propter membra, sed ratione doctrinæ, ratione sacramentorum, ratione principii, ratione finis. Ergo.

Similiter, quamvis in ea sæpius plurimi exstiterint

laxiores casuistæ, falsi doctores, pessimi pastores; quamvis non semel reformatione indiguerit in capite et in membris, nihilominus semper fuit sancta; nam hæc tribuenda sunt privatis, non vero Ecclesiæ, quæ ea semper et detestata est et reformare statuit. Ergo denique, etc.

PROPOSITIO TERTIA.

Ecclesia Romana est catholica.

Prob. Vera Ecclesia perpetuam et simultaneam habere debet catholicitatem: atqui hanc utramque catholicitatem habet Ecclesia Romana.

1^o *Perpetuam.* Qualibet enim ætate Ecclesia Romana adversarios suos debellavit, ostendendo diffusionem suam ex una parte, et paucitatem illorum ex altera parte: semper dicta est catholica, hoc est proprium ipsius nomen, a nulla alia secta usurpatum, quo ipsi protestantes eam designant. Ergo 1^o.

2^o *Simultaneam habet catholicitatem.* Ad hoc enim sufficit ut per magnam orbis partem sit diffusa et cæteras societates Christianas diffusionem suam vincat: atqui hæc duo certa sunt.

1^o *Per magnam orbis partem diffusa est.* Dominatur enim in tota Italia, in Gallia, Hispania, Lusitania, Hungaria, Polonia, in media parte Germaniæ, Bohemiæ, Helvetiæ; septem ex octo habet partes (*sept millions sur huit*) in Hibernia, frequentes ecclesias in Anglia et Batavia, et innumeros fideles in cæteris Europæ partibus; in vastis Turcarum imperiis non paucæ inveniuntur ecclesiæ Romano pontifici junctæ; immensas et numerosas habet dioceses in America (22,177,000 *catholiques*, dit M. de Humboldt, *Revue protest.* t. 1). In Asia usque ad imperium Sinense pervenit et multos ubique proselytas habet. Idem dicendum est de partibus Africae habitatis: denique in cunctis regionibus, moraliter loquendo, nota est, ipsiusque existunt sequaces. Unde sic. Illa Ecclesia legitime dici potest ubique moraliter diffusa, cujus do-

minatio non minus extenditur quam olim dominatio Nabuchodonosor, Alexandri, Romanorum, etc. atqui dominatio Ecclesiæ Romanæ non minus extenditur, etc. Ergo.

2° *Cunctas societates Christianas sua diffusionē vincit*; idque sub duplici respectu. Namque 1° aliæ societates in varias sectas sunt divisæ; sigillatim sumptæ, non multum diffunduntur: Romana vero Ecclesia est una, et tamen ingentem hanc habet diffusionem quam descripsimus. 2° Sola Ecclesia Romana, inter universas societates Christianas, ubique diffunditur, ubique plures aut pauciores habet sequaces. 3° Juxta D. de Humboldt, loco modo citato, in sola Europa 103,000,000 numerantur catholicorum, 52,000,000 tantum protestantium ex omnibus sectis, et 38,000,000 qui ritum Græcum sequuntur: ergo, etc. aliunde, etc. Ergo.

Idem probatur ex SS. Patribus quos supra retulimus ubi de catholicitate Ecclesiæ Christi: quando enim dicebant Ecclesiam Christi esse Catholicam, de Ecclesia Romana loquebantur: igitur Ecclesia Romana tunc erat catholica: atqui catholicitatem suam non amisit; nam, ex historia et ex præsentē religionis Christianæ statu, constat diffusionem Ecclesiæ Romanæ non fuisse notabiliter imminutam; si enim aliquas regiones amisit, alias acquisivit, solaque inter sectas Christianas hoc privilegio gaudet, scilicet, quod ubique nota sit ac sectatores habeat; nullam societatem Christianam æque diffusam, æque splendidam, æque universalem ac Ecclesiam Romanam ostendere possunt hæretici. Ergo.

Notandum est, infantes in omnibus sectis valide baptizatos et adultos, errori materialiter tantum adhærentes, ad Ecclesiam Romanam pertinere: porro in hac sola classe immensa est multitudo.

Solvuntur objectiones.

Obj. 1°. Vix decima pars orbis religionem Romanam profitetur: ergo Ecclesia Romana legitime dici non potest catholica.

R. Nego conseq. Nam, sicut jam diximus, Ecclesia Romana merito dicitur catholica, si eandem aut similem habeat extensionem ac habuerunt imperia Nabuchodonosor et Alexandri, cum hæc imperia dicta sint universalia : atqui revera extensio Romanæ Ecclesiæ comparari potest imperiis Nabuchodonosor et Alexandri, imo, comparatione facta, longe ea superat; non solum enim in vastis regionibus dominatur, sed ubique nota est, ubique plus minusve fulget, ubique subditos habet, et sic ubique in animas vere dominatur. Et vero, non tam quærendus est numerus eorum qui religionem catholicam profitentur, quam spectanda ipsius diffusio : sicut enim sol lucere non cessat quia multi oculos aperire nolunt, sic et vera religio Christi seu Ecclesia catholica non desinit esse universalis, quia multi eam ubique fulgentem agnoscere et profiteri renuunt. Ergo.

Obj. 2°. Mahumetana religio magis diffusa est quam Ecclesia Romana : ergo catholicitas Ecclesiæ Christi requisita Ecclesiæ Romanæ non competit.

R. 1°. *Nego. ant.* Mahumetani enim in varias dividuntur sectas, quæ, seorsim sumptæ, non multum diffunduntur, et certe diffusionem Ecclesiæ Romanæ non superant; quinimo totus Mahumetismus simul coadunatus non est tam diffusus quam Ecclesia Romana; nam Ecclesia Romana sectatores habet in omnibus fere regionibus in quibus Mahumetismus existit, ibique nota est, dum Mahumetismus penitus ignoratur in infinitis regionibus in quibus Ecclesia Romana fulget vel dominatur. Ergo.

R. 2°. *Nego conseq.* Notarum enim veræ Ecclesiæ proprius finis non est illam a societatibus infidelium, sed ab aliis societatibus Christianis distinguere; in tractatu nostro præcedenti demonstravimus solam religionem Christianam esse veram, nulla nunc igitur instituenda est comparatio inter veram Ecclesiam et quamcumque religionem antichristianam. Ergo.

PROPOSITIO QUARTA.

Ecclesia Romana vere est Apostolica ratione doctrinæ.

Prob. Ecclesia Romana est Apostolica ratione doctrinæ, si doctrinam Apostolorum integram retineat : atqui Ecclesia Romana, etc. Doctrinam enim Apostolorum integram retinet, si talis sit ejus constitutio, ut quælibet mutatio in ipsius doctrina fuerit impossibilis : atqui talis est constitutio Ecclesiæ Romanæ, ut, etc. Nam, ex ipsius constitutione, omnes quæstiones auctoritate traditionis dirimuntur; innumeri sunt episcopi circumquaque sparsi, ad custodiam illius doctrinæ vigilantes, ad traditionem semper attendentes, et nullam innovationem permittentes. *Nihil innovetur nisi quod traditum est*, aiebat S. papa Stephanus ad B. Cyprianum. « Id verius quod » prius, id prius quod ab initio, id ab initio quod ab » Apostolis; » Tert. adversus Marc. lib. 4, cap. 5. Nunc pariter hæc sunt principia quæ universim sequuntur episcopi : atqui, his positis, impossibile est aliquam fieri mutationem in doctrina Ecclesiæ.

Et vero, si qua hujusmodi mutatio serperet, vel modo sensibili, vel modo insensibili : atqui neutrum dici potest. 1° *Non modo sensibili*, propter rationem jam expositam; aliunde, assignari posset articulus circa quem mutatio contigisset, quo tempore grassari cœpisset, ubinam primum obtinisset, quis illius auctor, quo nomine appellatus, qua patria oriundus, cujus instituti professor, qua arte, qua audacia præditus, ut fidem antiquam corrumpere voluisset et potuisset : atqui tamen nihil horum invenitur nec a protestantibus citatur : ergo 1°.

2° *Non modo insensibili.* Nam tunc dicendum foret omnes fideles et eorum pastores, doctores et professores, prælatos regulares et sæculares, per orbem terrarum, easdem admisisse innovationes in gravissimis fidei punctis, ea credidisse ut dogmata a quibus abhorrebant, ea pro quibus sanguinem fundere parati erant tanquam

figmenta rejecisse; atque hæc tam unanimiter contigisse, ut nullus contra ea insurrexerit, nullus hos errores refellerit, nullus pastor gregem sibi commissum ab illis præcavendum monuerit, nullum concilium eos damnaverit, nullus apostata id objecerit; uno verbo, nullus exstiterit apud ecclesiasticos et laicos, doctos et indoctos, nobiles et plebeios, viros et mulieres, qui prioris doctrinæ memoriam retinuerit; nullus denique, in tota Ecclesia, qui hujusmodi mutationes adverterit. At nemo non videt quam talis suppositio sit absurda: innumeræ enim exortæ sunt novitates ab Apostolis usque ad nos, et statim atque prodierunt, undique conclamatum est contra illas; novimus earum auctores, epocham, progressus, adversarios aliasque circumstantias. Quomodo ergo tanti momenti mutationes ita contingere potuissent, ut nulla reliquissent vestigia? Qui tanta fiducia eos obijciunt protestantes, similes sunt cæcis a nativitate qui de coloribus disserunt, vel sepulchri Christi custodibus, qui asserebant illum, se dormientibus, a discipulis fuisse sublatum: ergo 2º, etc. aliunde, etc. ergo.

PROPOSITIO QUINTA.

Ecclesia Romana est Apostolica ratione ministerii.

Prob. Duæ requiruntur conditiones ut Ecclesia sit Apostolica ratione ministerii, scilicet, 1º successio pastorum non interrupta, 2º legitima missio: atqui illæ conditiones in Ecclesia Romana inveniuntur.

1º *Successio pastorum non interrupta.* Nam, sicut S. Irenæus, Tertullianus, S. Aug. S. Optatus aliique demonstrabant Ecclesiam Romanam suo tempore esse Apostolicam, numerando ejus pontifices a B. Petro sine interruptione sibi succedentes; similiter et nos ostendimus eandem pontificum seriem usque ad Gregorium XVI perseverasse; cæteræ ecclesiæ cum Ecclesia Romana unitæ, continuam seriem pastorum a primo fundatore suo descendentium et pontifici Romano communione juncto-

rum pariter habent : unde sic exclamat *Bossuet, Discours sur l'histoire universelle*, 2^e part. cap. 31 :

« Quelle consolation aux enfans de Dieu ! mais quelle
 » conviction de la vérité, quand ils voient que d'Inno-
 » cent XI, qui remplit aujourd'hui si dignement le pre-
 » mier siège de l'Eglise, on remonte sans interruption
 » jusqu'à S. Pierre, établi par Jésus-Christ prince des
 » Apôtres : d'où, en reprenant les pontifes qui ont servi
 » sous la Loi, on va jusqu'à Aaron et jusqu'à Moïse ; de là
 » jusqu'aux Patriarches, et jusqu'à l'origine du monde !
 » Quelle suite ! quelle tradition ! quel enchaînement
 » merveilleux ! Si notre esprit, naturellement incertain ,
 » et devenu par ses incertitudes le jouet de ses propres
 » raisonnemens, a besoin, dans les questions où il y va
 » du salut, d'être fixé et déterminé par quelque autorité
 » certaine ; quelle plus grande autorité que celle de
 » l'Eglise catholique, qui réunit en elle-même toute l'au-
 » torité des siècles passés, et les anciennes traditions
 » du genre humain jusqu'à sa première origine ? » Ergo
 1^o, etc.

2^o *In Ecclesia Romana legitima existit missio.* Omnes enim illius pastores alii ab aliis sine interruptione descendunt : nulli agnoscuntur successores alicujus pastoris, nisi legitime mittantur ; parochi, vicarii aliique sacerdotes ab episcopis, episcopi a summo Pontifice vel ab aliis episcopis Apostolorum successoribus, et summo Pontifici unitis : quicumque talem non habuerunt missionem, semper reputati sunt schismatici et omni jurisdictione destituti. Unde hæc verba Christi, *Sicut misit me vivens Pater, et ego mitto vos*, quotidie in Ecclesia Romana ad praxim reducuntur ; sicque missio Apostolis divinitus concessa usque ad nos pervenit : ergo 2^o, etc. aliunde, etc. Ergo Ecclesia Romana est Apostolica ratione ministerii.

Propterea nullo particulari nomine designatur, sed vocatur semper Ecclesia Christi, vel Ecclesia catholica : ipsi protestantes eam aliter designare jam non audent. Contra vero, aliæ societates Christianæ proprio fundatoris nomine appellantur, quidquid eorum defensores ad id

impediendum dixerint et tentaverint. Sic designamus Lutheranos, Calvinistas, Zuinglios, etc. sicut olim appellati sunt Eutychiani, Nestoriani, Ariani, etc. ergo illæ sectæ convincuntur initium habuisse, dum Ecclesia Romana nulla præ se fert mutationis indicia. Ergo denique, etc.

Solvuntur objectiones.

Obj. 1°. Defuncto pontifice Romano, nullus est qui legitimam missionem alteri conferre possit. Ergo.

R. Nego ant. Nam in Ecclesia Romana quædam statutæ sunt regulæ a B. Petro vel a successoribus suis, ad modum successionis determinandum : qui juxta has regulas eligitur et instituitur, eo ipso legitimus sui prædecessoris creatur successor, et eandem habet jurisdictionem, sicut principes qui aliis principibus juxta præscriptas regulas succedunt, eandem habent auctoritatem civilem. Ergo.

Nulla autem est difficultas pro episcopis aliis episcopis in ecclesiis particularibus succedentibus; semper enim canonicam institutionem accipiunt, et qui absque legitima institutione creantur, sunt *intrusi* et schismatici.

Obj. Sedes Romana, ab anno 1378 ad annum 1429, per duos aut tres pontifices fuit dilacerata : ergo series pontificum fuit interrupta.

Antequam respondeam, quædam facta breviter sunt referenda. Clemens V, ex archiepiscopo Burdigalensi summus pontifex creatus anno 1305, post diversa per Galliam itinera, venit Avenionem anno 1308, ibique mansit; successores ejus Joannes XXII, Benedictus XII, Clemens VI, Innocentius VI, Urbanus V et Gregorius XI, omnes origine Galli, manserunt etiam Avenione; hanc urbem ejusque territorium Clemens VI emit, anno 1348, a Joanna, provinciæ comitissa et Neapolis regina: cum autem Gregorius XI Romam ivisset, anno 1376, ibi mortuus est die 5 februarii 1378.

Tunc Romani, magna concitata turba, vehementer petierunt a cardinalibus ut papam ex Roma vel saltem

ex Italia oriundum constituerent. Cardinales vero, numero sexdecim præsentes, contra hujusmodi violentiam profitentes, juxta plures auctores (vide *Histoire de l'Église Gallicane*, et *Fleury*), Bartholomæum Prignano, archiepiscopum Bariensem in Apulia, elegerunt, qui nomen Urbani VI sumpsit. Deinde, æstimantes se ab illo quibusdam verbis et agendi ratione fuisse offensos, primo Anagniam, postea Fundum abierunt, et quinque menses post electionem ejusdem Urbani, publice contestati sunt se non fuisse liberos, palam affirmarunt Urbani electionem fuisse nullam, novum elegerunt papam Robertum, cardinalem Genevensem, qui dictus est Clemens VII. Hic venit Avenionem ibique sedem suam fixit. Ut legitimus pontifex Romanus agnitus est in Gallia, Hispania, Scotia, Sicilia et in Cypro. Benedictus XIII ei successit anno 1394, depositus fuit in concilio Pisano, deinde in concilio Constantiensi : at nihilominus dignitati suæ renuntiare constanter recusavit, licet ab omnibus derelictus ; mortuus est anno 1424 : duos solummodo habebat cardinales, quibus prope mortem constitutus jussit ut post se alterum eligerent papam ; elegerunt reipsa Ægydium *Magnos*, dictum Clementem VIII, qui pontificatus insignia anno 1429 abdicavit.

Urbanus VI, ex sua parte, successores habuit Romæ, Bonifacium IX, Innocentium VII, Gregorium XII, qui depositus fuit in concilio Pisano.

Alexander V, in concilio Pisano electus, successorem habuit Joannem XXIII, qui in concilio Constantiensi anno 1414 depositus, summo pontificatui renuntiavit. Idem fecit Gregorius XII. Martinus V, durante concilio, fuit electus et confirmatus : universus orbis Christianus eum ut legitimum B. Petri successorem habuit, et post cessionem Clementis VIII nullus amplius exstitit competitor, sicque finem habuit magnum Occidentis schisma, post annos quinquaginta et unum. His descriptis,

R. Nego conseq. Nam 1^o etsi auctoritas utriusque contendentis dubia fuerit, unus tamen coram Deo legitimus erat B. Petri successor, atque series successionis in eo

perseverabat, et alter nihilominus jurisdictionem necessariam habebat, juxta leges Ecclesiæ, scilicet, propter titulum coloratum et errorem communem. 2º Quamvis concederetur nullum ex diversis contendentibus legitimum fuisse pontificem, non ideo series successionis proprie fuisset interrupta; non magis enim hic defectus ministerio Apostolico nocere potuisset, quam vacatio sedis per plures annos legitimæ successionis nocet. 3º Ecclesia, tanquam societas perfecta usque ad finem sæculorum permansura, in quocumque casu existat, sufficientem habet potestatem ad sui conservationem et gubernationem : ergo, ubi plures sunt pontifices dubii et contendentes, eos deponere, vel abnegationem pontificatus ab eis exigere, et alium rite constituere potest. 4º Omnibus contendentibus semel defunctis, aut voluntarie abdicantibus, jus novum Pontificem constituendi remansit in Ecclesia : ergo qui ab omnibus ecclesiis tunc fuit agnitus, legitimus erat B. Petri successor ; proindeque magnum Occidentis schisma seriem successionis pontificum in sede Romana non disruptit.

Nota. Lugendum illud schisma Occidentis non magis unitati Ecclesiæ nocuit quam Apostolicæ missioni ; unitati enim non nocuit, si coram Deo catholici non fuerint divisi : atqui catholici coram Deo non fuerunt divisi ; omnes enim credebant unicum esse B. Petri legitimum successorem, necessariam esse erga illum subjectionem ; omnes illum venerari intendebant, sed alii hunc, alii illum arbitrabantur legitimum, sicque in solo facto dividebantur. Nihil charius ipsis erat, nihil ardentius exoptabant quam ut, illa divisione extincta, pax restitueretur Ecclesiæ. Omnes igitur sedi Romanæ adhærebant et coram Deo non erant divisi.

Et vero, si Romana sedes per quadraginta aut quinquaginta annos vacasset, non ideo Ecclesia defecisset, nec ipsius unitas aliquid detrimenti passa esset, omnes catholici futurum expectantes Pontificem eique se subiacere parati, in unione cum sede Romana perstitissent : atqui tempore magni schismatis sic agebant veri catho-

lici, futurum expectabant Pontificem certum, cui parati erant obedire : ergo.

Interea, quia difficillimum erat determinare quisnam ex contendentibus legitimus esset, tunc existebat error communis circa titulos diversorum pastorum : at ubi est error communis, Ecclesia, ex jure canonico, supplet jurisdictionem in eis qui habent titulum coloratum : ergo in utraque parte sufficiens erat jurisdictio ad sacramenta Ecclesiæ valide administranda ; sicque schisma saluti populi non nocebat ; et revera plures simul exstiterunt sancti, nunc canonizati, in communionibus oppositis, scilicet sancta Catharina Sinensis in communionem pontificis Romani, et S. Vincentius Ferrarius in communionem pontificis Avenionensis. Ergo denique, etc.

COROLLARIUM.

Ex hucusque dictis efformari potest argumentum quo unusquisque veram Ecclesiam ab aliis societatibus Christianis secernere possit ; sic enim argumentari potest, v. g. contra Lutheranos. Vera Ecclesia semper visibilis esse debuit : atqui vestra societas ante Lutherum non existebat, nec illius nomen fuerat auditum in mundo : ergo non estis vera Ecclesia. Quælibet secta ab Ecclesia Romana separata eodem argumento similiter confutari potest ; nulla enim est secta cujus assignari non possit auctor, tempus, progressus, etc. dum, e contra, Ecclesiæ Romanæ origo evidenter ad Apostolos ascendit, et nullum in ea mutationis signum percipi potest. Ergo.

Quanta ergo claritate fulget undique veritas sanctæ Ecclesiæ Romanæ ! Gratitudinis necnon admirationis sensu perfusi ex intimis præcordiis exclamemus cum illustrissimo *Bossuet* :

« Sainte Eglise Romaine, mère des églises, et mère de
 » tous les fidèles, Eglise choisie de Dieu pour unir ses
 » enfans dans la même foi et dans la même charité,
 » nous tiendrons toujours à ton unité par le fond de nos
 » entrailles. Si je t'oublie, Eglise Romaine, puissé-je
 » m'oublier moi-même ! que ma langue se sèche, et de-

» meure immobile dans ma bouche, si tu n'es pas tou-
» jours la première dans mon souvenir, si je ne te mets pas
» au commencement de tous mes cantiques de réjouis-
» sance ! » (*Sermon sur l'unité de l'Eglise.*)

Iisdem ferme verbis sic se exprimit *Fénelon* ! « O Eglise
» Romaine ! ô cité sainte ! ô chère et commune patrie
» de tous les Chrétiens ! Il n'y a en Jésus-Christ ni Grec,
» ni Scythe, ni barbare, ni Juif, ni gentil ; tout est fait
» un seul peuple dans votre sein, tous sont concitoyens
» de Rome et tout catholique est Romain. La voilà cette
» grande tige qui a été plantée de la main de Jé-
» sus-Christ. Tout rameau qui en est détaché se flétrit,
» se dessèche et tombe. O mère ! quiconque est enfant de
» Dieu, est aussi le vôtre ; après tant de siècles vous êtes
» encore féconde. O épouse ! vous enfantez sans cesse à
» votre Epoux dans toutes les extrémités de l'univers.
» Mais d'où vient que tant d'enfans dénaturés mécon-
» naissent aujourd'hui leur mère, s'élèvent contre elle
» et la regardent comme une marâtre ? d'où vient que
» son autorité leur donne tant d'ombrage ? Quoi ! le sa-
» cré lien de l'unité, qui doit faire de tous les peuples
» un seul troupeau, et de tous les ministres un seul
» pasteur, serait-il le prétexte d'une funeste division ?
» O Eglise d'où Pierre confirmera à jamais ses frères,
» que ma main droite s'oublie, si je vous oublie jamais !
» que ma langue se sèche et devienne immobile, si
» vous n'êtes pas jusqu'au dernier soupir de ma vie le
» principal objet de ma joie et de mes cantiques ! »
(*Histoire de Fénelon*, liv. 8, n. 16.)

PARS SECUNDA.

DE AUCTORITATE ECCLESIAE.

Cum sufficienter jam probaverimus existere in Ecclesia auctoritatem qua omnes controversiæ fidei infallibiliter dirimantur, nunc agendum est 1º de ipsius subjecto, seu de iis in quibus residet; 2º de modo quo exerceri debet; 3º de ejus objecto, id est de iis circa quæ versatur.

CAPUT PRIMUM.

DE IIS IN QUIBUS RESIDET AUCTORITAS ECCLESIAE.

Recentiores quidam novatores, post *Antoine de Dominis* et fanaticum auctorem libelli anonymi, *du Témoignage de la vérité*, contendunt omnes fideles vel esse fidei iudices, vel necessarios ejus testes, ita ut definitiones episcoporum neminem obligare queant, nisi prius a Christi fidelibus approbentur. Hinc si qua sit divisio inter episcopos, licet pauci stent contra omnes, sola vox populi certa erit veritatis regula.

Hæretici communionis Anglicanæ totam jurisdictionem et Ecclesiæ potestatem regi suo vel reginæ tribuunt, et apud eos suprema curia (*le Parlement*) omnium fidei controversiarum est iudex.

Alii vero docent potestatem de controversiis fidei iudicandi episcopis et presbyteris pariter esse communem: ita præsertim auctor libri cui titulus, *les Pouvoirs légitimes du premier et du second ordre*, a facultate Nannetensi et a clero Gallicano proscripti.

Alii denique facultatem definiendi controversias fidei

solis episcopis reservant, sed volunt eorum decretum esse nullum, si inconsultis ipsorum presbyteris feratur.

Quæstio itaque movetur 1° de plebe Christiana; 2° de principibus sæcularibus; 3° de clericis et presbyteris; 4° de episcopis. Primo diversos errores per sequentes propositiones impugnaturi sumus; deinde per conclusionem manifestabimus veritatem.

PROPOSITIO PRIMA.

Plebs Christiana nullo modo est particeps jurisdictionis ecclesiasticæ et potestatis dirimendi controversias circa fidem.

Hæc propositio habenda est ut de fide, utpote æquivalenter contenta in definitione concilii Trid. sess. 23, can. 8 et in Epist. Pii VI diei 10 martii 1791, contra constitutionem civilem cleri Gallicani directa, universæ Ecclesiæ nota et ab omnibus episcopis catholicis admissa.

Prob. Aliunde procul rejicienda est sententia quæ adversatur Scripturæ sacræ, praxi Ecclesiæ et rationi: atqui talis est sententia quæ simplicibus fidelibus tribuit potestatem de controversiis circa fidem judicandi.

1° *Adversatur Scripturæ sacræ.* Præcipui enim Scripturæ sacræ textus quibus nititur potestas docendi et judicandi in Ecclesia, sunt hi: *Docete omnes gentes, etc. Prædicate Evangelium, etc. Quæcumque alligaveritis, etc. Qui vos audit, me audit, etc. Sicut misit me Pater, et ego mitto vos; Posuit vos Spiritus sanctus episcopos regere Ecclesiam Dei, etc.* at illi textus, in quantum potestatem divinam docendi et judicandi exprimunt, ad fideles nullo modo diriguntur. Ergo.

2° *Adversatur praxi Ecclesiæ.* Illi namque non sunt fidei judices qui ut tales nunquam habiti sunt: atqui fideles, etc. In veteri enim Lege, non laicorum, sed tantum presbyterorum erat de rebus ad religionem pertinentibus judicare, ut videre est præsertim Deut. xvii, 8. Similiter in nova Lege, soli Apostoli et seniores conve-

nerunt ut quæstionem de legalibus definirent : ex conciliis plus quam sexcentis quæ jam celebrata sunt, ne unum citari potest in quo simplices laici de rebus fidei judicaverint; semper appellata sunt ab historicis conventus episcoporum, nusquam vero dicta sunt cœtus laicorum. Ergo 2º.

3º *Adversatur rationi.* Repugnat enim 1º Christum eos instituisse fidei judices, quorum judicium necessario esset tumultuosum et incertum; atqui tale esset judicium multitudinis fidelium in materiis fidei, ut evidens est. 2º Qui docendi sunt pariter docere tenerentur : in hoc autem manifesta est contradictio : ergo 3º, etc. aliunde, etc. Ergo.

Solvuntur objectiones.

Obj. 1º. B. Paulus, I Cor. v, 4, jubet ut fideles congregati incestuosum per excommunicationem ejiciant; et ibid. 11, 8, eosdem hortatur ut charitatem in illum confirmet, et aliquid ei magis donent : ergo fideles jurisdictionis ecclesiasticæ sunt participes.

R. Nego consequ. Nam in ipso loco Epistolæ citatæ, B. Apostolus ait, v. 3 : *Ego quidem absens corpore, præsens autem spiritu, jam judicavi ut præsens eum qui sic operatus est... congregatis vobis... tradere hujusmodi Satanæ.* Ergo ipse sententiam tulerat, et executionem illius duntaxat Corinthiis mandat : in secunda vero Epistola, quos prioris sententiæ aliquo modo consortes fecerat, absolutionis participes similiter facit : at inde concludi non potest simplices fideles jurisdictionis ecclesiasticæ esse participes. Imo probabile est sacerdotes apud Corinthios tunc exstantes, non vero laicos, sententiam Pauli significasse. Ergo.

Obj. 2º. In concilio Hierosolymitano sederunt Apostoli, et seniores, et fratres, juxta textum Græcum, Act. xv, 23 : atqui per fratres necessario intelligendi sunt laici : ergo.

R. Nego maj. et dico, legendum esse, non ut in Græco, sed ut habetur in Vulgata, *Apostoli et seniores fratres.*

Nam 1° peritiores critici, post maturum examen, censuerunt Vulgatam in hoc puncto textui Græco anteponendam esse. 2° Act. xv, 2, de fratribus ab Antiochia super hoc negotio missis, legitur eos ascendisse *ad Apostolos et presbyteros*; et v. 6 dicitur: *Conveneruntque Apostoli et seniores videre de verbo hoc*. Postea, v. 41, cap. seq. Paulus, electo Sylla, præcipit fidelibus per Syriam et Ciliam custodire præcepta *Apostolorum et seniorum*. Tollendæ sunt igitur particulæ Græcæ *αἱ καὶ*, et legendum sicut in Vulgata, *et seniores fratres*, id est episcopi.

PROPOSITIO SECUNDA.

Principes sæculares nullam habent auctoritatem in Ecclesia jure proprio.

Hæc propositio, sicut et præcedens, est de fide, ob eadem fundamenta.

Prob. Scriptura sacra, traditione et ratione.

1° *Scriptura sacra*. Verba Christi superius citata, *Euntes docete..... Qui vos audit.....* non magis ad principes diriguntur quam ad simplices laicos, sed solummodo ad Apostolos eorumque successores: ergo ex his aliisque Scripturæ verbis probari non potest Christum aliquam auctoritatem in Ecclesia principibus concessisse: attamen nullam hujusmodi potestatem habere possunt, nisi Christus eam illis concesserit: ergo.

B. Paulus, Eph. iv, 11, eos enumerans quos dedit Christus ad ædificationem corporis sui mystici, id est Ecclesiæ, nominat apostolos, prophetas, evangelistas, pastores et doctores: nullo modo autem principes sæculares designat: ergo.

2° *Traditione*. Principes vere Christiani libenter agnoverunt se nullam habere auctoritatem in res spirituales et ipsis plausit universus orbis. Sic Constantinus Magnus patres Nicænos alloquens exhibetur, Hist. eccl. Euseb. l. 10, c. 2: « Deus vos constituit sacerdotes, et dedit vobis potestatem de nobis quoque judicandi, et ideo nos

» a vobis recte judicamur, vos autem non potestis a nobis
» bis judicari. »

Theodosius junior ad concilium Ephesinum dicit :
« Nefas est enim qui sanctissimorum episcoporum catalogo
» adscriptus non est, illum ecclesiasticis negotiis
» et consultationibus sese immiscere. » *Labbe*. Eodem sensu præstantissimi regum nostrorum semper locuti sunt.

Quando autem nonnulli principes minus pii ecclesiasticam auctoritatem usurpare voluerunt, publicam totius Ecclesiæ indignationem provocaverunt : unde celeberrimus Osius, Cordubensis episcopus, ad Constantium imperatorem scribens, ait : « Ne te immisceas rebus ecclesiasticis : tibi Deus imperium tradidit, nobis ecclesiastica concredidit : quemadmodum qui tibi imperium abripit, Deo ordinanti repugnat ; ita metue ne si ad te Ecclesiam trahas, magni criminis reus fias. » *Labbe*. Ergo.

3^o *Ratione*. Principes infideles, v. g. Nero, Diocletianus, Julianus Apostata cæterique Christianorum persecutores non erant controversiarum fidei iudices, nec jurisdictionis ecclesiasticæ participes : atqui principes fideles non plus habent jurisdictionis in Ecclesia quam infideles ; si talem enim haberent jurisdictionem, vel quatenus sunt principes, vel quatenus sunt Christiani : atqui neutrum dici potest. 1^o Non quatenus sunt principes ; sub eo enim respectu infidelibus non præcellunt. 2^o Non quatenus sunt Christiani, siquidem Baptismus non plus auctoritatis confert principibus quam aliis Christianis. Ergo.

Præterea, supremam potestatem civilem ipsæ mulieres nonnunquam obtinent ; at illas jurisdictione ecclesiastica potiri quam indecens ac inauditum sit nemo non videt. Ergo.

Solvuntur objectiones.

Obj. 1^o. Tempore veteris Legis, principes sæculares auctoritatem spiritualem exercebant, ut patet de Moyse, Josue, David, Salomone, Josaphat, etc. Ergo.

R. 1º. Nego conseq. In iis enim quæ a libera voluntate Dei pendent, nullum admitti potest argumentum *a pari*: atqui concessio auctoritatis spiritualis pendet a libera Dei voluntate: ergo, etiamsi constaret principes sæculares eam sub veteri Lege exercuisse, nihil concludi posset.

R. 2º. Dist. ant. Principes sæculares auctoritatem spirituales exercebant, extraordinarie, per concessionem Dei specialem, *conc.* ordinarie et velut principes, *nego*. Etenim 1º Moyses specialem potestatem ea statuendi quæ religionem spectabant a Deo acceperat. 2º Josue, David, Salomon, Josaphat aliique principes nonnulla statuerunt aut præscripserunt circa religionem, sed vel tanquam prophetæ et ex missione extraordinaria, vel ut diligentius ea quæ Lex præcipiebat implerentur: porro in ea agendi ratione nihil erat quod jura sacerdotum læderet. 3º Quando rex Osias thus adolere voluit, Azarias, summus pontifex, eum repulit, dicens: *Non est tui officii, Ozia, adolere incensum Domino, sed sacerdotum*, II Paral. xxvi, 18; cum autem graviter insisteret, extemplo horrenda percussus est lepra. Ergo.

Obj. 2º. Multi principes Christiani varias leges ad Ecclesiæ regimen spectantes promulgaverunt, ut constat ex omnibus historiis, et præsertim ex Capitularibus Caroli Magni, Ludovici Pii, etc. Ergo.

R. Disting. ant. Varias leges ad Ecclesiæ regimen spectantes promulgaverunt, sed de consensu episcoporum et summi Pontificis, *concedo*; absque illo consensu, *subdistinguo*: et potestatem suam excedebant, *conc.* secus, *nego ant.* Itaque fateor principes sæculares non semel tulisse leges ad regimen Ecclesiæ pertinentes; sed ordinarie id faciebant ex consensu, et aliquando ex precibus episcoporum et summi Pontificis, qui potestatem civilem in adjumentum auctoritatis spiritualis advocabant. Si autem consensus pastorum legibus hujusmodi non accedebat, tunc limites potestatis suæ excedere censebantur principes. Unde nonnulla eorum arresta ab Ecclesia fuerunt rescissa, v. g. *Ecthesis* Heraclii et *Typus* Constantis.

Si vero aliquoties contigerit ut contra istiusmodi leges non statim reclamaverint pastores, id ex prudentia, ad vitanda majora mala, factum est.

Quod ad Capitularia regum nostrorum attinet, certum est illa non tantum civili, sed simul utraque potestate, ecclesiastica et civili, fuisse condita; nam in comitiis generalibus in quibus condebantur, semper aderant episcopi cum primoribus regni. Aliunde nihil continebant nisi quod Ecclesiæ canonibus jam erat statutum. Ergo.

Inst. Principes sæculares impedire possunt ne quædam Ecclesiæ decreta vim in ditionibus suis habeant: ergo quamdam auctoritatem spiritualem habent.

R. Dist. ant. Principes sæculares impedire possunt ne decreta disciplinam spectantia, etc. *transeat*; ad fidem aut mores pertinentia, *nego ant.* Equidem non negamus principes sæculares aliquando impedire posse ne quædam disciplinæ decreta vim in ditionibus suis habeant, quia spectant materias mixtas, civiles simul et ecclesiasticas et idcirco utrique potestati subjiuntur: at principes impedire non possunt ne decreta Ecclesiæ fidem aut mores spectantia vim in ditionibus suis habeant; tunc enim potestatem spiritualem exercerent, quam non acceperunt a Christo, et quæ ipsis nunquam tributa fuit in traditione. Ergo.

PROPOSITIO TERTIA.

Simplices presbyteri non sunt jure divino controversiarum fidei iudices.

Prob. Simples presbyteri hoc sibi vindicare non possunt quod Scriptura non fundatur, praxi Ecclesiæ et rationi adversatur: atqui tale est jus quod sibi vindicarent de quæstionibus circa fidem judicandi.

1° *Scriptura sacra non fundatur.* Nullus enim exhibetur textus alicujus momenti. Cura docendi, prædicandi, populo Christiano invigilandi, Ecclesiam regendi Apostolis

eorumque successoribus committitur; nulla autem fit mentio de simplicibus presbyteris : ergo.

2° *Praxi Ecclesiæ adversatur.* 1° A concilio Hierosolymitano usque ad Tridentinum, plus quam sexcenta celebrata sunt concilia, tum generalia, tum nationalia aut provincialia : in paucis simplices presbyteri sederunt, et in paucioribus subscripserunt. 2° Subscribendo utebantur modo speciali, a forma episcopis consueta diverso. Sic namque subscribebant episcopi : *Ego N. definiens vel judicans subscripsi* : presbyteri vero simpliciter scribebant : *Ego N. subscripsi*. 3° Non omnes ad subscriptionem admittebantur, verum ii duntaxat qui ab episcopis erant deputati, eos repræsentabant ac ipsorum nomine subscribebant. 4° Innumera celebrata sunt concilia absque presbyteris, ut ex Actibus eorum patet. 5° Nunquam directe convocati sunt, sed soli episcopi. 6° A deliberatione et subscriptione pluries repulsi sunt, ut in concilio Lugdunensi II, anno 1274, ex quo sacerdotes, qui nominatim fuerant vocati, ejecti sunt, et in concilio Tridentino cujus patres vocem deliberativam concedere noluerunt D. Soto, celebri theologo. Ergo 2°.

3° *Adversatur rationi.* Vel enim sacerdotes ignorassent se talem habere potestatem, vel non : at neutrum dici potest. Non prius; nam potestas de fide judicandi est essentialis Ecclesiæ : si ergo Christus eam simplicibus presbyteris concessisset, non permisisset eam tanto tempore penitus ignorari : universa quippe Ecclesia in gravissimum errorem tunc impegisset. Posterius similiter dici non potest; si enim simplices presbyteri tale jus sibi competere novissent, certe illud sibi auferri tam facile non tulissent, ut ne unum vestigium alicujus reclamationis inveniatur.

Præterea, inter adversarios, alii omnia concilia generalia admittunt, alii saltem quatuor priora; ita protestantes : at, ex hypothesis quod simplices presbyteri jus habeant sedendi in conciliis et quæstiones fidei judicandi, omnes eodem jure ac episcopi convocari debuissent : verum nunquam generatim convocati sunt ad

concilia sive generalia, sive particularia : ergo 3º, etc. Ergo.

Solvuntur objectiones.

Obj. 1º. Plurima Scripturæ sacræ verba quibus fundatur auctoritas controversias circa fidem judicandi, non minus presbyteris quam episcopis conveniunt, v. g. *Quæcumque alligaveritis super terram*, etc. Matth. xviii, 18; *Qui vos audit*, etc. *Dedit quosdam apostolos.... quosdam pastores et doctores.* Ergo.

R. 1º. Constat traditione et ex adversariorum confesso, quædam saltem ex testimoniis supra allatis solos episcopos spectare, v. g. illum textum : *Data est mihi omnis potestas; Euntes ergo docete*, etc.

R. 2º. Distinguo ant. Quædam ex prædictis testimoniis non minus presbyteris quam episcopis conveniunt, in aliquibus, nempe in his quæ ipsis cum episcopis sunt communia, v. g. baptizare, prædicare, offerre Eucharistiam et pœnitentiam administrare, *concedo ant.* conveniunt in omnibus et eodem modo, *nego ant.* Etenim quædam sunt ita propria episcopis ut presbyteris non conveniant, fatentibus adversariis, qualis est potestas confirmandi, ordinandi, sententias depositionis ferendi. Hæc tamen episcoporum potestas in iisdem supradictis textibus specialiter fundatur, et ex perpetuo Ecclesiæ usu ac constanti traditione concluditur eam solis episcopis competere. Porro non minus constat, ex praxi et usu Ecclesiæ, auctoritatem judicandi et controversias circa fidem dirimendi ad solos episcopos pertinere. Ergo.

Inst. 1º. Nomen episcopi communiter tribuitur in Scriptura presbyteris et episcopis; v. g. Act. xx, 28, Paulus vocavit majores natu Ecclesiæ Ephesinæ et eis dixit : *Attendite vobis*, etc. unicus esse poterat episcopus Ephesi : igitur majores natu erant presbyteri. Philip. i, 1, B. Paulus loquitur *sanctis qui sunt Philippis cum episcopis et diaconibus*; unicus pariter debebat esse episcopus in illa civitate, et Apostolus non omisisset presbyteros, si illos sub nomine episcoporum non designasset, etc. Ergo eadem aucto-

ritate ac episcopi donantur presbyteri ad docendum, sicque ad judicandum de fide.

R. 1º. Si premerentur hæc argumenta, sequeretur nullum dari discrimen inter episcopos et presbyteros: atqui novatores quos hic inpugnamus, hanc sequelam non admittunt: ergo prædicta argumenta nihil probant.

R. 2º. Nego conseq. Etiam si concederetur nomen episcopi in Scripturis commune esse ipsis episcopis et presbyteris, non sequeretur episcopos presbyteris superiores non esse; in usu enim civili, sub communi nomine omnes magistratus designantur: attamen alii sunt aliis superiores: ergo *a pari*, etc.

R. Nego ant. Episcopi pluries vocantur in Scripturis sacerdotes aut presbyteri; verum non ita constat simplices presbyteros per nomen episcopi designatos esse: vocavit quidem Apostolus majores natu Ecclesiæ ab Epheso, et eos appellat episcopos. Hinc recte infertur episcopos vocari posse majores natu vel seniores; at non sequitur presbyteros dici posse episcopos. Tunc enim non solus episcopus Ephesinus, sed alii viciniore potuerunt simul B. Paulum adire Miletum; et merito idem Apostolus illis dicere potuit, *Attendite vobis*, etc. Hæc itaque verba de solis episcopis sunt intelligenda, prout ea de facto intellexerunt patres concilii Tridentini, sess. 23, de Ordine, c. 4; *l'abbé de Saint-Cyran*, et quatuor episcopi qui primi a constitutione *Unigenitus* ad futurum generale concilium appellaverunt. Ergo.

Item, Epist. B. Pauli quæ ad *Philippenses* inscribitur, juxta plures, non tantum directa est ad eos qui habitabant Philippis, sed ad vicinas quoque civitates in quibus erant episcopi cum diaconis. Sæpe tunc temporis nullus erat presbyter in ecclesiis, sed episcopi duntaxat quibus serviebant diaconi, et tot erant episcopi quot civitates. *Vide* Estium in hunc locum. Ergo.

Inst. 2º. Illi pares sunt episcopis qui alios presbyteros et etiam episcopos ordinabant: atqui simplices presbyteri alios, etc. ut patet ex his verbis B. Pauli, I Tim. iv,

14 : *Noli negligere gratiam quæ in te est, quæ data est tibi cum impositione manuum presbyteri. Ergo.*

R. Nego min. Sæpe enim episcopi, ut jam diximus, vocantur presbyteri; quando autem de consecrando episcopo agitur, ex antiquissimo usu Ecclesiæ plures episcopi manus imponunt, licet unus sacramentum conficiat : ergo ibi forte agitur de episcopis qui, in ordinatione Timothei, cæremoniam manuum impositionis impleverunt.

Et revera Apostolus per impositionem manuum presbyteri, hic propriam manuum suarum impositionem exprimere intendit; nam in Epistola secunda, 1, 6, ad eundem Timot. dicit : *Admoneo te ut resuscites gratiam Dei quæ est in te per impositionem manuum mearum. Ergo.*

Obj. 2º. In concilio Hierosolymitano, simplices presbyteri sederunt et judicarunt, ut patet ex Act. xv, 2 : *Et statuerunt ut ascenderent Paulus et Barnabas... ad Apostolos et presbyteros in Jerusalem; et v. 23 : Apostoli et seniores fratres qui sunt Antiochiæ, etc. Ergo.*

R. Nego ant. Nam, ut hæc propositio vera esset, probandum foret illas voces, *presbyteros* et *seniores*, necessario simplices sacerdotes significare : at certum est, e contra, voces istas non raro designare episcopos. Sic B. Joannes, secunda et tertia Epist. 1, 1, seipsum vocat seniozem. B. Paulus ad Titum, 1, 5 : *Reliqui te Cretæ, ut constituas per civitates presbyteros*; et statim subjungit : *Oportet enim episcopum sine crimine esse. Ergo illæ voces, presbyteri, seniores, non semper sacerdotes secundi ordinis designant.*

Præterea, vox apud nos usitata, *clerus*, episcopis et presbyteris est communis : attamen sæpe, ex circumstantiis et absque ullo addito, solos episcopos designat, v. g. quando dicitur comitia cleri Gallicani, *clerus Gallicanus* has aut illas propositiones damnavit : ergo *a pari*, etsi voces istæ, *seniores, presbyteri*, sacerdotibus primi et secundi ordinis sint communes, possunt tamen ex circumstantiis solos episcopos designare : porro, ex omnium sæculorum traditione et universa praxi Ecclesiæ, constat ad

solos episcopos pertinere de fide judicare : ubi ergo legitur seniores aut presbyteros circa fidem aut mores judicasse, dicendum est illos fuisse episcopos.

Obj. 3º. Sacerdotes secundi ordinis, et præsertim parochi, jure divino deputantur ad docendum : at auctoritas quæstiones circa fidem judicandi annexa est potestati institutæ ad docendum : ergo.

R. Dist. maj. Sacerdotes secundi ordinis, et præsertim parochi, jure divino deputantur ad docendum, sed dependenter et auctoritate limitata, *conc.* absolute et primaria auctoritate, *nego maj.* Similiter, *distincta minore*, *nego conseq.* Itaque fateor sacerdotes secundi ordinis specialiter a Deo fuisse institutos ut docerent, sacramenta administrarent, etc. sed nonnisi dependenter et limitata auctoritate, ut toto traditionis decursu constat et adversarii fatentur. Porro ex traditione non minus constat jus controversias circa fidem dirimendi eis solis competere qui absolutam habent potestatem docendi et Ecclesiam Dei regendi : ergo.

Obj. 4º. Simples sacerdotes deputari possunt ab episcopis et tunc in conciliis admittuntur, cum episcopis sedent ac judicant; duo sacerdotes Romani, ex delegatione summi Pontificis, concilio Nicæno I cum celebri Osio præfuerunt; religiosorum ordinum generales et abbates, cardinales presbyteri, ex usu in conciliis sedent ac judicant. Ergo.

R. 1º. Ex hoc argumento concludendum foret, non solum presbyteros, sed et diaconos controversiarum fidei esse judices; nam diaconi ab episcopis deputari possunt, et revera pluries in conciliis admissi sunt : atqui nolunt adversarii diaconos controversiarum fidei esse judices : ergo.

R. 2º. Nego conseq. et dico, nihil ex his factis adversus propositionem nostram concludi posse; contendimus enim simplices sacerdotes non esse jure divino controversiarum fidei judices : at prædicta facta contrarium non probant, *ut patet*, sed tantum monstrant episcopos per sacerdotes aut diaconos repræsentari posse.

Constat autem hujusmodi delegatos nonnisi ex speciali concessione vocem deliberativam in conciliis habuisse; concilium Tridentinum hanc facultatem ipsis denegavit; vix obtentum est ut suffragia trium abbatum Cassinensium pro unico computarentur (Palav. l. 6, c. 2). Ergo.

Quoad abbates et generales ordinum, nonnulli arbitrantur suffragia illorum vim consultationis tantum habuisse, non autem vim deliberationis et judicii. Multo communius docetur eos esse convocandos et habere suffragium decisivum, sed ex consuetudine ac privilegio, non vero ratione dignitatis. Vide Ferraris, v^o Concil. art. 1, n^o 30. Consuetudo allegata est antiqua et ultra duodecesimum sæculum ascendere videtur, ex pluribus factis in historia conciliorum relatis. Dignitas quippe eorum a Christo non fuit instituta. Ergo.

Inst. 1^o. Postestas de fide judicandi a solo Deo pendet : nemini ergo ab Ecclesia conferri potest.

R. Nego conseq. Etenim tota jurisdictio ecclesiastica a solo Deo pendet : atqui tamen singuli episcopi eam delegare possunt : potestas autem de rebus fidei judicandi ad jurisdictionem ecclesiasticam pertinet : ergo non repugnat eam simplicibus presbyteris ab Ecclesia conferri posse.

Inst. 2^o. Qui habent facultatem de fide judicandi, privilegii infallibilitatis fiunt participes : atqui repugnat Ecclesiam privilegium infallibilitatis alicui conferre : ergo.

R. Dist. maj. Qui habent facultatem..... privilegio infallibilitatis fiunt participes, id est, cooperantur infallibili sententiæ, *concedo*; ipsi sunt infallibiles, *nego maj.* Etenim privilegium infallibilitatis non individuis, sed corpori episcoporum fuit promissum : ita omnes sentiunt : unde hæc sola sententia est infallibilis quæ nomine episcoporum fertur. At quorundam presbyterorum accessio non impedit quin sententia nomine episcoporum feratur : sic, quando in nonnullis regionibus quidam jurisperiti in discutienda aliqua causa magistratibus aggregantur, nihilominus sententia nomine tribunalis et

magistratum in quibus tota judicandi potestas residet, lata reputatur. Ergo.

Nullus est locus timendi ne presbyteri in nimio numero admissi episcopis prævaleant; cum enim vocem deliberativam habere non possint nisi ex libera episcoporum concessione, nunquam in majori numero admittentur. Aliunde, vel episcopis consentirent, vel non. Si prius, nulla difficultas; sententia esset episcoporum: si posterius, tunc decretum ut legitima fidei definitio non haberetur. Ergo.

Quæritur 1° quo fundamento simplices presbyteri delegari possint ad judicandum de fide?

R. Juxta communem theologorum sententiam sic ratiocinandum est. Ex pluribus factis constat simplices presbyteros aliquando suffragium decisivum habuisse in conciliis, sed nunquam nisi ex speciali episcoporum vel summi Pontificis concessione: proprio igitur titulo non sunt fidei judices, sed ex commissione tales fieri possunt. Inde concludunt eos capacitatem judicandi in ordinatione sua accipere. Rem illustrent exemplo: soli episcopi sunt ordinarii ministri sacramenti confirmationis: attamen presbyteri, ex delegatione seu ex commissione summi Pontificis, valide et licite illud sacramentum administrare possunt: ergo in ordinatione sua quamdam facultatem circa hoc sacramentum accipiunt: similiter dici potest eos certam judicandi capacitatem in ordinatione accipere.

Imo et diaconi hujusmodi capacitatem accipere videntur; nam ad sacram hierarchiam pertinent, et aliquando sederunt in conciliis ac suffragium dederunt, v. g. cardinales diaconi. Ergo. At privilegium istud ab Ecclesia concedi non posset subdiaconis et aliis clericis, quia de hierarchia non sunt. *Ita communiter theologi.*

Quæritur 2° an episcopi dicti in partibus infidelium ordinarii sint fidei judices?

R. Qui ad infideles vere mittuntur, etiam tanquam vicarii Apostolici, juxta communem opinionem, habent vocem deliberativam; item qui sub titulo coadjutoris

instituuntur, quia jurisdictionem episcopalem habent et Ecclesiam Dei regunt. Contra vero qui simpliciter sunt titulares, aliorum episcoporum suffraganei. Ita Canus, de Auctoritate concil. c. 2, et Suarez. Multi alii theologi ac canonistæ contendunt titulares episcopos jurisdictionem in actu primo habere, et, remota infidelium tyrannide, eam in ecclesiis quarum sunt titulares exercere posse : unde concludunt eos ad concilia generalia cum suffragio decisivo convocandos esse. Ita Jacobatius, Ferraris, v^o Concil. art. 1, n. 29.

Qui autem sedibus suis renuntiaverunt, juxta omnes, non sunt fidei iudices; quia nullam jurisdictionem habent nec ullo modo Ecclesiam Dei regunt.

Qui aperte sunt hæretici aut publice schismatici, ad concilia aliquando vocantur ut causam suam defendant, et ad veram fidem adducantur; sed vocem deliberativam non habent.

PROPOSITIO QUARTA.

Simplices presbyteri non sunt necessarii fidei testes et episcoporum consilarii.

Prob. Si presbyteri jure divino necessarii essent fidei testes et episcoporum consultores, ut quidam Jansenii et Quesnel discipuli volunt, nullam vim haberent conciliorum decreta, non vocatis et inconsultis presbyteris lata : atqui tamen multa celebrata sunt concilia, non vocatis nec consultis presbyteris, et nihilominus eorum decreta ab omnibus semper habita sunt ut legitima : ergo.

Et vero, si presbyteri necessarii essent fidei testes, vel omnes, vel aliquos tantum episcopi consulere deberent : atqui neutrum dici potest : non prius; quia sæpe est impossibile et nunquam fuit in usu; non posterius, alioquin illorum testimonium non esset jure divino necessarium, quia omnes ratione dignitatis jure divino sunt æquales. Itaque convenit quidem episcopos, ut mos est,

nonnullos sibi adjungere sacerdotes scientia, pietate et experientia conspicuos, quorum expectant consilium; præsertim in rebus alicujus momenti, v. g. in controversiis circa fidem. At validitas sententiæ episcopalis ab hujusmodi consultationibus non pendet; tota enim potestas, tum judicandi, tum præcipiendi et gubernandi, in solis episcopis residet; sufficientem autem rerum notitiam obtinere possunt ex Scripturis sacris, ex SS. Patribus, ex diversarum ecclesiarum traditionibus, ex historia ecclesiastica, ex testimonio et opinione aliorum episcoporum, etc. Ergo.

PROPOSITIO QUINTA.

In propria sua diœcesi simplices presbyteri jus non habent causas fidei judicandi et leges ferendi, nec necessario sunt episcopi consultores.

Prob. Jus istud sibi vindicare non possunt simplices presbyteri, nisi ex Scriptura sacra aut traditione : atqui neque ex Scriptura sacra, neque ex traditione probari potest tale jus ad sacerdotes pertinere. 1^o *Non ex Scriptura.* Nam textus ex quibus deducitur jus Ecclesiam gubernandi, auctoritas docendi et controversias circa fidem dirimendi, solos episcopos spectant, *ut supra ostendimus.* 2^o *Non ex traditione.* Nullum enim affertur exemplum lucidum in gratiam hujus propositionis; contra vero ex universa praxi Ecclesiæ videtur episcopos per seipsos, et independenter a sacerdotibus, suam Ecclesiam rexisse, leges condidisse, dogmatica decreta tulisse, etc. Et revera, legitur in Constitutionibus Apost. l. 2, c. 26 : « Qui episcopus est... hic princeps et dux vester est; hic vester rex et dynastes; hic vobis post Deum terrenus Deus, cui honorem debetis præstare; de eo quippe et de similibus aiebat Deus : *Ego dixi, Diis estis, et filii Excelsi omnes; et, Diis non maledices.* Igitur episcopus vobis præsideat tanquam Dei dignitate condecoratus, ob quam clero præest et plebi universæ

« imperat; » *Cotel.* Porro episcopus non diceretur rex, dynastes, Deus, si independenter a sacerdotibus non posset Ecclesiam regere, leges condere, decreta ferre, etc. Quamvis ille textus non sit authenticus, saltem est antiquissimus. Ergo.

Præterea, *jam probavimus* sacerdotes in genere non esse fidei iudices, nec habere vocem deliberativam in conciliis : atqui non plus auctoritatis habent respectu unius episcopi et in una ecclesia particulari, quam respectu concilii et in universo orbe : ergo. Unde episcopus sacerdotes et parochos, sicut simplices fideles, legibus suis constringere potest ; nam ille solus veram habet potestatem totam diœcesim gubernandi ac regendi. Ergo.

Dices. Concilium Carthaginense IV, can. 23, jubet ut « episcopus nullius causam audiat absque præsentia clericorum suorum, alioquin irrita erit sententia. » Ergo.

R. 1°. Inde sequeretur omnes clericos facultatis iudicandi et potestatis leges condendi esse participes : hoc autem consecrarium negant adversarii : ergo.

R. *Dist. ant.* Jubet ut episcopus nullius causam audiat absque præsentia clericorum, ut solemnior et firmitior sit sententia atque regimen episcopale suavius appareat, *concedo ant.* quasi episcopus sufficientem non habeat jurisdictionem ad leges condendas et controversias fidei iudicandas, *nego ant.* Sic evidenter explicari possunt prædicta concilii Carthag. verba, ac consequenter nihil contra nos probant.

Idem cum debita proportionem dicendum est de collegio cardinalium in Ecclesia Romana respectu summi Pontificis ; tota jurisdictio sedi Romanæ annexa, in solo Pontifice maximo residet, et nonnisi ex institutione ecclesiastica cardinales sunt illius consultores.

Nota. Quidquid de simplicibus presbyteris diximus, de parochis similiter intelligendum est. Multi quidem theologi, præsertim in Gallia, acriter contendunt, contra Bellarminum et plures alios, parochos septuaginta duorum discipulorum quorum fit mentio apud S. Lucam, c. x, legitimos esse successores, eos proinde divinitus

esse institutos et jurisdictionem immediate a Christo obtinere. Ita, cum Facultate Parisiensi, *Habert*, de Ord. c. 6; *Collet*, de Ord. c. 5; *Bailly*, de Eccles. 3^a parte, c. 2; *Conf. d'Ang. des Etats, et de la Hiér.* At nihilominus omnes consentiunt eos ab episcopis pendere, tum in sua institutione, tum in jurisdictionis suæ limitibus aut exercitio, et solum jure ecclesiastico esse inamovibiles. Etenim, saltem in tribus primis Ecclesiæ sæculis, territorium diversarum dioceseon non erat in parochias divisum; unica communiter erat ecclesia in qua episcopus cœtibus fidelium præerat, verbum divinum prædicabat et missæ sacrificium pro populo offerebat. Sacerdotes, diaconos aliosque inferiores clericos sibi adjunctos habebat, qui illum ratione dignitatis plus minusve adjuvabant. Multitudine fidelium nimis crescente, permittebat ut novi cœtus alibi fierent: his præficiebat sacerdotes qui nomine ipsius populum docebant, sacra peragebant et diversis ministerii sacri officiis fungebantur: hujusmodi cœtus decursu temporum multiplicati sunt, et paulatim conversi sunt in parochias.

Sacerdotes ad nutum episcopi ita missi, sic et revocari poterant. Postea, ut regimen Ecclesiæ firmitus esset, statutum est parochos semel institutos, verum habituros esse titulum a quo excidere non possunt, nisi secundum regulas sat difficiles: hinc dicti sunt inamovibiles. Nunc in Gallia, post Concordatum anni 1801, soli parochi primarii (*curés de canton*) hoc privilegio gaudent; cæteri vero qui *deservientes* appellantur, ad voluntatem episcopi, sicut vicarii et quicumque delegati, semper revocari possunt.

Sive autem parochi sint amovibiles, sive non, constat episcopum immediatam habere jurisdictionem in tota diocesi. Nec admitti potest opinio eorum qui volunt parochos ita jure divino existere, ut episcopus in diversas diocesis suæ parochias solummodo mediatam jurisdictionem habeat: nam, ante parochiarum existentiam, immediatam habebat jurisdictionem in totam diocesim:

porro divisio parochiarum jurisdictionem ejus tollere non potuit : ergo. Vide *Confér. d'Ang. de la Hiér.*

COROLLARIUM PRIMUM.

Constat ex dictis, solos episcopos jus habere controversias circa fidem dirimendi. Probavimus enim 1° Christum instituisse in Ecclesia corpus docens; 2° potestatem ei dedisse cunctas fidei controversias infallibiliter dirimendi; 3° hanc potestatem plebi Christianæ non competere, nec principibus sæcularibus, nec simplicibus presbyteris, sive sint parochi, sive non : restat ergo ut soli episcopi eam habeant.

COROLLARIUM SECUNDUM.

Sequitur pariter ex dictis, episcopos non simpliciter habendos esse tanquam fidei testes, sed proprie loquendo tanquam judices; non solum enim testantur has aut illas veritates in deposito revelationis contineri, sed insuper decernunt eas fide divina esse credendas, et anathemate plectunt eos qui contrarium dixerint.

Quædam tamen sunt notanda, nempe 1° episcoporum esse invigilare in suis diœcesibus ne sana doctrina corrumpatur; 2° nascentem errorem denunciare, privatim aut publice, prout opportunum ipsis videbitur, ac reprimere teneri; 3° silentium circa novitatem exortam imponere posse etiam sub pœna excommunicationis, donec summus Pontifex, ad cujus judicium causam deferre debet, pronuntiaverit : at internum fidei actum episcopus exigere non potest in materiis nondum definitis, quia privilegio infallibilitatis non gaudet. Unicum quippe est tribunal certo infallibile in Ecclesia, scilicet corpus episcoporum capiti suo junctorum, et sola hujus tribunalis sententia internum fidei actum exigere potest.

4° In materiis controversis episcopus non habet jus cohibendi in sua diœcesi libertatem opinandi, sentiendi,

judicandi, discutiendi : attamen si contententes notas hæresis vel schismatis publice inurerent adversariis, ab eis exigere posset, etiam cum censuris, ut ab hujusmodi denominationibus abstinerent; quia solius est Ecclesiæ propositiones definire, et decernere quid sit hæreticum vel schismaticum.

5° Si dubium sit an propositio aliqua sit in materia controversa vel ad fidem pertineat, episcopus respectuosum præscribere potest silentium donec sententia Romani pontificis intervenerit, et tunc omnes parere tenentur, quia præsumptio est pro superiore.

6° In conciliis œcumenicis sententia per modum unius fertur, et omnes episcopi ad eam active tanquam iudices concurrunt, licet præcipua pars ad summum Pontificem, quatenus est caput Ecclesiæ, pertineat.

7° Si vero summus Pontifex dogmaticum ex cathedra ferat decretum, illudque ad omnes transmittat episcopos, docetur Romæ episcopos illud judicare non posse, quia jam est completum, ut iudicium, sed tantum illud acceptare. Eo sensu Clemens XI scripsit ad clerum Gallicanum qui arbitratus fuerat se bullam *Vineam Domini Sabaoth* judicare posse. (*Vide d'Argentré, Collect. Jud.* tom. 3, part. 2, pag. 453 et seq.)

CAPUT SECUNDUM.

DE MODO QUO AUCTORITAS ECCLESIE DOCENTIS EXERCERI
DEBET, UT ILLIUS DECISIO SIT INFALLIBILIS.

Quinque hic proponi possunt quæstiones : 1° qualis esse debeat unanimitas episcoporum, ut eorum sententia sit infallibilis ; 2° utrum episcopi per orbem dispersi controversias circa fidem infallibiliter dirimere possint ; 3° utrum in eo casu requiratur consensus eorum expressus, an vero tacitus sufficiat ; 4° quid de condemnatione

propositionum *in globo* sentiendum sit; 5° quænam sit auctoritas conciliorum. De his omnibus in quinque articulis dicemus.

ARTICULUS PRIMUS.

DE UNANIMITATE EPISCOPORUM UT SENTENTIA EORUM SIT INFALLIBILIS.

Duplex distingui potest episcoporum unanimitas, physica scilicet et moralis : dici posset episcopos physice unanimes esse, si omnes, ne uno quidem excepto, circa idem punctum consentirent : unanimitas autem est moralis, ubi multo major pars eorum in idem consentit.

Certum est 1° unanimitatem physicam non esse necessariam ut iudicium episcoporum sit infallibile ; alioquin nulla hæresis legitime damnata fuisset, nulla enim fuit quæ saltem aliquos patronos inter episcopos non habuerit : aliunde, sæpe difficile et aliquando impossibile est omnes episcopos assensum suum manifestare et suffragium emittere : ergo unanimitas moralis sufficit.

Certum est 2° minorem numerum episcoporum, cæteris contradicentibus, sententiam infallibilem proferre non posse ; nam infallibilitas corpori episcoporum promissa est : at minor numerus, majori oppositus, corpus illud non repræsentat, *ut evidens est* : ergo.

Sola *majoritas*, seu pluralitas suffragiorum, communiter sufficit in collegiis virorum deliberantium, ut feratur sententia quæ totius corporis esse censetur. Sic causæ terminantur in tribunalibus nostris, in publicis conventibus, etc. Attamen hæc dispositio est arbitraria, et alias formas homines statuere potuissent, sicut de facto aliquoties statutum est, v. g. pro electione papæ ; duo enim ex tribus vocibus necessario requiruntur (*les deux tiers*). Nullum est dubium quin Christus efficere potuerit ut sola pluritas sufficiat : sed, cum nihil circa hoc punctum expresse dixerit, ad constantem Ecclesiæ praxim recur-

rendum est, ut quid semper factum sit noscatur, et quid faciendum judicetur.

Certum est 3^o nullam habitam fuisse rationem, in sæculis præteritis, episcoporum numero evidenter inferiori reluctantium. Sic episcopi Ariani, Donatistæ, Nestoriani, Græci, etc. rejecti sunt velut hæretici aut schismatici.

Certum est 4^o Ecclesiam nunquam tulisse sententiam ob pluralitatem stricte sumptam; non quia judicavit talem sententiam futuram nullam, sed quia sapientius arbitrabatur in hujusmodi divisione opinionum nihil definire. Quæstio igitur ad hoc præcipue reducitur, an scilicet pars episcoporum notabiliter major, summo Pontifici conjuncta, privilegio infallibilitatis in decisionibus fidei certo gaudeat, ita ut unanimitas moralis non sit necessaria.

Duplicem unanimitatem episcoporum distinguunt Jansenistæ, unam antecedentem ad decretum, et alteram subsequentem. Fatentur unanimitatem antecedentem necessariam non esse, nec ordinarie possibilem; at contendunt unanimitatem subsequentem omnino necessariam esse. Vel, inquiunt, episcopi reluctantes ab Ecclesia rejiciuntur, vel non: si prius, perfecta est unanimitas, siquidem dissentientes jam non sunt de Ecclesia utpote excommunicati; si posterius, quæstio non censetur definita, cum reluctantes adhuc sint in Ecclesia. *His notatis, sit*

PROPOSITIO.

Pars notarie major episcoporum, summo Pontifici conjuncta, infallibilis est in decisionibus fidei, licet quidam episcopi ex adverso reclamant, nec nominatim excommunicentur.

Prob. Scriptura sacra, praxi Ecclesiæ, testimoniis Patrum, et rationibus theologicis.

1^o *Scriptura sacra.* Matth. xxviii, 20: *Ecce ego vobiscum sum*, etc. Unde sic. Infallibilitas his verbis promissa Apostolis et eorum successoribus, eos spectat quatenus sunt

corpus morale : ergo, ut iudicium illorum sit infallibile, requiritur tantum consensus hujus corporis : at ubi pars notabiliter major capiti juncta pronuntiat, sententia merito judicatur esse totius corporis : ergo.

2° *Praxi Ecclesiæ*. Ut hæretici habiti sunt Pelagiani, quibus decem et octo patrocinebantur episcopi; Donatistæ, quibus centum et quinquaginta; Ariani, quibus multo plures, etc. velut schismatici habentur Græci, non obstantibus tot episcopis, archiepiscopis et patriarchis causam eorum defendentibus eosque gubernantibus. Ergo.

3° *SS. Patrum testimoniis*. Patres concilii Ephesini sic aiunt : « Perabsurdum est ducentorum et decem sanctorum episcoporum synodo, quibus et universa Occidentalium sanctorum episcoporum multitudo, et per ipsos reliquus totus terrarum orbis consentit, triginta tantum numero sese opponere. » Idem habent S. Athanasius contra Arianos, S. Aug. contra Donatistas et Pelagianos, etc. Ergo, etc.

4° *Rationibus theologicis*. 1° Si majori episcoporum parti summo Pontifici junctæ standum non sit, unusquisque expendere debet an veritas cum majori vel cum minori numero episcoporum reperiatur, sicque admittenda erit via examinis privati cujus absurditatem demonstravimus. 2° Auctoritas a Christo Ecclesiæ concessa nihil prodesset, quia fere nunquam infallibiliter pronuntiaret. 3° Major pars episcoporum præcipere non posset episcopis reluctantibus ut assentirent decreto, et tamen illos damnare, imo et excommunicare valeret, propter inobedientiam; alioquin decisio fidei impossibilis esset. Ergo.

Hinc 1° decretum a parte episcoporum notabiliter majori summo Pontifici juncta, latum, eo ipso ad fidem pertinet, quamvis plures alii episcopi adversus illud reclamant.

Hinc 2° prædicto decreto semel lato, omnes, sive laici, sive presbyteri, sive episcopi, quidquid hucusque opinati fuerint, sincere et interne adhærere tenentur.

Hinc 3^o qui postea pertinaciter reluctantur, sunt hæretici, licet nominatim non excommunicentur; articulo enim catholicæ fidei reipsa adversantur.

Nec dici potest, definitionem nondum esse consummatam, quia Ecclesia reluctantes e sinu suo non ejicit; nam ejici possunt, cum judicio decretorio obsistant: ergo constat veritatem apud eos non esse. Si autem non ejiciantur nominatim, id fit ex prudentia, ne scilicet majora inde nascantur scandala, ne ipsi fiant contumaces et fideles in ruinam suam inducant, etc. at pessime inferretur rem non esse finitam.

Quæritur utrum mera episcoporum pluralitas ad decisionem fidei sufficeret?

R. Mera pluralitas a summo Pontifice sejuncta non sufficeret; merito namque dici non posset totum corpus tunc repræsentari: sed mera pluralitas summo Pontifici juncta, totum corpus episcopale sufficienter repræsentare videtur: sic corpora politica et tribunalia repræsentari censentur. Cum tamen inde maxima exsurgerent incommoda, *ut patet*, præsumere licet Christum non permissurum ut episcopi sic dividantur; vel si de facto ita dividerentur, majoritas a ferendo fidei decreto abstineret, quemadmodum pluries a pronuntiando abstinuerunt patres Tridentini, et tunc controversia non terminata esset: talis diu fuit quæstio Rebaptizantium olim famosissima inter summum pontificem Stephanum et S. Cyprianum.

ARTICULUS SECUNDUS.

AN EPISCOPI PER ORBEM SPARSI CONTROVERSIAS CIRCA FIDEM INFALLIBILITER DIRIMERE POSSINT.

Quæstio non est utrum episcopi per orbem dispersi omnes controversias fidei judicare debeant, sed utrum infallibiliter eas dirimant, ex hypothesis quod judicent. Nonnulli novatores, Jansenii et *Quesnel* asseclæ, contendunt solum concilium generale quæstiones fidei obscuras

infallibiliter dirimere posse; libenter tamen concedunt Ecclesiam dispersam, seu episcopos per orbem diffusos, in quæstionibus claris et apertis infallibiliter judicare. Dicunt autem eas quæstiones esse apertas, quæ communiter de fide credebantur ante suscitatum hæresim, qualis erat divinitas Verbi cum exortus est Arius; eas vero esse obscuras in quibus hinc et inde disputatur in scholis, salva fidei substantia. Juxta catholicos, Ecclesia dispersa aliquando a ferendis judiciis abstinere; quia, ex variis circumstantiis, prudenter æstimat necessarium esse concilium generale. At quotiescumque sententiam emittit, infallibiliter judicat, nec quisquam sub prætextu obscuritatis dissentire potest: cum quibus sit

PROPOSITIO.

Episcopi per orbem dispersi, summo Pontifici juncti, quascunque fidei controversias, sive claras, sive obscuras, infallibiliter judicant, seu infallibiles sunt in omnibus decisionibus suis.

Prob. Scriptura sacra, traditione et ratione.

1º *Scriptura sacra.* Matth. xxviii, 20: *Ecce ego vobiscum sum*, etc. Christus promisit infallibilitatem corpori docenti in Ecclesia: verum episcopi dispersi, sicut et congregati, corpus docens in Ecclesia constituunt: ergo.

Insuper Christus testatur se *omnibus diebus* adfuturum esse cum Apostolis docentibus et eorum successoribus, usque ad consummationem sæculi: his præsertim verbis nititur privilegium infallibilitatis quo munita est Ecclesia docens: at impossibile est episcopos *omnibus diebus* in unum coadunatos remanere. Et reipsa Christus non dixit: *Congregemini*, et ego ero vobiscum, sed: *Ite, docete omnes gentes*, id est: *Dispergamini per mundum universum, ecce ego vobiscum sum omnibus diebus.* Ergo.

2º *Traditione.* Pelagiani et Semipelagiani semper habiti sunt ut hæretici a tempore S. Aug. usque ad nos: attamen nullum concilium generale adversus illos fuit cele-

bratum, sed tantum concilia particularia, et præsertim duo, unum Africanum et Arausicanum II. Duo hæc concilia « missa sunt ad sedem Apostolicam, inde etiam » rescripta venerunt; causa finita est, utinam aliquando » finiatur error! » S. Aug. Serm. 131 de Verbis Evang. Joan. Porro nulla unquam fuit hæresis magis intricata quam Pelagiana et Semipelagiana : ergo.

Aliunde, per tria priora Ecclesiæ sæcula, usque ad concilium Nicænum I, anno 325 celebratum, multæ damnatæ sunt hæreses, et sancti Patres omnes hæreticos ex auctoritate Ecclesiæ convincebant : ergo velut certum habebatur Ecclesiam dispersam infallibilitate gaudere.

3^o *Ratione.* 1^o Non concilium generale, sed episcopi per orbem sparsi populum Christianum doctrina pascunt : unde si errori obnoxii essent docendo, contingere posset majorem Ecclesiæ partem a veritate deficere : tunc infallibilitas ejus passiva cum activa destrueretur, catholicitas periret et portæ inferi adversus illam prævalerent : porro hæc consecraria admitti nequeunt : ergo.

2^o Difficillimum et sæpe impossibile est concilium œcumenicum congregare : attamen necesse est ut tribunal ad terminandas quæstiones fidei destinatum semper existat, alioquin error in Ecclesia Dei serpere posset, et nullum adesset medium quo efficaciter cohiberetur : ergo necesse est ut Ecclesia dispersa privilegio infallibilitatis gaudeat, non solum in quæstionibus manifestis, sed in obscuris et etiam intricatis; facilius enim error in his quam in aliis grassaretur et obfirmaretur : sufficiens igitur remedium præparare debuit Christus contra hujusmodi malum : atqui nullum aliud excogitari potest præter infallibilitatem jugiter in Ecclesia permanentem et ad quascumque causas se extendentem : ergo.

Solvuntur objectiones.

Obj. 1^o. S. Aug. pluribus in locis excusat resistantiam S. Cypriani decreto S. Stephani, ex eo quod concilio œcumenico obtemperare paratus esset : ergo non existi-

inabat auctoritatem Ecclesiæ dispersæ sufficientem esse ad finiendam controversiam de baptismo ab hæreticis collato.

R. 1º. Dist. ant. S. Aug. S. Cyprianum excusat ex eo quod paratus esset obtemperare concilio œcumenico et auctoritati Ecclesiæ dispersæ, sufficienter sibi notæ, concedo; ex eo quod soli concilio œcumenico obtemperare vellet, nego ant. Nam ibi S. Doctor, l. 1 de Baptismo, cap. 18, agnoscit quod *postea totus catholicus orbis amplexus sit* opinionem S. Cypriano oppositam; eo tempore igitur nondum hac de re clara apparuerat totius Ecclesiæ dispersæ consensio. Præterea, expresse testatur idem S. doctor, l. 2 de Bapt. c. 4, S. Cyprianum semper paratum fuisse auctoritati Ecclesiæ cedere, et forsitan cessisse antequam moreretur : atqui tamen nullum tunc existerat concilium generale in quo error Rebaptizantium fuisset damnatus : ergo.

R. 2º. Nego conseq. Libenter enim admittimus tales contingere posse circumstantias quod necessarium sit concilium generale, non quidem ut sententia Ecclesiæ sit infallibilis, sed ut evidentius appareat et omnis disputandi prætextus tollatur, ac tutius pax inter contententes restituatur : porro gravissimæ sub omni respectu erant circumstantiæ in quibus versabatur Ecclesia relative ad quæstionem de Rebaptizantibus; omnes enim Ecclesiæ Africæ, Numidiæ, Mauritanianæ, Ponti et fere totius Orientis opinionem S. Cypriani tenebant; cæteræ vero summo Pontifici Stephano hanc opinionem damnantem adhærebant : vix igitur urgentiores excogitari possent circumstantiæ ut concilium generale sit necessarium. Ergo.

Obj. 2º. Sæpe concilia œcumenica articulos ab Ecclesia dispersa definitos de novo tractarunt, v. g. errores Nestorii, Eutychii, Monothelitarum, etc. jam proscriptos proscripserunt : ergo persuasum habuerunt Ecclesiam dispersam privilegio infallibilitatis non donari.

R. Dist. ant. Sæpe concilia œcumenica articulos ab Ecclesia dispersa jam definitos tractarunt, ut eos confirma-

rent, *conc.* ut eos tanquam incertos novo examini subjicerent, *nego ant.* Equidem sæpe concilia œcumenica articulos ab Ecclesia dispersa, imo a conciliis antecedentibus etiam generalibus definitos de novo tractarunt, ut iterum eos confirmarent, contumaciam hæreticorum efficacius contunderent, eorum animos ad unitatem facilius inclinarent et dogmata Christiana magis ac magis elucidarent : sic secunda synodus Constantinopolitana quatuor priora concilia generalia confirmavit, et tamen de illorum auctoritate non dubitavit; sic concilium Trident. multa definivit quæ in antiquis Ecclesiæ conciliis fuerant decreta : atqui patres Tridentini de antiquorum conciliorum infallibilitate non dubitabant : ergo.

Exempla nobis allegata, ex damnatione errorum jam proscriptorum petita, pro responsione nostra pugnant; nam concilium Ephesinum et concilium Chalcedonense definierunt capita quæ jam erant de fide, nempe concilium Ephesinum unicam in Christo esse personam, et concilium Chalcedonense duas in eodem Christo esse naturas. Ergo.

COROLLARIUM.

Hinc manifestum est appellationem ad futurum concilium generale esse illicitam, quando de morali episcoporum dispersorum unanimitate constat. Nam 1^o hæc unanimitas est infallibilis, ex dictis. 2^o Talis appellatio est illusoria; saltem enim difficillimum et sæpe impossibile est concilium generale congregare; interea errores legitimam condemnationem non formidantes, impune grassarentur. 3^o Eadem est Ecclesia dispersa et congregata; ridicule autem fit appellatio ab Ecclesia ad Ecclesiam. 4^o Talis appellatio inter catholicos est insolita, a Pelagianis in quinto sæculo fuit excogitata, a Lutheranis in decimo sexto fuit renovata. 5^o Pelagianos futurum concilium invocantes sic confutavit S. Aug. lib. 4 ad Bonifac. cap. ultimo, n. 34 : « Quid est ergo quod dicunt, » *Simplicibus episcopis sine congregatione synodi in locis suis sedentibus, extorta subscriptio est ?*... Aut vero con-

» gregatione synodi opus erat, ut aperta perniciēs dam-
 » naretur : quasi nulla hæresis aliquando nisi synodi
 » congregatione damnata sit ! cum potius rarissimæ in-
 » veniantur, propter quas damnandas necessitas talis ex-
 » stiterit ; multoque sint atque incomparabiliter plures
 » quæ, ubi exstiterunt, illic (Romæ) improbari damnari-
 » que meruerunt, atque inde per cæteras terras devi-
 » tandæ innotescere potuerunt. » Ergo.

ARTICULUS TERTIUS.

UTRUM AD INFALLIBILE FIDEI JUDICIUM EXPRESSUS REQUIRA-
 TUR EPISCOPORUM CONSENSUS, AN VERO TACITUS SUFFICIAT.

Tacitus episcoporum consensus est vera eorum adhæ-
 sio alicui circa fidem definitioni, sed non expresse ma-
 nifestata. Sensus præsentis quæstionis non est, an hu-
 jusmodi adhæsiō infallibilem fidei definitionem efficiat ;
 libenter id nobiscum admittunt Janseniani et Quesnel-
 listæ ; sed an silentium episcoporum sufficiens sit indi-
 cium eos propositioni sibi notæ adhærere, seu tacite
 consentire : partem affirmantem docuerunt abbas *de*
Saint-Cyran, in opere suo de Hierarchia ecclesiastica, sub
 nomine Petri Aurelii, et *Quesnel*, *Tradition de l'Eglise*
Romaine. Postquam vero constitutio *Unigenitus* fuit pro-
 mulgata, *Quesnel* et tota Jansenianorum caterva, ut ab
 illius auctoritate se expedirent, conclamarunt eam ab
 episcopis per orbem sparsis sufficienter non fuisse ac-
 ceptatam, aut saltem id ex silentio eorum concludi non
 posse. Contra quos sit

PROPOSITIO.

*Quoties dogma aliquod a Romano pontifice definitum ad
 omnes episcopos dirigitur, et nulla alicujus ponderis ex-
 surgit eorum reclamatio, tunc tacitus omnium moraliter
 consensus necessario est præsumendus, et infallibilis est
 definitio.*

Prob. Scriptura sacra, praxi Ecclesiæ, et ex S. Aug.

1° *Scriptura sacra.* Matth xvi, 18 : *Tu es Petrus, et super hanc petram ædificabo Ecclesiam meam, et portæ inferi non prævalebunt adversus eam.* Unde sic. Nunquam error prævalere potest in Ecclesia : at si hujusmodi definitio infallibilis non esset, error prævaleret in Ecclesia, cum nulla tunc existeret via ad eum præcavendum aut rejiciendum : ergo.

2° *Praxi Ecclesiæ.* Omnes fatentur errores Pelagianorum et Semipelagianorum legitime fuisse proscriptos : atqui nulla existit declaratio episcoporum, sive congregatorum, sive dispersorum, expressa contra illos. Idem dicendum est de erroribus Baii et Molinosi, de quinque propositionibus Jansenii quæ ab adversariis habentur ut hæreticæ. Ergo.

3° *Ex S. Aug.* Epist. 55, alias 119, c. 19, ad Januarium : « Quæ sunt contra fidem vel bonam vitam, non approbat, nec tacet, nec facit » (Ecclesia). Nisi autem præfata fidei definitio infallibilis esset, Ecclesia ea quæ sunt contra fidem et bonam vitam taceret. Ergo.

Ut autem silentium episcoporum velut sufficiens indicium taciti eorum consensus haberi debeat, tres requiruntur conditiones, scilicet : 1° ut fidei decretum de quo agitur ipsis innotescat, decretum enim ignotum nec approbare nec rejicere possunt ; 2° ut ad eos tanquam regula fidei totam obligans Ecclesiam dirigatur vel perveniat ; non enim reclamare tenentur episcopi contra errores particulares, quia doctrina Christi non periclitatur in Ecclesia ; 3° ut illud decretum fidem, mores aut disciplinam generalem et essentialem respiciat ; nam de his solis Ecclesia infallibiliter judicat, *ut infra dicemus* : si ergo de aliquo facto personali vel de rebus politicis ageretur, nihil ex silentio episcoporum concludi posset.

Solvuntur objectiones.

Obj. 1°. Semper aliquis erit locus timendi ne omnes episcopi dispersi definitionem Apostolicam non cognoverint, aut eam non legerint, aut cum debita meditatione

non examinaverint, aut suam oppositionem nondum manifestare potuerint : ergo ex eo quod sileant, merito concludi non potest eos consentire.

R. 1°. Retorqueo argumentum. Semper erit locus timendi ne omnes episcopi ad concilium generale non fuerint debito modo convocati, aut rem cum debita attentione non expenderint, aut aliqua consideratione humana ad consentiendum inducti fuerint, etc. ergo de sufficienti illorum consensu, licet expresso, nunquam constabit.

Quælibet auctoritas humana eodem ratiocinio rueret, quia semper aliqua hujusmodi fingi posset hypothesis.

R. 2°. Nego ant. Nullus enim est timendi locus ubi certitudo moralis habetur : at si definitio Apostolica ad omnes episcopos directa fuerit, quod facile constabit, moraliter certum erit eos illam accepisse, legisse et sufficienter examinasse; supponi quippe non potest omnes episcopos muneri suo simul deesse, propter continuam Christi assistentiam. Quamvis autem nullum præcise assignari possit tempus ut oppositio refragantium manifestari possit, certum est tamen quod longum esse non debeat. Præterea, Christus dare debuit regulam fidei omnibus obviam : verum si examen conditionum ad sufficientiam consensus episcoporum requisitarum omnibus necessarium esset, Christus non dedisset regulam omnibus obviam. Ergo.

Inst. Qui tenent summum Pontificem esse infallibilem, ipsius decreta accipiunt sine examine : at plerique episcopi tenent summum Pontificem, etc. merito igitur timendum est ne plerique definitionem Apostolicam sufficienter non examinaverint.

R. Nego maj. Qui enim tenent summum Pontificem esse infallibilem, hanc doctrinam habent tantum ut probabilem, non ut articulum fidei : debent ergo nihilominus definitionem Apostolicam examinare.

Dicunt quidem Jansenistæ plerosque episcopos librum Jansenii non legisse ; sed omnes illius sensum agnoscere potuerunt, tum examinibus et discussionibus Romæ alibi que celebratis, tum ipsis Jansenistarum confessis. Ergo.

Fatendum est insuper Christum prævidisse fore ut plerique episcopi crederent summum Pontificem esse infallibilem, et tamen infallibilitatem corpori episcoporum certo promisit: quidquid sit ergo de illa infallibilitate, negari non potest decisiones episcoporum infallibiles esse. Ergo.

Obj. 2º. Summus pontifex Honorius, in epistola ad Sergium, patriarcham Constantinopolitanum, errorem Monothelitarum docuit: atqui tamen episcopi contra hanc epistolam non reclamarunt: ergo.

R. 1º. Non constat Honorium errorem Monothelitarum docuisse; multi enim ipsius epistolas ad Sergium, Sophronium et Cyrillum ab omni labe hæresis excusant. Sergius ad eum scripserat litteras dolo plenas, quibus illi persuadere nitebatur pro bono et pace Ecclesiæ maxime necessarium esse ut nec *una* nec *duplex* in Christo *voluntas et operatio* diceretur: his testimoniis Sergii nimis credens Honorius, altum circa hanc quæstionem præscripsit silentium; silentium istud magnum veræ fidei attulit detrimentum, sed præter Honorii intentionem. Ergo 1º.

R. 2º. Nego conseq. Etiam si enim Honorius in epistolis suis errorem Monothelitarum docuisset, nihil contra propositionem nostram ex silentio episcoporum inferri posset: nam 1º decisio Honorii non erat dogmatica, siquidem non definiebat quid esset credendum aut rejiciendum; 2º ad omnes ecclesias non fuit directa: erat e contra omnibus fere episcopis ignota, tum in Oriente, tum in Occidente; nam Orientales Monothelitis addicti, eam ad confirmandum errorem suum nunquam invocaverunt. Quando Heraclius silentium per Ecthesim suam præscripsit, undique contra illam reclamatum est: atqui non minus contra Honorii decisionem reclamatum esset, si cognita fuisset. Similiter in Occidente Joannes IV, Theodorus et Martinus I, summi pontifices Romani, Ecthesim Heraclii et Typum Constantii damnaverunt, epistolas autem Honorii ad Sergium ne quidem commemorant: ergo prædicta Honorii decisio quasi so-

pita remansit per quinquaginta annos, usque ad sextam synodum generalem in qua fuit reprobata. Non mirum igitur si episcopi tacuerint. Ergo.

Obj. 3^o. Clerus Gallicanus, in celebri censura anni 1700, damnavit eorum sententiam qui docebant silentium episcoporum circa aliquam doctrinam ut illius approbationem esse habendum. Ergo.

R. Distinguo ant. Et ibi agebatur de doctrina ab aliquo theologo privato asserta, *concedo*; agebatur de constitutione dogmatica, *nego ant.* Equidem clerus Gallicanus merito damnavit eorum sententiam qui tenebant episcopos novas theologorum opiniones approbare censi, eo ipso quod circa illas tacerent; inde enim sequeretur Ecclesiam approbare multas opiniones contradictorias, falsas, scandalosas et hæreticas, aliunde fere occultas, quæ sine periculo in lucem prodirent: nunquam vero clerus Gallicanus definire intendit silentium episcoporum circa constitutionem dogmaticam, legitime promulgatam et conditionibus supra requisitis vestitam, sufficiens non esse indicium veræ approbationis. Ergo.

ARTICULUS QUARTUS.

DE CONDEMNATIONE PROPOSITIONUM IN GLOBO.

Duplici modo perversæ propositiones damnari possunt, scilicet speciali modo, quando singulis sua nota assignatur et declaratur, v. g. primam esse erroneam, secundam scandalosam, tertiam hæreticam, etc. vel *in globo*, ut aiunt, id est, si omnes damnentur velut respective erroneæ, scandalosæ, hæreticæ, etc. Eo modo 101 propositiones *Quesnel*, ex libro *les Réflexions morales*, etc. in celebri bulla *Unigenitus*, a Clemente XI damnatæ sunt anno 1713. Hinc Jansenii et *Quesnel* asseclæ novam occasionem sumpserunt Pontificiæ hujus constitutionis auctoritatem declinare, contendentes Ecclesiam propositiones sic *in globo* damnare non posse. Contra quos sit

PROPOSITIO.

Ecclesia est infallibilis in damnatione propositionum in globo.

Prob. Scriptura sacra, praxi Ecclesiæ et ratione.

1° *Scriptura sacra. Euntes, docete omnes gentes, etc.* Unde sic. Christus suam promisit assistentiam Ecclesiæ, ut infallibiliter doceret et judicaret; modum autem non determinavit: quocumque modo igitur Ecclesia sententiam suam aperiat, infallibiliter quæstiones judicat. Ergo 1°.

2° *Praxi Ecclesiæ.* « Si quid tota per orbem frequentat Ecclesia, quin ita faciendum sit disputare insolentissimæ insanix est, » ait S. Aug. Epist. 54, alias 118, cap. 5. Atqui mos receptus est in Ecclesia, sive congregata, sive dispersa, propositiones sic *in globo* condemnandi. 1° In Ecclesia congregata; in concilio enim Nicæno I damnatus est liber Arii cui titulus Thalia; in concilio generali V tria famosissima Theodori, Theodoretii et Ibæ Capitula proscripta sunt; in VI damnati sunt libri Origenis: *a fortiori* propositiones ex illis libris extractæ sub pluribus notis respective damnari potuissent. Sic pariter concilium Constantiense, sess. 8, 45 Wiclefi articulos *in globo* proscripsit ut erroneos, scandalosos, blasphemos, et sess. 15, eodem modo damnavit 35 propositiones Joannis Hus. Ergo 1°. 2° A multo tempore idem usus propositiones *in globo* condemnandi viget in Ecclesia non congregata; eo modo Sixtus IV damnavit Petrum de Osma, Leo X Lutherum, Pius V, Gregorius XIII et Urbanus VIII Baium, Innocentius XI mysticas et exitiosas Molinosi assertiones, Innocentius XII 23 propositiones ex lib. illust. *de Fénelon Explication des maximes des saints* excerptas, etc. Universa Ecclesia has proscriptiones approbavit. Ergo.

3° *Ratione.* 1° Quando Ecclesia speciales singulis propositionibus notas assignat, infallibiliter judicat, secun-

dum adversarios : atqui non minus infallibiliter judicare debet quando eas *in globo* condemnat ; nam assignatio notæ unicuique propositioni Ecclesiam non facit, sed supponit infallibilem. Ergo.

4^o Ille modus propositiones veræ doctrinæ oppositas damnandi sæpe maximæ est utilitatis ; est enim promptior et expeditior, multo minus præbet locum cavillationibus hæreticorum. Unde *Bossuet, Second écrit sur le livre de Fénelon*, n. 2 : « Les condamnations générales » sont utilement pratiquées dans l'Église, pour donner » comme un premier coup aux erreurs naissantes, et » souvent même le dernier, suivant l'exigence du cas » et le degré d'obstination qu'on trouve dans les es- » prits. » Ergo legitime condemnari possunt propositiones *in globo*. Imo infallibiliter condemnari posset liber velut continens propositiones respective falsas, erroneas, scandalosas, etc. ad hanc enim conclusionem evidenter ducunt rationes a nobis allatæ, et sic damnata sunt tria Capitula.

Solvuntur objectiones.

Obj. 1^o. Illa judicandi forma admitti non potest in Ecclesia, quæ nihil certum et determinatum proponit credendum : atqui talis est condemnatio propositionum *in globo* : ergo.

R. Nego min. Dici enim non potest nihil certum et determinatum nobis proponi credendum, si constet propositiones sic damnatas saltem sub aliquo respectu esse malas : atqui tunc constat omnes illas propositiones saltem sub aliquo respectu esse malas ; posito quod legitima sit condemnatio, eo ipso constat nullam ex his propositionibus esse cui saltem una ex notis in genere assignatis non conveniat : ergo. Rem exemplo sic illustrat *de la Hogue* : « Supponatur, inquit, de permultis » cibis alicui apposis, sex peritissimos medicos gene- » ratim declarare ex eis unum esse capiti noxium, alios » stomacho vel visceribus, quosdam veneno infectos, et » cæteros prorsus insalubres : profecto qui et sanitati et

» suæ vitæ providere vellet vir sapiens, non obtenderet
 » vagam nimis esse illam medicorum assertionem quam
 » ut ei indulgere debeat. » Ergo *a pari* obtendere non
 debent fideles nimis vagam esse condemnationem pro-
 positionum *in globo*, ut eas rejicere teneantur.

Inst. 1º. Prædicta propositionum condemnatio non
 potest reputari infallibilis, nisi episcopi in parte saltem
 notabiliter majori illi assentiant: at, in hypothesi nostra,
 episcopi non assentiunt tali condemnationi saltem per
 modum unius; unus enim talem habebit propositionem
 ut falsam, alius ut scandalosam, alter ut hæreticam,
 sicque de cæteris, et forte circa nullam plene sibi con-
 sentient. Ergo.

R. 1º. Nego min. ejusque probationem. Etiam si enim epi-
 scopi non sibi consentirent in assignando notas conve-
 nientes singulis propositionibus, nihilominus sufficienter
 unanimes essent circa ipsam propositionum condemna-
 tionem, siquidem omnes tenerent nullam ex dictis pro-
 positionibus esse quæ unam saltem ex notis assignatis
 non mereretur, et vicissim nullam ex notis assignatis
 quæ saltem uni ex propositionibus damnatis non conve-
 niret: porro hæc unanimitas sufficit ut sana doctrina
 custodiatur integra et error repellatur.

Præterea, ut damnatio propositionum *in globo* sit in-
 fallibilis, vel episcopi moraliter unanimes esse debent in
 assignando notas singulis propositionibus, quod solus
 Deus scit, vel non: si id non requiratur, nulla est diffi-
 cultas; si requiratur, Christus assistentia sua providebit
 ut existat; nam promisit se cum Ecclesia docente semper
 adfuturum, et modum ferendi judicium non determina-
 vit. Fideles ergo inquirere non debent qua ratione, quo
 motivo episcopi circa aliquam propositionem consen-
 tiant: humiliter eos audiant et prompto animo eis obe-
 diant, hoc ipsis ad salutem sufficit.

Inst. 2º. Quando propositiones damnantur *in globo*, plu-
 rimæ ex illis notam hæresis non merentur: ergo adhuc
 propugnari possunt.

R. Dist. consequens. Adhuc propugnari possunt, id est,

qui eas seorsim sumptas propugnaret, non esset formaliter hæreticus, *conc.* non esset erga Ecclesiam rebellis, *nego conseq.* Etenim qui, post hujusmodi condemnationem, propositiones sejungeret, contenderetque notam hæresis his aut illis non applicari et eas propugnaret, non esset formaliter hæreticus; nam fidei catholicæ strictæ sumptæ non adversaretur: sed ipsius conditio non ideo melior esset; rebellis enim erga Ecclesiam et reus peccati mortalis fieret. Si autem omnes propositiones damnatas *in globo* generatim defenderet, formaliter hæreticus foret, ex hypothesi quod nota hæreseos assignata esset sine alia determinatione, quia fidem catholicam tunc directe pugnaret: ergo, etc.

ARTICULUS QUINTUS.

QUÆNAM SIT AUCTORITAS CONCILIORUM SEU ECCLESIAE CONGREGATÆ.

Concilium est legitima episcoporum congregatio, ad deliberandum et judicandum de iis quæ ad fidem, mores aut generalem Ecclesiæ disciplinam pertinent.

Concilium vel generale est, vel particulare. Concilium generale seu œcumenicum est illud quod universam legitime repræsentat Ecclesiam; particulare vero est illud quod aliquam tantum Ecclésiæ partem repræsentat. Potest esse nationale, vel provinciale: est nationale, si omnes episcopi ejusdem regionis seu regni aut imperii, sub præsentia patriarchæ vel primatis, legitime convocentur: est autem provinciale, quando ex omnibus ejusdem provinciæ ecclesiasticæ episcopis metropolitano junctis componitur. De concilio generali præcipue nobis dicendum est.

Per concilium generale non intelligenda est multitudo episcoporum cum Romano pontifice conjuncta, alioquin nullum esset discrimen essentielle inter concilium et Ecclesiam dispersam. Concilium generale recte definitur: *Coetus episcoporum nomine totius Ecclesiæ congrega-*

torum, ad illam legitime repræsentandam, et ad tractandum de fide, moribus aut disciplina. Quatuor inprimis circa concilia generalia inquiri possunt, nempe: 1° quo jure sint instituta; 2° quæ requirantur conditiones ut sint œcumenica; 3° quænam sit eorum auctoritas; 4° quæ necessitas. De his in quatuor paragraphis breviter dicemus, et quintum de conciliis particularibus subjungemus.

§ I. — De jure quo instituta sunt concilia œcumenica.

Jure tum naturali tum divino instituta sunt concilia. 1° *Jure naturali*; quælibet enim societas numerosa potest jure naturali, saltem convocante legitimo principe, per membra a se deputata cœtum generalem congregare qui illam repræsentet. Actus hujusmodi cœtus ab universa societate emanasse censentur, et membra absentia pariter obligant: porro Ecclesia, utpote societas perfecta, idem jus habet: ergo concilia generalia jure naturali instituta videntur, id est, ex constitutione Ecclesiæ sequuntur.

2° *Jure divino*. Nam apud Matth. XVIII, 20, Christus dicit: *Ubi enim sunt duo vel tres congregati in nomine meo, ibi sum in medio eorum*: atqui hæc verba, ex contextu, Ecclesiam congregatam spectare videntur; immediate enim ante ea Christus dixerat: *Si Ecclesiam non audierit, sit tibi sicut ethnicus et publicanus. Amen dico vobis: Quæcumque alligaveritis super terram, etc.*

Universa traditio hunc textum sic intellexit, v. g. concilium Chalcedonense, in quo plus quam quingenti sederunt episcopi; concilium Constant. II; item Cœlestinus papa, ad patres concilii Ephesini scribens, etc. Ergo.

Insuper certum est, *ut infra demonstrabitur*, concilia generalia privilegio infallibilitatis gaudere: at illud privilegium a solo Christo accipere potuerunt: ergo a Christo fuerunt instituta.

§ II. — De conditionibus requisitis ut concilia sint œcumenica et legitima.

Triplicis generis requiruntur conditiones ut concilia sint œcumenica et legitima; aliæ enim spectant eorum convocationem, aliæ celebrationem, et aliæ exitum.

1^o *Quoad convocationem*, tres iterum sunt conditiones de jure ordinario requisitæ: 1^a ut pontifex Romanus episcopos convocet vel convocationi eorum consentiat; ille enim solus episcopus legitime convocare potest, qui ratione dignitatis primus est et universalem habet jurisdictionem: atqui talis est pontifex Romanus: ergo. Unde, si aliquoties principes concilia œcumenica convocaverunt, id annuente pontifice Romano fecerunt, alioquin convocatio fuisset nulla. Alius princeps facere non posset quod olim fecerunt imperatores, quia nullus fere omnes episcopos in ditionibus suis habet.

2^a Ut major pars episcoporum non reclamet. Concilium enim generale universam repræsentare debet Ecclesiam: at universam repræsentare non potest Ecclesiam, nisi saltem major pars episcoporum ei annuat: ergo.

3^a Ut omnes episcopi communionem cum Romano pontifice habentes convocentur; nam jure divino omnes æqualem habent potestatem de controversiis circa fidem judicandi: ergo nullius convocatio negligi potest quin jus divinum lædatur.

Dixi, *de jure ordinario requisitæ*; quia convocatio de essentia conciliorum non videtur: in societate enim civili magistratus legitime judicant, quamvis specialiter convocati non fuerint; cur ergo episcopi recte judicare non possent, si de facto coadunarentur in numero sufficienti ut totam repræsentarent Ecclesiam, aut si, sede Romana vacante vel a pontifice dubio occupata, a cardinalibus convocarentur? Verum in eo casu concilium non foret œcumenicum, nisi accedente consensu aliorum episcoporum qui convocare debuissent.

2^o *Quoad celebrationem*, omnes catholici docent: 1^o præ-

sidentiam ad pontificem Romanum jure divino pertinere; certum est enim illum esse jure divino Christi vicarium, caput totius Ecclesiæ et supremam in illa habere auctoritatem, *ut mox probaturi sumus*; aliunde unanimi traditione constat pontificem Romanum omnibus conciliis generalibus per se aut per legatos suos præfuisse, aut saltem auctoritate sua ea confirmasse, antequam haberentur ut œcumenica. 2º Omnes pariter fatentur requiri episcopos in numero sufficienti ut universa Ecclesia censeatur repræsentata: non quidem necesse est ut major pars episcoporum congregetur, alioquin Ecclesia non esset repræsentata, sed congregata; at numerus episcoporum admodum parvus, sex, v. g. aut decem, sufficienter totum Ecclesiam repræsentare non judicaretur. 3º *Quoad exitum*, tres requiruntur conditiones, scilicet, ut sit libertas, ut res conciliariter tractentur, et ut confirmatio summi Pontificis accedat.

1º *Ut sit libertas*. Nam episcopi agere debent humano modo: at humano modo non agerent si vi opprimerentur, fraude aut captionibus deciperentur. Aliunde totam Ecclesiam non repræsentant, nisi cæteri episcopi decretis eorum subscribere præsumantur: at episcopi per orbem dispersi non parati sunt subscribere decretis concilii cujus patres sufficienti non pollent libertate. Hinc nullius auctoritatis est falsa synodus Ephesina, vulgo dicta *latrocinium Ephesinum*, anno 449 habita; in ea quippe nulla exstitit libertas. Disocorus, patriarcha Alexandrinus, præses et alii Eutychiani ejus fautores vim aliis patribus intulerunt, et plagis in ipso concilio Flavianum, patriarcham Constantinopolitanum, affecerunt. Ergo.

Inde tamen concludere non licet majorem numerum episcoporum a vera fide, etiam ob metum mortis, decidere posse; nam promissiones Christi sunt absolutæ, ac proinde cum tali defectione conciliari non possent: si ergo contingeret aliquam synodum ex majori numero episcoporum totius orbis coalescere, tunc nec minis, nec plagis, nec fraude aut deceptionibus a vero deflecteret.

2º *Ut res conciliariter tractentur*, et consueta adhibeantur

media ad veritatem detegendam, scilicet studium, collationes, disputationes, etc. alioquin Spiritus Dei tentaretur; ut ferantur decreta totam Ecclesiam respicientia, cum obligatione credendi, non vero tantum exponantur motiva, ut sæpe fit, v. g. in capitibus concilii Trid. canones præcedentibus.

3° *Ut confirmatio summi Pontificis accedat*: dici enim non potest concilium totam Ecclesiam repræsentare donec consensus supremi Pontificis decretis ejus accesserit: ergo.

Queritur qua via constare possit omnes conditiones ad concilium œcumenicum requisitas fuisse adimpletas?

R. Duplici via id constare potest, scilicet, 1° via examinis, singulas condiciones percurrendo, et attendendo an revera adimpletæ fuerint, quod sæpe non difficile est doctis. 2° Alia est via brevior omnibus, sive doctis sive indoctis, pariter aperta, videlicet totius Ecclesiæ acceptatio; quando enim constat aliquod concilium per orbem generaliter haberi ut œcumenicum, certum est condiciones necessarias adimpletas esse, alioquin error in Ecclesia prævaleret. Ergo.

§ III. — De auctoritate concilii generalis.

PROPOSITIO.

Concilium œcumenicum ex institutione Christi infallibiliter judicat.

Prob. Scriptura sacra, fide Ecclesiæ, SS. Patrum testimoniis et adversariorum consensu.

1° *Scriptura sacra.* Ex pluribus enim textibus certum est corpus docens in Ecclesia infallibilitate gaudere: ergo pariter concilium generale est infallibile; nam, ex definitione, universam repræsentat Ecclesiam: illusorie autem diceretur universam Ecclesiam repræsentare, si iudicia ipsius errori forent obnoxia. Ergo. 1°.

2° *Fide Ecclesiæ.* Quod semper, ubique et ab omnibus in Ecclesia habitum est de fide, de fide est: atqui sem-

per, ubique et ab omnibus habitum est de fide concilia œcumenica infallibilia esse; a tempore enim Apostolorum quæstiones fidei delatæ sunt ad concilia œcumenica, quorum decreta sub pœna anathematis suscipi debuerunt: id ex cunctis historiæ ecclesiasticæ monumentis constat. Ergo 2°.

3° *SS. Patrum testimoniis*. S. Ambros. de Fide, l. 3, c. 15, decreta concilii Nicæni appellat *hæreditaria signacula, quæ nulla temeritate sunt violanda*. S. Gregorius Magnus quatuor priora concilia generalia, nempe Nicænum, Constantinopolitanum I, Ephesinum et Chalcedonense profitebatur se suscipere et venerari *sicut quatuor Evangelii libros*, Epist. ad Joan. Constantinop. et similiter quintum, videlicet Constantinop. II, « Quia, *pergit pontifex,* » dum sunt universali consensu constituta, se et non » illa destruit quisquis præsumit aut solvere quos ligant, » aut ligare quos solvunt. » Ergo concilia per se privilegio infallibilitatis gaudent, *dum sunt universali consensu constituta*. Ergo 3°.

4° *Adversariorum consensu*. Plurimi enim auctores protestantes, et quidem celeberrimi, confessi sunt temerarium esse definitionibus conciliorum generalium obsistere et assensum denegare, ut videre est apud Hooke, tract. de Eccl. et apud *de la Hogue*. Ergo 4°.

Solvantur objectiones.

Obj. 1° S. Aug. l. 2 de Baptismo, c. 3, asserit priora concilia etiam plenaria seu generalia, sæpe posterioribus emendari, « cum aliquo experimento rerum aperitur » quod clausum erat, et cognoscitur quod latebat. » Ergo persuasum habebat concilia generalia non esse infallibilia.

R. 1° S. Aug. ibi non loquitur de conciliis generalibus; nam dicit priora illa concilia sæpe posterioribus emendari: atqui tempore sancti Aug. duo tantum celebrata fuerant concilia generalia, nempe Nicænum I, anno 325, et Constantinop. I, anno 381; posterius autem in

priori nihil emendavit, sed Symbolum ejus adoptavit et articulum de Spiritu sancto et Ecclesia eis addidit.

R. 2º. Dist. ant. S. Aug. asserit priora concilia plenaria prioribus emendari, quando agitur de factis, *concedo*; ubi agitur de fide, moribus aut disciplina generali, *nego ant.* Equidem fieri potest ut concilia priora etiam generalia posterioribus emendentur in iis quæ spectant facta particularia vel aliquas disciplinæ regulas non essentielles; non contendimus enim concilia generalia circa hujusmodi articulos infallibilitatis privilegio gaudere: porro S. Aug. in textu nobis allato loquitur de factis, non vero de fide; asserit namque priora concilia posterioribus emendari, *cum aliquo rerum experimento aperitur quod erat clausum*: atqui fides et quæ spectant fidem, non rerum experimento, sed ex solo verbo Dei scripto et tradito noscuntur. Præterea, S. Doctor hoc loco arguit Donatistas qui suum schisma defendebant, et auctoritatem S. Cypriani in sui gratiam invocabant. Ergo.

Inst. S. Aug. disputans adversus Maximum, Arianum, dicit, l. 2, c. 14, n. 3: « Nec ego Nicænum, nec tu debes » Ariminense concilium proferre; nec ego hujus auctoritate, nec tu illius detineris. » Ergo auctoritatem ipsius concilii Nicæni respuebat.

R. Nego conseq. Nam Maximus auctoritatem hujus concilii non admittens, concilium Ariminense objiciebat; ne igitur contentio prolixius traheretur, S. Aug. suum adversarium ex principio certo, ab utroque admissio, confutare sibi proponit, abstrahendo a conciliis, tum Nicæno, tum Ariminensi: sic autem agendo, auctoritatem concilii Nicæni non lædit; quotidie enim, cum protestantibus disputantes, concilium Trid. seponimus, quamvis infallibilem illius auctoritatem labefactare non intendamus. Ergo.

Obj. 2º. Concilium Ariminense, in quo quadringenti sederunt episcopi, fuit generale: attamen a vera fide deflectens, erroribus Arianorum subscripsit. Ergo.

R. 1º. Neg. maj. Concilium enim Ariminense quo fere omnes hæretici contra Ecclesiam abutuntur, tanquam

generale haberi non potest, quia plures ex conditionibus ad concilium œcumenicum necessariis ei defuerunt; scilicet : 1° non fuit legitime convocatum; solus enim imperator Constantius jussit episcopos illuc congregari, et Liberius, tunc pontifex Romanus, nec convocationi consensit, nec concilio per se aut per legatos præsuit. 2° Omnes episcopi non fuerunt convocati; nam eodem tempore centum et sexaginta episcopi Orientales jussu ejusdem imperatoris aliud celebrabant concilium Seleuciæ, et nulla inter utrumque concilium erat communicatio. Alii insuper celebres episcopi et permulti nullo modo fuerunt vocati; quidam tunc erant in exilio, v. g. Lucifer Calaritanus in Palæstina, S. Eusebius Vercellensis in Thebaide cum multis aliis, S. Athanasius Seleuciæ latebat, etc. 3° Sufficientem libertatem non habuerunt patres Ariminenses; præfectus enim Taurus, ex speciali mandato imperatoris, concilio adfuit, et nihil non molitus est ut precibus, blanditiis, minis fallacibusque promissis ac declarationibus episcopos ad subscribendum formulæ æquivocæ adduceret : hanc subscriptionem summus pontifex Liberius non approbavit; asserit e contra, in epistola ad Orientales, quod patres Ariminenses a fide desciverint; *Labbe*, t. 2. Ergo illud concilium non fuit œcumenicum in sua convocatione, nec in sua celebratione, nec in suo exitu. Ergo.

R. Nego min. Illi enim a vera fide non recesserunt qui formulæ tantummodo æquivocæ subscripserunt, et multas adhibuerunt cautiones ut pravum sensum excluderent : atqui ita se gesserunt patres Ariminenses.

1° Formulæ tantummodo æquivocæ subscripserunt, nempe formulæ Sirmiensi; nam formula cui patres Ariminenses subscripserunt, a S. Athanasio relata, lib. de Synodis Ariminii et Seleuciæ, in sensu catholico optime intelligi potest, siquidem in ea declaratur Christum esse « Filium Dei unigenitum, ante omne principium et ante omne tempus quod excogitari potest impassibiliter ex Deo genitum, solum ex solo Patre, Deum de Deo, » etc. Vox quidem *consubstantialis*, a concilio Nicæno adhibita,

de industria et cum intentione perversa fuit omissa, et in hoc consistit venenum hujus formulæ: attamen omisio hujus vocis errorem non constituit. Ergo 1°.

2° Patres Ariminenses multas adhibuerunt cautiones ut falsum sensum hujus formulæ excluderent; primum hanc formulam tanquam suspectam rejecerunt, Ursacium Sigidonensem episcopum, et Valentem Mursensem aliosque Arianos, qui fidei Nicænæ subscribere renuebant, deposuerunt; deinde solemnem retractationem ab illis hæreticis, præsertim ab Ursacio et Valente, exegerunt; testatur S. Hieronymus, Dialogo adversus Luciferianos, illos palam declarasse se Arianos non esse, et sub anathemate dixisse Christum Filium Dei esse non solum ante omnia sæcula, sed ante omne tempus genitum: tunc patres blanditiis, precibus ac minis cedentes, formulæ sibi oblatae subscripserunt: at statim atque adverterunt se fuisse deceptos, et Arianos ubique prædicare Christum, ex concilio Ariminensi, esse duntaxat creaturam, licet aliis perfectiorem, subscriptionem suam indignantes revocaverunt, *contestantes corpus Domini se nihil mali in sua fide suspicatos*, ait S. Hieron. Sic ingemuit totus orbis, pergit sanctus Doctor, *et Arianum se esse miratus est*; ergo, etc. ergo 2° etc. aliunde, etc. Ergo patres Ariminenses a vera fide non recesserunt. Ita communiter theologi et eruditi, ut Baronius, card. du Perron, Tillemont, P. Alexander et multi alii apud Pierre Corgne, *Dissertation critique et théologique sur le concile de Rimini*.

Obj. 3°. Sola Ecclesiæ acceptance constare potest concilium aliquod fuisse œcumenicum: ergo conciliorum auctoritas non differt ab auctoritate Ecclesiæ dispersæ.

R. Nego conseq. Nam, eo ipso quod nomine totius Ecclesiæ concilium fuit celebratum, ipsius decreta sunt infallibilia, *ut probavimus*: igitur Ecclesiæ acceptatio auctoritatem concilio non tribuit, sed efficit ut absque errandi formidine haberi possit tanquam generale. Ecclesia, definiendo quasdam propositiones in Scriptura esse contentas, auctoritatem illis non tribuit, sed tantum ostendit

illas esse de fide : sic acceptando concilium generale, illud infallibile non reddit, sed declarat dogmata ab illo definita esse de fide. Ergo.

Quidam tamen theologi opinantur Ecclesiæ approbationem auctoritatem concilio generali tribuere : at grave incommodum inde non sequitur ; nam ubi constabit concilium aliquod ut generale ab Ecclesia fuisse receptum, certum erit ipsius decreta esse de fide.

Nota. Omnia quæ in actibus conciliorum generalium continentur, non idcirco ad fidem catholicam pertinent ; nam id solum ad fidem catholicam pertinet quod fuit revelatum, et quod ut tale ab Ecclesia cunctis fidelibus credendum proponitur : at in actibus conciliorum generalium sæpe multa reperiuntur quæ vel non fuerunt revelata, v. g. facta mandata, etc. vel quæ non proponuntur ut revelata et a cunctis fidelibus credenda : sic quando patres conciliorum motiva decretorum exponunt, hæc ad fidem non pertinent, quia solum decretum ab omnibus credendum esse decernunt, non vero ejus motiva. Hinc doctrina quæ continetur in capitibus canones præcedentibus, communiter non est de fide catholica, licet gravis sit auctoritatis ; *a fortiori* textuum interpretatio haberi non potest ut infallibilis decisio.

Quæritur quibus signis judicari possit ea quæ in actibus conciliorum continentur ad fidem pertinere ?

R. ad illud dignoscendum duo sunt expendenda, scilicet, natura rei et tenor decreti.

1^o *Natura rei* ; requiritur enim ut res sit *definibilis* de fide, videlicet ut mediate vel immediate sit revelata : unde si, præter institutionem suam, concilium generale pronuntiaret circa quæstiones physicas, mathematicas, ad studia legum pertinentes, a prudentia, non vero a scientia divina pendentes, illius decreta ad fidem non pertinerent, quia non haberent pro objecto aliquid revelatum. Ita Melchior Canus, *Bellarmin*, *Véron* in sua *Regula fidei*, *Bossuet* in defensione Declarationis, part. 1, l. 3, c. 1, *Tournely*, *de la Hogue*, etc.

2^o Considerandus est *tenor decretorum*, nempe 1^o si con-

trarium asserentes declarentur hæretici; 2° si anathema contra eos pronuntietur, v. g. ut in concilio Trid. *si quis dixerit.... anathema sit*; 3° si pœna excommunicationis ipso jure adversus eos feratur; 4° si expresse dicatur hoc vel illud esse de fide, ab omnibus esse credendum, aut Evangelio vel doctrinæ Apostolorum esse contrarium; 5° denique ex toto contextu colligitur mentem concilii fuisse dogma de fide enuntiare, hæreses præcavere aut damnare, et fideles obligare. Ubi vero, omnibus perpensis, remanet dubium an concilium dogma intenderit definire, decisio non est de fide; nam ut propositio ad fidem catholicam pertineat et cunctos fideles obstrictos teneat, non sufficit illam fuisse revelatam et utcumque enuntiatam, sed insuper requiritur ut ab auctoritate infallibili clare proponatur. Ergo, etc. Ita fusius melioris notæ theologi, ut Melchior Canus, lib. 5, c. 5, quæst. 4, et plures alii.

§ IV. — *De necessitate conciliorum generalium.*

1° Nemo catholicus ambigere potest quin concilia œcumenica sint utilia; nam in summo honore semper habita sunt, ea frequenter celebravit Ecclesia, et Christus illa instituit.

2° Concilia generalia non sunt absolute necessaria. Si enim absolute necessaria forent, vel ad controversias fidei dirimendas, vel ad leges condendas : atqui sub hoc duplici respectu non sunt absolute necessaria, siquidem Ecclesia dispersa infallibili auctoritate gaudet, tum ad judicia ferenda et dogmata definienda, tum ad leges condendas. Et vero, ante et post primum concilium generale Nicææ celebratum, multæ profligatæ sunt hæreses, plurimæ conditæ sunt leges totam Ecclesiam spectantes et universos fideles obligantes, v. g. lex jejunii quadragesimalis, lex abstinentiæ diebus veneris et sabbati, lex audiendi missam diebus dominicis et festivis, etc. Ergo.

3° Quamvis concilia generalia non sint absolute necessaria, aliquoties tamen adeo sunt utilia, ut dici possint moraliter necessaria, vel quia ita divisum videtur corpus

episcoporum ut solemnitas concilii generalis ab omnibus desideretur tanquam medium efficacius unitatem conservandi; vel quia generales abusus ita grassantur, ut sola concilii œcumenici auctoritas eos corrigere valeat; vel quia tam multi aut tam audaces apparent fidei hostes, ut per Ecclesiæ dispersæ decreta sufficienter refrenandi non sint. Ergo.

Insuper nihil splendidius, solemnius et ad persuadendum aptius est quam conciliorum generalium majestas: unde aliquid Ecclesiæ dignitati deesse videretur si nulla celebrarentur concilia. Ergo.

§ V. — *De conciliis particularibus.*

Juxta omnes, illa concilia per se non sunt infallibilia licet Christus dixerit: *Ubi sunt duo vel tres congregati in nomine meo, ibi sum in medio eorum*; quia non satis constat eos in nomine Christi congregari. Certum est promissionem infallibilitatis totam Ecclesiam spectare; at nihil reperitur in Scriptura neque in traditione quo idem privilegium tribui possit quibusdam episcopis, etiam collective sumptis et in concilio coadunatis, si totam Ecclesiam non repræsentent: imo contrarium ex traditione manifestatur; sola enim concilia œcumenica habita sunt ut infallibilia. Unde, licet concilia Africæ numerosissima, a S. Cypriano congregata, pluries definierint baptismum ab hæreticis collatum esse nullum, hoc ab universa Ecclesia catholica tanquam hæresis fuit rejectum; e contra, plurima sunt concilia particularia quorum decreta ad catholicam fidem pertinent, quia universim fuerunt recepta et infallibilitate Ecclesiæ dispersæ fulciuntur.

Hinc sequitur, concilia particularia nec absolute nec moraliter esse necessaria, sed valde utilia esse possunt; nam episcopi ex eadem provincia vel natione coadunati, sibi invicem patefaciunt quid in unaquaque ecclesia agatur vel omittatur, quid propagari debeat, quid corrigi et reprimi oporteat; consiliis, adhortationibus et documentis se mutuo adjuvant, perfectiorem tum in doctrina, tum in disciplina instituunt ac servant unitatem, effica-

cius nascentes impugnant errores, abusus destruunt, etc. Unde plurima concilia œcumenica, et inprimis Nicænum, jusserunt ut archiepiscopi frequenter concilium suæ provinciæ celebrarent. Idem renovavit concilium Tridentinum, sess. 24, c. 2 de Reform. Ergo.

CAPUT TERTIUM.

DE OBJECTO AUCTORITATIS ECCLESIE.

Hic non agitur de auctoritate Ecclesiæ in sacramentis conficiendis, seu de potestate ordinis, neque de potestate jurisdictionis pro foro interno et in peccatis remittendis, neque de potestate ferendi leges quæ conscientiam fidelium obstrictam teneant; de his alibi disseritur, videlicet in tractatibus de Sacramentis et de Legibus. Nunc vero auctoritatem Ecclesiæ duntaxat spectamus quatenus est judicans et aliquid infallibiliter decernit. Omnes generaliter fatentur privilegium infallibilitatis a Christo Ecclesiæ concessum inter quosdam limites coerceri; non sufficit igitur probare Ecclesiam speciali Christi assistentia esse infallibilem, sed insuper ostendendum in quibus materiis vel quæstionibus singulari hoc privilegio gaudeat, licet affirmari possit illam nunquam de materiis sibi non subjectis judicaturam, quia eo ipso infallibilis non foret, cum jus indebitum sibi vindicaret.

Certum est illam esse infallibilem in quæstionibus fidei : *id sequitur ex dictis.*

Solæ quæ igitur nunc tractandæ sunt quæstiones respiciunt mores, disciplinam, facta et canonizationem sanctorum.

De potestate Ecclesiæ circa temporalia regum alibi disseremus : itaque quatuor hic subjiciemus articulos.

ARTICULUS PRIMUS.

DE AUCTORITATE ECCLESIE CIRCA MORES.

Non petitur quænam morum decreta sint utilia vel

utiliora ; talis quæstio potius speculativa quam practica esset, et a prudentia ; non vero a scientia penderet : non de præceptis ad privatos homines directis ; in his namque Ecclesia decipi potest, propter locorum, personarum aut quarundam circumstantiarum ignorantiam, ut v. g. si Ecclesia definiret talem virum ad uxorem publice ductam accedere teneri, ignorans illum alteram uxorem adhuc viventem legitime antea duxisse. Agitur itaque de moribus totæ Ecclesiæ communibus et ad salutem necessariis.

PROPOSITIO.

Infallibilis est Ecclesia in decretis morum totæ Ecclesiæ communium et ad salutem necessariorum.

Prob. Scriptura sacra, traditione et ratione.

1° *Scriptura sacra.* Matth. xxviii, 19 et 20 : *Euntes ergo, docete omnes gentes, ... docentes eos servare omnia quæcumque mandavi vobis. Ecce ego vobiscum sum*, etc. Ex his verbis constat Christum suam promisisse assistentiam Ecclesiæ ipsius mandata docenti : at inter mandata Christi reputanda sunt præcepta morum ad salutem necessaria.

B. Paulus, Eph. iv, 11 : *Dedit quosdam apostolos, quosdam autem prophetas, alios vero evangelistas, alios autem doctores et pastores, ad consummationem sanctorum....* Porro doctores et pastores non ducerent fideles ad consummationem sanctorum, sed potius eos a sanctitate alienarent, si in tradendis vel explicandis morum præceptis errarent. Ergo.

2° *Traditione*, quæ unanimiter admisit hoc S. Aug. effatum jam supra memoratum, p. 371 : « Quæ sunt contra fidem vel bonam vitam, non approbat, nec tacet, nec facit » (Ecclesia). Ergo.

3° *Ratione.* Ideo instituta est Ecclesia ut fideles ad salutem ducat : atqui hunc finem non attingeret, si in generalibus morum præceptis infallibilis non esset, Christus in necessariis ipsi deesset aut deesse posset. Ergo.

Hinc 1° Ecclesia est infallibilis in interpretanda lege

naturali; ipsius enim præcepta sunt generalia et ad salutem necessaria.

Hinc 2º infallibilis est in approbandis ordinibus religiosi, quatenus scilicet dicit hunc vel illum ordinem nihil habere in suis constitutionibus aut regulis fidei vel bonis moribus contrarium: infallibiliter vero pronuntiare non posset talem religionis ordinem futurum esse utilem vel aptiorem ad propositum finem; hoc enim a prudentia et variis circumstantiis personarum, locorum et temporum pendet: idcirco abusus ex ordinibus religiosi provenientes, si qui sint, Ecclesiæ tribui non possunt.

ARTICULUS SECUNDUS.

DE AUCTORITATE ECCLESIAE CIRCA DISCIPLINAM.

Per disciplinam intelliguntur leges vel instituta quæ externam Ecclesiæ gubernationem ordinant. Duplex distinguitur disciplina: una generalis, quæ totam spectat Ecclesiam; et altera particularis, quæ unam ecclesiam vel ecclesias unius provinciae aut regionis ordinat.

Quando quæritur an Ecclesia sit infallibilis circa disciplinam, sensus est utrum aliquid præcipere vel statuere possit quod juri divino, naturali aut positivo sit contrarium, vel quod, habita ratione circumstantiarum, saluti fidelium sit nocivum.

Ecclesia, ex prudentia et ad vitanda majora mala, silere potest circa quosdam errores in ecclesiis particularibus grassantes, quia ipsi tribui non possunt.

De sola ergo disciplina generali hic nobis tractandum est.

PROPOSITIO.

Ecclesia errare non potest in statuenda disciplina generali.

Prob. Scriptura sacra, praxi Ecclesiæ et ratione.

1º *Scriptura sacra.* Act. xv, 28, Apostoli Jerosolymis congregati, regulas disciplinæ generalis statuerunt, nempe ut fideles ab immolatis, sanguine et suffocato abstinerent: atqui tamen declararunt se in his statuendis spe-

ciali Spiritus sancti assistentia fuisse adjutos : *Visum est Spiritui sancto et nobis nihil ultra vobis imponere*, etc. Episcopi autem in disciplina generali statuenda Apostolis successerunt : ergo similiter Spiritus sancti auxilio adjuvantur, ac proinde infallibilitate donantur. Et vero, fideles tenentur obedire Ecclesiæ aliquid præcipienti : atqui repugnat illos ad id teneri quod juri divino esset contrarium vel salutis suæ nocivum : ergo.

2° *Praxi Ecclesiæ.* Quartodecimani habiti sunt tanquam hæretici post decretum concilii Nicæni, quo statutum est Paschatis solemnitatem prima dominica post 14 diem lunæ quæ sequitur æquinoctium celebrandam esse : si admitteretur Ecclesiam errare posse in statuenda generali disciplina, Quartodecimani tanquam hæretici haber non debuissent. Ergo.

3° *Ratione.* Ecclesia infallibilis est circa doctrinam a Christo revelatam : atqui eo ipso infallibilis esse debet in statuenda generali disciplina ; nam ubi aliquid faciendum præcipit, judicat illud juri divino non esse contrarium, nec salutis nocivum : porro si in hoc statuendo erraret, falso circa doctrinam Christi judicaret, in docendo erraret, sancta non esset, Christus ipsi deesset, portæ inferi adversus eam prævalerent : ergo.

Solvuntur objectiones.

Obj. 1°. Ecclesia non est infallibilis nisi in revelatis : atqui non est revelatum hanc aut illam disciplinam esse servandam : ergo.

R. 1°. *Nego maj.* Necesse est enim ut promissio Christi impleatur : atqui promissio Christi non impleretur si Ecclesia non esset infallibilis etiam in non revelatis ; instituta est enim ut nos ad salutem duceret : ergo infallibilis esse debet in his quæ nobis præcipit aut prohibet relative ad salutem. At sæpe quædam nobis præcipit aut prohibet quæ non sunt revelata ; sic præcipit celebrationem festorum, observationem jejuniorum, auditionem missæ, etc. prohibet Eucharistiam dare infantibus, carnes certis diebus manducare, etc. hæc autem non sunt reve-

lata, idcirco ad fidem non pertinent ; sed de fide est Ecclesiam in his præcipiendis aut prohibendis esse infallibilem : ergo.

R. 2º Dist. maj. Ecclesia non est infallibilis nisi in revelatis mediate aut immediate, *conc.* nisi immediate revelatis, *nego maj.* Eodem sensu distincta minore, *nego conseq.* Equidem admitti potest, absolute loquendo, quod Ecclesia non sit infallibilis nisi in eis quæ saltem mediate sunt revelata ; sed ubi aliquam instituit disciplinam, mediate revelatum est eam esse servandam ; nam revelatum est 1º Ecclesiæ præcipienti obtemperandum esse, et 2º nihil juri divino contrarium aut saluti noxium esse faciendum. Ergo si Ecclesia aliquid juri divino contrarium vel saluti nocivum præscriberet, eo ipso in iis quæ revelata sunt erraret. Ergo.

Obj. 2º. Sæpe mutatur disciplina : atqui id in quo Ecclesia est infallibilis debet esse immutabile : ergo.

R. Nego min. Ad hoc enim requireretur ut privilegium infallibilitatis necessario importaret immutabilitatem in objecto : at, ubi de disciplina agitur, id affirmari non potest. Certum est quidem veritates fidei et principia morum mutari non posse, quia in essentiis rerum fundantur : sub hoc respectu objectum infallibilitatis Ecclesiæ est immutabile. At nihil vetat ne Ecclesia statuta disciplinæ suæ mutet et nova prioribus substituat, prout magis expedire sibi videbitur, et non minus erit infallibilis in posterioribus quam in prioribus. Ergo.

Plurima sunt adhuc notanda circa generalem Ecclesiæ disciplinam.

1º Quidquid dicitur de disciplina positivo Ecclesiæ decreto statuta, simili ratione dicendum est de universali totius Ecclesiæ praxi cum aliquo dogmate proxime connexa, v. g. de doxologia *Gloria Patri, et Filio, et Spiritui sancto* ; de baptismo per solam infusionem collato, etc. Ecclesia enim non potest approbare errores contra fidem aut contra salutem proximi : at, in casibus hic expressis approbaret errores, si ipsius disciplina erronea esset. Ergo.

2° Non parvum datur discrimen inter has duas propositiones : Ecclesia nihil decernere potest, in sua disciplina, juri divino contrarium, aut saluti nocivum ; et : Ecclesia semper aptiora et efficaciora instituit disciplinæ præcepta. Prior propositio est certissima et ab omnibus catholicis admittitur ; posterior vero est falsa et communiter rejicitur. Varias namque ob rationes contingere potest ut Ecclesia rigidiores aut molliores disciplinæ regulas præscribat, propter quamdam locorum aut hominum ignorantiam ; in his non est infallibilis, *ut infra dicemus*. Ita Melchior Canus, l. 4, c. 5, versus finem ; P. Thomassin, præf. in exquisitum opus cui titulus, *Discipline ecclésiastique*, n. 15 et seq.

3° Quidam sunt usus in Ecclesia universa generatim recepti et etiam approbati, qui tamen ad fidem non pertinent, quia ut tales non exhibentur ; sic consuetudo celebrandi festum immaculatæ Conceptionis vel Assumptionis B. Mariæ non probat de fide esse sanctissimam illam virginem sine labe fuisse conceptam, et in corpore ad cælos ascendisse.

4° Ecclesia *a fortiori* non censetur multas approbare summorum Pontificum dispensationes, gratiarum extraordinariarum concessiones, etc. quæ probabili tantum nituntur opinione ; nam hujusmodi actus nunquam exhibentur velut totius Ecclesiæ decisiones.

5° Præsentem Ecclesiæ disciplinam improbare non licet, quamvis lugenda sit morum relaxatio quæ in causa fuit cur antiqua et perfectior mutata fuerit disciplina ; hæc enim mutatio tribuenda est fidelibus, non vero Ecclesiæ, quæ suam disciplinam moribus accommodare debuit.

ARTICULUS TERTIUS.

DE AUCTORITATE ECCLESIE CIRCA FACTA.

Hanc maximi momenti quæstionem mira obscuritate involvere semper conati sunt Janseniani ; asserebant enim in genere Ecclesiam infallibiliter judicare non posse de factis.

Ut status quæstionis recte dignoscatur, notandum est jus a facto distinguendum esse. Quæstio est juris, quando qualitas alicujus doctrinæ in se sumptæ expenditur, v. g. utrum Filius Patri sit consubstantialis, utrum in Christo duplex sit natura et unica persona, utrum Christus realiter sit præsens in Eucharistia, etc. Dicitur quæstio juris, quia definiri non potest nisi per verbum Dei, in Scriptura aut in traditione contentum : verbum autem Dei est publicum jus nostrum quod perpetuo consulere et sequi tenemur. Quæstio est facti, quando examinatur an propositio hunc vel illum habeat sensum, vel in tali libro contineatur.

Facta vero multiplicis sunt generis : 1° alia sunt immediate revelata, v. g. passio et mors Christi, ipsius resurrectio ; 2° alia non sunt eodem modo revelata, et iterum dividuntur 1° in historica, scilicet quando de rebus gestis agitur, v. g. utrum Arius in concilio Nicæno fuerit damnatus ; 2° in mere personalia, quæ specialem alicujus personæ statum, crimen, innocentiam, mentis sensum, etc. respiciunt, v. g. an Jansenius fuerit auctor illius libri qui ipsi attribuitur, vel an hunc aut illum sensum in mente habuerit dum scriberet ; 3° facta grammaticalia, quæ voces tantum et syllabas spectant, v. g. quinque celebres Jansenii Propositiones continentur de verbo ad verbum in ipsius *Augustino* ? 4° Denique facta dogmatica quæ etiam complexa dicuntur, duplicem involvunt quæstionem, unam juris et alteram facti. Sit in exemplum hæc Jansenii propositio : *Ad merendum aut demerendum, in statu naturæ lapsæ, non requiritur in homine libertas a necessitate, sed sufficit immunitas a coactione.* Duplex exsurgit quæstio circa hanc propositionem : 1° an sit hæretica ; 2° an in libro Jansenii contineatur, et eo sensu accipienda sit. Igitur factum dogmaticum est illud quod habet connexionem cum propositione de fide.

Certum est 1° Ecclesiam infallibiliter judicare de factis immediate revelatis, quia ad depositum revelationis pertinent.

Certum est 2° illam infallibilitatis privilegio non gau-

dere circa facta historica aut mere personalia, quia tale privilegium ipsi non necessarium est ad depositum fidei custodiendum. Omnes tamen fatentur summam deberi reverentiam Ecclesiæ de hujusmodi factis judicanti, v. g. quando talem hominem velut hæreticum damnat.

Certum est 3^o Ecclesiam, vi promissionis sibi factæ, infallibiliter non judicare de factis grammaticalibus : voces et syllabas non attendit, sed doctrinam, id est, sensum propositionum et librorum.

Certum est 4^o eam in factis dogmaticis infallibilem esse circa quæstionem juris : id ab omnibus qui auctoritatem ejus agnoscunt plane conceditur.

Tota igitur difficultas ad hoc reducitur, nempe an Ecclesia sit infallibilis in assignando genuino alicujus libri sensu.

Hæc quæstio, ante Jansenianos inaudita, prima vice cœpit agitari post bullam *Cum occasione*, qua Innocentius X, anno 1653, quinque famosissimas Jansenii Propositiones solemniter damnavit, primam ut *temerariam*, *impiam*, *blasphemam*, *anathemate damnatam* ; secundam et tertiam ut *hæreticas* ; quartam ut *falsam* et *hæreticam* ; et quintam ut *falsam*, *temerariam*, *scandalosum* et, in uno sensu, *impiam*, *blasphemam*, *contumeliosam*, *divinæ pietati derogantem* et *hæreticam*. Jansenii defensores negare non potuerunt illas Propositiones merito fuisse damnatas, sed acriter contenderunt eas in libro Jansenii non contineri : hinc origo distinctionis toties recantatæ inter jus et factum.

Alexander VII, Innocentii X successor, novam edidit bullam *Ad sacram*, qua declarabat quinque Propositiones in libro Jansenii contineri, et ad sensum illius auctoris fuisse damnatas. Hinc magnus inter novatores rumor; tunc cœperunt palam dicere Ecclesiam infallibiliter judicare non posse de factis etiam dogmaticis, seu de sensu librorum ; illam merito quidem allatas Propositiones damnasse, sed Alexandrum VII immerito definiisse eas in libro Jansenii contineri. Ita notissimus *Arnauld* et post eum tota Jansenianorum turba. Idem Alexander VII,

voto cleri Gallicani annuens, novam dedit bullam, die 15 februarii, anno 1665, qua aliquod præscribebat Formularium (*Formulaire*) ab omnibus episcopis et presbyteris subscribendum ; unusquisque subscribens cum expresso juramento profitebatur se Constitutionibus Apostolicis Innocentii X et Alexandri VII subijcere, « et » quinque Propositiones ex Cornelii Jansenii libro cui » nomen *Augustinus* excerptas, in sensu ab auctore intento, sincero animo rejicere ac damnare. » Quatuor tantum episcopi Gallicani huic bullæ fortiter obstiterunt, scilicet *Pavillon* episcopus Alecensis, *Arnauld* Andegavensis, *Caulet* Apamiensis, et de *Buzenval* Bellovacensis.

Inter Jansenianos, alii cum *Arnauld* nullo modo subscribere voluerunt Formulario, asserebant enim id sine evidenti parjurio fieri non posse ; alii vero tenebant subscriptionem absolute licitam esse. At simul contendebant internum mentis assensum non esse necessarium, solumque requiri obsequiosum silentium. Novum effugium istud proscripsit Innocentius XII, in suis epistolis ad episcopos Belgicos, an. 1694 et 1696, et præsertim Clemens XI, bulla *Vincam Domini*, an. 1705.

Catholici autem circa hanc quæstionem non sunt unanimis ; quidam enim fatentur Ecclesiam in hujusmodi factis nunquam errasse, et præsumendum illam nunquam erraturam, ac proinde in hoc puncto moraliter infallibilem esse. At illa opinio communissime rejicitur ; in ea enim nullum assignatur motivum infallibile quo nitantur fideles ut assensum judicio Ecclesiæ præbeant.

Cæteri vero dicunt Ecclesiam, in his factis, vi promissionum Christi, infallibiliter judicare. Cum quibus sit

PROPOSITIO.

Vi promissionum Christi, Ecclesia in factis dogmaticis, seu in intelligendo et proponendo naturali librorum sensu, infallibiliter judicat.

Prob. Scriptura sacra, praxi Ecclesiæ et rationibus theologicis.

1^o *Scriptura sacra.* Ex variis Scripturæ locis constat Ecclesiam, vi promissionum Christi, esse infallibilem in docendo, in sanam doctrinam proponendo et falsam reprobando : atqui in hoc puncto infallibilis esse non potest quin pariter sit infallibilis in intelligendo et proponendo naturali librorum sensu ; si enim infallibilis non esset in assignando naturali librorum sensu, fieri posset ut librum hæreticum approbaret et orthodoxum condemnaret : at in utroque casu erraret ; nam si librum hæreticum approbaret , hæresim positive doceret ; si librum orthodoxum velut hæreticum rejiceret , eo ipso doctrinam oppositam, falsam et hæreticam approbaret : ergo.

2^o *Praxi Ecclesiæ.* Quod Ecclesia jugiter sibi vindicavit, id rejici non potest. Hoc fatentur adversarii ; tenent enim Ecclesiam in dogmate errare non posse : attamen in dogmate erraret, si jus aliquod falso sibi tribueret. Porro Ecclesia jugiter jus sibi vindicavit de naturali sensu librorum infallibiliter judicandi, hoc enim innumeris ostenditur factis quæ unusquisque potest legere in toto historiæ ecclesiasticæ decursu, et apud *Tournely, Bailly, de la Hogue* aliosque theologos : inter ea quædam tantum seligemus.

Impia Nestorii doctrina solemniter damnata fuerat in concilio Ephesino, tertio generali ; quædam postea prodierunt opera quæ judicabantur erroribus Nestorii nimis faventia, nempe liber Theodori Mopsuesteni episcopi adversus Appollinarem, liber Theodoretî Cyrenensis episcopi contra S. Cyrillum, et epistola Ibæ Edesseni episcopi ad quemdam Marim Persam. Cum, in concilio generali Chalcedonensi, Theodoretus et Ibas, a sedibus suis in latrocinio Ephesino injuste depulsi, canonice fuissent restituti, plurimi arbitrabantur ipsorum scripta eo ipso fuisse a sacro concilio approbata : hinc gravis inter catholicos orta est controversia circa illa opera quæ dicebantur *tria Capitula*.

Ad dirimendam hanc controversiam generalis convocata est synodus Constantinop. II, anno 553, longe post

mortem Theodori, Theodoreti et Ibæ. Patres hujus concilii, in quinta et sexta collatione seu sessione, opera Theodoreti et Ibæ, intactis eorum personis, damnaverunt; Theodori vero scripta, nomen et personam proscripserunt. Unde sic argumentari licet. Ibi certe de facto agebatur, nempe utrum illa opera erroribus Nestorii faverent: atqui Ecclesia jus sibi vindicavit de illis infallibiliter judicandi; sancta enim synodus Constantinop. exegit sub pœna anathematis ut omnes sententiæ damnationis se submitterent, et pluries anathema dicit eis qui *impia Theodoreti scripta et impiam Ibæ epistolam defendunt*. Ergo.

Idem habetur de condemnatione librorum in concilio Lateranensi, sub Martino I, anno 649 celebrato, art. 5, can. 18, et in concilio Constantiensi, sessione ultima, ubi statuitureos qui suspecti sunt interrogandos esse, « Utrum » credant, teneant et asserant Joannem Wiclefum, Joannem Hus et Hieronymum de Praga fuisse hæreticos..... » et libros et doctrinas eorum fuisse et esse perversos, » propter quos et quas, et eorum pertinacias, per sacrum » concilium Constantiense pro hæreticis sint condemnati. » Ergo tam pro libris quam pro doctrinis aliquis damnari potest ut hæreticus: hoc autem supponit Ecclesiam in judicandis libris sicut et doctrinis infallibilem esse. Ergo 2º.

3º *Rationibus theologicis*. 1º Ecclesia, fatentibus adversariis, infallibiliter de sensu propositionum judicat: atqui non minus infallibiliter judicare debet de sensu librorum; nam libri ex propositionibus sibi succedentibus constant; si igitur de illis Ecclesia infallibiliter judicare non posset, maxime quia numerosiores vel longiores essent: illud autem est absurdum; nulla siquidem excogitari potest ratio cur Ecclesia tutius de brevibus propositionibus quam de longioribus, de una quam de pluribus judicaret. Ergo.

2º Fatentur iterum adversarii Ecclesiam infallibiliter de symbolis et fidei professionibus judicare: ergo *a pari* de sensu librorum infallibiliter judicat; symbolum enim est in suo genere liber, brevis quidem, sed longior esse

posset, et de facto longior est quibusdam hæreticorum epistolis: quare ergo de his epistolis Ecclesia infallibiliter judicare non posset?

3º Sæpe adversarii citant Patres et totam traditionem invocant: at, in eorum principiis, Ecclesia infallibiliter judicare non posset talem veritatem in traditione esse contentam; nam istiusmodi iudicium ferre non potest quin de sensu librorum iudicet. Unde celebris Calvinista *Pajou* sic *D. Arnauld* premebat, contra exquisitum illius opus *de la Perpétuité de la foi*, etc. « Si tibi licet, o Arnalde, » de sensu Jansenii litigare post Ecclesiæ definitionem, » quidni licebit nobis de sensu Augustini, Chrysostomi » aliorumque Patrum disputare, in nostra de præsentia » reali disceptatione? » Huic argumento ad hominem nihil solidi respondere poterat *Arnauld*. Immerito etiam Janseniani citant doctrinam divi Aug. tanquam ab Ecclesia approbatam; nam Ecclesia illam non approbavit, nisi de sensu librorum ejus iudicando. Ergo.

4º Ecclesia infallibiliter definiit Vulgatam genuinum Scripturæ sensum continere: atqui illud definire non potuit nisi legendo et interpretando libros qui sibi exhibebantur tanquam divina exprimentes: ergo.

5º An Ecclesia sit infallibilis circa facta dogmatica, est quæstio juris: verum Ecclesia hanc quæstionem sua agendi ratione affirmative solvit contra Jansenistas, siquidem bullæ summorum Pontificum ab universa Ecclesia fuerunt acceptatæ: ergo, etc. Ergo 3º.

Nota. Si petatur an propositio nostra sit de fide divina, distinguendum esse nobis videtur. In se spectata, v. g. Ecclesia vi divinarum promissionum, infallibilitate circa facta dogmatica donatur: est de fide divina; illa enim propositio est de fide divina, quæ in deposito revelationis continetur, cui propter summam Dei veracitatem assentimus: atqui talis est prædicta propositio, siquidem ex Scriptura et traditione probatur.

Si vero quæstio ad factum particulare reducatur, an v. g. quinque Propositiones Jansenii in ipsius libro contineantur, propositio non est de fide divina; tunc enim

illi non assentimus præcise ob veracitatem Dei eam revelantis, sed ob auctoritatem Ecclesiæ definientis : fides igitur quam hujusmodi facto adhibemus, merito a pluribus theologis, post D. *de Péréfixe* apud *Tournely*, et *Bossuet*, *Lettre aux religieuses de Port-Royal*, dicitur ecclesiastica. Medium locum inter fidem divinam et fidem humanam tenet; longe tamen a fide humana distat; hæc enim fallibili tantum, illa vero infallibili motivo nititur; quia, ex supra dictis, Ecclesia infallibiliter pronuntiat circa hujusmodi facta. Imo, fides ista quodam sensu ad fidem divinam revocari potest; immediate quidem auctoritate Ecclesiæ nititur : verum, ob summam Dei auctoritatem, credimus Ecclesiam circa hujusmodi facta esse infallibilem : ergo assensus noster mediate Dei verbo fundatur.

Attamen, qui simpliciter diceret Ecclesiam circa prædictum factum infallibilem non esse, formaliter hæreticus dici non posset, quia propositioni certo revelatæ et definitæ non adversaretur. Qui autem consensum internum judicio Alexandri VII denegaret, hæreticus esset; contra expressam enim definitionem ab Ecclesia acceptatam ageret. Res illustratur exemplo : qui negaret concilium Tridentinum esse œcumenicum, hæreticus non esset; qui vero assensum uni ex definitionibus ejus recusaret, ab hæresis labe excusari non posset. Ergo.

Solvuntur objectiones.

Obj. 1º. Ecclesia dici non potest infallibilis circa facta quæ modo approbat et modo condemnat : atqui Ecclesia approbavit facta dogmatica et eadem postea damnavit, nempe tria Capitula, quæ approbata fuerunt in concilio Chalcedonensi et damnata in secundo concilio Constantinop. Ergo.

R. Nego minorem et ejus probationem. Tria Capitula fuerunt damnata in quinto concilio generali, *ut supra notavimus*; at falsum est ea in concilio Chalcedonensi fuisse approbata. Nam 1º in eo concilio nulla facta est mentio

Theodori Mopsuesteni. 2º Theodoretus et Ibas declarati sunt orthodoxi et sedibus suis restituti, illorum vero opera nullo modo admissa fuerunt ut orthodoxa : porro auctores declarari potuerunt orthodoxi, licet eorum opera non approbarentur. Enimvero non declarati sunt orthodoxi, nisi postquam epistolæ S. Leonis ad Flavianum patriarcham Constantinop. subscripserunt, et anathema Nestorio ejusque erroribus dixerunt; Ibas negavit epistolam ad Marim esse suam. Illa autem agendi ratione sua opera sufficienter retractabant, aut manifestabant se in pravo sensu ea non intellexisse. Falsum est ergo tria Capitula in concilio Chalcedonensi fuisse approbata.

Aliunde, plurimi theologi contendunt concilium Chalcedonense non fuisse œcumenicum quando causas Theodreti et Ibæ judicavit, quia S. Leo ei consensisse non videtur quoad istud factum; legatos enim miserat sub expressa conditione quod sola fides tractaretur, ut patet ex ipsius epistola ad Maximum, Antiochenum patriarcham, *Labbe*, t. 4 : « Si quid sane, *inquit*, ab his fratribus » quos ad sanctam synodum vice mea misi, præter id » quod ad causam fidei pertinebat, gestum esse perhi- » beatur, nullius erit penitus firmitatis, quia ad hoc tan- » tum ab Apostolica sede sunt directi : » ergo causis a fide distinctis non consentiebat.

Quædam obijciuntur verba epistolæ Pelagii II summi pontificis, ad episcopos Histrienses, sed unica observatione facile solvuntur; totus enim erat Pontifex ut Histriensibus episcopis persuaderet tria Capitula, post definitionem V concilii generalis, nulla ratione propugnari posse : admittebat ergo infallibilem auctoritatem Ecclesiæ in judicandis hujusmodi factis.

Palavicinus etiam dicit, Hist. conc. Trid. lib. 9, c. 18, n. 9, controversiam de tribus Capitulis non pertinuisse ad infallibilem Ecclesiæ auctoritatem : verum *unicuique attente legenti patebit* id Palavicinum intelligere de Theodori, Theodreti et Ibæ personis, non de eorum erroribus : atqui omnes fatentur Ecclesiam non esse infallibilem in damnandis personis : ergo.

Obj. 2°. Cardinales Baronius, Bellarminus et de Turrecremata vindicant Honorium summum pontificem ab omni errore : atqui tamen in sexta synodo generali, Constantinop. III, damnatus fuit tanquam hæreticus : ergo.

R. 1°. Etiam si illustres illi cardinales doctrinam nobis oppositam tenuissent, nihil absolute contra nos sequeretur ; evidens est enim eorum auctoritatem tot rationibus et manifestis sanctæ sedis Apostolicæ judiciis prævalere non posse.

R. 2°. *Dist. maj.* Tres dicti cardinales vindicant Honorium ab omni errore, et arbitrantur eum a sexta synodo non fuisse damnatum, *concedo* ; et arbitrantur illum fuisse damnatum, *nego maj.* Equidem tres supra dicti cardinales magno zelo conantur ab omni errore Honorium purgare, sed auctoritatem sexti concilii non ideo labefactare volunt ; nam alias afferunt rationes ut illum a nota erroris immunem faciant, scilicet, internam ipsius mentem in scribendis epistolis spectant, vel asserunt acta concilii sexti fuisse corrupta. Ergo.

Obj. 3°. Sententia nostra de potestate Ecclesiæ circa facta dogmatica est nova : ergo rejicienda est.

R. Nego ant. Illa enim sententia non est nova quæ semper fuit in usu : atqui sententia nostra, circa facta dogmatica, semper fuit in usu, *sicut in probatione diximus*. Non quidem eodem modo et eadem præcisione exprimebatur, quia nondum prodierant disputationes postea exortæ ; sed Ecclesia jugiter damnavit hæreticorum verba et libros, v. g. Origenis, Arii, Pelagii, Nestorii, Eutychetis, etc. Ergo.

ARTICULUS QUARTUS.

DE AUCTORITATE ECCLESIAE IN CANONIZATIONE ET BEATIFICATIONE SANCTORUM.

Canonizatio est solemne Ecclesiæ judicium de sanctitate alicujus viri, in catholica religione defuncti, cum præcepto religiosum illi cultum exhibendi.

Beatificatio est licentia a summo Pontifice concessa ut aliquis defunctus appelletur *beatus*, et in aliqua regione, Ecclesia aut familia quidam illi exhibeatur cultus religiosus.

Unde canonizatio in pluribus differt a beatificatione. 1^o Enim in canonizatione præcipitur ut aliquis pro sancto habeatur et cultus ei rependatur; in beatificatione vero cultus tantum permittitur. 2^o Canonizatio totam respicit Ecclesiam, et beatificatio intra provinciam, diocesim, civitatem, parochiam aut monasterium saltem ordinarie coercetur. 3^o Canonizatio est sententia definitiva de viri sanctitate ab omnibus reverenda et colenda; at in beatificatione iudicium quod fertur non est ultima et definitiva sententia de beatificati sanctitate.

Per multa sæcula episcopi sua auctoritate cultum religiosum hominibus cum characteribus sanctitatis mortuis decernebant; illa cultus institutio erat particularis canonizatio, seu melius, ut observat Benedictus XIV, beatificatio; nam præceptum episcopi ultra limites suæ diœccesis extendi non poterat. Ille ergo cultus necessario erat limitatus, et cunctos Ecclesiæ fideles obligare non poterat, nisi, a singulis episcopis per orbem successive admissus, fieret catholicus: improprie ergo ille cultus diceretur canonizatio, siquidem canonizatio, ex definitione, totam per se respicit Ecclesiam.

Mos iste sanctos canonizandi, seu potius beatificandi, usque ad duodecimum sæculum exstitit. S. Ulricus, Augustanus episcopus, primus fuit solemniter canonizatus a summo Pontifice, scilicet a Joanne XV, anno 993; secundus fuit Simeon, solitarius, a Benedicto IX, anno 1042; et tertius S. Geraldus, episcopus Tullensis, ab eodem Benedicto IX, anno 1050. Ultimus, juxta antiquam formam in sanctorum numerum relatus, fuit S. Galterius (*Gautier*), abbas S. Martini Pontisaræ, quem archiepiscopus Rothomagensis canonizavit anno 1153.

Alexander III et Innocentius III, in fine duodecimi sæculi, advertentes multos abusos circa cultum sanctorum ex nimia episcoporum facilitate aut credulitate sæ-

pius exoriri, prohibuerunt ne deinceps aliquis pro sancto haberetur aut coli inciperet, sine Romani pontificis approbatione. Urbanus VIII, per bullam anni 1634, non solum canonizationem, sed ipsam beatificationem et quidquid ad cultum servorum Dei pertinet, Apostolicæ sedi reservavit. *His notatis, quæritur, an Ecclesia sit infallibilis in canonizatione et beatificatione sanctorum?*

Certum est 1° canonizationem particularem, seu beatificationem æquipollentem, ut eam vocat Benedictus XIV, ab episcopo vel a metropolitano factam, nusquam haberi potuisse tanquam infallibile Ecclesiæ judicium; nam privilegium infallibilitatis episcopis singulatim sumptis non competit: atqui tamen in his casibus non reperitur judicium totius Ecclesiæ, sed tantum alicujus episcopi, aut ad summum quorundam episcoporum: ergo nisi aliquis privatim olim canonizatus, postea per orbem universum habitus fuerit ut sanctus, infallibiliter constare non potest illum esse sanctum.

2° *Velut certum communiter admittitur* Ecclesiam non esse infallibilem in simplici servorum Dei beatificatione. Nam 1° illud solum judicium haberi debet ut infallibile quod absolute et definitive fertur: atqui in beatificatione judicium Ecclesiæ non fertur absolute et definitive, siquidem tota causa de novo instruitur quando de beatificatione ad canonizationem transitur. 2° Illud judicium ut infallibile haberi non debet quod ad universam non dirigitur Ecclesiam, quemadmodum supra jam exposuimus. 3° In beatificatione nihil præcipitur, sed tantum aliqua fit concessio: porro de natura concessionis Ecclesiæ non est absolute ut sit infallibilis. Ita Benedictus XIV, in eruditissimo opere de Canonizatione sanctorum, l. 1 de Beatif. c. 42, n. 12. Qui tamen contra publicam beatificationis sententiam insurgeret, temeritatis notam declinare non posset. Nunc igitur de sola canonizatione solemniter agitur.

PROPOSITIO.

Solemne Ecclesiæ judicium circa sanctorum canonizationem, est infallibile.

Prob. Auctoritate et ratione.

1° *Auctoritate.* Summi Pontifices, saltem a multis sæculis, servos Dei solemniter canonizant, seu inter sanctos annumerant, et jubent ut cultus religiosus eis exhibeatur, cunctis episcopis tacentibus : at si tale decretum esset falsum, Ecclesia approbaret errorem, *ut patet* : ergo.

2° *Ratione.* Illud enim admitti non potest quod cultum religiosum erga omnes sanctos subverteret, Ecclesiam contemptui exponeret et ejus sanctitatem labefactaret : atqui talis esset sententia docens Ecclesiam in canonizatione sanctorum esse fallibilem. 1° Cultum religiosum erga omnes sanctos subverteret ; si enim semel admittatur Ecclesiam errare posse in agnoscenda alicujus defuncti sanctitate, unusquisque dubitare poterit de legitimitate cultus erga insigniores sanctos præscripti. 2° Ecclesiam contemptui exponeret ; in ea enim opinione, impii, hæretici et perditionis homines semper exprobrare possent Ecclesiæ quod forte inimicis Dei et reprobis religiosos tribuat honores, et nulla ratione firma redargui possent. 3° Sanctitatem Ecclesiæ labefactaret ; Ecclesia quippe debet esse sancta in suo cultu : at, prædicta opinione semel admissa, non esset sancta in suo cultu, siquidem cultum objecto prorsus indigno forsitan exhiberet. Ergo.

Solvuntur objectiones.

Obj. 1°. Sanctitas alicujus viri pendet a factis personalibus : at Ecclesia de factis personalibus infallibiliter non judicat : ergo.

R. Dist. min. Ecclesia de factis personalibus infallibiliter non judicat, si in se spectentur, *conc.* si in aliquo casu cum puritate doctrinæ Evangelicæ essentialiter jungantur, *nego min.* Itaque fatemur Ecclesiam de factis

personalibus in se sumptis infallibiliter non judicare; at ubi illa facta, propter aliquam circumstantiam, essentialiter cum puritate doctrinæ Evangelicæ junguntur, de illis infallibiliter judicare debet Ecclesia; nam de doctrina Evangelica infallibiliter judicat: necesse est igitur ut infallibiliter de iis judicet quæ ad tale judicium essentialiter prærequiruntur: porro, in solemni canonizationis sententia, facta quæ sanctitatem viri probant, cum puritate doctrinæ Evangelicæ essentialiter conjunguntur; nam puritas doctrinæ Evangelicæ necessario exigit ut cultus religiosus alicui non sancto nomine totius Ecclesiæ et præcepto ejus non rependatur. Ergo. Unde Benedictus XIV, opere citato, l. 1, c. 44, n. 4: « Omnibus » prædictis objectis unica solidissima responsione satisfit, » si dicatur, quidquid ex materiæ et testium qualitate » pro infallibilitate desumitur, plene submoveri, ex divina providentia et Spiritus sancti præsentia. »

Obj. 2º. Multi honorantur ut sancti qui ab episcopis tantum aut archiepiscopis per judicium fallibile fuerunt canonizati: ergo *a pari* non necesse est ut solemnis Ecclesiæ sententia sit infallibilis.

R. Nego conseq. et paritatem. Ratio disparitatis est, quod in priori casu cultus religiosus nomine totius Ecclesiæ non exhibeatur. Itaque si error de facto existat, in totam Ecclesiam refundi non potest, nec idcirco promissionibus Christi opponitur. In posteriori vero hypothesi, error tribuendus foret Ecclesiæ, et promissis Christi adversaretur, *ut diximus.* Ergo.

Nec sufficeret dicere errorem in eo casu esse tantum materiale, ac proinde non culpabilem, ut v. g. quando adoratur hostia quæ falso putatur consecrata; nam repugnat Ecclesiam directe approbare errorem contra bonos mores et Dei honorem: atqui hujusmodi errorem directe approbaret Ecclesia, si publicum decerneret cultum alicui non sancto. Quando autem adoratur hostia quæ falso putatur consecrata, est error facti particularis qui in Ecclesiam refundi non potest; nam Ecclesia non discernit talem hostiam esse consecratam: contra vero ju-

dicat talem hominem esse sanctum, et cultum illi exhibendum. Ergo.

Obj. 3^o. Pluries deleta sunt nomina sanctorum in Martyrologio et in Breviario Romano : at quaecumque in Martyrologio et Breviario Romano inscribuntur, ab universa Ecclesia censentur approbata. Ergo.

R. Nego min. Ea enim reputari non possunt ab universa Ecclesia approbata, quæ ei non proponuntur ut definita et cunctos fideles obligantia; porro ea quæ reperiuntur in Martyrologio et in Breviario Romano non proponuntur ut definita et cunctos fideles obligantia; Benedictus enim XIV expresse declarat, l. 4, part. 2, c. 13, n. 8, facta historica quæ in Breviario Romano referuntur, licet non modicam mereantur fidem, posse tamen novo examini subjici, etiam a privatis hominibus, modo id fiat modeste et cum gravi fundamento; et ibidem, c. 17, n. 9, hæc habet illustris Pontifex : « Asserimus Apostolicam sedem non judicare inconcussæ esse » et certissimæ veritatis quaecumque in Martyrologium » Romanum inserta sunt.... quod optime colligitur ex » mutationibus et correctionibus a sancta ipsa Sede de » mandatis. » Ergo. Nihil *a fortiori* concludi potest ex Legendis in aliis libris contentis.

Quæritur utrum infallibilitas Ecclesiæ circa sanctorum canonizationem ad fidem divinam pertineat ?

R. Eodem modo de hac infallibilitate judicandum est ac de infallibilitate circa facta dogmatica. De fide divina videtur Ecclesiam jus habere infallibiliter pronuntiandi in canonizationibus sanctorum; nam Ecclesia infallibilis est circa morum præcepta : canonizatio autem sanctorum ad præcepta morum pertinet, *ut in probatione observavimus*. At, posito solemnī Ecclesiæ decreto de alicujus viri sanctitate, constatne fide divina hunc virum esse sanctum ? Disputant inter se theologi; communius tenetur hoc factum ad fidem divinam non pertinere. Benedictus XIV, momentis utriusque opinionis scite et perite, pro more suo, libratis, sic concludit : « Videtur igitur » nobis utraque opinio in sua probabilitate relinquenda,

» usquequo sedis Apostolicæ judicium prodeat; » de Canon. l. 1, c. 45, n. 27. Valde tamen temerarius foret qui contra aliquod canonizationis decretum insurgeret. Melchior Canus, lib. 5, c. 5, versus finem, eum vocat temerarium, impudentem ac irreligiosum.

PARS TERTIA.

DE CAPITE ET MEMBRIS ECCLESIAE.

Dicemus 1° de capite, et 2° de membris Ecclesiae.

CAPUT PRIMUM.

DE CAPITE ECCLESIAE.

Certum est existere supremum et invisibile caput totius Ecclesiae visibilis, nempe Christum, *qui*, ut ait Apostolus, Coloss. 1, 18, *est principium, primogenitus ex mortuis, ut sit in omnibus ipse primatum tenens*. Sed *quæritur* utrum aliud existat caput Ecclesiae, vices Christi super terram gerens, et visibilem primatum in tota Ecclesia tenens? Si hujusmodi existat caput universale pro tota Ecclesia, alius sine dubio esse non potest quam pontifex Romanus; alius enim non est in mundo qui talem prærogativam sibi adscribere possit.

Primatus autem duplex esse potest, scilicet alius honoris, et alius jurisdictionis. Primatus honoris ille est quo aliquis primum locum inter cæteros obtinet, sed absque ulla superiori potestate, qualis est, v. g. præses in cœtu deliberante ex æqualibus membris composito. Primatus jurisdictionis ille est quo aliquis non solum in cœtu primum locum obtinet, sed reipsa aliis superior constituitur et majorem habet potestatem.

Primatus potest iterum vel esse tantum juris ecclesiastici, ut in archiepiscopis, primatibus et patriarchis; vel juris divini, si ab ipso Christo fuerit institutus. Schismatici et hæretici non ægre concederent pontifici Romano quemdam honoris primatum, vel etiam admitterent il-

lum superiorem aliquam olim habuisse jurisdictionis potestatem, sed tantum juris ecclesiastici, quam deinceps Ecclesia ab eo auferre potuit. Ita sentiunt Græci, qui pontifici Romano subjecti fuerunt usque ad tempora patriarchæ Photii, circa annum 887. Catholici vero unanimiter contendunt Romanum pontificem semper habuisse jure divino primatum, non tantum honoris, sed jurisdictionis, in totam Ecclesiam. Ut ergo ad ipsa rerum exordia ascendamus, examinabimus 1^o an Christus concesserit Petro præminentiam auctoritatis supra alios Apostolos, et 2^o an illa præmentia ad episcopum Romanum integra transierit. Hinc in quatuor articulos præsens caput dividemus. I^{us} erit de primatu B. Petri; 2^{us} de primatu Romani pontificis; 3^{us} de ejusdem monarchia, et 4^{us} de consecrariis ejus primatus.

ARTICULUS PRIMUS.

DE PRIMATU B. PETRI.

In odium Romani pontificis, audacter negaverunt protestantes Christum aliquam concessisse B. Petro auctoritatem supra alios Apostolos: unde inferunt episcopum Romanum nihil supra alios episcopos ratione suæ sedis habere. Quidam alii novatores, quorum fit mentio apud *Tournely*, prætenderunt æqualem collatam fuisse potestatem Petro et Paulo. Contra quos omnes sit

PROPOSITIO.

Beatus Petrus accepit a Christo præminentiam auctoritatis supra omnes alios Apostolos.

Prob. ex Scriptura sacra. Ex S. Joan. i, 41, Andreas primus viderat Jesum; venit ad fratrem suum Simonem, et dixit illi: *Invenimus Messiam; adduxit eum ad Jesum. Intuitus autem eum Jesus, dixit: Tu es Simon filius Jona, tu vocaberis Cephas, quod interpretatur Petrus.* Apud Matth. xvi, congregatos Apostolos simul interrogaverat Christus, dicens, v. 15: *Vos autem, quem me esse dicitis?* Respondit

Petrus, v. 16 : *Tu es Christus, Filius Dei vivi...* 18 : *Et ego dico tibi, quia tu es Petrus, et super hanc petram ædificabo Ecclesiam meam.... et tibi dabo claves regni cælorum; et quodcumque ligaveris super terram, erit ligatum, etc.* Unde sic. Fundamentum ædificiï aliquem constituere, claves regni illi dare, sunt voces metaphoricæ collationem auctoritatis et regiminis significantes : atqui vi illarum locutionum Petrus constituitur fundamentum Ecclesiæ et illius claves accipit. Si utraque hæc præmissa demonstratur vera, certa erit propositio nostra : atqui utraque hæc præmissa ex præcedentibus textibus demonstratur vera.

1° *Major.* Fundamentum in ædificio est sicut caput in corpore, rector in civitate, dux in exercitu, etc. Claves semper fuerunt symbolum auctoritatis et dominii; qui habet jure claves alicujus ædificiï, illius est dominus; qui domum suam vendit, eam tradidisse censetur quando claves ejus remisit; claves urbis traduntur in subjectionis testimonium, etc. Ergo 1°.

2° *Minor similiter demonstratur vera*, id est, vi illarum locutionum Petrus constituitur fundamentum Ecclesiæ et claves ejus accipit. 1° Fundamentum Ecclesiæ constituitur, quidquid contra pueriliter dicat Calvinus, Institut. l. 4, c. 6, n. 6; Christus enim dicit : *Et ego dico tibi, quia tu es Petrus, et super hanc petram, etc.* Porro totus ille textus prima fronte et naturali sensu de persona Petri intelligitur : pronomen istud *hanc* manifeste ostendit vocem *petram* ad Petrum immediate antecedentem referendam esse. In lingua Hebraica, Chaldaica et Syriaca non est mutatio generis, sed idem habetur ac si diceretur : *Tu es lapis, et super hunc lapidem, etc.* *Cephas* enim lapidem et *petram* significat; eandem significationem habent voces Græcæ Πέτρος, Πέτρα : interpres his statim vertens *Cephas*, equidem vocem bis repetere noluit; masculinam pro designando homine elegit, femininam vero ad fundamentum Ecclesiæ metaphorice exprimendum usurpavit : duo igitur hæc verba, *hanc petram*, de ipso B. Petro intelligenda sunt. Ergo 1°.

2° Claves Ecclesiæ accipit. Soli namque Petro Christus

dixit : *Tibi dabo claves regni cœlorum*; statim addidit : *Quodcumque ligaveris super terram , erit ligatum et in cœlis* , etc. Ex toto contextu patet Christum quamdam prærogativam B. Petro concedere voluisse¹, in præmium insignis confessionis qua præ cæteris exclamaverat : *Tu es Christus , Filius Dei vivi* : nomen ejus *Simonem* jam antea mutaverat in *Cephæ* , profecto non sine mysterio et intentione : ergo 2^o , etc. aliunde , etc. Ergo.

S. Joan. XXI , 15 : *Dicit Simoni Petro Jesus : Simon Joannis , diligis me plus his? dicit ei : Etiam , Domine , tu scis quia amo te. Dicit ei : Pasce agnos meos. Dicit ei iterum : Simon Joannis , diligis me? ait illi : Etiam , Domine , tu scis quia amo te. Dicit ei : Pasce agnos meos. Dicit ei tertio : Simon Joannis , amas me? Contristatus est Petrus quia dixit ei tertio , Amas me? et dixit ei : Domine , tu omnia nosti : tu scis quia amo te. Dixit ei : Pasce oves meas.* Unde sic. Ut ex illo textu merito concludatur beatum Petrum emittentem potestatem jurisdictionis accepisse a Christo , duo sufficiunt , scilicet , ut per *agnos* et *oves* omnes intelligi debeant fideles , et vox *pasce* veram exprimat jurisdictionem : atqui hæc duo constant. 1^o Per *agnos* et *oves* omnes intelligi debent fideles ; pluries enim Christus se designat tanquam pastorem , et Ecclesiam velut ovile : unus est Christus , igitur unus pastor et unum ovile : Ergo 1^o omnes fideles sunt oves Christi. 2^o Vox *pasce* veram exprimit jurisdictionem , et idem est ac si diceretur : Rege , duc , governa ; talis est enim naturalis sensus vocis Græcæ Παύρις ; et insuper eo sensu vox *pasce* sumitur , quoties ad populum applicatur ; v. g. II Reg. v. 2 , sic inducitur Deus loquens ad David : *Tu pasces populum meum Israel , et tu eris dux super Israel* ; Ps. LXXVII , 71 : *Et elegit David servum suum pascere Jacob servum suum , et Israel hæreditatem suam.* Certe in his casibus vox pascere significat regere , ducere , gubernare ; sic et quando Jesus dixit Petro , *Pasce agnos meos ; pasce oves meas* : ergo , etc. aliunde , etc. Ergo. Unde illustrissimus Bossuet , *sermon sur l'unité de l'Église* , 1^{er} point : « C'est à Pierre qu'il est » ordonné premièrement d'aimer plus que tous les autres

» Apôtres, et ensuite de paître et gouverner et les agneaux
 » et les brebis, et les petits et les mères, et les pasteurs
 » mêmes : pasteurs à l'égard des peuples, et brebis à
 » l'égard de Pierre, ils honorent en lui Jésus-Christ. »

Petrus in Evangeliiis et in Actibus Apostolorum semper nominatur primus. Matth. x, 2 : *Duodecim autem Apostolorum nomina sunt hæc : primus Simon, qui dicitur Petrus, et Andreas frater ejus.* Ibidem, xvii, 1 : *Assumit Jesus Petrum et Jacobum, etc.* Marc. iii, 16; ix, 1; xiv, 33, et xvi, 7 : Luc. vi, 14; viii, 45 et 51; ix, 20, et xxii, 8 : S. Joan. i, 2 : Act. i, 13; ii, 37; iii, 1. Petrus aliquando velut dux aliorum designatur : *Petrus vero et qui cum illo erant*, Luc. ix, 32. In congregatione Apostolorum primus loquitur : *Exsurgens Petrus in medio fratrum, dixit...* Act. i, 15. *Stans autem Petrus cum undecim, levavit vocem suam*, Act. ii, 14. *Respondens autem Petrus et Apostoli, dixerunt*, etc. Act. iv, 29. In concilio Jerusalem, *Surgens Petrus, dixit ad eos*, etc. Act. xv, 7. B. Paulus ad fidem recens conversus, Jerosolymam proficiscitur, et quamvis plures tunc ibi degerent Apostoli, causam sui itineris sic indicat, Gal. i, 18 : *Veni Jerosolymam videre Petrum, et mansi apud eum diebus quindecim.* Impossible est B. Petrum casu fortuito et sine causa primum locum sic constanter obtinuisse : atqui alia causa insignis hujus distinctionis assignari non potest præter primatum auctoritatis ; non erat enim major ætate nec primus vocatus, sed Andreas frater ejus, ætate provecior, juxta omnes SS. Patres, primus fuit vocatus, Joan. i, 40 ; Petrus non erat ille *discipulus quem diligebat Jesus* ; nulla ratione constat illum præ cæteris virtutibus et sanctitate fuisse præditum : constat e contra illum solum jurando et blasphemando Christum negasse. Ergo.

Prob. 2º ex SS. Patribus. Euseb. in Chron. ad an. 44 :
 » Petrus Apostolus, natione Galilæus et Christianorum
 » pontifex primus. » Non dicit illum esse Romanorum,
 sed Christianorum pontificem ; vocat e contra Jacobum Jerosolymorum pontificem. S. Basilius, serm. de Peccato, sic de Petro loquitur : « Ille Petrus omnibus discipulis prælatus, cui majora data quam aliis sunt testi-

» monia, qui prædicatus est beatus, cui claves regni
» cœlorum conceditæ sunt. »

S. Epiph. Hæres. 51, dicit de Christo : « Petrum disci-
» pulorum suorum principem elegit. »

S. Ambrosius, in cap. XII Epist. II ad Cor. « Primatum
» non accepit Andreas, sed Petrus. »

S. Aug. Sermon. 76 : « Ipse enim Petrus in Apostolorum
» ordine primus, in Christi amore promptissimus, sæpe
» unus respondit pro omnibus. »

Multi alii citari possent textus Patrum, tum Græcorum, tum Latinorum, præsertim S. Hieronymi, S. Leonis, etc. Insuper speciale institutum est festum universale in memoriam cathedræ B. Petri, et illius festi institutio usque ad prima Ecclesiæ sæcula ascendit, ut videre est apud *Godescard*, ad diem 18 januarii : at nusquam tale festum fuit institutum in memoriam et honorem cathedræ aliorum Apostolorum. Ergo.

Solvuntur objectiones.

Obj. 1º. Plures SS. Patres referunt hæc verba, et *super hanc petram*, non ad Petrum, sed ad Christum, vel ad fideles, vel ad ipsam B. Petri confessionem de divinitate Christi : ergo falsum est Ecclesiam super Petrum esse fundatam.

R. Nego conseq. 1º Enim pauci SS. Patres prædictum textum in sensu nostro, qui est obvius et naturalis, non intelligunt. 2º Communiter qui alium sensum dictis verbis, *super hanc petram*, pro abundantia rationum, assignant, sensum nostrum non excludunt; illum e contra tanquam primum et genuinum tradunt, et simul alium per allegoriam inveniunt. Ergo.

Inst. 1º. Matth. XIX, 28, Christus dicit ad omnes Apostolos : *Sedebitis et vos super sedes duodecim, judicantes duodecim tribus Israel.* B. Paulus ait, loquens ad fideles, Eph. II, 20 : *Superædificati super fundamentum Apostolorum et Prophetarum ipso summo angulari lapide Christo Jesu.* Apocalypsis, XXI, 22, Apostoli dicuntur *duodecim*

fundamenta, scilicet murorum Ecclesiæ : ergo duodecim Apostoli perfecte fuerunt æquales.

R. Nego conseq. Nam in his textibus de potestate respectiva Apostolorum non agitur, sed de eorum virtutibus, meritis et præmiis, vel de eorum dignitate et ministerio, quatenus collective spectantur.

Sic 1° quando Christus dicit ad eos : *Sedebitis et vos super sedes duodecim*, etc. de potestate eorum in Ecclesia non loquitur, sed de eorum statu in cælo; sic enim se habet integer textus : *Amen dico vobis quod vos qui secuti estis me, in regeneratione, cum sederit Filius hominis in sede majestatis suæ, sedebitis et vos*, etc. hæc igitur verba ad rem non pertinent.

2° B. Paulus declarat fideles esse fundatos et ædificatos super Apostolos, super Prophetas et super Christum : non eodem modo tamen Prophetæ se habent respectu Ecclesiæ ac Apostoli, nec Apostoli eodem modo ac Christus, nec omnes Prophetæ eodem modo Christum prædixerunt. Ergo pariter, licet Ecclesia sit fundata super omnes Apostolos, non sequitur omnes æquali jurisdictione pollere.

3° Idem dicendum est de textu Apocalypsis. Duodecim Apostoli appellantur fundamentum murorum Ecclesiæ vel potius Jerusalem cœlestis, comparantur lapidibus pretiosis; sed inter lapides pretiosos alii aliis valde superiores sunt. Similiter ergo et Apostoli diversam habere possunt auctoritatem.

Inst. 2°. Apostoli inter se disputabant *quis eorum major esset*, Luc. xxii, 24; Christus vero eos redarguebat his verbis : *Reges gentium dominantur eorum... vos autem non sic*. Atqui non ita disputassent, nec Christus eos sic redarguisset, si unus caput aliorum constitutus fuisset : ergo.

R. Nego min. Nam 1° Apostoli erant adhuc rudes et valde imperfecti, ut patet ex ipsismet Christi objurgationibus; non mirum est ergo si adhuc disputarent : imo ipsa prærogativa Petro promissa occasionem disputandi forte præbebat; poterat enim Petrus verba Christi in sui gratiam invocare, Joannes amorem et prædilectionem

Domini allegare, Andreas quod natu major esset et prior vocatus; alii, ut Jacobus, quod essent cognati Domini. Ergo.

2º Increpatio Christi ad Apostolos, inter se sic vane disputantes, non significat nullam futuram esse inter eos hierarchiam nullumque primatum; nam, eo ipso nulla existere debuisset potestas ecclesiastica nullique pastores: siquidem pastores esse non possunt quin fidelibus sint superiores et aliquo modo eis dominantur. Id unum ergo significare voluit Christus, scilicet, suos ipsius ministros dominari non debere cum fastu et ostentatione, nec subditis terrorem incutere, sed potius fiduciam et amorem sibi conciliare, humilitatem, mansuetudinem et charitatem in usu suæ potestatis semper demonstrare. Et vero, Christus, ibidem, addit: *Sed qui major est in vobis, fiat sicut minor; qui præcessor est, sicut ministrator*: supponit ergo aliquem superioritatis gradum inter eos existere aut exstiturum esse. Ergo.

Obj. 2º. B. Petrus I Epist. v. 2, sic habet: Pascite qui in vobis est gregem Dei; et S. Cyprianus, de Unitate Eccl. « Episcopatus unus est, cujus a singulis in solidum pars » tenetur. » Ergo Petrus nihil habuit plus quam cæteri Apostoli.

R. Nego consequ. Quando enim primatum B. Petri as-truimus, non contendimus hunc Apostolum esse unicum pastorem; non dicimus aliorum pastorum, Apostolorum et episcoporum auctoritatem ab eo solo derivare: id unum affirmamus, nempe Petrum ea præditum esse pascendi et regendi potestate qua cæteros pastores antecellat, eosque ex divina institutione subditos habeat. Atqui hoc posito, textus objecti nobis minime nocent: non prior; ex eo quod enim alii jure divino præponantur ut populos pascant, non sequitur Petrum non fuisse constitutum eorum superiorem, et specialem non accepisse auctoritatem cunctos generaliter pascendi et populos et pastores. Non posterior. Nam idem S. Cyprianus, eodem libro, majorem S. Petri auctoritatem his verbis proficitur: « Super illum (Petrum) unum Christus ædificat Ec-

» clesiam suam, et illi pascendas mandat oves suas. » Deinde postquam dixit parem auctoritatem omnibus Apostolis sensu modo exposito datam fuisse, statim subjungit : « Tamen ut unitatem manifestaret, unitatis » ejusdem originem ab uno incipientem sua auctoritate » disposuit. » Si ergo episcopatus sit unus, id intelligendum est de unitate finis quem omnes episcopi sibi proponere debent, de unitate functionum quas omnes pariter exercere debent, de dignitate episcopali quam omnes æqualiter possident; non vero de unitate auctoritatis, eo sensu quod unus aliis superior non existat.

Obj. 3º. Act. viii, 14. Petrus ab aliis Apostolis Samariam mittitur; *ibid. xi, 2*, a fratribus objurgatur, et *Gal. ii, 11*, a Paulo corripitur : atqui superior ab inferiore non mittitur, non objurgatur, non corripitur : ergo.

R. Nego min. Ad primum sic respondeo. Miserunt quidem Apostoli Petrum et Joannem, sed ibi agitur de missione quæ fit ex deliberatione et per preces, non vero de missione ex auctoritate et per mandatum : porro hujusmodi missio prærogativis Petri non nocet. Sæpissime primi magistratus qui veram habent auctoritatem super omnes, tanquam legati a civibus eliguntur et ad regem mittuntur; Ismael, summus sacerdos, a Judæis missus est Romam ad Neronem, *Joseph. Ant. lib. 20, c. 7.* Ergo.

Ad duo posteriora, dico unam esse objurgationis speciem quæ a superiore tantum fieri potest, nempe quando fit per modum castigationis; sed alia est objurgatio fraternitatis quæ fit per modum admonitionis : hæc posterior est quidam charitatis actus quo quis, salutis proximi providens, non solum æqualem, verum et superiorem monere ac quodam modo objurgare vel corripere potest : at hujusmodi fuerunt objurgationes fratrum et correptio Pauli erga Petrum. Ergo.

Obj. 4º. II Cor. xii, 11, B. Paulus ait : Nihil minus fui ab iis qui sunt supra modum Apostoli. Dixerat, *xi, 28*, sibi commissam fuisse sollicitudinem omnium ecclesiarum. *Gal. ii, 7*, dicit sibi creditum esse evangelium præputii, sicut et Petro circumcisionis : atqui hæc verba demon-

strant æqualitatem inter Petrum et Paulum exstitisse : ergo.

R. Nego min. Et ad primum respondeo B. Paulum, in citato loco, cum Petro se non conferre, sed ministerium suum cum ministerio Apostolorum æquiparare ; declarat enim se divinitus a Christo fuisse immediate missum, doctum, et Apostolica potestate donatum, non secus ac cæteros discipulos. Ergo.

Ad secundum, non ait Apostolus curam omnium animarum sibi commissam fuisse, bene vero omnium ecclesiarum sollicitudine se gravari : sed hæc sollicitudo potuit esse meræ charitatis, non vero ministerii. Præterea, illa sollicitudo intelligi potest de cunctis ecclesiis ab ipso fundatis ; erant enim sat numerosæ, ut hyperbolice merito diceret se gravari *omnium ecclesiarum* sollicitudine. Insuper omnes Apostoli collective sumpti omnium ecclesiarum curam habebant ; unde Joannes, Jacobus et Judas ad omnes ecclesias scripserunt, similiter ergo B. Paulus dicere potuit omnium ecclesiarum sollicitudine se gravari, licet parem non habuerit potestatem cum Petro.

Ad tertium, B. Paulus ait sibi creditum fuisse evangelium præputii, id est gentilium, et B. Petro evangelium circumcisionis, seu Judæorum : at inde non sequitur Petrum Judæis tantum, et Paulum solummodo gentibus prædicare debuisse ; nam B. Petrus Cornelium gentilem totamque ejus domum convertit ad Christum et baptizavit, Act. x. Paulus autem Judæis primum verbum Dei annuntiabat, deinde convertebatur ad gentes, Act. xiii, 46 : ergo de speciali quadam missione agitur et de particulari destinatione divinæ Providentiæ, quæ ad hierarchicum ordinem minime pertinebat : sic Vincentius a Paulo specialiter dicitur evangelizasse pauperes, et eorum apostolus vocatur : attamen non tantum pauperes evangelizabat et docebat : ergo *a pari*, etc.

Inst. 1°. Plures sancti Patres docent Paulum æqualem esse B. Petro, et ipsius fratrem. Ergo.

R. Dist. ant. Plures sancti Patres docent Paulum æqualem esse Petro ratione vocationis, laborum, martyrii,

fructuum copiae, meriti ac gloriæ, *conc.* ratione dignitatis et potestatis, *nego ant.* Itaque non diffitemur plures sanctos Patres B. Paulum aliquoties cum B. Petro comparasse et æqualem fecisse, sed sensu modo exposito, quod absque dubio fieri potest : at nego sanctos Patres illum cum Petro comparasse ratione dignitatis et auctoritatis ; nullus enim pro hac opinione affertur textus clarus et expressus, dum multi, e contra, proferuntur in quibus suprema B. Petri auctoritas clare exprimitur ; et insuper singularis ille primatus tot et tantis argumentis demonstratur, tam constanti traditione firmatur, ut pauca quædam sanctorum Patrum verba illud dogma subvertere nequeant. Ergo.

Romani pontifices sua decreta suasque constitutiones nomine beatorum Petri et Pauli tradunt, eaque auctoritate utriusque Apostoli obfirmant. Verum doctrina sanctæ sedis Romanæ satis nota est ut illæ locutiones benigna interpretatione intelligi debeant ; certum est enim illos pontifices nunquam ambos Apostolos tanquam pares ratione auctoritatis et jurisdictionis habuisse : quando igitur nomine utriusque agunt, id intelligendum est de invocatione ac de patrocinio. Ergo.

ARTICULUS SECUNDUS.

DE PRIMATU ROMANI PONTIFICIS.

Nonnulli protestantes asseruerunt B. Petrum Romam non venisse, nec proinde suam sedem ibi habuisse, aut saltem ibi sedem adhuc occupantem non obiisse : inde concludunt Romanum pontificem B. Petri successorem non esse. Alii vero protestantes et Græci schismatici fatentur quidem Petrum sedem suam Romam ab Antiochia transtulisse, ibi eam occupantem mortuum esse, et Romanum pontificem legitimum successorem habuisse : at simul contendunt illum nullam auctoritatem jure divino super alios episcopos habere ; et, si quam olim exercuerit, hanc ex Ecclesiæ concessione, seu ex con-

ciliis obtinuisse. Contra hos et illos duæ erunt propositiones.

Notandum est quod, etiamsi præeminentia pontificis Romani fuisset tantum juris ecclesiastici, nihilominus schismatici essent Græci; nam sua auctoritate privata hanc prærogativam a summo Pontifice auferre non possent, et tamen nullum citari potest concilium generale quo hæc prærogativa fuerit abolita. Ergo.

PROPOSITIO PRIMA.

Beatus Petrus sedem suam transtulit Romam, et ibi eam tenens mortuus est.

Prob. Illud pro certo tenendum est quod constanti traditione per quindecim sæcula unanimiter fuit creditum; alioquin nihil esset credendum in historia: atqui per quindecim sæcula constanter et unanimiter creditum est B. Petrum venisse Romam, sedem suam in hac civitate fixisse, et ibi eam occupantem mortuum esse. Ad asstruendam ultimam hanc propositionem, innumera citari possent testimonia, tum SS. Patrum, tum auctorum ecclesiasticorum; et nullum aliud testimonium eis positive adversatur. Ergo.

Præterea, illud factum rejici non potest quod necessario conjunctum est cum inconcussis monumentis: atqui factum modo a nobis expositum cum inconcussis monumentis essentialiter conjungitur; sepulcrum enim B. Petri ostenditur Romæ, reliquæ ejus summo honore venerantur, ad eas frequenti concursu adeunt fideles ex cunctis orbis partibus; urbs illa ideo dicitur sancta; apud eam dicuntur esse limina Apostolorum, ejus pontifex semper habitus est ut legitimus beati Petri successor: atqui hæc omnia sic institui et perpetuo tradi non potuerunt quin reipsa Petrus venerit Romam, et ibi sedem episcopalem tenens mortuus fuerit: ergo.

Multi citantur protestantes qui suis suffragiis hanc propositionem plenissime confirmant. Sic, inter alios, Pearson episcopus Anglus, Grotius, Usserius, Hamman-

us, Blondel, Scaliger, *Casaubon*, *Du Moulin*, *Petit*, *Basnage*, etc.

Obj. Assignari non potest tempus quo B. Petrus venerit Romam; nullam mentionem de itinere ejus facit S. Lucas in Actibus Apostolorum; ipsum nequidem nominat B. Paulus in Epistola ad Romanos: ergo non constat eum venisse Romam ibique mortuum esse.

R. Nego conseq. Nam 1° multa sunt facta quæ a nemine in dubium revocantur, et quorum tamen dies et annus præcise assignari non possunt: talis est mors Christi, de qua sane nemo dubitare potest, et cujus tamen epocha non est omnino certa.

2° Multa non levia omisit S. Lucas in Actibus Apostolorum, v. g. reprehensionem Petri a Paulo circa legalia, et iter B. Pauli Jerosolymam ad videndum Petrum.

3° B. Paulus in Epistola ad Hebræos de Jacobo episcopo Hierosolymitano non loquitur, nec de Timotheo episcopo Ephesino in Epistola ad Ephesios; attamen nemo inde concludit Jacobum non fuisse Jerusalem, nec Timotheum Ephesi: ergo *a pari*, ex eo quod de Petro in Epistola ad Romanos non loquatur, male inferretur eum istius urbis episcopum tunc non fuisse.

Aliunde, eo tempore quo Paulus ad Romanos scribebat, anno æræ vulgaris 57, Petrus, juxta plures, non erat Romæ, quia omnes Judæi et cum illis Christiani, anno Claudii nono, inde expulsi fuerant: Petrus vero tunc in Oriente versabatur, Jerosolymam petiit, ibique primum concilium celebravit, prout cap. xv Act. describitur. Mortuo Claudio, rediit Romam, et in hac civitate anno Neronis ultimo, æræ nostræ 67, una cum Paulo ab Oriente adducto martyrio coronatus est. Post ascensionem Domini, quatuor annos manserat Jerusalem, quarto anno venerat Antiochiam et ibi suam sedem instituerat; inde profectus, diversas regiones evangelizans peragraverat, scilicet Asiam Minorem, Galatiam, Pontum, Capadociam, etc. Quinto circiter anno a sede sua Antiochiæ instituta, redierat Jerusalem, ubi ab Herode in carcerem conjectus, ministerio angeli liberatus fuerat, Act. vii;

statim venerat Romam et ibi sedem suam fixerat, anno Claudii 2, Christi vero 42. Sic per viginti quinque annos circiter Romanam rexit Ecclesiam ab ipso fundatam.

Unde concludendum est, Romanum pontificem legitimum esse B. Petri successorem : igitur, si eminentes illius Apostoli prærogativæ ad aliquem transmitti debuerunt, solus pontifex Romanus eas sibi vindicare potest. Itaque sit

PROPOSITIO SECUNDA.

Romanus pontifex, tanquam beati Petri successor, primum honoris et jurisdictionis habet jure divino in tota Ecclesia.

Prob. Scriptura sacra, traditione, praxi Ecclesiæ, rationibus theologicis et diversis testimoniis protestantium.

Primo, Scriptura sacra. Demonstravimus enim ex Scriptura sacra beatum Petrum primum supra alios Apostolos a Christo accepisse. *Unde sic argumentari licet.* Ut constet pontificem Romanum primum jurisdictionis seu auctoritatis supra alios episcopos jure divino in tota Ecclesia habere, duo requiruntur et sufficiunt, scilicet : 1° quod B. Petrus successorem in suo primatu habere debuerit, et 2° quod pontifex Romanus hunc B. Petri primum solus habere possit : atqui hæc duo certa sunt.

1° *B. Petrus successorem in primatu habere debuit.* Prærogativæ enim a Christo pro Ecclesia institutæ, tamdiu existere debent quamdiu permanebit Ecclesia : atqui primatus beati Petri a Christo fuit institutus, non pro Petro, sed pro Ecclesia ; ad illius enim constitutionem evidenter pertinet : *Tu es Petrus, inquit ipse Christus, et super hanc petram ædificabo Ecclesiam meam, etc. Pasce agnos meos, pasce oves meas, etc.* Ecclesia autem nunquam suo fundamento carere potest ; oves Christi semper ducendæ et pascendæ sunt : divinæ ergo illæ B. Petri prærogativæ perire non potuerunt, sed perseverare debuerunt : atqui perseverare non potuerunt nisi ad successorem transmitterentur : ergo.

2° *Solus pontifex Romanus primatum B. Petri habere potest.* Nullus enim alius gloriari potest se talem habere prærogativam. Præterea B. Petrus mortuus est Romæ, sedem episcopalem hujus urbis tenens : solus ergo ipsius successor in hac sede episcopali ejusdem primatum habere potest, vel illius successor nullam haberet sedem : ergo 2°, etc. aliunde, etc. Ergo.

Secundo, traditione. Merito enim concluditur ex traditione constare pontificem Romanum, tanquam B. Petri successorem, primatum jurisdictionis in tota Ecclesia habere, si continua existat series testimoniorum et conciliorum et Patrum in favorem hujus assertionis : atqui continua existit series testimoniorum et conciliorum et Patrum in gratiam hujus assertionis, ut unicuique historiam ecclesiasticam attente legenti patet. Ex innumeris quæ citari possent et quæ apud nonnullos auctores, v. g. *Tournely, Bailly, Regnier, Jacques*, etc. referuntur, quædam tantum seligemus.

1° *Ex conciliis*, I Nicænum, generale I : « Ecclesia Romana semper habuit primatum; » *Labbe*, t. 2.

Constantinop. I, generale II : « Constantinopolitanus episcopus habeat priores honoris partes, post Romanum episcopum; » id. t. 2.

Ephes. generale III, actione 3 : « S. Petrus, Apostolorum princeps et caput, Ecclesiæ catholicæ fundamentum, a D. N. J. C..... claves regni accepit, solvendique ac ligandi peccata potestas ipsi data est, qui ad hoc usque tempus et semper in suis successoribus vivit et judicium exercet; » id. t. 3.

Chalcedonense, generale V, cujus patres ad S. Leonem scribentes, aiunt : « Rogamus igitur, tuis decretis nostrum honora judicium, et sicut nos capiti et bonis adjecimus consonantiam, sic et summitas tua filiis quod decet adimpleat; » id. t. 4.

Concil. Florentinum, in quo Græci cum Latinis sedebant, sic habet : « Definimus sanctam sedem Apostolicam et Romanum pontificem in universum orbem tenere primatum, et successorem esse B. Petri princi-

» pis Apostolorum, verum Christi vicarium, totiusque » Ecclesiæ caput, » etc. id. t. 13.

Concil. Trident. sess. 14, cap. 7 : « Pontifices maximi, » pro suprema potestate sibi in Ecclesia universa tradita, » causas aliquas criminum graviores suo potuerunt pe- » culiari iudicio reservare. »

2º *Ex SS. Patribus.* S. Irenæus, lib. 3 contra Hæres. c. 3, n. 2, dicit, ad Ecclesiam Romanam, *propter potio- rem principalitatem*, omnem necesse esse convenire Eccle- siam.

S. Athan. ad Felicem, Romanum pontificem, scribit : « Ob id vos prædecessoresque vestros... in summitate » arcæ constituit (*Christus*), omniumque Ecclesiarum » curam habere voluit, ut nobis succurratis. » Idem habent SS. Basilius, Epist. 32; Cyril. Alex. lib. de The- sauro; Theodoretus, Epist. ad S. Leonem.

S. Cyprianus, Epist. 53 : « Navigare audent, et ad » Petri cathedram atque ad Ecclesiam principalem, unde » unitas sacerdotalis exorta est... litteras ferre. »

S. Aug. Epist. 43, alias 162 : « In Romana Ecclesia » semper Apostolicæ cathedræ viguit auctoritas. »

S. Hieronymus, Epist. 14 ad Damasum papam : « Ego » nullum primum nisi Christum sequens, beatitudini » tuæ, id est, cathedræ Petri communione consocior..... » Quicumque tecum non colligit, spargit; hoc est, qui » Christi non est, Antichristi est. » Ergo, etc.

Tertio, praxi Ecclesiæ. Ille jure divino primatum habet jurisdictionis qui, nemine contradicente, omnibus retro sæculis jure sibi proprio concilia œcumenica convocavit, illis per se aut per legatos præfuit, eorum decreta confirmavit et executioni mandari jussit, ab eorum canonibus dispensavit; qui ex toto orbe Christiano circa fidem et mores frequenter consultus, doctrinæ statuta pro uni- versa Ecclesia constituit, ad quem undique majores de- latae sunt causæ, qui, ex cunctis mundi partibus, in gra- vissimis causis episcoporum, archiepiscoporum et etiam patriarcharum, tam Orientis quam Occidentis, innu-

meras appellationes suscepit : atqui pontifex Romanus hæc omnia jure proprio semper præstitit, tota Ecclesia consentiente : ergo 3°.

Quarto, rationibus theologicis. 1° Vera Ecclesia habere debet principium unitatis regiminis, *ex probatis* : atqui Ecclesia Romana, quæ est vera Ecclesia, *ut demonstravimus*, principium unitatis regiminis non haberet, si primatus jurisdictionis summi Pontificis rejiceretur ; tunc enim nullus esset cui omnes subjici tenerentur.

2° Ecclesia est ovile, regnum, corpus, etc. in ovili autem debet esse pastor, rex in regno, caput in corpore : ergo.

Quinto, diversis testimoniis celeberrimorum protestantium. Melancthon apud Bossuet, *Histoire des Variations*, l. 5, n. 24 : « Nos gens demeurent d'accord que la police ecclésiastique, où l'on reconnaît des évêques supérieurs de plusieurs églises et l'évêque de Rome supérieur à tous les évêques, est permise.... ainsi il n'y a point de contestation sur la supériorité du pape et sur l'autorité des évêques, et tant le pape que les évêques peuvent aisément conserver cette autorité ; car il faut à l'Eglise des conducteurs pour maintenir l'ordre, pour avoir l'œil sur ceux qui sont appelés au ministère ecclésiastique, et sur la doctrine des prêtres, et pour exercer les jugemens ecclésiastiques : de sorte que s'il n'y avait point de tels évêques, il en faudrait faire. La monarchie du pape servirait aussi beaucoup à conserver entre plusieurs nations le consentement dans la doctrine : ainsi on s'accorderait facilement sur la supériorité du pape, si on était d'accord sur tout le reste. »

Leibnitz apud de Stark, sic habet : « Comme Dieu est le Dieu de l'ordre, et comme il est de droit divin que le corps d'une seule Eglise catholique et Apostolique soit contenu par un seul gouvernement hiérarchique et universel, il s'ensuit qu'un magistrat suprême spirituel, qui se renferme dans de justes bornes, y soit également en vertu du même droit, et qu'il se

» trouve investi de toute la puissance et force dictatoriales nécessaires à l'exercice de sa charge pour le salut » de l'Eglise. »

In Gallia nostra Calvinistæ, anno 1775, humilem confecerunt supplicationem ad regem, ut honores status civilis et legitimitatem matrimoniorum suorum obtinerent; in ea autem supplicatione sic loquebantur :

« La chaîne de la tradition dont Pierre et Paul ont » attaché le premier anneau à l'Eglise de Rome, est tellement perpétuée parmi nous, que si les Irénée, les » Grégoire, les Cyrille, les Athanase, les Chrysostôme, » revenaient aujourd'hui sur la terre, ils ne reconnaî- » traient que dans l'Eglise Romaine la société dont ils » étaient membres; » apud de Stark. Utilissime legetur recens ille auctor Lutheranus.

Multa pariter clara et non parum curiosa reperiuntur testimonia, et protestantium, et schismaticorum Græcorum apud D. *de Maistre, du Pape*, t. 1, cap. 9 et 10. Ergo denique tenendum est pontificem Romanum, tanquam B. Petri successorem, supremam habere jure divino auctoritatem, seu primatum jurisdictionis in tota Ecclesia.

Hinc patet falsam et hæreticam esse doctrinam doctoris Richer, qui, in libro de la puissance ecclésiastique et politique, an. 1611, contendit potestatem clavium immediate a Christo datam fuisse Ecclesiæ, et ab Ecclesia commissam esse Petro et Apostolis, eorumque successoribus Romano pontifici et cæteris episcopis. Vide Richerii systema confutatum, auctore Veith.

Solvuntur objectiones.

Obj. 1º. B. Paulus, Eph. iv, 11, et I Cor. xii, 28, varios enumerat hierarchiæ ecclesiasticæ gradus, nempe, apostolos, evangelistas, pastores et doctores, nihilque de summo Pontifice dicit : ergo superiorem illius auctoritatem non agnoscit.

R. Nego maj. Nam B. Apostolus in locis citatis nominat prophetas, evangelistas, doctores et eos qui extraor-

dinaria dona acceperant a Deo : sed hi omnes ad sacram hierarchiam non pertinebant. Præterea, summus Pontifex inter pastores numeratur; quando enim loquimur de pastoribus Ecclesiæ in genere, summum Pontificem certe non excludimus : pariter ergo B. Paulus illum sub generali pastorum denominatione complectebatur. Ergo.

Obj. 2º. Quamvis episcopi legitimi sint Apostolorum successores, specialia tamen eorum privilegia non habent : ergo *a pari* pontifex Romanus, licet B. Petri successor, ipsius primatum non ideo possidet.

R. Nego consequ. Namque duplicis generis necessario distinguenda sunt privilegia Apostolorum : alia scilicet ad conservationem Ecclesiæ necessaria et jugiter permansura, et alia non necessaria et ideo ad tempus tantum duratura. Prioris generis sunt potestas ordinis et potestas jurisdictionis : utraque absolute necessaria est Ecclesiæ : tamdiu igitur perseverare debet quamdiu durabit Ecclesia, id est, usque ad consummationem sæculi. Privilegia autem posterioris generis sunt dona miraculorum, prophetiarum, linguarum, personalis infallibilitas, extraordinaria potestas ubique terrarum prædicandi, episcopos et presbyteros constituendi, etc. Hæc quidem in creanda et constituenda Ecclesia valde utilia et aliquo sensu necessaria esse potuerunt : ad regimen vero et conservationem ejus necessaria non erant; imo privilegium ubique prædicandi et episcopos ac presbyteros constituendi, paci, tranquillitati et unitati evidentissime noceret : hæc privilegia igitur ad episcopos Apostolorum successores transire non debuerunt. Similiter B. Petrus personalia etiam habebat privilegia cæteris Apostolis et sibi communia, quæ suis successoribus transmittere non debuit : at primatus prærogativa hujus generis non erat, cum ad ipsam Ecclesiæ constitutionem pertineat. Ergo.

Inst. Primatus auctoritatis B. Petro fuit collatus in præmium insignis ejus fidei confessionis : ergo privilegium erat personale.

R. Nego consequ. Christus enim propositum Ecclesiam

suam constituendi efformans, voluit ut esset una : eo ipso decrevit aliquem in ea exstiturum primatum, sicut est prima auctoritas in omni societate bene ordinata; potuisset illum primatum huic aut illi ex Apostolis conferre : illum autem B. Petro contulit, propter eximiam ejus fidei confessionem : sub hoc respectu fuit prærogativa personalis ; sed nihilominus fuit simul qualitas veræ Ecclesiæ essentialis, ad successorem S. Petri transitura et jugiter permansura. Ergo.

Obj. 3º. S. Gregorius Magnus, non episcopus universalis, sed *servus servorum Dei* appellari voluit : attamen si primatum B. Petri habuisset, episcopus universalis appellari potuisset. Ergo.

R. 1º. Dist. maj. Episcopus universalis appellari noluit, humilitatis vel prudentiæ causa, *conc.* quia persuasum habebat se præeminentiam jurisdictionis non habere, *nego maj.* Itaque S. Gregorius Magnus nomen *episcopi universalis* fortiter respuit, quia erat valde humilis et honores despiciebat. Aliunde, ita forte se gessit, ut efficacius reprimeret ambitionem et audaciam Joannis Junatoris, patriarchæ Constantinopolitani, qui patriarcha œcumenicus vel episcopus universalis appellari volebat : contra hujusmodi novitatem fortiter insurrexit S. Gregorius et quantum potuit eam repressit tanquam insolitam, falsam, impiam, blasphematoriam et juribus Ecclesiæ Romanæ nocivam. Si ergo talem abnuerit denominationem, si testatus sit nullum e suis prædecessoribus illam usurpare voluisse, non ideo persuasum habebat se nullam præeminentiam jurisdictionis habere.

R. 2º. Dist. min. Episcopus universalis appellari potuisset, eo sensu quod veram haberet auctoritatem super omnes alios episcopos, *conc.* eo sensu quod solus esset episcopus, vel alii episcopi essent duntaxat illius vicarii, *nego. min.* Equidem hæc appellatio quæ in patriarcha Constantinop. blasphemici nomen erat (Greg. Mag. lib. 5, Epist. 30), aliquo sensu in pontifice Romano vera esse potest : at sub alio respectu male sonat et falsa est ; nam pontifex Romanus non est solus episcopus : licet caput

sit generale totius Ecclesiæ, alia tamen sunt capita a Christo instituta, sed capiti generali subordinata : merito igitur Gregorius Magnus hanc æquivocam appellationem respuit.

Obj. 4°. Primatus Romani pontificis eo facto nititur, scilicet, B. Petrum Romam venisse, ibique sedem suam fixisse et mortuum esse : atqui factum istud jure divino non nititur : ergo primatus pontificis Romani non est juris divini.

R. 1°. *Retorqueo argumentum.* Successio ministerii ecclesiastici hoc facto nititur, scilicet, episcopos serie non interrupta sibi successisse et legitime ordinatos esse : atqui factum istud jure divino non constat : ergo successio ministerii ecclesiastici non est juris divini.

R. 2°. *Nego maj.* Primatus enim pontificis Romani hac utraque propositione nititur, nempe Petrum primatum jurisdictionis in tota Ecclesia jure divino habuisse, et legitimum B. Petri successorem hunc eundem primatum jure divino possidere : hæc utraque propositio in Scriptura expresse aut æquivalenter continetur ; igitur est de fide : atqui evidenter constat Romanum pontificem legitimum B. Petri esse successorem : ergo evidenter constat illum jure divino primatum jurisdictionis in tota Ecclesia habere : id unum probare intendebamus.

Inst. Si B. Petrus obiisset Antiochiæ, solus Antiochenus episcopus primatum jurisdictionis habuisset : ergo præeminentia pontificis Romani, non a Christo, sed a Petro qui suam mutavit sedem, oritur, proindeque non est juris divini.

R. 1°. *Retorqueo arg.* Si talis vir ad episcopatum non fuisset electus, alius sedem quam occupat habuisset : ergo potestas quam exercet non oritur a Deo, bene vero a rege qui eum designavit.

R. 2°. *Distinguo consequens.* Præeminentia pontificis Romani non oritur a Christo, sed a Petro, etc. quoad factum successionis, *transeat* ; quoad ipsam superioritatis prærogativam, *nego consequens et conseq.* Distinguendum est igitur cum Bellarmino, lib. 2, c. 12, factum succes-

sionis ab ipsa superioritatis prærogativa successioni annexa; Christus enim voluit ut B. Petrus legitimum haberet successorem qui eundem jurisdictionis primatum teneret: unde statim atque constat hunc aut illum pontificem legitimum esse beati Petri successorem, eo ipso certum est illum jure divino, id est, a Christo primatum jurisdictionis habere. Itaque si Petrus nullam elegisset particularem « Ecclesiam quam regeret, sicut fecit quin-
» que primis sui apostolatus annis, post ejus mortem ille
» episcopus Petro successisset quem sibi elegisset Eccle-
» sia. Potuisset quoque semper manere Antiochiæ, et
» tunc Antiochenus episcopus sine dubio illi successis-
» set; quia vero Romæ sedem suam fixit, et eam tenuit
» usque ad mortem, inde factum est quod Romanus
» pontifex ei succedat. » Ita Bellarminus in loco citato. Certum est ergo Romanum pontificem suam jurisdictionis præminentiam immediate a Christo tenere, quia evidenter constat illum B. Petri esse successorem.

Quoad factum successionis, *dixi transeat*, quia non omnino certum est pontificem Romanum, quatenus est pontifex Romanus, ex institutione Christi esse caput totius Ecclesiæ; non est enim ex institutione Christi caput totius Ecclesiæ, nisi in quantum Christus voluit ut Petrus sedem suam figeret Romæ, et ibi eam tenens moreretur: atqui non constat Christum voluisse, etc. Communius tamen id a theologis admittitur, et multo convenientius fuisse videtur. Roma quippe tunc præcipua erat urbs, princeps et caput totius orbis cogniti: valde igitur conveniebat ut ibi figeretur prima sedes religionis Christianæ per orbem diffundendæ: sed neque ex Scriptura, neque ex traditione constat Petrum hujusmodi mandatum a Christo accepisse: ergo.

Ex dictis quædam notanda sequuntur.

1^o De fide catholica est legitimum B. Petri successorem primatum jurisdictionis in tota Ecclesia jure divino habere; hæc enim propositio in promissionibus B. Petro factis evidenter continetur.

2^o Hæc propositio: *pontifex Romanus canonice electus*,

legitimus est B. Petri successor, et jure divino primatum jurisdictionis in tota Ecclesia habet, multis videtur de fide; quia, ex promissionibus B. Petro factis, ex perpetua traditione, ex unanimi conciliorum et Patrum consensu constat, et cum propositionibus de fide essentialiter est conjuncta. Quidam tamen judicant illam non esse de fide, quia immediate non est revelata; verum, juxta omnes, est saltem conclusio theologica cui internus mentis assensus debetur.

3^o Hæc altera propositio: *Hic aut ille homo*, v. g. *Gregorius XVI, legitimus est B. Petri successor*, communius non habetur ut de fide; quia nullibi in deposito revelationis expresse continetur. Sed ubi constat electionem fuisse canonicam, statim certum est singularem hunc hominem legitimum esse Petri successorem, Christi vicarium, et sub dispendio salutis omnimodam illi debitam esse reverentiam ac obedientiam.

4^o Quidquid in alia hypothesi contingere potuisset, nempe si B. Petrus sedem suam Romæ non fixisset, certum est in præsentibus rerum adjunctis legitimum B. Petri successorem necessario esse Romanum episcopum, et Romanum episcopum necessario esse B. Petri successorem; talem enim ordinem nemo subvertere potest. Unde merito concluditur semper exstiturum esse Romanum pontificem, sive resideat Romæ, sive alibi cogatur aut eligat habitare. Ita communissime theologi contra paucos alios, qui dicunt legitimum B. Petri successorem aliam occupare posse sedem, aut absque sede manere, sicut fecit Petrus in quinque primis apostolatus sui annis.

ARTICULUS TERTIUS.

DE MONARCHIA ROMANI PONTIFICIS.

Certum est, ex dictis, regimen Ecclesiæ esse monarchicum, et Romanum pontificem monarcham; Romanus namque pontifex non solum dignitatis et honoris, sed jurisdictionis et auctoritatis primatum habet in tota Ec-

clesia, eam regit ac gubernat. Ergo. *Ita omnes theologi catholici.* Verum habetne solus jure divino plenitudinem jurisdictionis ecclesiasticæ, ita ut episcopi ab ipso totam auctoritatem suam teneant? Res controvertitur.

Quidam dicunt Apostolos totam jurisdictionem suam, non immediate a Christo, sed a B. Petro accepisse: ita apud Bellarminum, de Romano pontifice, l. 4, c. 22, Joannes de Turrecremata et Jacobatius. Alii vero docent Apostolos jurisdictionem suam a Christo quidem accepisse, sed negant episcopos eis successisse, nisi quantum ad characterem: contendunt omnem jurisdictionem ecclesiasticam in solo papa jure divino residere, et ab ipso episcopos eam accipere. Hinc summus Pontifex est monarcha absolutus. Sic Bellarminus et cum illo plerique Ultramontani. Alii autem permulti et generaliter Galli tenent episcopos, canonice institutos, immediate a Christo jurisdictionem accipere.

Notandum 1°, sententiam Joannis de Turrecremata communissime a theologis et ab ipso Bellarmino rejici: illam ergo statim sejungimus.

Notandum 2°, episcopos, in Bellarmini opinione, aliquo sensu auctoritatem suam jure divino possidere; Christus enim suam instituens Ecclesiam, voluit ut in ea essent episcopi: unde nec eorum characterem mutare aut limitare, nec eorum existentiam tollere posset Romanus pontifex.

Notandum 3°, modum instituendi episcopos, in quacumque opinione, esse tantum juris ecclesiastici; nullibi enim Christus illum præscripsit, nec circa illum traditio Ecclesiæ fuit constans: ipsa summi Pontificis institutio varia fuit pro variis temporibus, et tamen Pontifex semel canonice institutus statim a Christo plenam habet auctoritatem: quamvis ergo modus instituendi episcopos sit humanus, non repugnat eos jurisdictionem a Christo immediate accipere.

His notatis, quæstionem, utpote dubiam et ad praxim minime pertinentem, definire aut partem unam præ altera defendere non aggredimur; ea quippe longe fuit

agitata in concilio Trid. ut videre est apud Palavicinum, præsertim l. 18, cap. 15, et non definita.

Bossuet, Defens. Declar. part. 3, l. 8, cap. 14, fortiter contendit, episcopos canonice institutos jurisdictionem habere immediate a Christo, sicque concludit : « At
 » episcopos, licet papæ divino jure subjectos ejusdem
 » esse ordinis, ejusdem characteris, sive, ut loquitur Hieronymus, *ejusdem meriti, ejusdem sacerdotii*, collegasque et coepiscopos, appellari constat, scitumque illud
 » Bernardi ad Eugenium papam, *Non es dominus episcoporum, sed unus ex ipsis*. Quod ergo nuperrime inventum est, episcopos a papa jurisdictionem habere, ejusque quosdam esse vicarios, ut duodecim sæculis inauditum, a scholis Christianis amandari oporteret. » Vide etiam *Confér. d'Angers, de la Hiérarchie*, et cardinalem *de la Luzerne, sur la Déclaration de 1682*.

PRINCIPIUM PRIMUM.

In quacumque opinione, omnes episcopi, non solum ratione characteris, sed et ratione substantiæ jurisdictionis sunt æquales; habent enim quidquid eos constituit episcopos, sive majori, sive minori præsent diœcesi. Quia vero natura constitutionis Ecclesiæ exigit ut eorum jurisdictio inter certos limites coerceatur, quædam institutæ sunt regulæ quibus determinantur diœceses, et episcoporum relative ad se invicem honores; illæ regulæ solius sunt juris ecclesiastici. Facile ergo intelligitur quomodo episcopi, licet jure divino æquales, alii aliis priores aut majores dici possint.

PRINCIPIUM SECUNDUM.

Constat, quæcumque admittatur sententia, regimen Ecclesiæ esse monarchicum, hocque de fide esse: unicus enim esse potest totius societatis christianæ præses et supremus gubernator: unde concil. Florentinum decrevit « Romanum pontificem in universum orbem
 » tenere primatum, successorem esse B. Petri principis

» Apostolorum, verum Christi vicarium, totius Ecclesiæ
 » caput, et omnium christianorum patrem ac doctorem
 » existere, et ipsi in B. Petro pascendi, regendi et guber-
 » nandi universalem Ecclesiam a D. N. J. C. plenam
 » potestatem traditam esse, quemadmodum in gestis
 » œcumenicorum conciliorum et in sacris canonibus con-
 » tinetur. » Hic Antonius *de Dominis* negans monarchiæ
 formam a Christo immediate fuisse institutam, habitus
 est ut schismaticus et hæreticus. Simul etiam certum est
 hanc monarchiam aristocratia esse temperatam, ut fere
 sunt gubernia *repræsentativa*, in quibus princeps su-
 premam habet auctoritatem, sed non omnino absolu-
 tam; nonnullis fundamentalibus statutis quæ præter-
 gredi non potest, subjicitur; universam et a solo Deo
 dependentem habet jurisdictionem in omnes subditos,
 in populum et in magnates: verum in eo casu quædam
 existit potestas ipsi subordinata, quam tamen destruere
 non potest. Sic summus Pontifex, ob eminentem auctori-
 tatem suam in Ecclesia, omnibus præest, omnibus pro-
 videre debet, cuncta regit, moderatur ac gubernat:
 attamen suprema ejus potestas quosdam agnoscit limites;
 non omnia pro solo arbitrio destruere aut mutare potest;
 episcopos, v. g. non potest sine justis causis deponere,
 suspendere aut interdicere; functiones episcopales in
 illorum diocesi turbare, aut sibi assumere et per se vel
 per alios licite exercere non potest; nec pariter ex solo
 nutu et absque justa causa antiquas disciplinæ generalis
 regulas, summorum Pontificum decreta et conciliorum
 canones universim acceptos destruere aut mutare; tunc
 enim non recte gubernaret, sed sua potestate abute-
 retur. Sub eo respectu potestas ejus canonibus est
 moderanda.

Hoc sæpius publice confessi sunt plurimi summi Pon-
 tifices. S. Cœlestinus, Epist. 1 ad Illyricos, ait: « Domi-
 » nentur nobis regulæ, non dominemur regulis. » Grego-
 rius VII ad Sanctium, Arragoniæ regem, qui aliquam
 postulabat dispensationem, sic respondit: « Solet sancta
 » sedes Apostolica pleraque, considerata ratione, tolerare,

• sed nunquam in suis decretis et constitutionibus a con-
 » cordia traditionis recedere; » *Labbe*, t. 10. S. Bernardus
 sic monet Eugenium papam, l. 3 de Consider. c. 4 :
 » Ubi necessitas urget, excusabilis dispensatio est; ubi
 » utilitas provocat, laudabilis dispensatio est.... cum
 » nihil horum est, non plane fidelis dispensatio, sed cru-
 » delis dissipatio est. »

Unde sic merito *Bossuet*, *Sermon sur l'unité de l'Eglise*,
 2^e point : « L'océan même a ses bornes dans sa plénitude,
 » et s'il les outrepassait sans mesure aucune, sa pléni-
 » tude serait un déluge qui ravagerait tout l'univers.
 » Au reste, la puissance qu'il faut reconnaître dans le
 » saint Siège est si haute et si éminente, si chère et si
 » vénérable à tous les fidèles, qu'il n'y a rien au-dessus
 » que toute l'Eglise catholique ensemble; encore faut-il
 » savoir connaître les besoins extraordinaires et les ex-
 » trêmes périls où il faut que tout s'assemble et se ré-
 » unisse. »

ARTICULUS QUARTUS.

DE PRÆROGATIVIS DIGNITATI SUMMI PONTIFICIS ANNEXIS.

Inter illas prærogativas aliæ sunt certæ et ab omnibus
 admissæ; aliæ vero sunt controversæ : hinc duplex erit
 hujus articuli paragraphus.

§ I. — De prærogativis Romani pontificis certis et communiter
 admissis.

Octo præcipue numerantur hujusmodi prærogativæ :
 1^a indefectibilitas in fide; 2^a centrum unitatis catholicæ;
 3^a potestas edendi decreta fidei et condendi leges quæ
 cunctos obligent Christianos; 4^a jus dispensandi ab omni-
 bus etiam conciliorum generalium legibus; 5^a concilia
 generalia convocandi, tanquam præses celebrandi eaque
 confirmandi; 6^a causas majores tum fidei, tum discipli-
 næ generalis ad se evocandi et appellationes episcoporum
 suscipiendi; 7^a episcopos confirmandi ac instituendi.
 8^a Denique jure divino immediatam habet jurisdictionem
 per totum orbem Christianum.

SECTIO PRIMA. — De indefectibilitate summi Pontificis in fide.

Nota, dari discrimen inter infallibilitatem summi Pontificis et ejus indefectibilitatem. Infallibilitas in eo consisteret, quod decreta fidei universæ Ecclesiæ proponendo, nunquam errare posset : de ea prærogativa infra dicemus.

Indefectibilitas summi Pontificis in eo sita est, quod a fide nunquam penitus excidere possit, errorem docendo et pertinaciter defendendo.

PROPOSITIO.

Summus Pontifex est indefectibilis in fide.

Prob. Scriptura sacra et ratione.

1^o *Scriptura sacra.* Luc. xxii, 31 : *Simon, Simon, ecce Satanas expetivit vos, ut cribraret sicut triticum : ego autem rogavi pro te ut non deficiat fides tua : et tu aliquando conversus, confirma fratres tuos.* Unde sic. Nullum est dubium quin oratio Christi fuerit exaudita : ergo fides B. Petri fuit indefectibilis ; hoc a nullo negatur. Atqui hæc insignis prærogativa ad successores B. Petri transire debuit ; quia ad officium capitis Ecclesiæ pertinet, et magis necessaria est decursu sæculorum quam tempore Apostolorum, qui infallibilitate personali gaudebant. Semper igitur legitimus existere debet Pontifex qui sit caput Ecclesiæ sicut B. Petrus, a fide non deficiat et fratres suos confirmare valeat. Hinc *Bossuet, Méditations sur l'Évangile* : « Cette parole, *Affermis tes frères*, n'est pas un commandement qu'il fasse en particulier à saint Pierre ; c'est un office qu'il érige et qu'il institue dans son Eglise à perpétuité.... Il devait toujours y avoir un Pierre dans l'Eglise pour confirmer ses frères dans la foi : c'était le moyen le plus propre pour établir l'unité de sentimens que le Sauveur désirait plus que toutes choses ; et cette autorité était d'autant plus nécessaire aux successeurs des Apôtres, que leur foi était moins affermie que celle de leurs auteurs. »

Matth. xvi, 18 : *Tu es Petrus*, etc. Si summus Pontifex a fide deficeret, tunc Ecclesia haberet fundamentum hæreticum, quod manifeste repugnat : ergo, etc. Ergo 1°.

2° *Ratione*. Constat enim summum Pontificem esse centrum unitatis, adeo ut omnes communionem cum illo habere teneantur : atqui repugnat dari obligationem servandi communionem cum Pontifice errorem docente et pertinaciter defendente.

Insuper, summus Pontifex est caput corporis Christi, *quod est Ecclesia*, Coloss. 1, 24 : at, si summus Pontifex errorem doceret et pertinaciter defenderet, caput Ecclesiæ a corpore separaretur, sicque corpus periret. Ergo. Hanc utramque rationem allegavit *Bossuet*, in disputationem quam habuit, anno 1682, cum episcopo Tornacensi; *Opuscules de Fleury*, p. 153.

Quidam auctores Gallicani volunt solam sedem Apostolicam esse indefectibilem, non vero Pontifices; aut seriem duntaxat Pontificum, non autem singulos scorsim sumptos : verum illæ sententiæ minus rectæ esse videntur; verba enim promissionum Christi non ad sedem Apostolicam, nec ad seriem Pontificum, sed ad B. Petrum ejusque successores immediate diriguntur : ergo admittendum est ipsosmet Pontifices maximos, Christo ex promissionibus suis eos assistente, a fide nunquam esse defecturos.

SECTIO SECUNDA. — De centro unitatis catholicæ.

Jam probavimus in prima hujus tractatus parte principium unitatis tum ratione doctrinæ, tum ratione regiminis, in vera Ecclesia semper exstiturum esse. Nunc ostensuri sumus hoc principium in summo Pontifice tanquam in centro residere.

PROPOSITIO.

Romanus pontifex est centrum totius unitatis catholicæ.

Prob. Illud pro certo tenendum est quod constat Scrip-

tura sacra et traditione : atqui propositio nostra constat Scriptura, etc.

1^o *Scriptura sacra*. Pontifex Romanus, ex dictis, est fundamentum et caput Ecclesiæ, supremus pastor ovium et agnorum : ergo sicut omnes partes ædificii fundamento niti, omnia corporis membra cum capite communicare, omnesque oves et agni gregis regimini pastoris subjici debent, sic et omnes fideles necnon inferiores pastores cum summo Pontifice uniantur necesse est. Omnia igitur ab ipso procedere, omnia ad eum redire debent, sicut in circulo omnes radii a centro procedunt et ad centrum redeunt. Ergo summus Pontifex reipsa est centrum unitatis in Ecclesia. Ergo 1^o.

2^o *Traditione*. Unanimis est conciliorum et SS. Patrum sententia circa hoc punctum; hæreticos et schismaticos omni tempore confutaverunt SS. Patres, ostendendo eos non habere communionem cum sede Romana. Plurimorum testimonia paucis lineis sic nervose contrahit *Bossuet*, *Sermon sur l'unité de l'Église* :

« L'autorité ecclésiastique, premièrement établie en
 » la personne d'un seul, ne s'est répandue qu'à condi-
 » tion d'être toujours ramenée au principe de son unité,
 » et que tous ceux qui auront à l'exercer se doivent tenir
 » inséparablement unis à la même chaire.

« C'est cette chaire Romaine tant célébrée par les
 » Pères, où ils ont exalté, comme à l'envi, la principauté
 » de la chaire Apostolique, la principauté principale, la
 » source de l'unité, et dans la place de Pierre, l'éminent
 » degré de la chaire sacerdotale, l'Église mère, qui tient
 » en sa main la conduite de toutes les autres Églises; le
 » chef de l'épiscopat, d'où part le rayon du gouverne-
 » ment; la chaire principale, la chaire unique en la-
 » quelle seule tous gardent l'unité. Vous entendez dans
 » ces mots, saint Optat, saint Augustin, saint Cyprien,
 » saint Irénée, saint Prosper, saint Avit, saint Théodo-
 » ret, le concile de Chalcédoine et les autres; l'Afrique,
 » les Gaules, la Grèce, l'Asie, l'Orient et l'Occident unis
 » ensemble. »

Quicumque ergo vinculum unitatis cum legitimo summo Pontifice solvit, eo ipso ad corpus Ecclesiæ, extra quam nulla salus, jam non pertinet; et sicut membrum a corpore humano sejunctum arescit, ita quisquis cum pontifice Romano communionem unitatis non servat, a fonte vitæ spiritualis separatur et moritur.

Hinc plurima sequuntur, videlicet :

1° Ecclesia Christi essentialiter est Romana, ac proinde veri fideles necessario sunt catholici Romani.

2° Privati homines ipsique sacerdotes nunquam legitime pronuntiare possunt talem aut talem Pontificem canonicè non fuisse electum, in hæresim vel in apostasiam lapsum esse, et sub hoc prætextu decernere communionem cum illo habendam aut servandam non esse; nam hujusmodi quæstiones ad fidem pertinent : porro soli episcopi sunt fidei judices; ubi ergo episcopi sunt moraliter unanimes in admittendo tali homine tanquam legitimo B. Petri successore, nemo ab illius communione discedere potest, quamcumque ob causam, quin eo ipso extra viam salutis constituatur. Sic societas vulgo dicta *la petite Église*, funditus ruit.

3° Qui ore tenus duntaxat pontifici Romano uniuntur, ad veram Ecclesiam de facto non pertinent; absurdum enim et ridiculum foret dicere unionem cum summo Pontifice necessariam, in verbis tantum consistere et non in actionibus : unde seipsos manifeste decipiebant Janseniani, qui ad Ecclesiam eos damnantem pertinere volebant.

4° Episcopi contra decreta summi Pontificis electi et confirmati, qui professionem fidei suæ, ut aiunt, ad eum mittunt, prætendentes, sub hac unitatis specie, se communionem essentialem cum illo servare, evidenter sunt schismatici. Tales sunt archiepiscopi Trajectenses, qui ab anno 1723 usque nunc juxta hanc methodum sibi succedunt : gravioribus censuris ecclesiasticis a sancta Sede perculsi, nihilominus in obstinatione sua perseverant et gloriantur se catholicos Romanos esse.

5° Summus Pontifex jurisdictionem proprie dictam

habet in schismaticos et etiam in hæreticos; tanquam enim B. Petri successor, habet auctoritatem in eos omnes qui ad Christum pertinent: at omnes qui valide baptizati sunt, licet rebelles, ad Christum pertinent, sicut cives contra principem conjurati nihilominus sunt ejus subditi, et milites profugi a duce suo legitime puniuntur.

SECTIO TERTIA. — De potestate edendi fidei decreta et condendi leges quæ cunctos obligent Christianos.

PROPOSITIO.

Summus Pontifex potest, ratione sui primatus, edere fidei decreta et condere leges quæ cunctos obligent Christianos.

Prob. Hoc admittendum est quod praxi Ecclesiæ et rationibus theologicis evidenter constat: atqui praxi Ecclesiæ, etc.

1° *Praxi Ecclesiæ.* Nam in omnibus retro sæculis summi Pontifices tulerunt fidei decreta et condiderunt leges quæ omnes Christi fideles spectarent et obligarent. Inter multa alia, citari possunt exempla Victoris in causa Paschatis, B. Stephani in causa baptismi ab hæreticis collati, Melchiadis in causa Donatistarum, Damasi in causa Macedonii, Siricii in causa Joviniani, Innocentii I, Zozimi, Bonifacii, Cœlestini I et Sixti III in causa Pelagianorum, ejusdem Cœlestini in causa Nestorii, Leonis Magni in causa Eutychetis, etc. Ergo 1°.

2° *Rationibus theologicis*, tum quoad fidei decreta, tum quoad leges. 1° *Quoad fidei decreta.* Summus Pontifex, in quantum est totius Ecclesiæ caput, specialem habet curam errores abigendi aut præcavendi, fideles docendi et deposito revelationis invigilandi: atqui certe hæc præstare non posset, si proprie dictam non haberet potestatem edendi decreta quæ omnes obligarent. Præterea, ut varii errores undique nascentes sufficienter reprimantur, et vera Christi doctrina integra semper custodiatur, universalis et permanens existat necesse est auctoritas quæ

continuo invigilet, episcopos fidei iudices moneat, aut saltem in unum eos jugiter devinciat : porro talis auctoritas est necessario auctoritas summi Pontificis, siquidem concilium generale frequenter coadunari non potest : ergo.

2^o *Quoad leges.* Summus Pontifex, vi supremæ jurisdictionis suæ, omnes Christi agnos et oves pascere tenentur ; certissime igitur habet a Christo quidquid necesse est ut eos recte pascat : porro non haberet quidquid necesse est, si leges cunctos obligantes condere non posset ; nam sæpe reprimendi sunt abusus, coercendæ cupiditates, fovendæ virtutes, sanciendæ leges divinæ et humanæ ; promovenda, statuenda et observanda est cultus solemnitas ; solus pontifex Romanus hæc jure communi præstare valet : at illa præstare non potest nisi condendo leges quæ cunctos teneant obligatos : ergo.

Pari ratione, sedulo invigilare tenentur summi Pontifices ut conciliorum decreta custodiantur et leges disciplinæ observentur ; nam hæc bonum Ecclesiæ regimen requirit.

SECTIO QUARTA. — De potestate dispensandi a legibus conciliorum.

PROPOSITIO.

Summus Pontifex ab omnibus etiam conciliorum generalium legibus dispensare potest, quando legitime dispensandi est locus.

Prob. auctoritate concilii Basileensis, omnium theologorum, et ratione.

1^o *Auctoritate concilii Basileensis.* Sic enim se habet illud concil. apud Bossuet, Defens. Decl. part. 3, l. 11, c. 16 : « Concilii statuta in nullo derogant potestati Romani pontificis, quin pro tempore, loco causisque et personis, utilitate vel necessitate suadente, moderari dispensareque possit. »

2^o *Auctoritate omnium theologorum.* Quoad Ultramonta-

nos res patet. Nomine Gallorum sic loquitur *Bossuet*, loco citato : « Neque vero putent a nobis tanta canonum » et conciliorum auctoritate constitutas sedis Apostolicæ » dispensationes esse sublatas : absit; has enim nemo » catholicus, nemo veri regiminis sciens aut rerum ec- » clesiasticarum gnarus, abstulerit. »

3^o *Ratione*. Bonum regimen Ecclesiæ sæpe exigit ut ipsius leges per legitimam dispensationem in quibusdam casibus relaxentur; id omnes fatentur : atqui solus pontifex Romanus jure ordinario ab his legibus dispensare potest : vel enim a pontifice Romano, vel a concilio generali hæc dispensatio ordinarie concedenda est : at posterius dici non potest : ergo.

Nec requiritur ut concilia talem facultatem summo Pontifici concedant; eam enim habet ratione suæ dignitatis.

Quinimo, etiamsi concilia positive statuerent quod nulla concederetur dispensatio a tali lege, summus Pontifex stricte non ligaretur hac prohibitionem; ea enim non obstante, concilium generale ab hujusmodi lege dispensare posset, si, attentis rerum adjunctis, id expedire videretur : at eandem facultatem habere debet summus Pontifex, si justa dispensandi causa existat. Sic, post concilium Tridentinum, in quo statutum fuerat nullam concedendam esse dispensationem in secundo gradu consanguinitatis et affinitatis, sess. 24, de Reform. c. 5, similiter dispensarunt summi Pontifices ob rationes quas exponit Palavicinus, in Hist. conc. Trident. lib. 23, c. 8.

Hinc in casu necessitatis, ubi de jure positivo et disciplina ecclesiastica agitur, nihil est quod summus Pontifex facere non possit. Id expresse agnovit *Bossuet*, Defens. Decl. part. 3, lib. 11, c. 22 : « Concedimus enim » in jure quidem ecclesiastico papam nihil non posse, » cum necessitas id postularit. » Idem ferme habetur eodem opere eademque parte, lib. 10, cap. 31.

SECTIO QUINTA. — De potestate concilia œcumenica convocandi, celebrandi ac confirmandi.

Jam probavimus supra solum pontificem Romanum posse, jure sibi divinitus concesso, concilia œcumenica convocare et eis præesse. Restat igitur ut paucis verbis ostendamus quod ipse solus ea confirmare possit et debeat; duplex autem distingui potest hujusmodi confirmatio, scilicet, proprie dicta, quæ est solemnis decretorum concilii promulgatio ad omnes ecclesias directa, et improprie dicta, quæ est tantum simplex assensus vel approbatio.

PROPOSITIO.

Concilium generale vim irrefragabilem non habet, nisi auctoritas summi Pontificis ei accedat, saltem per consensum.

Prob. traditione, ratione, et auctoritate theologorum.

1^o *Traditione.* Ipsa enim concilia generalia hanc facultatem in summo Pontifice agnoverunt. Sic concilium Nicænum confirmationem S. Sylvestri requisivit; concilium Chalcedonense assensum S. Leonis his verbis petiit : « Rogamus igitur, tuis decretis nostrum honora judicium. » Pius IV concilium Tridentinum, per bullam *Benedictus Deus*, ex petitione patrum, confirmavit ac promulgavit.

Plurima quidem celebrata sunt concilia generalia quibus expressa hujusmodi summi Pontificis approbatio non accessit; sed pontifices Romani eis consenserunt saltem per legatos, eorumque executionem semper prosecuti sunt : porro sic agendo ea sufficienter confirmaverunt : ergo 1^o.

2^o *Ratione.* 1^o Decreta conciliorum generalium sunt actus totius corporis docentis in Ecclesia : at dici non possent actus totius corporis docentis, si caput positive non consensisset. 2^o Concilia generalia sunt in suo genere, respectu summi Pontificis, sicut comitia generalia in regno, v. g. in Gallia, in Anglia, etc. atqui leges in comitiis generalibus constitutæ vim et robur non habent

nisi a rege confirmentur : ergo *a pari* et decreta conciliorum nondum perfecta sunt nisi a pontifice Romano fuerint approbata. 3° Decreta conciliorum per totam Ecclesiam promulgari debent; solus autem pontifex Romanus, tanquam Ecclesiæ caput, ea convenienter promulgare potest. 4° Summus Pontifex est centrum unitatis in fide, sicut in regimine : verum si decreta conciliorum essent regulæ fidei absque confirmatione summi Pontificis, tunc summus Pontifex jam non foret necessario centrum unitatis in fide : ergo 2°.

3° *Auctoritate theologorum*. Omnes Ultramontani in hoc puncto consentiunt; ipsi vero Galli ab hac sententia non recedunt, ut testatur illustrissimus *Bossuet*, Gallia orthodoxa, n. 84 : « Parisienses ultro consentiunt ex antiquissimis regulis synodos generales absque Romano pontifice nullas esse et irritas. » Ergo 3°, etc. aliunde, etc. Ergo.

Ex propositione ista quædam deducuntur consecutaria gravis momenti. 1° Si pontifex Romanus concilii generalis etiam legitime congregati dissolutionem pronuntiet, si in alium locum illud transferat, si ei per se aut per legatos præesse nolit aut cesset, tunc illud totam Ecclesiam jam non repræsentat, quia conditionibus ad concilia generalia requisitis non est donatum. Hinc 2° concilium Ariminense non fuit œcumenicum, *ut supra notavimus*. 3° Concilium Basileense non fuit pariter œcumenicum, saltem a sessione 29; nam Eugenius IV legatum suum revocaverat, et concilium transtulerat primo Ferrariam, deinde Florentiam, ibique illud celebrabat cum Græcis et multis Latinis, dum pauci episcopi, multo plures secundi ordinis sacerdotes et cardinalis Arelatensis, decreto translationis resistentes, Basileæ adhuc remanebant, sessiones interdum habebant, multa reformationis decreta edebant, contra Eugenium IV procedebant, hunc pontificem cum gravi scandalo deponebant, et eligebant Amedæum VIII, Sabaudia ducem, qui, ab anno 1439 usque ad annum 1449, fuit antipapa sub nomine Felicis V.

SECTIO SEXTA. — De jure appellationum.

Omnes fatentur , 1° summum Pontificem habere jus ad se evocandi causas majores fidei et disciplinæ generalis: *id sequitur ex dictis*; 2° simplices sacerdotes non habere jus recurrendi directe ad summum Pontificem: hoc fuit statutum ne ultra modum multiplicarentur appellationes; 3° summum Pontificem appellationes episcoporum suscipere posse: sed controvertitur an illud possit jure divino, an tantum jure ecclesiastico, ex concilio Sardicensi.

PROPOSITIO.

Summus Pontifex, non tantum jure ecclesiastico, sed vi eminentis sui primatus, causas majores fidei et disciplinæ generalis ad se evocare et appellationes episcoporum suscipere potest.

Prob. praxi Ecclesiæ et rationibus theologicis.

1° *Praxi Ecclesiæ.* Quod enim in optimis Ecclesiæ sæculis pontifices Romani fecerunt tanquam Petri successores, id adhuc jure sui primatus facere possunt: atqui in optimis Ecclesiæ sæculis pontifices Romani appellationes episcoporum susceperunt easque judicaverunt; sic in Oriente a sententiis conciliorum contra se latis appellaverunt S. Athanasius, Eusthatius Sebastensis episcopus, S. Joannes Chrysostomus, Flavianus Constantinopolitanus, Theodoretus, Ignatius; eos pontifices Romani audierunt, absolverunt et sedibus propriis restituerunt: in his autem appellationibus sola B. Petri successoris dignitas et præeminentia considerabantur; in Occidente vero Chelydonius, episcopus Viennensis, et Contumeliosus, episcopus Regensis, ad pontificem Romanum appellaverunt: S. Gregorius Magnus Januarium et Stephanum ab episcopis suæ provinciæ depositos restituit. Ergo 1°.

2° *Rationibus theologicis.* 1° Naturæ est omnis hierarchiæ ut de sententiis inferiorum ad superiores judices, et tandem ad supremum appellari possit; supremus autem ultimo et definitive judicat: atqui summus Pontifex, non tantum ex jure ecclesiastico, sed vi sui primatus est

superior omnibus episcopis seorsim sumptis, ipsisque conciliis provincialibus et nationalibus, sicut caput superius est membris : a judiciis ergo metropolitanorum, primatum, patriarcharum, conciliorumve provincialium aut nationalium episcopi condemnati aut despositi ad summum Pontificem appellare possunt.

2º Summus Pontifex, ratione sui primatus, cunctorum canonum executioni invigilare tenetur, eorumque observantiam promovere et urgere debet : atqui munere illo fungi non potest, nisi jus habeat sententiam adversus episcopum inique latam irritandi et annullandi, siquidem per hujusmodi sententiam canones violantur : ergo per se aut per judices a se delegatos eam irritare et episcopum depositum sedi suæ restituere potest.

Observandum est cum doctissimo jam citato *Regnier*, t. 2, aliud esse jus appellationes suscipiendi et judicandi, aliud vero modum jus illud exercendi : jus ipsum primatui pontificis Romani est annexum : at modus pro arbitrio et pro diversis circumstantiis variari potest. Ex concordato Bononiensi anni 1515, inter Leonem X et Franciscum I, non valet appellatio in Gallia, omisso medio tribunali, et papa tenetur committere judices in ipsis appellantis partibus, ne Galli extra regnum causas suas prosequi cogantur.

SECTIO SEPTIMA. — De potestate episcopos insituendi.

Institutio idem est ac missio : essentialiter differt ab electione, quæ est tantum indicatio subjecti cui conferenda est institutio seu missio, Variis modis in diversis temporibus facta est electio : modo a clero consulta plebe, modo a solo clero ; modo præsentatio facta est a principe sæculari, v. g. in Gallia, ex concordato inter Leonem X et Franciscum I inito. Institutio similiter variavit, et concessa est, vel a papa, vel a patriarcha, vel a metropolitano, et in absentia ejus ab antiquiore episcopo ejusdem provinciæ, vel a concilio provinciali. Vide opus D. *Frayssinous* cui titulus *les vrais Principes de l'Église Gallicane*.

PROPOSITIO PRIMA.

Institutio canonica, ab ecclesiastica potestate accepta, est omnino necessaria in genere.

Prob. 1º Scriptura sacra, nempe omnibus textibus quos attulimus demonstrando veram Ecclesiam debere esse Apostolicam ratione ministerii. Nullus enim validam habet potestatem spiritualem in populum Dei, nisi legitimam missionem a Christo per Apostolos eorumque successores descendantem acceperit: porro talis missio a sola potestate ecclesiastica conferri potest: ergo.

Prob. 2º concilio Tridentino. Sic enim se habet, sess. 23, c. 4: « Decernit (sacrosancta synodus) eos qui tantummodo a populo aut sæculari potestate ac magistratu » vocati et instituti, ad hæc ministeria exercenda ascen- » dunt, et qui ea propria temeritate sibi sumunt, om- » nes non Ecclesiæ ministros, sed fures et latrones, per » ostium non ingressos, habendos esse; » et canone 7 ejusdem sess. sic concludit: « Si quis dixerit... eos qui nec » ab ecclesiastica et canonica potestate rite ordinati nec » missi sunt, sed aliunde veniunt, legitimos esse verbi » et sacramentorum ministros: anathema sit. » Ergo.

Prob. 3º ex SS. Patribus, ut supra loco citato.

Prob. 4º Ratione theologica. Ad servandum bonum ordinem, requiritur ut proprium territorium unicuique episcopo assignetur; id evidenter patet: atqui solius potestatis ecclesiasticæ est territorium episcoporum ita determinare, cum de muneribus ecclesiasticis obeundis proindeque de potestate spirituali exercenda agatur: ergo.

Quod autem de institutione episcoporum dicitur, pari ratione dicendum est de creatione, suppressione, divisione, coadunatione diœceseon: nihil in hoc genere legitimum esse potest, nisi saltem consensus potestatis ecclesiasticæ accesserit. Hinc clerus Gallicanus in opere notissimo, *Exposition des principes sur la Constitution civile*

*du clergé, en 1790, cui centum et quadraginta episcopi subscripserunt, ait : « Il n'y a pas un exemple de la ré-
 » union de plusieurs diocèses, de la séparation de deux
 » diocèses unis, de la division d'un évêché, de la transla-
 » tion même d'un siège épiscopal, sans l'intervention de
 » la puissance ecclésiastique. »*

PROPOSITIO SECUNDA.

*Solus pontifex Romanus potest jure divino instituere
 episcopos per orbem universum.*

Probatur Scriptura sacra, concilio Trident. et ratione.

1° *Scriptura sacra.* Constat enim Scriptura sacra, ex dictis, summum Pontificem esse caput totius Ecclesiæ, habere primatum, non solum honoris, sed et jurisdictionis, et supremam potestatem universum gregem Christianum regendi ac pascendi : porro institutio episcoporum ad generalem hanc administrationem pertinet : ergo.

2° *Concilio Trident. sess. 23, c. 8 :* « Si quis dixerit episcopos qui auctoritate Romani pontificis assumuntur, non esse legitimos et veros episcopos, sed figmentum humanum : anathema sit. » Igitur pontifex Romanus potest ubique legitimos constituere episcopos : at ille solus talem potestatem sibi vindicare potest : ergo.

3° *Ratione.* Eo ipso quod pontifex Romanus sit caput Ecclesiæ et centrum unitatis catholicæ, episcopi ab eo missi legitimam auctoritatem habent ; qui vero ab ipso non agnoscerentur, hac sola ratione schismatis notam effugere non possent. Ergo.

Omnes quidem Apostoli, ex plenitudine missionis a Christo accepta, episcopos et presbyteros ubique constituere poterant, sicut supra observavimus ; sed extraordinaria hæc potestas ad eorum successores non transiit, quia bono regimini Ecclesiæ tunc nociva fuisset ; at necessario manere debuit integra penes illum cui cura totius Ecclesiæ Christi erat commissa.

Igitur beatus Petrus sibi substituit Evodium in sede Antiochena, et Ignatium, successorem ejus, propria dextra episcopum ordinavit, juxta plures antiquos Patres; *Godescard*, 1^{er} février; sedem Alexandrinam per suum discipulum Marcum fundavit, ut patet ex Epist. S. Gregorii ad Eulogium aliisque testimoniis. Ergo S. Petrus primos Ecclesiæ patriarchas instituit, eisque legitimam dedit missionem. Cæteri vero metropolitani, primates et patriarchæ fuerunt tantum institutionis ecclesiasticæ, ut omnes fatentur: universa ergo privilegia quæ possidebant, a summo pontifice Romano, vel a conciliis, summo Pontifice eis consentiente, tenuerunt.

Rekursus autem ad pontificem Romanum, pro obtinendis confirmationibus, nec tutus, nec sine multis et gravibus incommodis fuisset in primis sæculis: idcirco statutum fuit ut metropolitani episcopos suæ provinciæ ordinarent ac instituerent; metropolitani vero confirmabantur a papa, a patriarcha aut a primate, vel etiam a concilio provinciæ, v. g. in Gallia. Hunc ordinem jam existentem approbavit et sancivit concilium Nicænum, anno 325 habitum, canone 9.

Diu hæc disciplina perseveravit; sed in sæculis ignorantiae et barbariæ frequentes nati sunt abusus, tum ex parte principum qui libertatem electionum sæpius lædebant, tum ex parte metropolitanorum qui, præ metu et timiditate, viris omnino indignis aut inique vel irregulariter præsentatis manus imponebant. Ad sedem Apostolicam tunc appellabatur, sæpe etiam pontifices Romani causas ad se evocabant, nominationes et confirmationes annullabant, et alios episcopos instituebant: sic metropolitanorum privilegium paulatim imminutum est, et ante decimum quartum sæculum jam fere penitus cessaverat.

Illud renovare tentarunt episcopi Gallicani, in decimo quinto sæculo, per *Pragmaticam sanctionem* Caroli VII, datam apud Bituricas, anno 1438. Abs re forte non erit hic breviter quasi per transennam notare quid sit illa tam celebris Pragmatica sanctio, et quæ fuerit ejus occasio.

Pragmatica sanctio, a voce Græca *πραγμα*, *affaire*, et verbo Latino *sancire* (*confirmer, arrêter*) derivata, in stylo juris antiqui significat legem vel constitutionem fundamentalem, generales quasdam et gravis momenti continentem regulas, negotia civilia et præsertim ecclesiastica respicientes. Vox *pragmaticum* reperitur in codice Justiniani et in Capitularibus Caroli Magni.

Anno 1269, S. Ludovicus inter varia quæ ante secundam suam expeditionem contra Infideles statuit, Pragmaticam dedit sanctionem quinque articulos continentem, prout refertur apud *Labbe*, t. 11, et *Longueval*, *Histoire de l'Église Gallicane*, t. 11. Hac Pragmatica sanctione pius rex inprimis statuebat omnes prælatos ecclesiarum deinceps plena jurisdictione sua fruituros, omnes patronos et alios beneficiorum collatores totis juribus suis gavisuros, futuras ecclesias cathedrales aliasque omnino esse liberas in electionibus quæ secundum jus commune fierent, et plenum effectum statim obtinerent. Circa hanc Pragmaticam quæ a nonnullis ut dubia habetur, legi potest *Barruel*, *Collection ecclésiastique*, etc. t. 2.

Ex quo autem pontifices Romani sedem suam in Gallia cœperunt habere, immediatam frequenter exercuerunt potestatem in varia beneficia, ea extraneis et curiæ suæ ministris ac servis sæpe conferebant, in præjudicium regis subditorum. Hoc per magnum Occidentis schisma frequentius adhuc contigit: nam pontifices Avenione residentes amplis Ecclesiæ Romanæ redditibus privati, alio modo personas sibi obsequentes remunerare vel eis favere non poterant.

Hinc innumeræ natæ sunt querimonie et murmurationes.

Reformationem hujus abusus omnes Galli communibus votis vehementer exoptabant. Multum sub hoc respectu a concilio Constantiensi fere incassum expectaverant; ideo concilio Basileensi ipsiusque decretis adhæserunt, licet ipsius agendi rationem contra Eugenium IV improbarent.

Tunc Carolus VII celebrem convocavit cœtum cleri Gallicani et primorum totius regni, cui ipse in urbe Bituricarum præfuit, anno 1438. In eo cœtu famosissima condita et publicata est Caroli VII constitutio, dicta Pragmatica sanctio, qua, de consensu cleri Gallicani, prisca restituitur Ecclesiæ disciplina circa electiones, electorum confirmationes et ordinationes, circa perfectam ecclesiarum Gallicanarum libertatem, etc. etc.

Pontifices Romani contra hanc Pragmaticam sibi odiosam jugiter reclamarunt. Ludovicus XI eam per edictum solemne revocavit, anno 1467, ut benevolentiam Pauli II et totius curiæ Romanæ sibi conciliaret; sed illud edictum admittere supremus Parisiensis senatus et Universitas constanter recusarunt, ei obstiterunt, sicque impediunt ne effectum suum obtineret; Pragmatica igitur, non obstante illo edicto, permansit integra: sed in concilio Lateran. V, sess. 11, appellata fuit a Leone X *Corruptela*. Tandem anno 1515, penitus abolita fuit per concordatum inter summum pontificem Leonem X et Franciscum I initum. Vi hujusmodi concordati, rex facultatem habuit episcopos et archiepiscopos præsentandi, et Leo X omnes præsentatorum confirmationes sedi Apostolicæ reservavit, sicut eas jam sibi suisque successoribus reservaverat Nicolaüs V in Germania, anno 1448, per concordatum suum cum Frederico III.

Jus illud a pluribus sæculis nunc fere ubique exercent pontifices Romani: talis est ergo circa gravissimum istud punctum generalis Ecclesiæ disciplina, quæ tantummodo per generale concilium vel ex libera summi Pontificis concessionem mutari potest; nam ipsi soli hæc facultas jure divino competit, ad alios vero solo jure ecclesiastico pertinere potest. Ergo. Vide opus dictum *Tradition de l'Eglise sur l'institution des évêques*, auctore D. de la Menais.

Solus adhuc Pontifex maximus, ratione universalis suæ jurisdictionis, novas diœceses creare novasque metropoles erigere potest. Facultatem hujusmodi olim habuerunt, ex institutione ecclesiastica, metropolitani et

aliquando episcopi; sed nulli eam nunc possident, nisi ex speciali delegatione.

Episcopi canonice electi vel a rege nominati, sed nondum confirmati, nullo modo spirituali vel temporali administrationi ecclesiæ ad quam destinantur seingere possunt, sub nomine œconomi, procuratoris, aut sub alio quocumque prætextu, nec administrationem sibi oblatam accipere possunt. Ita Gregorius X, in concilio Lugdunensi II, *Labbe*, t. 11. Eamdem prohibitionem renovarunt, sua vice, Bonifacius VIII, in Sexto, l. 1, tit. 6, cap. 5; Alexander V, Julius II, Clemens VII et Julius III. Pius VII in suo brevi diei 5 novembris 1810 ad cardinalem *Maury*, et in altero brevi diei 2 decembris ejusdem anni, ad *Averardo Carboli*, archidiaconum Florentinum et capitularem vicarium directo, eamdem doctrinam fortiter tuetur: expresse docet episcopum nominatum eo ipso idoneum non esse ad jurisdictionem per delegationem a capitulo accipiendam, hancque doctrinam auctoritatibus supra citatis probat. Glossa, in c. 5 Sexti citati, est expressa. Quidam tamen opinantur contrarium in Gallia fieri posse; nam, inquiunt, tempore divisionis inter Ludovicum XIV et Innocentium XI exortæ, episcopi a rege nominati litteras vicarii generalis a capitulo accipiebant, et sic per delegationem sedem episcopalem administrabant, *Histoire de Bossuet*, t. 2. At cum valde dubium sit tales administrationes esse validas, certum est episcopum alicui sedi jam affixum hujus generis administrationem suscipere non posse.

Ubi vero episcopus canonice institutus pro alia sede, sive episcopali, sive archiepiscopali, proponitur, jurisdictionem semper habet ac exercere potest in prima diœcesi sua, donec a summo Pontifice canonice fuerit institutus pro altera diœcesi. Ex quo autem hæc canonica institutio ipsi certo innotescit, a prima jurisdictione statim abstinere debet, quia per actum pontificalem a vinculo quo ecclesiæ suæ erat ligatus absolvitur, omnem in eam amittit auctoritatem,

SECTIO OCTAVA. — De natura jurisdictionis quam summus Pontifex habet in tota Ecclesia.

Quidam illi concedunt duntaxat jurisdictionem mediatam, vi cujus omnibus episcopis invigilare, eos delinquentes aut suos populos male gubernantes admonere et corrigere debeat, sed nihil ultra facere queat. Illa autem doctrina cum prærogativis sanctæ Sedis a nobis expositis conciliari non potest.

PROPOSITIO.

Summus Pontifex immediatam habet jurisdictionem per totum orbem Christianum.

Prob. Scriptura sacra, conciliis, consensu doctorum et ratione.

1° *Scriptura sacra.* S. Joan. xxii, 15, 16 et 17 : *Pasce agnos meos, pasce oves meas.* Summus Pontifex, tanquam B. Petri successor, habet jus pascendi seu gubernandi totum gregem Christianum per orbem universum : atqui jus illud supponit jurisdictionem immediatam : ergo.

2° *Conciliis.* Concilium enim Florent. collatione 22, definit pontificem Romanum esse « verum Christi vicarium totiusque Ecclesiæ caput, et omnium Christianorum patrem et magistrum existere. » Conc. Trident. sess. 14, c. 7, hæc habet : « Merito Pontifices maximi, pro suprema potestate sibi in universa Ecclesia tradita, causas aliquas criminum graviores suo potuerunt peculiari judicio reservare. » At immerito diceretur pontifices Romanos esse omnium Christianorum patres et doctores, speciales criminum causas sibi reservare potuisse, si in cunctos Christianos per universum orbem sparsos immediatam non haberent jurisdictionem.

3° *Consensu doctorum.* Sacra quippe Facultas Parisiensis, anno 1542, inter plures articulos, sic decernit : « Non minus certum est unum esse jure divino Romanum in Ecclesia Christi militante pontificem, cui omnes Chri-

» stiani parere tenentur. » Hæc etiam est doctrina illustrissimi *Bossuet*, Append. ad Defens. Declar. lib. 1, c. 1. Si autem pontifex Romanus immediatam non haberet jurisdictionem per orbem universum, omnes Christiani non magis ipsi parere tenerentur quam archiepiscopo aut primati : at nullam debent obedientiam archiepiscopo ut tali, nec primati : ergo.

4^o *Ratione*. Summus enim Pontifex facultatem habet, ex dictis, condendi leges quæ omnes Christianos spectent eosque obligent : verum tales leges condere non posset si immediatam jurisdictionem in omnes non haberet : ergo.

Unde summus pontifex sententias depositionis, suspensionis, interdicti et excommunicationis in universa Ecclesia justa de causa ferre potest : id a nemine catholico negatur, modo servantur conditiones quas infra exponemus.

Eminentissimæ sedis Apostolicæ prærogativæ quas exposuimus, innumeris factis confirmantur : quicumque historiam ecclesiasticam attente legerint, plenissime convicti, fateri cogentur pontificem Romanum tanquam Petri successorem cæteros episcopos sua dignitate et auctoritate longe præcellere, quod observat et describit auctor operis pluries jam citati, *du Pape*, t. 1, l. 1, c. 8. Postquam diversa retulit testimonia, addit : « Néanmoins il y a quelque chose peut-être de plus frappant encore, c'est le sentiment général qui résulte d'une lecture attentive de l'histoire ecclésiastique. On y sent, s'il est permis de s'expliquer ainsi, je ne sais quelle présence réelle du souverain Pontife sur tous les points du monde chrétien. Il est partout, il se mêle de tout, il regarde tout, comme de tous côtés on le regarde. »

Sic ipse *Pascal*, non suspectus, notaverat : « Il ne faut pas juger de ce qu'est le pape par quelques paroles des Pères... mais par les actions de l'Eglise et des Pères, et par les canons. Le pape est le premier. Quel autre est connu de tous ? quel autre est reconnu de tous, ayant pouvoir d'influer par tout le corps, parce

» qu'il tient à la maîtresse branche qui influe partout? »
Pensées.

§ II. — De Prærogativis summi Pontificis controversis.

Tres præsertim sunt prærogativæ quæ ab aliis summo Pontifici tribuuntur, ab aliis vero negantur, nempe auctoritas in temporalia regum, infallibilitas in docendo, et summa potestas supra concilium generale.

Cum per tempus nobis non liceat de illis fusiori sermone disserere, eas breviter exposituri sumus. Idcirco præsentem paragraphum in tres sectiones dividemus; quartam subjungemus de celebri cleri Gallicani Declaratione, anni 1682, et de libertatibus Ecclesiæ Gallicanæ.

SECTIO PRIMA. — De potestate summi Pontificis in temporalia regum.

Circa potestatem summi Pontificis erga bona temporalia quatuor prodierunt opiniones.

Prima tenet summum Pontificem ut talem jure divino plenissimam habere potestatem in universum orbem terrarum, tum in rebus ecclesiasticis, tum in politicis, ita ut dominium temporale ab uno principe ad alterum pro arbitrio transferre posset.

Secunda in altero extremo posita, docet 1^o pontificem Romanum ut pontificem nullam habere potestatem temporalem, et nullo modo principibus sæcularibus imperare posse; 2^o nec pontificem Romanum nec alios episcopos accipere potuisse dominium in provincias aut in urbes, quocumque titulo eas obtinuerint; quia, aiunt hujus sententiæ auctores, jus divinum prohibet ne gladius spiritualis et gladius temporalis simul in eodem uniantur. Ita, post Wiclefitas et Hussitas, Calvinistæ alii-que hæretici.

Tertia sententia, eorum est qui affirmant pontificem Romanum nullam jure divino habere potestatem temporalem directam et immediatam, sed tantum spiritua-lem : at simul contendunt eum, ratione spiritualis arc-

toritatis, indirectam habere potestatem et quidem summam in temporalia omnium principum Christianorum et omnium fidelium; sicque Pontifex de hujusmodi bonis semper pro suo beneplacito disponere potest, quando bonum reipublicæ spiritualis sibi commissæ id postulare videtur. Ita cardinalis Bellarminus cum aliis pluribus theologis, præsertim extraneis, de Romano pont. l. 3, cap. 6 et 7. Sequentibus maxime nititur rationibus: 1º Pontifex Romanus nullam auctoritatem habet in temporalia infidelium, qui sibi non subjiciuntur, sed in temporalia fidelium; quia in eo casu politica et religiosa auctoritas sibi uniuntur sicut caro et spiritus in homine; non duas faciunt respublicas, sed unicam, ad eundem finem, nempe salutem æternam, conducentem: potestas igitur ecclesiastica, quæ est infallibilis, potestatem civilem sibi assumere, aut destruere, aut exercere, aut pro nutu transferre non potest, sed eam dirigere debet, quemadmodum in homine bene ordinato spiritus facta carnis dirigit. 2º In rebus publicis Christianis princeps non eligitur aut in thronum non elevatur nisi sub conditione veram fidem servandi et recte gubernandi: si ergo fiat hæreticus aut sua potestate pertinaciter abutatur, contractui inter se et populum sibi commissum expresso vel tacito deest, ac proinde jus imperandi radicitus amittit, et merito deponi potest. Porro sola potestas ecclesiastica privilegio infallibilitatis donata, recte judicare potest an talis princeps sit hæreticus vel in malo ita obduratus ut deponendus sit: ergo. 3º Plures summi Pontifices scientia et pietate conspicui, ut S. Greg. VII, Innocentius IV, Bonifacius VIII, Pius V, etc. firmiter persuasum habuerunt se, ut B. Petri successores et supremos Ecclesiæ rectores, hanc habere potestatem, cunctis moraliter episcopis et theologis assentientibus. 4º Concil. Lugd. I generale, anno 1245 celebratum, hanc approbavit doctrinam, siquidem Innocentius IV sententiam depositionis contra Fredericum II pronuntians ait, apud Labbe, t. II, 1ª part. se, *cum fratribus et sancto concilio deliberatione præhabita diligenti*, agere dum hunc

imperatorem *auctoritate Apostolica et vi clavium* solemniter deponit. Ergo.

Quarta sententia, a multis aliis theologis et episcopis admissa, tenet pontificem Romanum nullam jure divino habere potestatem directam nec indirectam, ad sensum Bellarmini, in temporale regum aut aliorum Christianorum. Nihilominus patroni hujus sententiæ volunt illum plenissimam habere potestatem spiritualem in principes, sicut in simplices fideles, eos docere, corripere et pœnis spiritualibus plectere posse, atque dubia ad conscientiam illorum et subditorum attinentia Apostolica auctoritate solvere.

Prima sententia ab ipso Bellarmino solidissimis rationibus confutatur; secunda ad omnibus catholicis habetur non tantum ut falsa, sed etiam ut hæretica. Opinionem Bellarmini communiter rejiciunt Gallicani, et nituntur 1^o pluribus Scripturæ et traditionis textibus, duas esse potestates distinctas, unam politicam et alteram ecclesiasticam, ostendentibus; sed cum alterius sententiæ patroni hanc veritatem non negent, fateanturque potestatem ecclesiasticam attributa potestatis civilis usurpare non posse, bene vero eam suis judiciis et sententiis dirigere, sequitur has auctoritates ab illustrissimo *Bossuet* et ab aliis auctoribus Gallicanis citatas, necnon a nobis olim allegatas, ad rem non venire.

2^o Nituntur præsertim sequentibus rationibus, videlicet: 1^o hæc opinio rejicienda est quæ per decem priora Ecclesiæ sæcula fuit inaudita: atqui talis est sententia docens summum Pontificem potestatem indirectam habere in temporalia regum, ad sensum Bellarmini, siquidem Bellarminus, magno labore congerens testimonia ad fulciendam suam opinionem tendentia, nulla præfert hujus generis facta anteriora Gregorio VII, qui, anno 1080, Henricum IV deponere tentavit et hac novitate totum orbem commovit.

2^o Opinio tenens pontificem Romanum reges deponere posse multa infallibiliter produceret incommoda: nempe 1^o concordiam inter sacerdotium et imperium

redderet impossibilem ; 2° principes infideles a religione Christiana retraheret : « Quelle puissance souveraine » voudrait se donner un maître qui pût par un décret lui » ôter son royaume? » ait *Bossuet*, *Lettre au cardinal d'Estrées* ; 3° auctoritatem summi Pontificis principibus, magistratibus aliisque multis redderet odiosam ; quod ipse sic advertit *Fénelon*, de summi Pontificis auctoritate, cap. 40 : « Dum aliena principum sæculi potestas Ec- » clesiæ tribui visa est, propria sensim est amissa : hinc » odiosa facta est pia hæc et matèrna auctoritas, quæ » amorem et fiduciam omnium olim sibi conciliabat. » Hæc eadem potestas, quæ in Leone, aut Agathone, aut » Gregorio Magno blanda et chara fuit, in Gregorio VII » et in Bonifacio VIII exterruit gentes. Hinc certe sen- » sim imminuta est spiritualis auctoritas, dum tempo- » ralem sibi arrogare videbatur. »

3° Tanta potestas Romano pontifici tribui non potest, nisi evidens habeat fundamentum in Scriptura sacra, vel saltem in Apostolica traditione : atqui hæc potestas nullum hujusmodi habet fundamentum. Non quidem in Scriptura, cum ipse Bellarminus nullum proferat textum, sed tantum Veteris Testamenti exempla, ad rem non at-
 tinentia, et in cap. 3 solide refellat argumenta olim de-
 ducta ex parabola duorum gladiatorum et ex illis verbis : *Data est mihi omnis potestas in cælo et in terra*, Matth. xx, 28. Non pariter in traditione Apostolica ; nullum enim invenitur hujus opinionis vestigium certum ante Gregorium VII. Ergo.

4° Si reges, ob suæ auctoritatis abusum, ea spoliari possint, cæteri Christiani cunctis juribus suis pari ratione exui poterunt, ut fatetur Bellarminus : atqui hoc intolerabile videtur. Si enim dominus potestate et facultatibus suis ad perdendas animas abutatur, si pater actiones injustas filiis suis præcipiat, summus Pontifex, episcopus, parochus et confessarius jus habent declarandi, auctoritate respectiva, talibus mandatis non obtemperandum esse ; sed quis dicet mandantes juribus suis esse spoliandos aut spoliari posse? Ergo.

5° Idem probant hujus sententiæ defensores testimonio theologorum et præsulum : anno 1626 Facultas Parisiensis, et deinde plures aliæ Facultates in Gallia, damnaverunt opus P. Santarelli, e Societate Jesu, Romæ anno præcedenti editum, quia opinionem Bellarmini docebat; *Dupin, Hist. eccl. t. 1.*

Eandem doctrinam semper tuiti sunt doctores Gallicani. An. 1789 catholici Anglicani, ex votis celeberrimi Pitt, sententiam sex præcipuarum Universitatum Europæ exquisierunt, nempe Parisiensis, Duacensis, Lovaniensis, Complutensis, Salmanticensis et Vallisoletensis, circa potestatem Ecclesiasticam in temporalia regis Angliæ : omnes unanimiter responderunt, neque papam, neque cardinales, neque concilium etiam generale habere potestatem eum deponendi et subditos ejus a juramento fidelitatis absolvendi. « La plupart des théologiens allemands, hongrois, polonais, espagnols et portugais pensent à-peu-près comme ceux de France, » ait *Bergier, Dict. théol. art. Gallic.*

Episcopi Gallicani similiter profitentur summum Pontificem in nullo casu reges deponere posse, ut in publica expositione diei 3 aprilis 1826, cui unus et septuaginta subscripserunt, testati sunt, occasione operis *D. de la Mennais*, cui titulus, *de la Religion dans ses rapports avec l'ordre civil et politique.*

Parem sententiam expresserunt omnes archiepiscopi et episcopi Hiberni per alteram declarationem diei 23 januarii 1826. Idem expressis verbis manifestarunt, mense maio 1826, omnes vicarii Apostolici eorumque coadjutores munia episcopalia in Anglia et Scotia exercentes, Plurimi episcopi, ex Italia ad concilium *nationale* Parisiis anno 1811 celebratum accedentes, huic doctrinæ publice adhæserant. Ipse Pius VII enixe rogatus a tribus episcopis, ex parte Napoleonis ad eum Savonam missis, ut scripto promitteret se contra quatuor propositiones Declarationis cleri Gallicani anni 1682 nihil unquam acturum esse, huic petitioni annuere noluerat, sed affirmaverat suam repugnantiam in primam propositionem

non cadere. (*Mémoires sur les affaires ecclés. de France, pendant les premières années du dix-neuvième siècle, t. 2.*)
Ergo.

NOTANDA MAXIMI MOMENTI.

1° Advertendum est pontifices Romanos ut tales, in Bellarmini aliorumque Ultramontensium systemate, nullo modo principum auctoritatem sibi assumere, aut ad alios transferre, vel impedire, destruere aut turbare posse; sed tantum eam, ut diximus, juxta æquitatis regulas dirigere, idque adjumento sancti Spiritus ipsi in muneribus suis obeundis semper assistentis.

2° Eosdem nihil posse in principes infideles, neque in principes hæreticos aut schismaticos, quando professio fidei non est conditio essentialis ad regnandum, ut nunc communiter admittitur. Unde Romani theologi aliique sententiæ Bellarmini defensores libenter fatentur eam nunc objecto carere, sed pluribus durantibus sæculis applicabilem fuisse et reipsa pluries merito fuisse applicatam, licet quandoque summi Pontifices in exercitio legitimæ suæ auctoritatis plus minusve excesserint. Ita D. de Maistre, *du Pape*, t. 1, cap. 9 et 10.

3° Plerique saltem Pontifices maximi, qui potestatem exercuerunt, vel exercere tentaverunt in temporalia regum, erant scientia et pietate conspicui: caveamus ergo ne eos, ob talia facta, odio habeamus; sed, attentis circumstantiis in quibus erant constituti, potius miremur eorum animi fortitudinem. Miserrima quippe erant tempora: invasiones barbarorum, destructio studiorum, perpetua bella, omnia subverterant principia, præsertim inter principes et magnates, qui densissimis ignorantiae tenebris involuti, frequenter in actibus suis nullas justitiæ et æquitatis regulas sequebantur: moribus erant asperi et depravati; populi, ab eis crudeliter vexati, ad clerum confugiebant gementes, ut invenirent protectores ac defensores. Episcopi et inprimis summi Pontifices, ob eminentiorem suam auctoritatem, admonitionibus, consiliis, exhortationibus et precibus hujusmodi principes

sæpe emollierunt et ad meliores fruges adduxerunt. Sæpe etiam alios invenerunt ita obduratos et contumaces, ut nihil ab eis obtinere possent : tunc, post minas frustra iteratas, eos excommunicabant. Frequentiores autem excommunicationes in contemptum venerunt : tunc Gregorius VII, vehementi zelo contra omnes abusus accensus, et ardenti ingenio præditus, efficaciora quæsiit media contra Henricum IV, qui ipse Pontificem in conciliabulo Germaniæ deponi jusserat. Supponens ergo, non vero definiens, se absolutam habere potestatem in imperatorem ut talem (ex multo enim tempore imperatores electi, confirmationem et coronam a pontifice Romano accipiebant), ad solemnem depositionis sententiam procedit. Quidam alii Pontifices, Gregorium VII imitantes, principes contumaces excommunicaverunt; raro tamen usque ad depositionem venerunt, et ordinarie nonnisi erga eos qui fuerant electi, ac proinde coronam sub certis conditionibus expressis aut tacitis acceperant, quibus cum pertinaciter deficerent, jus imperandi merito amittebant. Throno autem vacanti per sententiam declarato, magnates, ad quos pertinebat electio, convocabantur ut digniorem eligerent principem. Si quidam abusus in exercitio talis potestatis irrepserint, quod ipsi pontifices Romani non negant, certe affirmari non potest eam in se sumptam esse malam, injustam, absurdam : constat, e contra, eam bene intellectam nihil inordinatum continere et aliquando fuisse utilissimam.

4° Certum est Romanum pontificem, ut Petri successorem et Christi vicarium, spirituales habere jurisdictionem in Christianos principes sicut in simplices fideles, ac consequenter eos excommunicationi aliisque pœnis spiritualibus subicere posse : hoc a nullo catholico negari potest. Non minus certo constat, ut jam monuimus, excommunicationem, hæresim aliasve pœnas ecclesiasticas aut quascumque culpas vel spirituales sententias juribus temporalibus per se non nocere. Unde 1° principes hodierni, sive catholici, sive hæretici etiam obdurati, nihil habent formidandum a suprema summi Pontificis auc-

toritate, siquidem in plerisque saltem constitutionibus regnorum professio fidei catholicæ non amplius est conditio essentialis ad regnandum. 2° Qui olim coronam accipiebant sub conditione quod essent catholici et recte gubernarent, conqueri non poterant si, potestate sua evidenter abutentes, aut in hæresim labentes et perseverantes, repellebantur a throno. Etenim potestatem summi Pontificis in his casibus non negabant, sed contendebant se non esse hæreticos, se non potuisse excommunicari, etc.

5° Boni principes, aut delinquentes etiam graviter, sed emendationem non respuentes, nihil unquam molesti ex parte summorum Pontificum experti sunt; in ipsis, e contra, semper invenerunt amicos, adiutores et recti ordinis tenacissimos defensores. Soli depravati, publica scandala præbentes vel populorum suorum oppressores et ad meliora consilia redire pertinaciter recusantes, extremis sententiis fuerunt subjecti. Nulla igitur erat ratio cur, his temporibus, principes electi et juxta æquitatis regulas regnare volentes, ab acceptanda corona sibi oblata retraherentur, sub prætextu quod delinquentes aut errorem amplectentes, a Romanis pontificibus excommunicari et deponi possent, et multo minus cur infideles et hæretici fidem catholicam non amplecterentur.

A fortiori recentes philosophi nostri, si principiis suis starent, magnis laudibus celebrare deberent Romanos pontifices, qui causam populorum injuste oppressorum soli diu sustinuerunt.

6° Cæterum, quædam in historia reperiuntur facta ab Ultramontanis allegata et nihil probantia : v. g. 1° episcopi, et plusquam alii summus Pontifex, consulebantur utrum dignitas regia convenienter huic vel illi homini deferretur; tunc sententiam suam bene vel male aperientes, non semel definierunt eam ab uno ad alterum transferri posse; errare potuerunt, sed proprie loquendo, vi sui primatus in potestatem temporalem non agebant. Sic concilium XII Toletanum definivit, anno 681, Hispanos

regi Vambæ jam non esse obstrictos, quia regnabat Her-
vigius. Sic Zacharias declaravit, anno 751, nomen regis
a Chilperico III deferendum esse Pippino, qui jam solus
de facto habebat potestatem. Sic Leo III, anno 800, titu-
lum imperatoris et coronam imposuit Carolo Magno,
sed ex consensu et precibus Romanorum, qui ab impe-
ratore Orientis gubernari, regi ac defendi amplius non
poterant. Anno 962, Joannes XII coronavit Othonem I,
sed victorem, et ab Italis recognitum ut imperatorem.
Non ergo coronam de plenitudine suæ potestatis ab uno
in alium magis transferebat, quam Pius VII, coronando
Napoleonem, imperium se ei dedisse credidit.

2º Plures principes se suumque regnum sedi Aposto-
licæ consecraverant et subministrabant, se tributarios
erga summum Pontificem, B. Petri successorem, con-
stituerant : hinc summi Pontifices arbitrari potuerunt
se, ratione altioris potestatis (*comme suzerains*), habere
auctoritatem eos admonendi, judicandi et deponendi.

3º In quibusdam conciliis plures decretæ fuerunt
pœnæ temporales, v. g. in concilio Lateranensi III,
anno 1179, contra Albigenses et eorum fautores, in
concilio Lateranensi IV, anno 1215, sub Innocentio III.
Sed notandum est duo hæc concilia fuisse convocata
tum ad extinguendas hæreses Catharorum, Albigensium
et Valdensium, tum ad medendum innumeris malis
quæ inde in omni genere pullulabant : in eis autem
plures cum patribus sedebant principes, et non pauci
aderant aliorum legati; inter episcopos multi erant
simul domini temporales. Ut ergo calamitatibus tam
lugendis efficacius occurreretur, ex consensu principum
præsentium et absentium legatorum, decretis adversus
hæreses junctæ sunt pœnæ temporales contra hæreticos
eorumque fautores : juste autem principes bellum his hæ-
reticis, publicæ tranquillitatis evidenter hostibus, inferre
poterant, ut eos ad servandas leges æquitatis adduce-
rent : ergo pœnas temporales contra illos illorumque
fautores licite poterant decernere. In his igitur ac in
aliis conciliis in quibus latæ aut statutæ sunt pœnæ mix-

tæ, pars spiritualis episcopis, et pars temporalis principibus eas decernentibus vel iis consentientibus tribuenda est. Talia sunt, v. g. Capitularia Caroli Magni.

Hæc de tanta quæstione, olim tam vehementer agitata, sæpe tam imperfecte ponderata, et nunc ad praxim non pertinente, sufficere nobis videntur.

SECTIO SECUNDA. — De infallibilitate summi Pontificis.

Omnes catholici tenent 1° summum Pontificem, quocumque modo loquatur, errare posse in controversiis facti, quæ ex hominum informatione ac testimoniis præcipue pendent, et cum quæstionibus dogmaticis non sunt colligatæ; 2° illum, sicut cæteros homines, errare posse in quæstionibus fidei et morum, si ut doctor privatus doceat, v. g. si libros theologicos aut canonicos componat. Plures tamen olim tenuerunt eum etiam ut doctorem privatum errare non posse: at opinio ista jam diu abolevit.

Deinde catholici adhuc sunt unanimes circa duo puncta: 1° conveniunt summum Pontificem, cum generali concilio docentem, circa fidem et mores errare non posse; 2° generaliter admittunt Pontificem in re dubia statuentem per decretum omnes fideles spectans, ab omnibus cum veneratione et obedienter audiendum esse, sive errare possit, sive non; quia id necessarium est ad bonum Ecclesiæ regimen, et ad depositum sanæ doctrinæ custodiendum. Ita Bellarminus, de Pontifice Romano, l. 4, c. 2.

His notatis, tres occurrunt diversæ opiniones. 1^a Est eorum qui tenent illum, in quantum est Pontifex, errare posse si absque concilio generali aut consensu Ecclesiæ dispersæ, aliquid definiat. 2^a Tenet eum nunquam errare posse, etiamsi solus et absque ullo concilio propositionem aliquam definiat. 3^a Docet summum Pontificem non posse ullo modo definire aliquid hæreticum, a tota Ecclesia credendum. Qui autem hanc sententiam tuentur, adhuc inter se dissentiunt, saltem quoad formam; alii enim

dicunt Pontificem errare non posse, *si mature procedat et consilium audiat aliorum pastorum*, quod est definire, ut aiunt, ex cathedra; alii vero conditionem hanc præcise non negant, sed contendunt *non posse fieri ut Pontifex temere definiat*.

Igitur quæstio est utrum summus Pontifex ex cathedra B. Petri loquens, et aliquid circa fidem vel mores definiens ab universa Ecclesia credendum aut faciendum, infallibilitatis privilegio gaudeat. Hanc thesim fortiter tuentur Bellarminus, loco citato; Melchior Canus, lib. 6, c. 3 et seq. *Billuart*, Ligorio, Veith, Cerboni, et communiter extranei; quidam etiam Galli, v. g. doctissimus *de Marca*, speciali hac de re dissertatione, plures doctores Sorbonici, et nonnulli recentiores, inter quos D. *de Maistre*, *Pedimontanus*, sed qui in lingua nostra scripsit, *du Pape et de l'Eglise Gallicane*, et D. *de la Mennais*.

Auctores vero nostri, post illustrissimum *Bossuet*, Def. Decl. l. 10, distinguunt sanctam sedem Apostolicam ab ipsa summi Pontificis persona: unanimiter admittunt de fide esse B. Petrum semper habiturum esse successorem; nam legitimus B. Petri successor est fundamentum et caput Ecclesiæ; ædificium autem subsistere non potest sine fundamento, nec corpus sine capite: inde concludunt legitimum B. Petri successorem, ex hypothesi quod in errorem cadat, nunquam in eo perseveraturum generaliter. Cum aliunde constet Romanum pontificem legitimum esse B. Petri successorem, inferunt sedem Romanam nunquam deficere posse, sicut defecerunt sedes Antiochena, Alexandrina, Hierosolymitana, etc.

At nihilominus contendunt summum Pontificem, etiam ex cathedra loquentem et totam Ecclesiam docentem, errare posse, seu ipsius iudicium irreformabile non esse, nisi consensus Ecclesiæ ei accesserit. Ita *Bossuet*, in opere modo citato, *Tournely*, *Bailly*, *Regnier*, *de la Luzerne*, etc. Hæc controversia longior esset pro scopo nostro, ut eam ex professo tractare aggrediamur. Nunc omnes infallibilitatis papæ defensores ultro conveniunt illam sententiam ad fidem catholicam non pertinere.

Ergo 1° nullus catholicus, ubicumque existat, eam admittere tenetur; 2° Galli illam impugnantes et rejicientes nullam merentur censuram aut notam, sicut ostendit *Bossuet* in *Gallia orthodoxa*, quæ est dissertatio prævia ad Defensionem Declarationis, etc.

3° Eo ipso dogmatica sanctæ Sedis judicia, licet summa cum veneratione ab omnibus sint suscipienda, non tamen sunt de fide catholica, priusquam episcoporum consensu saltem tacito muniantur. Quod sic exprimit *Bossuet*, in epistola ad D. *Dirois*, qui tunc erat Romæ :

« Nous avons bien vu que, quoi qu'on enseignât en speculation, il en faudrait toujours en pratique revenir à ne mettre la dernière et irrévocable décision que dans le consentement de l'Eglise universelle, à laquelle seule nous attachons notre foi dans le Symbole. » D. *de Bausset* addit, *Histoire de Bossuet* : « Et en effet, c'est toujours où en reviennent les Ultramontains eux-mêmes, lorsqu'ils sont forcés dans leurs derniers retranchemens. L'infailibilité du pape finit par n'être plus que celle de l'Eglise universelle. »

Ad nihil igitur pro praxi conducit controversia de summi Pontificis infallibilitate : itaque merito ab illa penitus abstinendum esse judicarunt doctissimi theologi, v. g. celeberrimi fratres *Adrianus* et *Petrus de Walembourg*, in *Controversiis* contra protestantes, et pater *Véron*, in sua *Regula fidei* maxime laudata.

Si una præ altera mihi eligenda esset sententia, pro infallibilitate procul dubio starem : ea enim sententia multo melius probata, et consuetæ agendi rationi episcoporum catholicorum etiam Gallicanorum ubi de dogmaticis summi Pontificis decisionibus agitur, velut in infinitis super hæresi janseniana negotiis, magis congruens videtur. Admissa Romani pontificis infallibilitate, omnes catholici judicio ejus solemniter stare tenentur, dum, e contra, infallibilitate rejecta, interminabiles et fere insolubiles nascuntur difficultates.

SECTIO TERTIA. — De potestate summi Pontificis respective ad concilium generale.

Petitur an concilium generale sit supra papam, vel papa supra concilium generale?

Quæstio non est nec esse potest de concilio generali una cum summo Pontifice congregato; papa enim non potest esse seipso superior vel inferior.

Certum est 1^o summum Pontificem esse superiorem omni concilio particulari, sive provinciali, sive nationali; id omnes catholici fatentur. Etenim summus Pontifex divinam habet auctoritatem in tota Ecclesia; quando ex cathedra Petri loquitur, totam Ecclesiam docet, omnes fideles sunt ipsius oves, eos verbo Dei pascere tenetur; episcopi vero qui concilium provinciale vel nationale constituunt, auctoritatem habent in his ecclesiis respectivis limitatam, totam Ecclesiam non repræsentant, nec pro tota Ecclesia loquuntur. Unde, juxta omnes, illæsis promissionibus Christi errare possunt, sicut erravit concilium Carthaginense sub S. Cypriano celebratum, octoginta quinque complectens episcopos, quorum plurimi erant fidei confessores.

Certum est 2^o concilium non esse generale nisi a papa fuerit convocatum; aut saltem legitime approbatum, *ut supra diximus.*

Attamen *certum est* 3^o tempore schismatis et in casibus extraordinariis concilium generale sufficienter convocari posse absque papa, v. g. si nullus aut tantum dubius existat papa; Ecclesia enim, quæ nunquam perire nec deficere potest, sufficientem semper habere debet potestatem ut in quocumque casu sibi provideat: in tali ergo extremitate concilium generale a cardinalibus, v. g. vel etiam a principe sæculari congregatum, fit legitimum, non quidem ut dogmata fidei infallibiliter definiat, sed ut inter contententes de pontificatu pronuntiet, et certum papam ostendat vel constituat. Sic primum factum est in concilio Pisano, anno 1409, deinde in concilio Constan-

tiensi, anno 1415. Concilium Pisanum deposuit duos pontifices contendentes et dubios, scilicet Gregorium XII et Benedictum XIII, et elegit Alexandrum V, cui post decem menses successit Joannes XXIII. Cum autem Gregorius et Benedictus suæ depositioni acquiescere nolent, et numerosæ ecclesiæ illis adhærere non cessarent, Alexander V et Joannes XXIII a tota Ecclesia ut legitimi pontifices nunquam fuerunt admissi. Tres igitur erant simul papæ. Concilium Constantiense eos omnes deposuit, Martinum V elegit, Gregorius et Joannes pontificatui renuntiarunt, Benedictus XIII (Petrus de Luna) ab omnibus fuit derelictus, Martinus solus remansit, et universa Ecclesia eum ut legitimum B. Petri successorem agnovit, sicque tandem finem habuit magnum Occidentis schisma.

Certum est adhuc 4^o summum Pontificem concilio generali non esse superiorem, eo sensu quod dogmatica ejus decreta annullare aut mutare possit; decreta enim certo infallibilia nullam subire possunt mutationem: atqui decreta concilii vere generalis, secundum conditiones a nobis superius expositas, certo sunt infallibilia: ergo nec summus Pontifex nec aliud concilium generale aliquid in eis mutare potest. Posset, e contra, leges et disciplinæ statuta per legitimam dispensationem relaxare, *sicut ostendimus.*

Certum est 5^o summum Pontificem a dictis legibus aut statutis sine justa causa dispensare non posse, saltem licite; *id supra probavimus.*

Sola ergo quæ superest difficultas in eo sita est, videlicet 1^o an concilium generale legitime congregatum, cui summus Pontifex per se aut per legatos præest, possit eundem Pontificem, quamvis non dubium, accusare, judicare, condemnare et deponere, an vero in eo casu Pontifex valeat concilium dissolvere aut in alium locum transferre; 2^o an concilium generale legitime congregatum et celebratum, vera gaudeat infallibilitate, independenter a confirmatione summi Pontificis.

Omnes iterum conveniunt 1^o concilium legitimam habere potestatem examinandi Pontificem de aperta hæresi

aut schismate suspectum, illumque condemnandi et deponendi, si convincatur; nam quilibet homo vere hæreticus ipso facto extra Ecclesiam constituitur: ergo illius caput esse non potest, seu accuratius, si papa sit, eo ipso dignitatem suam coram Deo amittit; ideo concilium in eo casu proprie non deponeret, sed papam jam non esse declararet. Sic Ultramontani.

2° Universim admittunt theologi concilium generale omnimoda infallibilitate gaudere, si in decretis suis instructionem a summo Pontifice per litteras aut per legatos datam sequatur, quia tunc adest consensus totius Ecclesiæ.

3° Si, e contra, legati mandata a summo Pontifice accepta transgredierentur, concilium non esse infallibile generatim admittitur, quia vere œcumenicum dici non posset. Sic Nicolaus I annullavit quidquid ex consensu legatorum suorum factum fuerat in concilio Constanti-nopolitano, tempore Photii, contra Ignatium.

Quæstio denique, ad simpliciores statum suum ultimo reducta, sic videtur esse: 1° utrum concilium generale legitime congregatum habeat auctoritatem in summum Pontificem, non dubium, sed certum, de hæresi aut schismate non convictum, ita ut illum deponere possit, an vero Pontifex habeat auctoritatem in concilium; 2° utrum, ex hypothesi quod concilium legitime congregatum unam sententiam admitteret, et oppositam Pontifex teneret, Pontifici potius quam concilio, vel concilio potius quam Pontifici adhærendum foret.

In omnibus retro sæculis neutra ex his suppositionibus adhuc contigit. Ex divinis promissionibus non solum præsumere, sed sperare licet neutram deinceps adventuram esse; quippe Spiritus sanctus Ecclesiam catholicam semper speciali assistentia regens, non permittet tantis malis eam concuti. Parvi ergo refert ut immoremur in discutienda hac quæstione sat subtili, intricata, apud plerosque theologos diffusa et non mediocriter obscura. Generaliter Galli, contra cunctos extraneos, respectivam concilii auctoritatem supra summum Pontifi-

cem admittunt et propugnant. Legi possunt auctores supra citati, ubi de infallibilitate.

SECTIO QUARTA. — De celebri cleri Gallicani Declaratione anni 1682, et de libertatibus Ecclesiæ Gallicanæ.

Paucis verbis texenda est historia eorum quæ famosissimæ huic Declarationi occasionem præbuerunt; deinde genuinum sensum ejus assignabimus; postea expendemus quæ sit auctoritas ejus; denique tractabimus de libertatibus Ecclesiæ Gallicanæ.

Punctum primum. — *Historia Declarationis cleri Gallicani, anni 1682.*

Ab immemoriali tempore reges nostri jura circa beneficia in ecclesiis sui regni habebant: jura hec dicebantur regalia, Gallice *la régale*. In eo consistebant 1° quod rex bona temporalia episcoporum et archiepiscoporum, sede vacante, per suos delegatos sibi administraret, usque ad diem quo novus episcopus vel archiepiscopus juramentum fidelitatis præstaret; 2° quod interea nominaret ad omnia beneficia ad quæ episcopus solet nominare, exceptis tamen parochiis. Hinc jus regale erat simul temporale et spirituale. Circa originem talis juris valde inter se dissentiunt auctores; sed quidquid sit, certum est regem legitimum habere non potuisse jus ad beneficia nominandi, nisi ex consensu Ecclesiæ saltem tacito; nam potestas civilis, quantacumque sit, nullum habet jus per seipsam in diversa Ecclesiæ officia, nec proinde in personas quatenus ea exercere debent: non magis ergo potest ad ea officia nominare et jurisdictionem conferre, quam Ecclesia magistratus civiles instituere posset.

Ludovicus XIV jus regale, per solemne edictum anni 1673, ad omnes ecclesias regni sui in quibus non existebat extendere voluit. Episcopi Apamensis et Alethenensis huic edicto parere recusarunt, attestantes regem potestatem suam excedere. Tunc gravis contra eos ingruit tempestas; a potestate temporali oppressi, a suis metro-

politans damnati, ad summum pontificem Innocentium XI appellarunt. Pontifex ille, morum integritate, bonorum temporalium despicientia, pietate et zelo conspicuus, sed caractere inflexibilis et propositi semel concepti tenacissimus, causam duorum episcoporum ardentè suscepit, sententias metropolitanorum Tolosani et Narbonensis irritavit, bis ad Ludovicum XIV scripsit, et nihil obtinuit. Tertium breve ad illum misit, anno 1679, quo graviter eum increpavit, declarans se in tanto periculo non neglecturum remedia quibus, ex potestate Dei sibi commissa, uti poterat.

Rex potentissimus has minas indignanter ferens, extraordinaria totius cleri Gallicani comitia per suas litteras 16 junii 1681 convocavit, ut viderent in deliberatione communi quid ad pacem regni servandam et honorem regis tuendum agendum foret.

Nusquam visus est in Gallia cœtus episcoporum et presbyterorum numerosior virtutibus ac scientia commendatior, inquit D. *Bausset* in *Historia Bossuet*. Plurimi tamen episcopi apparebant valde exacerbati, et multum timendum erat ne, variis de causis, nimis commoti, ultra modum procederent, Romanum pontificem magis ac magis offenderent ac irritarent, magnum, præter intensionem suam, excitarent incendium quod in luctuosissimum schisma desineret. Infelicem hunc exitum prævidens *Bossuet* tanquam possibilem, vigilantem et constantem prudentiam quærebat illum præcavendo avertere. Designatus fuit ut sermonem consuetum in exordio hujus cœtus pronuntiaret; de unitate Ecclesiæ disserere statuit; materiam illam tanti monenti clare, lucide, graviter ac summa cum religione tractavit, omnia verba attenter ponderavit, et animos jam nimis *divergere* incipientes in unum coadunavit, aut saltem multum temperavit.

Ipsè mentem suam aperit in epistola ad card. *d'Estrées*, mensis decembris 1681 : « Je n'ai pas mis dans mon discours une seule parole qu'avec des raisons particulières, » et toujours, je vous l'assure devant Dieu, avec une intention très-pure pour le saint Siège et pour la paix.

Statim atque cœtus fuit congregatus, de jure regali primum actum est. Rex, in proposito suo firmiter perseverans, idem jus ad omnes ecclesias huc usque exemptas extendere semper voluit; attamen in modo illud exercendi aliquid relaxare proponebat, nempe pro beneficiis quibus aliqua jurisdictio erat annexa, retinebat duntaxat jus præsentandi, et subditi sic præsentati vicarios capitulares vel novum episcopum adire tenebantur, ut institutionem canonicam obtinerent. Temperamentum istud, cum imposita conditione, grato animo clerus libenter admisit: tunc Ludovicus XIV emisit novum edictum mense januario 1682, quo *regaliam* ad omnes ecclesias regni sui extendebat. Clerus autem totius rei conclusionem summo Pontifici notam fecit per epistolam diei 3 Februarii 1682 quam *Bossuet* redegit. Post duos menses tantum (11 aprilis) Innocentius XI respondit episcopis per breve duris et asperis vocibus plenum, exprobrans illis quod jura ecclesiarum suarum contra injustam regis auctoritatem male defenderent, annullavit ac irritavit quidquid in hac quæstione statuerant.

Interea rex, ex consilio D. *Colbert*, primi ministri sui, speciale mandatum dedit episcopis ut veram Ecclesiæ Gallicanæ sententiam circa potestatem summi Pontificis per nonnullos articulos clare exprimerent. Ex tunc magis adhuc timere cœpit *Bossuet* pro unitate Ecclesiæ: hujusmodi declarationem avertere aut saltem retardare voluisset; sed, cum nihil sub hoc respectu obtinendum videret, totus fuit ut regi, magistratibus et episcopis satisfaceret, et tamen essentialia sanctæ Sedis jura prorsus illæsa servaret; pro eis contra plures episcopos fortiter pugnavit, et sequentem Declarationem contexuit, quæ ab omnibus fuit admissa.

Declaratio diei 19 martii 1682.

- » Ecclesiæ Gallicanæ decreta et libertates a majoribus
- » nostris tanto studio propugnata, earumque funda-
- » menta sacris canonibus et Patrum traditione nixa,

» multi diruere moliuntur; nec desunt qui eorum ob-
 » tentu primatum Petri ejusque successorum Romano-
 » rum pontificum, a Christo institutum, iisque debitam
 » ab omnibus Christianis obedientiam, sedisque Aposto-
 » licæ, in qua fides prædicatur et unitas servatur Ecclesiæ,
 » reverendam omnibus gentibus majestatem imminuere
 » non vereantur. Hæretici quoque nihil prætermittunt
 » quo eam potestatem, qua pax Ecclesiæ continetur, in-
 » vidiosam et gravem regibus et populis ostendent, iis-
 » que fraudibus simplices animas ab Ecclesiæ matris
 » Christique adeo communione dissociant. Quæ ut incom-
 » moda propulsemus, nos archiepiscopi et episcopi Pari-
 » siis mandato regio congregati, ecclesiam Gallicanam
 » repræsentantes, una cum cæteris ecclesiasticis viris no-
 » biscum deputatis, diligenti tractatu habito, hæc san-
 » cienda et declaranda esse duximus.

» I. Primum beato Petro ejusque successoribus, Christi
 » vicariis, ipsique Ecclesiæ rerum spiritualium et ad
 » æternam salutem pertinentium, non autem civilium, a
 » Deo traditam potestatem, dicente Domino : *Regnum*
 » *meum non est de hoc mundo*; et iterum : *Reddite ergo*
 » *quæ sunt Cæsaris, Cæsari, et quæ sunt Dei, Deo*; ac
 » proinde stare Apostolicum illud : *Omnis anima potesta-*
 » *tibus sublimioribus subdita sit; non est enim potestas nisi*
 » *a Deo; quæ autem sunt, a Deo ordinatæ sunt; itaque qui*
 » *potestati resistit, Dei ordinationi resistit*. Reges ergo et
 » principes in temporalibus nulli ecclesiasticæ potestati
 » Dei ordinatione subjici neque auctoritate clavium Ec-
 » clesiæ directe vel indirecte deponi, aut illorum sub-
 » ditos eximi a fide atque obedientia, ac præstito fide-
 » litatis sacramento solvi posse; eamque sententiam
 » publicæ tranquillitati necessariam, nec minus Ecclesiæ
 » quam imperio utilem, ut verbo Dei, Patrum traditioni,
 » et sanctorum exemplis consonam, omnino retinendam.

» II. Sic autem inesse Apostolicæ sedi ac Petri succes-
 » soribus, Christi vicariis, rerum spiritualium plenam
 » potestatem, ut simul valeant atque immota consistent
 » sanctæ œcumenicæ synodi Constantiensis, a sede Apo-

» stolica comprobata, ipsoque Romanorum pontificum ac
 » totius Ecclesiæ usu confirmata, atque ab Ecclesia Gal-
 » licana perpetua religione custodita decreta de aucto-
 » ritate conciliorum generalium, quæ sessione quarta et
 » quinta continentur; nec probari a Gallicana Ecclesia
 » qui eorum decretorum, quasi dubiæ sint auctoritatis ac
 » minus approbata, robur infringant, aut ad solum schis-
 » matis tempus concilii dicta detorqueant.

» III. Hinc Apostolicæ potestatis usum moderandum
 » per canones Spiritu Dei conditos, et totius mundi reve-
 » rentia consecratos; valere etiam regulas, mores et in-
 » stituta a regno et Ecclesia Gallicana recepta, patrumque
 » terminos manere inconcussos; atque id pertinere ad
 » amplitudinem Apostolicæ sedis, ut statuta et consuetu-
 » dines sanctæ Sedis et ecclesiarum consensione firmata,
 » propriam stabilitatem obtineant.

» IV. In fidei quoque quæstionibus præcipuas summi
 » Pontificis esse partes, ejusque decreta ad omnes et
 » singulas ecclesias pertinere, nec tamen irreformabile
 » esse judicium, nisi Ecclesiæ consensus accesserit.

» Quæ accepta a patribus ad omnes ecclesias Gallica-
 » nas atque episcopos iis Spiritu sancto auctore præsi-
 » dentes mittenda decrevimus, ut idipsum dicamus
 » omnes, simulque in eodem sensu et sententia. »

Statim atque hæc cleri Gallicani Declaratio ab omnibus
 episcopis aliisque ecclesiasticis viris in comitiis sedenti-
 bus subscripta prodiit, Ludovicus XIV eam adoptavit, et
 solemniedicto, diei 23 martii 1682, jussit ut tanquam lex
 regni haberetur, ac in cunctis theologiæ scholis docere-
 tur. Omnis clerus Gallicanus moraliter ei subscripsit.
 At Innocentius XI, graviter inde offensus, institutionem
 canonicam constanter recusavit eis qui Declarationi sub-
 scripserant et a rege episcopi aut archiepiscopi nomi-
 nati erant, exigens ab eis ut subscriptionem et adhæsionem
 suam revocarent: rex autem noluit alios episcopos
 nominatos per bullas Pontificias, aliis prætermis-
 sis, accipere; res per undecim annos sic permansit, et tertia
 pars sedium episcopalium pastoribus erat destituta. Ale-

xander VIII, Innocentii successor, iisdem principiis adhæsit, decem menses tantum pontificatum obtinuit, et immediate ante mortem publicari jussit constitutionem quam sex abhinc mensibus jam paraverat adversus cleri Gallicani Declarationem.

Innocentius XII Alexandro successit, anno 1691, et statim de rebus componendis cum Christianissimo rege tractare cœpit, ut pax Ecclesiæ Gallicanæ restitueretur; constanter exegit ut qui prædictæ Declarationi subscripserant, aliquam satisfactionem sedi Apostolicæ darent. Post longam discussionem, episcopi nominati ad suam Sanctitatem hanc scripserunt epistolam, die 14 septembris 1693 :

« Ad pedes Beatitudinis vestræ provoluti, profitemur
 » et declaramus nos vehementer quidem, et supra omne
 » id quod dici potest, ex corde dolere de rebus gestis in
 » comitiis prædictis, quæ Sanctitati vestræ et ejusdem
 » prædecessoribus summo opere displicuerunt; ac proinde
 » quidquid in iisdem comitiis circa ecclesiasticam potes-
 » tatem et Pontificiam auctoritatem decretum censi
 » potuit, pro non decreto habemus et habendum esse
 » declaramus : præterea, pro non deliberato habemus
 » illud quod in præjudicium jurium ecclesiarum delibe-
 » ratum censi potuit; mens quippe nostra non fuit
 » quidquam decernere et ecclesiis prædictis præjudicium
 » inferre. »

Illa epistola, saltem quoad substantiam, a *Bossuet* fuerat redacta (*Nouveaux opuscules de Fleury*). Episcopi promovendi doctrinam Gallorum in ea præcise non ejurant, sed testantur 1° se dolere de illa Declaratione quam vellent non existere; 2° nullam habuisse intentionem aliquid statuendi et definiendi, sed tantum opinionem declarandi et manifestandi. Sic *Bossuet* hanc epistolam ipsamque Declarationem interpretatur in Gallia orthodoxa, § 6.

Ludovicus XIV eodem tempore scripsit quoque propria manu ad Innocentium XII his verbis :

« Très-saint Père, j'ai toujours beaucoup espéré de

» l'exaltation de votre Sainteté au pontificat pour les
 » avantages de l'Église et l'avancement de notre sainte
 » religion ; j'en éprouve présentement les effets avec bien
 » de la joie dans tout ce que sa Béatitude fait de grand
 » et d'avantageux pour le bien de l'un et de l'autre.
 » Cela redouble en moi mon respect filial envers votre
 » Béatitude : comme je cherche de le lui faire connaître
 » par les plus fortes preuves que j'en puis donner, je suis
 » bien aise aussi de faire savoir à votre Sainteté que j'ai
 » donné les ordres nécessaires pour que les choses con-
 » tenues dans mon édit du 22 mars 1682, touchant la
 » Déclaration faite par le Clergé de France, à quoi les
 » conjonctures passées m'avaient obligé, ne soient pas
 » observées ; et que, désirant que non-seulement votre
 » Sainteté soit informée de mes sentimens, mais encore
 » que tout le monde connaisse par une marque particu-
 » lière la vénération que j'ai pour ses grandes et saintes
 » qualités, je ne doute pas que votre Béatitude n'y ré-
 » ponde par toutes les preuves de démonstrations envers
 » moi de son affection paternelle... » *Hist. de Bossuet.*

Notandum est, regem summo Pontifici non promittere quod in posterum propositiones Declarationis 1682 in regno suo propugnare non liceret : id ipse respondit anno 1713, cum Clemens XI, Innocentii XII successor, bullas institutionis concedere nollet D. de Saint-Agnan, pro sede Bellovacensi, quia prædictas propositiones in thesi publica anno 1705 defenderat. Semper igitur unusquisque has opiniones amplecti ac tueri pro arbitrio suo potuit : imo in cunctis Universitatibus nostris professores eas docebant, et fere omnes theologi qui de Ecclesia in scriptis suis tractaverunt, eas propugnauerunt.

Cum edictum Ludovici XIV diei 22 martii anni 1682, expresse revocatum non fuisset, Parlamenta semper illud habuerunt ut legem proprie dictam usque ad initium perturbationis Gallicanæ, ejusque observationem stricte prosecuta sunt.

Punctum secundum. — *De genuino sensu Declarationis cleri Gallicani anni 1682.*

1° Ubi prædicta cleri Gallicani Declaratio innotuit, facta est odiosa Pontifici maximo, cardinalibus, theologis Romanis et fere omnibus extraneis, qui undique adversus illam insurrexerunt, in Hispania, Italia, Hungaria, etc. omnes enim eam sibi fingeant velut decretum fidei aut quoddam iudicium doctrinale episcoporum: et fatendum est episcopos Declarationis auctores, in epistola ad suos collegas absentes, dedisse locum tale ferendi iudicium. In hac autem hypothesis, actus ille valde reprehensibilis ac damnandus fuisset, cum enuntiasset cæteras ecclesias contrarium sentientes in errorem versari. Propterea totus fuit *Bossuet* ut ostenderet nec se nec alios episcopos ullo modo aliquid definire intendisse, sed tantum opiniones suas in quæstionibus ad fidem non pertinentibus manifestare voluisse.

2° Plurimi arbitrati sunt præsules Gallicanos statuere in secundo articulo Declarationis concilium generale esse tribunal ordinarium supra summum Pontificem institutum: verum talis non est sensus huius articuli: » Nous ne croyons pas, *ait D. Fleury*, *Nouveaux opuscu-*
» *les*, que les conciles doivent être regardés comme un
» tribunal réglé et ordinaire au-dessus du pape, mais
» comme un remède extraordinaire dans les maux ex-
» trêmes et dans les grandes divisions de l'Église. » Idem expressis verbis asserit *Bossuet*, *Lettre au cardinal d'Es-*
trées. Ipsimet Ultramontani fatentur deponendum esse papam hæreticum, aut declarandum dignitate papali destitutum: unde controversia potius esse videtur de modo procedendi quam de substantia rei, ac proinde opinio Gallorum nihil auctoritati summi Pontificis detrahit.

3° Tertius articulus eo sensu intellectus est, quod pontifex Romanus ita constringeretur canonibus, ut ab illis dispensare non posset, vel a superiori potestate, nempe a concilio, ad eos servandos cogeretur, ut videre est apud

card. *Litta*, *Lettre* 18°. Sed nunquam talis fuit mens doctorum præsulumque Gallicanorum; expresse enim docet *Bossuet*, cui omnes alii libenter subscribunt, *papam nihil non posse, cum necessitas id postularit*, ut supra diximus. Legitimus ergo sensus illius articuli est, summum Pontificem teneri, saltem ut licite agat, auctoritatem suam moderare per canones *Spiritu Dei conditos, et totius mundi reverentia consecratos* (sunt verba S. Damasi), quod Ultramontani et ipsi summi Pontifices ultro fatentur. In hoc tantum existit opinionum varietas quod, scilicet, juxta Gallicanos, summus Pontifex subjiciatur legibus conciliorum generalium ut inferior, adeo ut sine legitima causa ab illis valide dispensare non possit, dum Ultramontani asserunt illum eis subjectum esse sicut legislatorem propriis legibus suis, a quibus valide, etiam sine causa, dispensare valet. De legitimitate autem causæ solus Pontifex judicat, saltem in casibus ordinariis: unde controversia fere ad nihil reducitur quoad praxim.

4º Quartus articulus intellectus est ab Ultramontanis, quasi clerus Gallicanus dixisset et definire voluisset papam esse fallibilem: hoc autem falsum est; id unum quippe statuere voluit, nempe decreta summi Pontificis ultimam fidei regulam non esse, nisi consensus episcoporum ei accesserit, et ea præcise intentione has adhibuit voces, *nec tamen irreformabile esse judicium, nisi consensus Ecclesiæ accesserit*. Ita *Bossuet*, qui certe audiendus est, cum ipse vocem *irreformabile* totis viribus curaverit usurpandam potius quam *infallibile*. Opinio quidem cleri Gallicani non est summum Pontificem etiam ex *cathedra* loquentem errare non posse, sed nunquam propositum habuit sententiam adversam reprobandi. Ex utraque vero parte omnes convenire tenentur decreta Pontificalia, licet summa veneratione suscipienda, ultimum robur non consequi donec consensus episcoporum accesserit. Vide *Bossuet*, coroll. ad calcem Defens. n. 8, et *Nouveaux opuscules de Fleury*.

Punctum tertium. — *De auctoritate Declarationis anni 1682.*

Sedulo distinguendum est inter Declarationem et doctrinam in ea expressam. Hæc quippe doctrina ante Declarationem libere defendebatur in scholis nostris, et eo tempore variis de causis magis invaluerat : ergo, sublata Declaratione, liceret adhuc eam tenere ac defendere cum debita sobrietate. Unde *Bossuet*, Gallia orthodoxa, § 10, affirmat se defensionem ipsius Declarationis stricte non suscipere, bene vero priscae doctrinae Facultatis Parisiensis : « Abeat ergo Declaratio quo libuerit, *inquit* ; » non eam, quod sæpe profiteri juvat, tutandam hic » suscipimus. Manet inconcussa et censuræ omnis ex » pers prisca illa sententia Parisiensium. »

Quæstio est igitur an præfata Declaratio habeat vim legis.

1° Certum est illam vim legis ecclesiasticæ non habere : 1° quia episcopi sententiam suam tantummodo manifestare voluerunt, non vero decretum efformare, nec legem condere ; 2° quia deputati secundi ordinis ad episcopatum promovendi, qui in comitiis anni 1682 sedentes Declarationi adhæserant, testati sunt in epistola satisfactoria quam paulo ante retulimus, mentem suam non fuisse quidquam decernere, et præterea revocaverunt quidquid contra Pontificiam auctoritatem decretum censi posset ; 3° quia Alexander VIII dictam Declarationem rescidit et annullavit ; sunt ferme ipsius verba. Quamvis constitutio ejus non fuerit publicata secundum formas in Gallia consuetas, non tamen est parvi momenti etiam apud nos.

2° Non videtur quomodo eadem Declaratio vim legis civilis haberet : 1° quia auctoritas civilis non habet jus aliquid præcipiendi circa doctrinam ecclesiasticam ; 2° quia Ludovicus XIV, licet edictum suum solemniter non revocaverit, testatur, in epistola ad Innocentium XII, se jussisse ut deinceps non observaretur ; et 3° præcipue, quia Charta constitutionalis anni 1814 et anni 1830 illud

abrogasset, si adhuc exstisset, declarando Gallos habere jus opiniones suas publicandi, observando leges quæ abusus ex tali libertate provenientes reprimere debent: porro nullæ postea conditæ sunt leges quæ libertatem circa opiniones in Declaratione anni 1682 contentas coerceant. Ergo.

Quæritur utrum prædictæ Declarationi subscribere liceat?

R. 1º *Certum est*, ut diximus, licere opiniones in seæ contentas tenere ac docere, utpote nullo modo damnatas: at ipsa Declaratio fuit cassata et annullata; qui ergo ei subscriberent, contra decretum sanctæ Sedis agerent.

2º Attamen *certum est* ei subscribentes nullam mereri censuram; nam Pontifices maximi fortius adversus illam insurgentes, ab omni nota hæresis, schismatis, vel etiam erroris caute abstinerunt. Sic se habet Alexander VIII, in bulla *Inter multiplices*, supra citata: « Omnia et singula, quæ tam quoad extensionem juris regaliam, quam quoad Declarationem de potestate ecclesiastica, ac quatuor propositiones in ea contentas, in supradictis comitiis cleri Gallicani, anno 1682 habitis, acta et gesta fuerunt, cum omnibus et singulis mandatis, arrestis, etc. improbamus, cassamus, irritamus et annullamus.... deque eorum nullitate coram Domino protestamur. »

Benedictus XIV scribens ad supremum Hispaniæ inquisitorem, die 31 julii, anno 1748, sic aiebat, de operè *Bossuet* agens: « Totum opus (*Defensio Declarationis*) versatur in asserendis propositionibus a clero Gallicano firmatis in conventu anni 1682. Difficile profecto est aliud opus reperire quod æque adversetur doctrinæ extra Galliam ubique receptæ de summi Pontificis ex cathedra definientis infallibilitate, de ejus excellentia supra quodcumque concilium œcumenicum, de ejus jure indirecto, si potissimum religionis et Ecclesiæ commodum id exigat, super juribus temporalibus principum supremorum. Tempore felicitis recordationis Clementis XII, nostri immediati prædecessoris, serio

» actum est de opere proscribendo; et tandem conclusum
 » fuit, ut a proscriptione abstineretur, nedum ob memo-
 » riam auctoris ex tot aliis capitibus de religione bene
 » meriti, sed ob justum novorum dissidiorum timorem. »

Videtur quid sapientissimus ac doctissimus Pontifex de Declaratione, necnon de doctrina in ea consignata, et de opere ad eam tuendam tantis laboribus confecto censuerit, et simul nullam de facto censuram in ejus defensores fuisse inustam.

Pius VI, in bulla *Auctorem fidei*, edita die 28 aug. anno 1794, contra actus synodi Pistoriensis, ait : « Ne-
 » que silentio prætereunda insignis et fraudis plena syn-
 » odi temeritas, quæ pridem improbatam ab Apostolica
 » sede conventus Gallicani Declarationem anni 1682
 » causa sit, non amplissimis modo laudibus exornare,
 » sed..... eam in decretum de fide inscriptum insidiosè
 » includere, articulos in ea contentos palam adoptare.....
 » Exigit a nobis pastoralis sollicitudo recentem horum
 » (actorum anni 1682) factam in synodo tot vitiis affec-
 » tatam adoptionem, velut temerariam, scandalosam, ac
 » præsertim.... huic Apostolicæ sedi summopere inju-
 » riosam reprobare ac damnare. »

Cardinalis *Gerdil* sapienter observat hanc condemnationem Pontificiam, non in quatuor articulos Declarationis anni 1682 in se spectatos cadere, sed in vitiosam eorum adoptionem in decreto de fide : ergo iterum famosissima Declaratio nullis censuris unquam fuit inusta.

Summus Pontifex hac de re anno 1820 consultus, his verbis : « Beatissime Pater, N. confessarius in Galliis,
 » S. V. humillime consulit, num ipse queat et debeat
 » absolvere illos ecclesiasticos qui se subijcere recusant
 » condemnationi quam sancta Sedes edidit quatuor cele-
 » berrimarum propositionum cleri Gallicani. Ita multæ
 » tollentur quæstiones et conscientiae quiescent. »

Respondit per sacram Pœnitentiariam ut sequitur :
 » Sacra Pœnitentia, diligenter perpensa proposita
 » quæstione, respondendum censuit, Declarationem con-
 » ventus Gallicani anni 1682, ab Apostolica sede impro-

» latam quidem fuisse, ejusque conventus acta rescissa,
 » et nulla atque irrita declarata; nullam tamen theolo-
 » gicæ censuræ notam doctrinæ Declaratione illa con-
 » tentæ inustam fuisse : propterea nihil obstare quomi-
 » nus sacramentali absolutione donentur sacerdotes illi
 » qui bona fide et ex animi sui persuasione doctrinæ illi
 » adhuc adhærent, modo absolutione digni aliunde vi-
 » deantur. Datum Romæ, in sacra Pœnitentiaria, die
 » 27 sept. 1820. — MICHAEL, cardinalis de Petro, Major
 » Pœnitentiarius. »

Punctum quartum. — *De libertatibus Ecclesiæ Gallicanæ.*

Libertates Ecclesiæ Gallicanæ sunt leges vel consuetudines ex principiis disciplinam spectantibus Galliæ propriis fluentes, a Clero Gallicano cum expresso vel tacito summi Pontificis et Ecclesiæ consensu admissæ.

Diximus 1^o in definitione, *a clero Gallicano admissæ*; vera enim notio libertatum nostrarum non repetenda est a magistratibus rerum ecclesiasticarum parum peritis, et multo minus a publicis oratoribus et scriptoribus politicis, sed a canonistis, doctoribus et præsertim ab episcopis qui sunt naturales earum custodes.

Diximus 2^o *cum expresso vel tacito*, etc. Est enim de fide ecclesiastica summum Pontificem habere jurisdictionem ac consequenter potestatem legislativam, vi primatus divini, in omnes ecclesias particulares : atqui jus divinum nulla consuetudine deleri potest : ergo quælibet ecclesia particularis decretis summi Pontificis obedire tenetur, nisi ex consensu illius saltem legitime præsumpto dispensetur. Si quippe privatæ ecclesiæ decreta summi Pontificis, ipso renitente, sub prætextu libertatum suarum rejicere possent, jam factum esset de subordinatione, evanesceret unitas. Ergo.

Hinc sequitur, concilia generalia et summos Pontifices libertatibus nostris derogare posse. Nam 1^o auctoritas superior auctoritatem sibi inferiorem reformare potest : porro Ecclesia Gallicana est inferior concilio generali et ipso pontifici Romano. Unde episcopi agnoverunt obli-

gationem publicandi concilium Tridentinum illudque, quantum in se erat, promulgarunt variis in conciliis provincialibus, et Concordatum anni 1801 susceperunt, licet propriis libertatibus nostris directe opponeretur. 2^o Omnes consentiunt summum Pontificem legibus Ecclesiæ universalis derogare posse, quando graves occurrunt rationes : ergo *a fortiori* et consuetudinibus Ecclesiæ particularis.

His positis, certum est libertates ecclesiæ Gallicanæ nihil habere vitii; consuetudines enim a Patribus nobis traditæ canonibus conciliorum fundatæ, sedis Apostolicæ et Ecclesiæ consensu firmatæ, in se bonæ sunt ac legitimæ : ergo licet eas servare, atque in hoc vera sanctæ Sedis jura minime læduntur. Imo dignitatis et amplitudinis est tantæ sedis ut antiquæ leges de consensu ejus formatæ servantur, et immobilitatem obtineant; summus Pontifex eas subvertere rationabiliter velle non potest in casibus ordinariis, et quando omnes episcopi locorum judicant optimum esse illas servare. Ipsa concilia generalia non censentur eas ubi existunt attingere et abrogare. Hinc concilium Tridentinum pluribus in punctis non fuit receptum apud nos quoad disciplinam, ideoque sub eo respectu neutiquam nos obligat. Bulla *In cæna Domini* consuetudinibus nostris in multis opposita, nunquam publicata fuit in Gallia; idcirco censuris in ea latis non ligamur.

Pariter, ex antiqua consuetudine, episcopi in Gallia ab hæresi per se aut per alios absolvunt, licentiam legendi libros hæreticos concedunt, decisiones congregationum cardinalium velut auctoritatem habentes non agnoscunt, in ipso regno judicari debent, nec in causa appellationis cogi possunt adire Romam, *ut supra diximus*.

Bullæ et omnia summi Pontificis statuta, forum externum spectantia, nullam vim legalem in regno habent, nec publicari aut executioni mandari possunt, quin prius supremæ curiæ, nunc concilio gubernii (*conseil d'Etat*) fuerint præsentata et recognita ut authentica, privilegiis regni non adversantia, et in actis publicis in-

scripta (*enregistrés*). Hæc tamen sunt pro foro civili tantum ; acceptatio enim et inscriptio actus summi Pontificis in civilibus registris minime requiri possunt ad ligandas conscientias, ad conferendam jurisdictionem, etc. Sola pro his effectibus sufficit acceptatio et publicatio ab episcopis facta, idque pro tempore duntaxat ordinario, non vero pro tempore quo illæ formalitates impleri non possent, ut contigit per revolutionem nostram ; nec pariter locum habent quando agitur de dispensationibus, de rescriptis forum internum duntaxat spectantibus, vel gratiarum, v. g. indulgentiarum concessionibus : attamen dispensationes et illæ gratiarum concessiones præsentari debent ordinario antequam executioni mandentur. Talis est usus apud nos receptus, quem novit nec improbat pontifex Romanus. Vide *les vrais principes de l'église Gallicane*. Excipiuntur rescripta S. Pœnitentiariæ forum internum individuorum respicientia.

Aliæ ecclesiæ, v. g. Hispaniarum, Belgiæ, Germaniæ, etc. sua etiam specialia habent privilegia quæ sedulo conservant, nemine contradicente ; quare ergo consuetudines nostras non haberemus ? Eas vocamus libertates, quia potestati regum et episcoporum favent relative ad summum Pontificem ; sed vox illa qua multi abusi sunt, legitimitati eorum non nocet, supposito consensu summi Pontificis saltem tacito. Si ergo videamur odiosi extraneis propter libertates nostras, id præsertim venit ex eo quod male percipiant sub quo respectu eas tueamur.

Non diffitemur multiplices natos esse abusus in Gallia sub prætextu harum libertatum ; quicumque enim historiæ ecclesiasticæ ultimi sæculi non est omnino expers, ignorare non potest quot modis auctoritas civilis spirituales Ecclesiæ potestatem evidenter læserit, nomine libertatis. Studiosissimi libertatum nostrarum defensores non semel amare conquesti sunt de officiariis regiis et magistratibus, qui legitimam potestatem suam sic prætergredebantur. Pluries improbaverunt eorum libros, opinionibus erroneis et ad schisma tendentibus plenos, v. g. opera Petri *Pithou*, *Traité des libertés de l'église*

Gallicane, cum eorum probationibus Petri Dupuy, de quibus viginti et duo episcopi, post examen, anno 1639, dixerunt : « Compilator ille multis pessimis bona quædam immiscuit, et inter falsas et hæreticas, quas detestamur, Ecclesiæ Gallicanæ ascriptas servitutes potius quam libertates..... exposuit. » *Procès-verbaux du Clergé*, t. 3, *pièces justif.* n. 1.

Bossuet, in Defens. Decl. l. II, c. 20, declarat episcopos Ecclesiæ Gallicanæ nunquam omnia approbasse quæ in operibus Petri Dupuy et Caroli Fréret, *Traité de l'abus*, continentur : non igitur quærendæ sunt veræ libertates nostræ in hujusmodi et in aliis ejusdem generis operibus.

Hic etiam Bossuet, epistola ad cardin. d'Estrées, *Histoire de Bossuet*; sic habet : « Je me suis proposé deux choses : l'une, en parlant des libertés de l'église Gallicane, d'en parler sans aucune diminution de la vraie grandeur du saint Siège; l'autre, de les expliquer de la manière que les entendent les évêques, et non pas de la manière que les entendent les magistrats. »

Fénelon, in notis ab illustrissimo vitæ ejus scriptore nobis transmissis, *pièces justificatives du livre 7^e*, n. 8, sic mentem suam aperit : « Le roi dans la pratique est plus chef de l'Église que le pape en France. Libertés à l'égard du pape, servitudes à l'égard du roi. Autorité du roi sur l'Église dévolue aux juges laïques. Les laïques dominent les évêques. Abus énormes de l'appel comme d'abus... »

Sic adhuc Fleury, *Nouveaux opuscules* : « Mais la grande servitude de l'église Gallicane, s'il est permis de parler ainsi, c'est l'étendue excessive de la juridiction séculière..... Enfin les appellations comme d'abus ont achevé de ruiner la juridiction ecclésiastique..... Un mauvais Français pourrait faire un traité des servitudes de l'église Gallicane, comme on en a fait des libertés, et il ne manquerait pas de preuves. »

Testimonia hæc referendo, veras libertates nostras nec evertere nec imminuere intendo, sed accuratam earum

notionem tradere volui; necesse est enim ut theologiæ alumni eas sciant ac teneant: verum non minus necesse est ut illas ultra legitimos limites non extendendas esse noscant.

CAPUT SECUNDUM.

DE MEMBRIS ECCLESIAE.

Ex dictis in decursu hujus tractatus sequitur veram Christi Ecclesiam essentialiter esse visibilem et in visibilitate sua indefectibilem, esse unam, sanctam, catholicam et Apostolicam; episcopos esse jure divino omnium controversiarum circa fidem, mores et disciplinam judices, infallibilitate gaudere; summum Pontificem visibile illius caput esse, et proprium vicarium Christi in terris: unde Ecclesia merito definitur: *Societas hominum viatorum, ejusdem fidei professione, eorumdem sacramentorum participatione conjunctorum, sub regimine eorumdem pastorum legitimorum et præsertim Romani pontificis.*

Nunc igitur quærendum est quinam homines his vinculis externis inter se devinciuntur, ita ut sint vera Ecclesiae membra. Homines autem qui super terram existunt, sunt infideles vel fideles, hæretici aut schismatici vel catholici, prædestinati vel reprobi, justi vel peccatores. Paucis verbis nobis dicendum est 1º de infidelibus, catechumenis et apostatis; 2º de hæreticis et schismaticis; 3º de prædestinatis et reprobis; 4º de excommunicatis; 5º de justis et peccatoribus.

ARTICULUS PRIMUS.

DE INFIDELIBUS, CATECHUMENIS ET APOSTATIS.

Infideles in genere sunt ii qui non sunt baptizati: quando sunt publici, certum est eos nullo modo ad

Ecclesiam pertinere; si vero essent occulti, id est, si quis non baptizatus haberetur ut baptizatus, inter fideles versaretur, cum iis preces funderet, officiis publicis assisteret, sacramentis participaret, pertineretne ad corpus Ecclesiæ? Quidam affirmarunt; nam ille homo eis videbatur externis Ecclesiæ vinculis obstrictus; sed alii omnes hanc opinionem rejiciunt: Baptismus enim est janua Ecclesiæ (conc. Trident. sess. 14, c. 2), et aliunde ille homo suffragiis Ecclesiæ neque directe neque indirecte participat: ergo nequaquam ipsius membrum dici potest.

Catechumeni illi sunt qui doctrina Christi imbuuntur et ad baptismum se præparant.

De corpore Ecclesiæ ipsi non sunt; nam, ut ait Apostolus, I Cor. XII, 13: *In uno spiritu omnes nos in unum corpus baptizati sumus*; fideles baptizantur ut sint unum corpus in Christo: ergo catechumeni nondum sunt de corpore Christi seu de Ecclesia. Præterea baptismus est Ecclesiæ janua, *ut observavimus*: igitur catechumeni sunt velut concepti in sinu Ecclesiæ per signum crucis, S. Aug. tract. 12 in S. Joan. Sed quia per baptismum nondum sunt renati, filii Dei et Ecclesiæ membra dici nequeunt. Attamen, si fidem, spem et charitatem perfectam habeant, ad animam Ecclesiæ pertinent et justi sunt apud Deum. *Ita omnes.*

Apostatæ ii dicuntur qui religionem Christianam penitus abnegant; sive religionem falsam profiteantur, sive nullam aliam amplectantur. Si publice id fecerint, certum est eos amplius non esse membra Ecclesiæ; nam quæcumque exteriora illius vincula eo ipso dissolverunt.

At, qui religionem Christianam occulte deserunt, ut multi hisce temporibus increduli, non ideo cessant esse membra Ecclesiæ, licet mortua; externa enim unionis vincula nihilominus existunt: de iis eodem modo ac de peccatoribus ratiocinandum est, *quod videbimus infra.*

ARTICULUS SECUNDUS.

DE HÆRETICIS ET SCHISMATICIS.

Hæretici sunt illi qui, religionem Christianam profitentes, unum aut plures articulos, a Deo revelatos et ab Ecclesia ut tales propositos, pertinaciter negant.

Sunt occulti, si heterodoxa eorum opinio in notitiam publicam non venerit; si, e contra, eorum opinio sufficienter innotuerit, dicuntur publici.

Publici, sunt iterum vel tolerati, vel non tolerati: tolerati quidem, si in externa communionem Ecclesiæ permaneant, ut erant Jansenistæ; non tolerati autem, si ab Ecclesia per positivam excommunicationis sententiam ejiciantur, vel si totam communionem ipsi solverint, altare contra altare erigendo et aliis pastoribus se subji-ciendo.

Certum est 1° hæreticos occultos ad corpus Ecclesiæ pertinere, sicut apostatas occultos, et propter eandem rationem.

Certum est 2° hæreticos publicos et non toleratos, sive per sententiam fuerint separati, sive ipsi communionem solverint, Ecclesiæ non esse membra; nullo modo enim cum illa uniuntur, neque interne per virtutes, neque externe per communionis vincula.

Certum est 3° hæreticos toleratos ad animam Ecclesiæ non pertinere, nisi forte ratione bonæ fidei excusentur a peccato: *id sequitur ex dictis ubi de unitate Ecclesiæ.* Quidam theologi contendunt eos ad corpus Ecclesiæ pertinere, quia characterem baptismi, confirmationis et etiam ordinis, si sint clerici, retinent. Cæteri vero generaliter docent eosdem nec etiam ad corpus Ecclesiæ pertinere.

Prob. 1°. Illi ad corpus Ecclesiæ revera non pertinent qui essentialia non habent vincula quibus membra ejus uniuntur: atqui hæretici notorii essentialia non habent vincula quibus membra Ecclesiæ inter se uniuntur;

nam, *ex probatis*, hæc vincula sunt professio ejusdem doctrinæ, participatio iisdem sacramentis, subjectio iisdem pastoribus, et præsertim Romano pontifici : quicumque ergo vel uno ex his vinculis caret, realiter membrum Ecclesiæ dici non potest, sicut qui unius peccati mortalis fit reus, jam Deo amicus dici nequit : porro hæretici notorii, licet tolerati, eandem fidem non profitentur : ergo.

2º Sententia nobis opposita admitti non potest, saltem ob rationem quam ejus defensores afferunt, scilicet, ob characterem baptismi, confirmationis et ordinis; cum enim spiritualis ille character nunquam deleri valeat, inde sequeretur eos qui a religione Christiana ad Judæismum, Mahumetismum et etiam paganismum transirent, nihilominus esse membra Ecclesiæ, quod absurdum est et ab omnibus rejicitur. Ergo.

Quæritur utrum hæretici notorii, sed tolerati, jurisdictionem retineant, si sint clerici, usque dum per sententiam ab Ecclesia ejiciantur, vel donec ab illa actu positivo seipsos separent?

Quæstio hæc gravis est momenti, ut patet.

Nonnulli affirmant hæreticos eo instanti quo heterodoxa eorum opinio fit notoria, omni jurisdictione destitui, sicque cunctos eorum actus a jurisdictione pendentes prorsus esse nullos. Ita Bellarminus, de Pontifice Romano, l. 2, c. 30, et plures apud eum; ita etiam, apud *Régnier, Isambert et Duval*. Contra quos tamen

Resp. prædictos hæreticos, ex jure novo, id est, a Martino V, suam retinere jurisdictionem; nam Martinus V in bulla *Ad evitanda scandala*, « Christi fidelibus » misericorditer indulget, quod nemo deinceps a communionem alicujus, sacramentorum administratione vel » receptione.... teneatur abstinere, » nisi sententia contra hujusmodi personam expresse fuerit publicata : ex illa ergo bulla nullus potestate administrandi sacramenta privatur nisi per sententiam.

Præterea, nunquam Ecclesia rescidit aut nullos declaravit actus episcoporum aut parochorum hæreticis opi-

nionibus valde notorum : attamen eos rescindere vel nullos declarare debuisset; inde enim multum et dolendum secutum esset animarum detrimentum, v. g. invalidæ fuissent approbationes ab episcopis Jansenianis concessæ, nullæ absolutiones a tot sacerdotibus iisdem erroribus infectis datæ. Ergo.

Solvuntur objectiones.

Obj. 1°. Bulla Martini V non reperitur in actibus concilii Constantiensis, nec in collectione bullarum SS. Pontificum, nec in jure canonico : ergo nullius est auctoritatis.

R. Nego conseq. Nam 1° S. Antoninus expresse testatur et probat hanc bullam a Martino V revera fuisse datam et a concilio Constantiensi approbatam. 2° Apud omnes certum est illam a multo tempore ubique esse in usu et velut tutam agendi regulam admitti : porro universalis et constans ille usus abunde sufficit ut plenam habeat auctoritatem : ergo.

Obj. 2°. Hæretici notorii non sunt de Ecclesia : atqui repugnat eos ab Ecclesia esse præcisos et simul jurisdictionem ecclesiasticam retinere : ergo.

R. Nego min. Non magis enim repugnat viros ab Ecclesia præcisos jurisdictionem ecclesiasticam retinere, quam repugnat hæreticos non toleratos et excommunicatos etiam denunciatos sacramenta Ecclesiæ valide administrare : atqui de fide est hæreticos non toleratos et excommunicatos denunciatos plurima Ecclesiæ sacramenta valide administrare, nempe ea quæ a jurisdictione non pendent, idque ex institutione Christi : ergo *a pari* non repugnat Ecclesiam, pro bono spirituali fidelium, jurisdictionem suam in viris ab ipsa de facto separatis conservare ; tunc enim sunt instrumenta quibus in filiorum suorum gratiam et divini sponsi sui gloriam utitur.

In hæreticis autem qui publice ab Ecclesia omnino seipsos sejunxerunt, prædicta jurisdictio nullo modo

conservatur, excepto solo mortis articulo : sic intelligunt omnes catholici.

Schisma, a σχίσμα, *déchirer, diviser*, est scissura seu divisio.

Duplex distinguitur schisma : aliud per externam a communione Ecclesiæ separationem, quando fidelis a Romano pontifice, vel a proprio episcopo, vel ab aliis Ecclesiæ membris se ita segregat, ut cum ipsis in rebus divinis communicare nolit; aliud vero fit per inobedientiam erga superiorem ecclesiasticum, ex contemptu auctoritatis ejus, v. g. si quis tali die jejunare recuset, negans pastores Ecclesiæ hujusmodi jejunia præcipere posse.

Schismatici sicut hæretici possunt esse occulti vel publici, tolerati vel non tolerati, ut evidens est. Quæcumque autem de hæreticis diximus, similiter et propter easdem rationes de schismaticis dicenda sunt. Hinc episcopi et sacerdotes apud Græcos schismaticos nullam habent jurisdictionem.

ARTICULUS TERTIUS.

DE EXCOMMUNICATIS.

In tractatu de Censuris multa notantur circa excommunicationem, quæ hic referri non debent.

Excommunicatio major, de qua sola hic agitur, est censura qua homo externa fidelium communione seu usu omnium bonorum Ecclesiæ spiritualium cunctis fidelibus communium privatur.

Inter excommunicatos, alii sunt occulti et alii publici, alii denunciati et alii tolerati.

Certum est 1º excommunicatos occultos ad corpus Ecclesiæ adhuc pertinere; externa quippe conservant unitatis vincula.

Certum est 2º excommunicatos publice denunciatos de corpore Ecclesiæ jam non esse, nec ullam jurisdictionem ecclesiasticam retinere : id omnes fatentur propter ratio-

nes quas attulimus in articulo præcedenti, de hæreticis non toleratis tractando.

3^o *Generaliter admittunt theologi* excommunicatos publicos, licet non denunciatos, membra Ecclesiæ reipsa non esse; nam, ex verbis Christi, Matth. xviii, 17, qui non audit Ecclesiam, habendus est sicut *ethnicus et publicanus*: porro qui propter contumaciam suam publice excommunicatus est, certe non audit Ecclesiam: ergo.

Insuper, excommunicatio in eo præcise consistit, quod vincula unionis solvantur, et homo fidelis e sinu Ecclesiæ per auctoritatem legitimam ejiciatur: ergo, ubi hæc censura est notoria, externa unionis vincula non conservantur, proindeque homo sic excommunicatus ad corpus Ecclesiæ non pertinet; jurisdictionem tamen adhuc conservat, donec publice sit denunciatus, sicut hæreticus toleratus. Ita omnes, post bullam *Ad evitanda scandala*.

ARTICULUS QUARTUS.

DE PRÆDESTINATIS ET REPROBIS.

Solos ad vitam æternam prædestinatos de Ecclesia esse docuerunt Wiclefus et Joannes Huss (concil. Constantiense, sess. 15). Idem asseruisse videtur Calvinus, dicendo veram Christi Ecclesiam ex solis sanctis constare; nam, juxta ipsum, sanctitas semel obtenta amitti non potest: omnes igitur sancti sunt prædestinati, et ex solis prædestinatis coalescit Ecclesia.

PROPOSITIO.

Nec omnes nec soli prædestinati ad Ecclesiam pertinent.

Prob. 1^o. Non omnes prædestinati. Nam infideles, hæretici publici, schismatici et excommunicati ad Ecclesiam non pertinent: atqui tamen negare non licet aliquos ex eis esse prædestinatos; alioquin pronuntiandum foret omnes futuros esse reprobos; ac proinde turpiter erravissent sanctissimi viri qui conversionem hujusmodi hominum procurare tot modis et tantis laboribus tenta-

verunt et etiam tentant. Præterea, de Ecclesia non erat B. Paulus, dum fideles persequeretur, nec S. Aug. ante baptismum suum, nec innumeri alii viri qui idolis servierunt, partes hæreticorum tenuerunt, etc. et quos veneramus ut sanctos: erant tamen prædestinati. Ergo.

2° Non soli prædestinati sunt de Ecclesia. Nam 1° in hujus tractatus initio, probavimus veram Christi Ecclesiam essentialiter esse visibilem: atqui societas ex solis prædestinatis coalescens, non esset visibilis, quia prædestinati soli Deo sunt noti. 2° Judas a Christo vocatus et edoctus, cum cæteris Apostolis vivens, erat de Ecclesia, et tamen fuit reprobus.

3° Ex probatis, quicumque sunt baptizati et externæ communionis vincula retinent, ad corpus Ecclesiæ pertinent: porro certum est inter eos multos futuros esse reprobos: ergo.

Solvuntur objectiones.

Obj. 1°. I Petr. III, 20, arca Noe fuit Ecclesiæ Christi figura: atqui eos solos continebat qui erant salvandi: ergo.

R. Dist. maj. Arca Noe fuit Ecclesiæ figura quoad aliqua, *conc.* quoad omnia, *nego maj.* Itaque in duobus potissimum dici potest arcam Noe Ecclesiam Christi præfigurasse. 1° Quia in ea concludebantur animalia cujuscunque generis, munda et immunda, ita et in Ecclesia includuntur homines diversarum gentium et morum, justi et peccatores, prædestinati et reprobi. 2° Sicut nullus extra arcam ab aquis diluvii salvari potuit, ita extra Ecclesiam nullus salvari potest: in eo præcipue consistit comparatio Apostoli inter arcam et Ecclesiam; comparisones autem nunquam urgeri debent ultra similitudinis punctum. Ergo.

Obj. 2°. Christus caput est Ecclesiæ et illius salvator, Eph. v, 23; eam sibi exhibet *gloriosam, non habentem maculam, aut rugam, aut aliquid hujusmodi*, etc. ibid. v. 27: atqui hæc omnia dici non possent de Ecclesia, si cum prædestinatis reprobos contineret: ergo.

R. Nego min. 1° Christus revera est caput Ecclesiæ et ipsius salvator, eo sensu quod ab ipso tota fluat auctoritas in Ecclesia existens, et per ipsum tantum salus obtineri possit.

2° Ex Ecclesia visibili prædestinatos et reprobos, justos et injustos nunc continenti, efformabit Christus Ecclesiam triumphantem quam sibi exhibebit gloriosam..... sanctam et immaculatam; cum ea ineffabili fœdere copulabitur, et nuptiæ ejus in æternum celebrabuntur: merito igitur *corporis sui* mystici, id est, Ecclesiæ salvator esse dicitur, quamvis in ea nunc existant reprobi.

ARTICULUS QUINTUS.

DE PECCATORIBUS ET JUSTIS.

Ecclesiam ex solis justis constare plures docuerunt hæretici. Ab ea etiam imperfectos repellebant Pelagiani; solos peccatores insignes rejiciebant Donatistæ, quales dicebant esse catholicos, quos divinas Scripturas tradidisse falso et per calumniam accusabant.

Lutherani et præsertim Calvinistæ duplicem distinguunt Ecclesiam: unam externam, quæ non solum peccatores, sed hæreticos et schismaticos in sinu suo complectitur; et alteram internam, quæ vera Christi est sponsa et ex solis sanctis constat.

Janseniani et Quesnellistæ docent nullam proprie dictam existere virtutem sine charitate, ne quidem fidem: unde, cum certum sit charitatem in peccatoribus non existere, inde concludunt eos pariter veram fidem non habere; et ideo in Ecclesia non esse.

PROPOSITIO.

Peccatores etiam insignes et manifesti vere sunt de corpore Ecclesiæ.

Prob. 1° ex *Scriptura sacra*. Matth. XIII, Ecclesia comparatur agro in quo zizania igne comburenda in medio tritici crescunt, et *sagenæ missæ in mare et ex omni genere*

piscium congreganti, Matt. XIII, 47 : atqui per zizania et malos pisces intelliguntur mali homines cum justis in Ecclesia commixti. His parabolis sæpe usi sunt SS. Patres contra Novatianos et Donatistas, ut legitur apud S. Aug. breviculo Collationis cum Donatistis, col. tertii diei, c. 8. Ergo.

Prob. 2º ex SS. Patribus. S. Hieronymus, Dial. adversus Luciferianos, sic habet ; « Arca Noe Ecclesiæ typus » fuit... ut ibi pardus et hædi, lupo et agni ; ita et hic, » justi et peccatores, id est, vasa aurea et argentea, » etc. S. Aug. lib. de unico Baptismo, cap. 16, n. 30 : « Intra » istam arcam (Ecclesiam) boni et mali esse possunt, » extra eam boni esse non possunt.¹ » Et in tractatu 6 in Joannem, v. 2 : « Boni et mali sunt in Ecclesia Christi. » Ergo.

Prob. rationibus theologicis. 1º Ecclesia est visibilis : atqui societas ex solis justis composita non esset visibilis, siquidem justitia est qualitas interna et soli Deo perfecte nota. 2º Sacramentum pœnitentiæ non extra, sed intra Ecclesiam administratur : atqui Christus non instituit illud sacramentum pro justis, sed pro peccatoribus. 3º Illi sunt de corpore Ecclesiæ qui omnia necessaria unitatis vincula retinent : atqui peccatores etiam insignes et manifesti omnia essentialia unitatis vincula retinent ; nempe eandem profitentur fidem, ut supponitur, iisdem subiiciuntur pastoribus, jus immediatum habent ad pœnitentiæ sacramentum, et eo mediante, ad alia Ecclesiæ sacramenta : ergo.

Solvuntur objectiones.

Obj. 1º. Qui sunt de Ecclesia, Deum habent patrem : atqui peccatores Deum non habent patrem, sed *ex patre diabolo* sunt, Joan. VIII, 44 : ergo.

R. Distinguo min. Deum non habent patrem eos ut tales generantem, seu ratione gratiæ sanctificantis quam non habent, *conc.* ratione creationis, conservationis, doctrinæ, gratiæ sufficientis, sacramentorum aliorumque salutis mediorum ipsis oblatores, *nego min.* Etenim

Isai. 1, 2, peccatores vocat filios Dei : itaque iidem homines ad regnum Christi seu ad Ecclesiam pertinere possunt, quatenus fidem profitentur, pastores agnoscunt, jus habent ad sacramenta, etc. et sub hoc respectu Deum habent et vocare possunt patrem ; verum qui charitate et gratia sanctificante destituuntur, filii sunt ingrati erga Deum et ad diabolum vere pertinent. Ergo.

Obj. 2º. Si peccatores ad Ecclesiam vere pertinerent, essent membra Christi : atqui repugnat Christum hujusmodi habere membra ; tunc enim ipsius corpus esset monstrum, ait *Jurieu* : ergo.

R. Nego min. et ejus probationem. Non enim ibi agitur de corpore Christi naturali, sed de corpore mystico, seu de societate quæ sensu aliquo morali et allegorico corpus ejus dicitur : atqui non repugnat peccatores ad hujusmodi corpus Christi pertinere ; nam, ut societas absque ulla indecentia corpus Christi mysticum dici possit, sufficit quod in se spectata, sit bona, sancta et perfecta : atqui Ecclesia, licet peccatores contineat, est nihilominus societas bona, sancta et perfecta, *ut ostendimus*, de sanctitate ejus specialiter agendo : ergo non repugnat peccatores membra illius esse, sed mortua, quia gratia sanctificante non vivificantur.

Plurimi objiciuntur textus SS. Patrum, præsertim S. Aug. sed cum ille sanctus doctor aliique Patres doctrinam nostram contineant, *ut supra vidimus*, textus nobis objecti alio sensu necessario debent intelligi ; et revera, si attente considerentur, intelliguntur vel de Ecclesia triumphante, vel de virtutibus internis quæ animam Ecclesiæ constituunt, sicque non probant peccatores etiam insignes membra corporis Ecclesiæ non esse.

COMPENDIUM HISTORICUM I,

DE SCHISMATE ANNI 1791.

Ex via discussionis, a novatoribus decimi sexti sæculi admissa, infinitæ numero scaturierunt sectæ et opiniones diversæ, præsertim in Anglia. Præcipuas jam nominavimus sectas quæ in sinu *Lutheranismi* et *Calvinismi*, aliæ post alias, exortæ sunt. Unusquisque suum voluit excogitare systema et particularem suam habere religionem. Tot disputationibus nimis defatigata ratio et cupiditatibus obcæcata, vehementi correpta est odio contra omnes religiones positivas; eas sibi repræsentavit ut æqualiter falsas; contra eas ardentem surrexit, omnem suggillavit revelationem. Hinc perniciosa nata est deistarum etiam atheorum doctrina quæ ab Anglia et Batavia in Galliam cœpit introduci paulo post initium decimi octavi sæculi. Eam præcipue defendit et omni genere librorum apud nos propagavit Franciscus Maria *Arouet*, dictus postea *Voltaire*, anno 1694 natus, et anno 1778 mortuus: fere uno integro vixit sæculo, et totus semper fuit ut omnem religionem revelatam subverteret.

Famosissimus vir ille multos alios sibi adjunxit viros, qui perpetuo et infatigabili zelo nihil non tentaverunt ut principia incredulitatis omnibus insinuarent ac persuaderent; innumera ediderunt volumina in omni genere et forma. Nomine *philosophorum* decorati, universi artibus et scientiis abusi sunt, ut cunctas ideas huc usque receptas obtenebrarent et omnium corda depravarent. Auctoritatem ecclesiasticam et civilem in multis reprehendentes et continuis dicteriis lacescentes, in quemdam contemptum adduxerunt. Veteres quæque institutiones deprimebantur, et tota philosophorum schola semper et undique reformationem, seu potius radicalem regenerationem, ut aiebat, describebat, commendabat, exoptabat et petebat. Multi, præsertim in ordine plebeio, his imbuti erant principiis, et numerus eorum magis ac magis quotidie crescebat; mentes circumquaque ardenti innovationis desiderio laborabant.

Ex altera parte, numerosior Jansenianorum et Quesnellistarum secta, quæ tanta pertinacia, versutia et subtilitate utrique potestati a tot annis resistebat, gravissimum intulerat ei nocumentum.

Anno 1788, Ludovicus XVI, consilio ministri sui *Necker* cedens, generalia totius regni comitia pro anno sequenti convocavit; multi ex iis qui in variis provinciis fuerunt electi, novis opinionibus vel Janse-

nianorum erroribus erant infecti. Prima comitiorum sessio, cui rex ipse præfuit, locum habuit die 5 maii 1789. Legati plebis (*les députés du tiers-état*) statim petierunt ut, contra morem consuetum, tres ordines unum tantum efficerent conventum, qui per capita et ad maioritatem numericam opinaretur. Hanc concessionem, non tamen sine difficultate, obtinuerunt; ea semel obtenta, novitatis et reformationis amatores in majori semper fuerunt numero, et sic postea fecerunt quidquid voluerunt.

Die 2 novembris ejusdem anni, dictus conventus hanc decrevit propositionem : *Les biens du clergé seront mis à la disposition de la nation*. 13 februarii 1790, omnes monasticos ordines utriusque sexus suppressit, et vota religiosa abolevit. Die 12 julii ejusdem anni 1790 decrevit Constitutionem civilem cleri. In illa constitutione hæc inter alia erant statuta.

TITRE 1^{er}.

• *Art. 1.* Chaque département formera un seul diocèse, et chaque diocèse aura la même étendue et les mêmes limites que le département.

• *Art. 2.* Les sièges des évêques des quatre-vingt-trois départemens du royaume seront fixés, savoir, etc.

• Tous les évêchés existans dans les quatre-vingt-trois départemens du royaume, et qui ne sont pas nommément compris au présent article, sont et demeurent supprimés.

• Le royaume sera divisé en dix arrondissemens métropolitains dont les sièges seront, etc.

• *Art. 4.* Il est défendu à toute église ou paroisse de France, et à tout citoyen français, de reconnaître en aucun cas, sous quelque prétexte que ce soit, l'autorité d'un évêque ordinaire ou métropolitain dont le siège serait établi sous la domination d'une puissance étrangère, ni celle de ses délégués, résidans en France ou ailleurs....

• *Art. 7.* L'église cathédrale de chaque diocèse sera ramenée à son état primitif d'être en même temps église paroissiale et église épiscopale, par la suppression des paroisses, et le démembrement des habitations qu'il sera convenable d'y réunir.

• *Art. 8.* La paroisse épiscopale n'aura pas d'autre pasteur immédiat que l'évêque; tous les prêtres qui y seront établis seront les vicaires et en feront les fonctions.

• *Art. 9.* Il y aura seize vicaires de l'église cathédrale dans les villes qui comprendront plus de 10,000 âmes, et douze seulement dans celle où la population sera au-dessous de 10,000 âmes.

• *Art. 10.* Il sera conservé ou établi dans chaque diocèse un seul séminaire pour la préparation aux ordres.

» *Art. 12.* Pour la conduite et l'instruction des jeunes élèves dans le séminaire, il y aura un vicaire supérieur, et trois vicaires directeurs, subordonnés à l'évêque....

» *Art. 14.* Les vicaires des églises cathédrales, les vicaires supérieur et directeurs du séminaire formeront ensemble le conseil habituel et permanent de l'évêque, qui ne pourra faire aucun acte de juridiction, en ce qui concerne le gouvernement du diocèse et du séminaire, qu'après en avoir délibéré avec eux. Pourra néanmoins l'évêque, dans le cours de ses visites, rendre seul telles ordonnances provisoires qu'il appartiendra.

» *Art. 15.* Dans toutes les villes et bourgs qui ne comprennent pas plus de 6,000 âmes, il n'y aura qu'une seule paroisse; les autres paroisses seront supprimées....

» *Art. 20.* Tous titres et offices, autres que ceux mentionnés en la présente constitution, les dignités, canonicats, prébendes, demi-prébendes, chapelles, chapellenies, tant des églises cathédrales que des églises collégiales, et tous chapitres réguliers et séculiers, de l'un et de l'autre sexe, les abbayes et prieurés en règles ou en commande, aussi de l'un et l'autre sexe, et tous autres bénéfices et prestimones généralement quelconques, de quelque nature et sous quelque dénomination que ce soit, sont, à compter du jour de la publication du présent décret, éteints et supprimés, sans qu'il puisse jamais en être établi de semblables.

TITRE II.

» *Art. 1.* A compter du jour de la publication du présent décret, on ne connaîtra qu'une seule manière de pourvoir aux évêchés et aux cures; c'est à savoir, la forme des élections.

» *Art. 2.* Toutes les élections se feront par la voie du scrutin, et à la pluralité absolue des voix.

» *Art. 3.* L'élection des évêques se fera dans la forme prescrite et par le corps électoral, indiqué dans le décret du 22 décembre 1789 pour la nomination des membres de l'assemblée du département....

» *Art. 7.* Pour être éligible à un évêché, il sera nécessaire d'avoir rempli au moins pendant quinze ans les fonctions du ministère ecclésiastique dans le diocèse en qualité de curé, de desservant ou de vicaire, de vicaire supérieur ou vicaire directeur du séminaire...

» *Art. 14.* La proclamation de l'élu se fera par le président de l'assemblée électoral, dans l'église où l'élection aura été faite....

» *Art. 16.* Au plus tard dans le mois qui suivra son élection, celui qui aura été élu à un évêché se présentera en personne à son évêque métropolitain, et s'il est élu pour le siège de la métropole, au plus ancien évêque de l'arrondissement, avec le procès-verbal d'élection et de proclamation, et le suppliera de lui accorder la confirmation canonique....

- *Art. 18.* L'évêque à qui la confirmation est demandée ne pourra
- exiger de l'élu d'autre serment, sinon qu'il fait profession de la re-
- ligion catholique, apostolique et romaine.
- *Art. 19.* Le nouvel évêque ne pourra s'adresser au pape pour en
- obtenir aucune confirmation, mais il lui écrira comme au chef visi-
- ble de l'Eglise universelle, en témoignage de l'unité de foi, et de la
- communion qu'il entretient avec lui.
- *Art. 20.* La consécration de l'évêque ne pourra se faire que dans
- son église cathédrale....
- *Art. 21.* Avant que la cérémonie de la consécration commence,
- l'élu prêtera, en présence des officiers municipaux, du peuple et du
- clergé, le serment de veiller avec soin sur les fidèles du diocèse qui
- lui est confié, d'être fidèle à la nation, à la loi et au roi, et de main-
- tenir de tout son pouvoir la Constitution décrétée par l'assemblée
- Nationale et acceptée par le roi.
- *Art. 22.* L'évêque aura la liberté de choisir les vicaires de son
- église cathédrale dans tout le clergé de son diocèse à la charge par
- lui de ne pouvoir nommer que des prêtres qui auront exercé des
- fonctions ecclésiastiques au moins pendant dix ans; il ne pourra les
- destituer que de l'avis de son conseil, et par une délibération qui
- aura été prise à la pluralité des voix, en connaissance de cause.
- *Art. 23.* Les curés actuellement établis en aucunes églises cathé-
- drales, ainsi que ceux des paroisses qui seront supprimées pour être
- réunies à la cathédrale et en former le territoire, seront de plein
- droit, s'ils le demandent, les premiers vicaires de l'évêque, chacun
- suivant l'ordre de leur ancienneté dans les fonctions pastorales.
- *Art. 24.* Les vicaire supérieur et vicaires directeurs du séminaire
- seront nommés par l'évêque et son conseil, et ne pourront être desti-
- tués que de la même manière que les vicaires de l'église cathédrale.
- *Art. 25.* L'élection des curés se fera dans la forme prescrite, et
- par les électeurs indiqués dans le décret du 22 décembre 1789,
- pour la nomination des membres de l'assemblée administrative du
- district....
- *Art. 32.* Pour être éligible à une cure, il sera nécessaire d'avoir
- rempli les fonctions de vicaire dans une paroisse, ou dans un hôpital
- et autre maison de charité du diocèse, au moins pendant cinq ans....
- *Art. 35.* Celui qui aura été proclamé élu à une cure, se présen-
- tera en personne à l'évêque avec le procès-verbal de son élection et
- proclamation, à l'effet d'obtenir de lui l'institution canonique.
- *Art. 36.* L'évêque aura la faculté d'examiner l'élu, en présence de
- son conseil, sur sa doctrine et ses mœurs : s'il le juge capable, il lui
- donnera l'institution canonique; s'il croit devoir la lui refuser, les
- causes du refus seront données par écrit, signées de l'évêque et de
- son conseil, sauf aux parties le recours à la puissance civile.
- *Art. 38.* Les curés élus et institués prêteront le même serment

• que les évêques, dans leur église, un jour de dimanche, avant la messe paroissiale, en présence des officiers municipaux du lieu, du peuple et du clergé : jusque là ils ne pourront faire aucunes fonctions curiales....

• *Art. 40.* Les évêchés et les cures seront réputés vacans, jusqu'à ce que les élus aient prêté le serment ci-dessus mentionné.

• *Art. 41.* Pendant la vacance du siège épiscopal, le premier vicaire, et, à son défaut, le second vicaire de l'église cathédrale, remplacera l'évêque tant pour les fonctions curiales que pour les actes de juridiction qui n'exigent pas le caractère épiscopal ; mais en tout il sera tenu de se conduire par les avis du conseil.

• *Art. 42.* Pendant la vacance d'une cure, l'administration de la paroisse sera confiée au premier vicaire, sauf à y établir un vicaire de plus, si la municipalité le requiert....

• *Art. 43.* Chaque curé aura le droit de choisir ses vicaires ; mais il ne pourra fixer son choix que sur des prêtres ordonnés ou admis dans le diocèse par l'évêque.

• *Art. 44.* Aucun curé ne pourra révoquer ses vicaires que pour des causes légitimes, jugées telles par l'évêque et son conseil. »

(*Tiré du procès-verbal de l'Assemblée Nationale de 1790, t. 24.*)

Cum ipse textus prædictæ Constitutionis difficile nunc inveniatur, præcipuos ejus articulos de verbo ad verbum referendos duxi, ut unusquisque eos legere queat : sola inspectione clare percipitur illam multis et gravissimis scaturire vitiis.

1° Conventus Nationalis, propria auctoritate, absque recursum ad potestatem ecclesiasticam, omnes veteres diœceses, saltem aliquo modo, mutat aut reformat ; multas destruit, novas erigit ; has minuit, illas auget, etc.

2° Prohibet ne ulla ecclesia vel civis Gallicanus auctoritatem cujusvis episcopi extranei agnoscat, etc.

3° Novum instituit modum administrandi et regendi ecclesias cathedrales, etiam in spiritualibus. Item pro seminariis.

4° Divinam episcoporum auctoritatem evertit, intra certos limites eam coercendo, et quoddam eis imponendo *consilium*, sine cujus sententia fere nihil facere possunt.

5° Omnes titulos ecclesiasticos et dignitates, cuncta beneficia et officia in perpetuum tollit.

6° Consuetum modum nominandi et instituendi episcopos abrogans, novam excogitat formam eos eligendi, juxta quam protestantes, Judæi, et quicumque impii homines ad designandum primum pastorem catholicum immediate concurrunt, imo illum nominare possunt ; nam fieri potest ut in majori sint numero.

7° Vetat ne deinceps institutio canonica a summo Pontifice accipiat, et statuit ut a solo metropolitano petatur et obtineatur, vel a suffraganeo qui ratione ordinationis est primus.

8° Contra jus canonicum et concilii Tridentini præceptum, sess. 24, de Refor. cap. 16, decernit quod, sede vacante, tota jurisdictio spiritalis penes primum aut secundum vicarium deinceps manere debeat.

9° Novum pariter instituit modum, prorsus inauditum, eligendi parochos eosque constituendi, fere independentem ab episcopo, etc. etc.

Porro manifestum est, ex principiis in tractatu nostro positis et demonstratis, hos articulos totam Ecclesiæ Christi disciplinam ejusque constitutionem turbare, et plurimis in punctis evertere; laici enim, magistratus et ipsi reges nullam habent potestatem circa res spirituales: atqui tamen conventus Nationalis erat cœtus laicorum. Aliunde, etiamsi fuisset cœtus clericorum, vel etiam episcoporum, generalem Ecclesiæ disciplinam nec licite nec valide mutare potuisset, saltem absque consensu summi Pontificis. Insuper episcopi jure divino perfectam et completam habent jurisdictionem in tota diœcesi sua: nullo modo igitur sub absoluta consilii dependentia constitui, nec jure ordinario nominandi ad parochias a quocumque privari possunt.

Hinc 1° prædictum conventus Nationalis decretum immerito dictum est *Constitutio civilis cleri*, quasi statum ejus temporalem vel civilem duntaxat spectaret.

Hinc 2° quicumque vi illius Constitutionis instituti sunt episcopi, parochi, vicarii aut confessores, legitimam missionem non obtinuerunt, nullam habuerunt jurisdictionem, sicque manifeste erant intrusi.

Hinc 3° eo ipso quod erant intrusi et omni jurisdictione destituti, varios titulos usurpantes vel ab usurpatoribus accipientes constituebantur schismatici, quidquid dicerent; nam de facto a legitima auctoritate se separabant, unitatem solvebant, et altare contra altare erigebant.

Hinc 4° parochi titulares qui cum novis episcopis communicabant in divinis, et eos agnoscebant ut legitimos, statim fiebant schismatici; non tamen jurisdictione spoliabantur, nec illa unquam fuerunt destituti, quia non fuerunt publice denunciati.

Hinc 5° non solum schismatica, sed et hæretica est supra dicta Constitutio civilis Cleri; nam, ut ait Pius VI, in brevi ad card. *de la Rochefoucault*, etc. diei 10 martii 1791: « Inter decreta ipsa, non solum disciplinaria, sed et alia non pauca in eversionem puri immutabilisque dogmatis congeruntur. »

Præterea de fide est 1° jus administrandi res spirituales potestati civili non competere; 2° summum Pontificem habere primatum jurisdictionis in totam Ecclesiam; 3° episcopos legitima missione seu confirmatione canonica indigere; 4° eos, valide institutos, esse presbyteris superiores, et habere jurisdictionem ab illis independentem, etc. etc. atqui Constitutio civilis hæc omnia subvertit: ergo.

Hinc 6° centies potius moriendum erat quam semel præstare juramentum art. 21 et 38 secundi tituli præscriptum; quia, cum esset de

re graviter illicita, illius præstatiore peccato mortali excusari non poterat.

Ludovicus XVI hanc cleri Constitutionem valde improbat; et tamen vi circumstantiarum coactus est eam regali sanctione sua munire, eamque promulgavit die 24 augusti 1790.

Cardinalis *de la Rochefoucault*, Rothomagensis archiepiscopus, et 29 alii archiepiscopi aut episcopi, conventus Nationalis membra, claram et solidam instructionem circa Constitutionem civilem cleri ediderunt, sub hoc titulo : *Exposition des principes sur la Constitution du clergé, par les évêques députés à l'assemblée Nationale*, die 30 octobris 1790. Alii episcopi Gallicani vel extensionem suæ diœcesis in Gallia habentes, numero 110 dictæ Expositioni positive adhæserunt : hæc igitur facta est judicium totius ecclesiæ Gallicanæ.

Die 27 novembris ejusdem anni, conventus Nationalis, opus suum semper prosequens, decrevit omnes episcopos et parochos qui intra octo dies juramentum Constitutione præscriptum non emisissent, statim habendos fore tanquam titulo per voluntariam dimissionem privatos.

Omnes viri ecclesiastici qui in conventu sedebant, juramentum solemniter præstare debebant 4 januarii 1791. Henricus *Grégoire*, parochus *d'Embermesnil*, primus juravit et cum illo 70 circiter alii parochi vel clerici secundi ordinis. Cæteri jurare noluerunt.

In provinciis multo major et sanior pars cleri statutum juramentum præstare fortiter recusavit. Ex 135 episcopis Gallicanis titularibus, quatuor tantum juramento se obstrinxerunt, scilicet cardinalis *de Brienne*, archiepiscopus Senonensis; *de Savines*, episcopus Vivariensis; *de Jarante*, episcopus Aurelianensis, et *Talleyrand de Périgord*, episcopus Augustodunensis.

Tunc ubique electi sunt episcopi secundum novam formam Constitutione statutam; primos consecravit episcopus Augustodunensis, die 25 januarii, nempe *Expilly*, pro præfectura Finisterræ, et *Marolles* pro præfectura dicta *l'Aisne*; episcopi enim, juxta novam Constitutionem, non per nomen civitatis designabantur, sed per nomen præfecturæ, sicque per mare, montes et flumina. Statim atque novi constituti sunt episcopi, omnes parochi alique sacerdotes qui juramentum præstare noluerant, e parochiis suis respectivis fuerunt expulsi, et sic, per totum Christianissimum regnum, luctuosum consummatum est schisma.

Pius VI, ad quem episcopi *Expositionem* suam *principiorum* miserant, duas edidit longas epistolas in forma brevium, unam diei 10 martii, ad 30 episcopos conventus Nationalis, et alteram diei 13 aprilis 1791 ad omnem Galliæ clerum et populum. In his epistolis plurima Constitutionis principia discutebat Pontifex; ipsamque Constitutionem pessimam esse, schismaticam et multum erroneam clare ostendebat.

Has epistolas pro non existentibus habuerunt schismatici, sub prætextu quod juxta formam in regno consuetam receptæ et publicatæ non fuissent, quasi condemnationes adversus hæreticos et schismaticos validæ non essent, nisi ab ipsis secundum ordinarias formas acceptarentur.

Die 3 maii episcopi conventus Nationalis summo Pontifici responderunt, eum enixe rogantes ut de ipsis minime sollicitus esset, sed tantum de Ecclesia, et ideo sedium suarum dimissiones illi offerebant. Pluries adhuc scripsit Pius VI circa Constitutionem cleri, tum ad catholicos, tum ad schismaticos. Brevia ejus et decisiones utilissime leguntur, 3 vol. in-12, cum versione Gallica.

Conventus Nationalis sessiones suas terminavit die 30 septembris, et alter, qui dictus est Legislativus, statim ei successit. Posterior iste conventus decrevit die 29 novembris, quod omnes sacerdotes erga Constitutionem civilem rebelles et juramentum non præstantes quacumque pensione a gubernio solvenda spoliarentur. Die 6 aprilis 1792, omnem prohibuit habitum clericalem. Tunc furiosa cœpit exerceri persecutio contra episcopos et sacerdotes, religiosos et etiam passim moniales aut simplices fideles. Innumeri presbyteri fuerunt deportati, vel ipsi ad persecutionem vitandam in exilium fugerunt; *alii vero ludibria et verbera experti, insuper et vincula, et carceres, lapidati sunt, secti sunt, tentati sunt, in occisione gladii mortui sunt.* Hebr. xi, 36.

COMPENDIUM HISTORICUM II.

DE CONCORDATO ANNI 1801 ET DE SECTA QUÆ DICITUR *LA PETITE EGLISE.*

§ I. — *De Concordato.*

Novus clerus juxta Constitutionem civilem institutus, et propterea clerus *constitutionalis* vocatus, non multum causam suam honoravit. Episcopi præfecturarum, candidatis convenientibus et bene dispositis omnino indigentes, manus imposuerunt iis omnibus quos invenire potuerunt, viris ignobilibus, quorum minor defectus erat ignorantia. Novis opinionibus contra cœlibatum presbyterorum, cæremonias ecclesiasticas, mysteria divina et cultum ipsum subscribentes, multi in anno 1793 sacrilega inierant matrimonia, functiones sacras deseruerunt, contra fidem et mores prædicaverunt, publice omnem religionem abjecerunt, et variis criminibus turpiter se inquinaverunt. Eodem anno, omnis cultus religiosus fuit proscriptus. Ingens et universalis exstitit terror usque ad mortem *Robespierre*, qui die 27 julii 1794 abscissione capitis merito plexus est. Ex hac die minus crudelis fuit persecutio;

et 21 february 1795, Conventus (*la Convention*) libertatem omnium cultuum decrevit, ea lege quod gubernium nullam retributionem pecuniariam ministris religionis solveret, nec ullum eis assignaret ædificium publicum; die 3 maii, statuit quod templa non adhuc alienata cultui divino restituerentur, et omnes sacerdotes perfecta libertate cultum suum exercendi fruerentur, modo expresse declararent se futuros esse legibus Reipublicæ submissos. Multæ tunc apertæ sunt ecclesiæ, et cultus catholicus solemniter passim in eis celebrari cœpit. At illa libertas non diu exstitit; in mensibus septembri et octobri, novæ excogitatæ sunt vexationes contra sacerdotes, novum petatum est juramentum ut exsecutio legum an. 1792 et 1793 conditarum.

In mense novembri, Directorium Conventui successit; die 9 martii anni 1796, sub pœna deportationis præscripsit ut omnes qui publicam exercebant functionem, odium regimini monarchico voverent; dicentes: *Je jure haine à la royauté et à l'anarchie, attachement et fidélité à la République et à la Constitution de l'an 3.* Inter brevia Pii VI duæ exstant epistolæ contra juramentum istud, nomine dicti Pontificis scriptæ, una archiepiscopi Tyriensis, et altera episcopi Isaurensis (t. 3, p. 355).

Persecutio tamen minus ardens erat, et in diem deferrebat; sed de novo cum furore exarsit post 18 fructidor, 4 septembris 1796; qua die Directorium vastam detexit et compressit conspiracy contra ipsum tentatam ad restituendum regimen monarchicum et regium. Multi sacerdotes exportati sunt, cum aliis non paucis, in aridas et mortiferas Americæ regiones; alii in veteribus navibus (*les pontons*) catervatim fuerunt reclusi, ubi ærumnis et incomprehensibilibus miseriis confecti, per centenos et centenos moriebantur.

Napoleo *Buonaparte*, ex Ægypto inopinate adveniens, Directorium evertit die 10 novembris 1799, gubernium tunc existens mutavit, aliud substituit, creatus vel declaratus est primus consul, et sic in eo tota vis publica exstitit. Extemplo omnis persecutio cessavit; presbyteri in carceribus detenti exierunt; qui latebant prodierunt; qui exsules erant redire potuerunt; solum sacramentum submissionis legibus ab illis exigebatur, et functiones suas publice exercere poterant.

Buonaparte, perspicuens quod, ad publicam tranquillitatem sibi necessariam et ab omnibus exoptatam, valde utilis foret pax et concordia Ecclesiæ, statim media quæsiit pactum religiosum ineundi cum Pio VII, qui, die 14 martii 1800, quasi per miraculum Venetiis electus, Romam solemniter intraverat die 3 julii. Sanctus Pontifex, de tantis tamque diuturnis ecclesiæ Gallicanæ malis vehementer dolens, primam spei lucem ex totis præcordiis suscepit. Omnia Ecclesiæ jura, quantum ipsi licuit, defendere et servare conatus est. Negotiatione diu protracta, conventio tandem inita est Parisiis 15 julii 1801. Sic se habet, post præambulum:

« I. Religio catholica, Apostolica, Romana libere in Gallia exerce-

bitur. Cultus publicus erit, habita tamen ratione ordinationum quoad politiam, quas gubernium pro publica tranquillitate necessarias existimabit.

» II. Ab Apostolica sede, collatis cum Gallico gubernio consiliis, novis finibus Galliarum diœceses circumscribentur.

» III. Summus Pontifex titularibus ecclesiarum Gallicarum episcopis significabit se ab eis, pro bono pacis et unitatis, omnia sacrificia firma fiducia exspectare, eo non excepto quo ipsas suas episcopales sedes resignent.

» Hac hortatione præmissa, si huic sacrificio quod Ecclesiæ bonum exigit, renuere ipsi vellent (fieri autem id posse summus Pontifex suo non reputat animo), gubernationibus Gallicarum ecclesiarum novæ circumscriptionis, de novis titularibus providebitur, eo qui sequitur modo.

» IV. Consul primus Gallicanæ Reipublicæ, intra tres menses qui promulgationem constitutionis Apostolicæ consequentur, archiepiscopos et episcopos novæ circumscriptionis diœcesibus præficiendis nominabit : summus Pontifex institutionem canonicam dabit juxta formas, relate ad Galliam, ante regiminis commutationem statutas.

» V. Item consul primus ad episcopales sedes quæ in posterum vacaverint, novos antistites nominabit ; iisque, ut in articulo præcedenti consitutum est, Apostolica sedes canonicam dabit institutionem.

» VI. Episcopi, antequam munus suum gerendum suscipiant, coram primo consule juramentum fidelitatis emittent quod erat in more ante regiminis commutationem, sequentibus verbis expressum : *Ego juro et promitto, ad sancta Dei Evangelia, obedientiam et fidelitatem gubernio per constitutionem Gallicanæ Reipublicæ statuto. Item promitto me nullam communicationem habiturum, nulli concilio interfuturum, nullamque suspectam unionem neque intra neque extra conservaturum, quæ tranquillitati publicæ noceat : et si, tam in diœcesi mea quam alibi, noverim aliquid in Status damnum tractari, gubernio manifestabo.*

» VII. Ecclesiastici secundi ordinis idem juramentum emittent coram auctoritatibus civilibus a Gallicano gubernio designatis.

» VIII. Post divina officia, in omnibus catholicis Galliæ templis, sic orabitur : *Domine, salvam fac Rempublicam ; Domine, salvos fac consules.*

» IX. Episcopi, in sua quisque diœcesi, novas parœcias circumscribent ; quæ circumscriptio suum non sortiatur effectum, nisi postquam gubernii consensus accesserit.

» X. Iidem episcopi ad parœcias nominabunt, nec personas eligent nisi gubernio acceptas.

» XI. Poterunt iidem episcopi habere unum capitulum in cathedrali ecclesia, atque unum seminarium in sua quisque diœcesi, sine dotationis obligatione ex parte gubernii.

» XII. Omnia templa metropolitana, cathedralia, parochialia, atque

alia quæ non alienata sunt, cultui necessaria, episcoporum dispositioni tradentur.

» XIII. Sanctitas sua, pro pacis bono felicique religionis restitutione, declarat eos qui bona Ecclesiæ alienata acquisiverunt, molestiam nullam habituros, neque a se, neque a Romanis pontificibus successoribus suis; ac consequenter proprietas eorundem bonorum, redditus et jura eis inhærentia, immutabilia penes ipsos erunt atque ab ipsis causam habentes.

» XIV. Gubernium Gallicanæ Reipublicæ in se recipit tum episcoporum, tum parochorum, quorum diœceses atque parœcias nova circumscriptio complectetur, sustentationem quæ cujusque statum deceat.

» XV. Idem gubernium curabit ut catholicis in Gallia liberum sit, si libuerit, ecclesiis consulere novis foundationibus.

» XVI. Sanctitas sua recognoscit, in primo consule Gallicanæ Reipublicæ, eadem jura ac privilegia quibus apud sanctam Sedem fruebatur antiquum regimen.

» XVII. Utrunque conventum est quod, in casu quo aliquis ex successoribus hodierni primi consulis catholicam religionem non profiteretur, super juribus et privilegiis in superiori articulo commemoratis, necnon super nominatione ad archiepiscopatus et episcopatus, respectu ipsius, nova conventio fieret.

» Ratificationum autem traditio Parisiis fiet quadraginta dierum spatio.

» Datum Parisiis, die 15 mensis julii 1801. »

Sequuntur subscriptiones trium legatorum papæ, *Conclavi* cardinalis, J. *Spina* archiepiscopi Corinthini, et P. *Caselli* theologi Sanctitatis suæ consultoris; et ex altera parte, pro gubernio Gallicano, Josephi *Bonaparte*, *Cretet*, et *Bernier*, doctoris Andegavensis.

Celebrem hanc conventionem Pius VII confirmavit die 15 augusti 1801, per bullam *Ecclesia Christi*. Eadem die ad omnes episcopos Gallicanos adhuc exstantes et per varias terras dispersos scripsit, ab eis postulans sedium suarum, pro bono pacis, cessionem, et quidem intra decem dies, declarans quod si expresse et statim petitioni suæ acquiescere nollent, cogeretur eos habere tanquam renuentes, et nihilominus ulterius progredi oporteret.

Ex tota Gallia, 81 tantum restabant episcopi titulares et catholici: tres jurati, Augustodunensis, Vivariensis et Aurelianensis jam diu episcopatum abjecerant, et 51 erant mortui; 45 dimissionem suam ad summum Pontificem miserunt; 36 alii eam, cum reverentia tamen, recusarunt, allegantes, inter alias rationes, se non fuisse consultos, talem conventionem esse contra omnes leges ecclesiasticas, summum Pontificem non fuisse liberum, etc.

Attamen Pius VII dedit bullam *Qui Christi Domini*, diei 19 novembris, qua cunctas Galliæ sedes supprimebat, et sexaginta novas erigebat, 10 metropoles et 50 episcopales, non solum pro Gallia, sed pro aliis provinciis Belgicæ et Sabaudicæ Galliæ adjunctis.

Concordatum interea semper manebat occultum in Gallia, quamvis legatus a latere *Caprara* die 4 octobris Parisios advenisset : unde omnes vere catholici, dispositiones conventionis omnino ignorantes, non parum erant anxii. Demum die 5 aprilis 1802, minister cultuum, *Portalis*, idem Concordatum detulit ad Corpus Legislativum, a quo fuit acceptatum : simul præsentavit, ex parte gubernii, et absque ulla participatione S. Pontificis, *articulos organicos* circa cultum catholicum, qui pariter fuerunt acceptati et vim legis habuerunt. Catholicis, clericis et laicis, et potissimum curiæ Romanæ valde displicuerunt illi articuli ; videbantur enim redacti in contemptum potestatis ecclesiasticæ, quam, sub prætextu politiæ externæ, nimis coercebant, exquisitis obstaculis irretiebant, variisque modis irreligiose vexabant. Quidam, ex Constitutione deprompti, formaliter erant contra disciplinam et doctrinam ecclesiasticam, et schismatis notam merebantur, v. g. sequentes :

« *Art. 36.* Pendant la vacance des sièges, il sera pourvu par le métropolitain, et, à son défaut, par le plus ancien des évêques suffragans, au gouvernement des diocèses.

« Les vicaires généraux de ces diocèses continueront leurs fonctions, même après la mort de l'évêque, jusqu'à remplacement. » Hic articulus est contra dispositionem concilii Tridentini, sess. 24, c. 16, in Gallia sicut alibi receptam.

« *Art. 52.* Ils ne se permettront (les curés) dans leurs instructions aucune inculpation directe ou indirecte, soit contre les personnes, soit contre les autres cultes autorisés dans l'Etat. » Ille articulus ad absolutam religionum indifferentiam ducere videtur.

Non obstantibus his articulis, capitula, sede vacante, diœceses semper administraverunt, juxta concilii Tridentini disciplinam, et in templis catholicis nihilominus publice prædicatum est unicam religionem esse veram, atque extra Ecclesiam Romanam nullam sperandam esse salutem. Nullo modo igitur vitium *articulorum organicorum* summo Pontifici aut clero Gallicano, nisi injuste et per calumniam, tribui potest ; nedum enim summus Pontifex eos approbaverit, de illis e contra amare conquestus est in allocutione diei 24 maii 1802, et annuntiavit se revocationem eorum jam postulasse ; verum nihil obtinuit.

Inter illos quos primus consul ad sedes metropolitanas et episcopales nominavit, quidam fuerant intrusi, et schismatis reatu fœdati. Legatus, secundum instructiones sibi traditas, retractationem ab eis exigere tenebatur. D. *Bernier* specialiter officium habuit retractationem sufficientem a suspectis obtinendi : sive autem deceptor, sive deceptor fuerit, omnes conveniunt falsum testimonium de pluribus disse, et legatum ipsamque curiam Romanam in errorem induxisse.

Nonnulli namque ex nominatis et institutis palam deinde professi sunt se principiis Constitutionis civilis corde et effectu semper adhærere. *Portalis*, die 8 junii ejusdem anni 1802, ad omnes archiepiscopos et episcopos scribens, multas agendi regulas, etiam in rebus pure spi-

ritualibus, eis tradidit, et inprimis vetavit ne ullas retractationes exigèrent.

Verumtamen plerique, imo fere omnes, a sacerdotibus juramento inquinatis formalem exegerunt retractationem, vel saltem ut positive et sua subscriptione novo rerum ordini adhærerent. Porro hac subscriptione eaque adhæsione exterius suo schismati renuntiabant, et, quando aliquod officium suscipiebant, jurisdictionem vere accipiebant.

Die 6 aprilis 1803, 36 episcopi qui dimissionem suam dare noluerant, reclamaciones canonicas et reverentes ad summum Pontificem miserunt; fortiter contendebant, licet cum magna reverentia, Pium VII limites potestatis suæ excessisse. Reclamabant præsertim 1° contra ipsorum, licet de religione bene meritorum, invitam destitutionem; 2° contra suarum aliarumque sedium Galliæ suppressionem, allegantes hoc esse prorsus inauditum in Ecclesia, et omnibus regulis hucusque receptis contrarium; 3° conquerebantur ex eo quod in re tanti momenti, ad ipsos tam proxime pertinenti, non fuissent consulti, quod sacrificium dimissionis a se exactum fuisset antequam dispositiones novi Concordati noscerent; 4° contra Articulos organicos insurgebant, etc. His rationibus mox responsuri sumus.

Reclamationibus istis 36 episcoporum duo alii subscripserunt, scilicet *de Chambre*, episcopus Oropensis *in partibus infidelium*, et *de la Tour*, episcopus Molinensis nominatus; sicque 38 erant subscriptiones. Reperiuntur etiam nomina episcoporum Tarbensis et Rivenensis; sed constat eos antea jam abdicasse.

Buonaparte, ex primo consule factus imperator, per senatus-consultum diei 18 maii 1804, coronari voluit a supremo Ecclesiæ capite. Pius VII, anxietatibus undique graviter pressus, voluntati Imperatoris tandem annuit, ea præcipue intentione ut negotia religionis felicius in Gallia promoveret.

Advenit Parisios die 28 novembris. Tunc exegit ut omnes episcopi qui schismati adhæserant et de sinceritate suæ retractationis merito erant suspecti, sequenti formulæ absque ulla restrictione subscriberent: *Ego, coram Deo, declaro et profiteor firmiter me adhærere et subiectum esse judiciis a sancta Sede et ab Ecclesia catholica, Apostolica et Romana prolatis circa negotia ecclesiastica in ecclesia Gallicana. Sanctitatem suam rogo ut Apostolicam suam benedictionem mihi concedere dignetur.* Ipsi pertinaciores subscripserunt.

Deinde summus Pontifex, iteratis vicibus, petiit ab Imperatore ut Articulos organicos revocaret aut saltem eos reformaret, ut efficacioribus mediis ecclesiæ Gallicanæ necessitatibus subveniret, eamque meliori modo instauraret, etc. sed frustra petiit et rogavit, nihil obtinuit. Tristis et dolens rediit Romam, ubi in secreta allocutione cum cardinalibus, die 26 junii 1805, varias itineris sui causas et circumstantias eis aperuit.

Vix sex elapsi erant menses, cum Gallicani milites, jussu Impera-

toris, plures patrimonii Ecclesiæ urbes intraverunt; omnimoda atque injustissima vexatione cœpit urgeri sanctus Pontifex. Tunc graviter turbata est et mox omnino destructa fuit concordia inter utramque potestatem. Napoleo, quascumque leges æquitatis contemnens, omnes Pontificis ditiones invasit, easque per decretum diei 17 maii 1809 imperio suo adjunxit. Pius VII contra injustam et sacrilegam hanc spoliationem in faciem totius mundi solemniter reclamavit, die 6 julii, omnem pecuniariam compensationem ex parte Imperatoris indignans rejecit, eodem die longam dedit bullam excommunicationis contra auctores, fautores et executores violentiarum contra se et sanctam Sedem exercitarum: nullum tamen nominatim designabat; licuit itaque, hac bulla non obstante, cum Napoleone in divinis communicare, et pro illo publice orare; sic responderunt plures cardinales super hoc consulti. Exinde Pontifex in dura detentus est captivitate, et omnes cardinales per varia Galliarum loca dispersi fuerunt.

Res ita se habuerunt usque ad annum 1814, quo, divina Providentia evidenter operante, in pristino statu restitutæ sunt. Statim nova tractari cœperunt negotia pro altero concordato inter summum Pontificem et Ludovicum XVIII ineundo. Conventio fuit terminata die 2 junii 1817....

§ II. — *De secta quæ dicitur LA PETITE ÉGLISE.*

Plurima sub diversis guberniis successive præscripta fuerant jura-menta, et erant fere omnia mala, schismatica, injusta aut impia, et ideo ab episcopis catholicis, a toto clero et ab ipso papa fuerant damnata. Omnes sacerdotes schismatici vulgo appellabantur jurati (*jureurs*); quia omnis participatio cum ipsis in divinis officiis strictissime prohibebatur, a solo nomine intrusorum, juratorum, juramenti et etiam Reipublicæ abhorrebant fideles.

Quando prodiit Concordatum anno 1801, viderunt in eo aliquod non tantum permitti, sed præscribi novum juramentum erga gubernium existens, pro consulibus et Republica publice in ecclesiis orandum esse, sacerdotes et episcopos intrusos et juratos absque publica retractatione admitti et in novos episcopos vel parochos creari, multos fidei confessores suis sedibus dejici, titulis destitui, vetera instituta abrogari, bonorum ecclesiasticorum alienationes confirmari, etc. etc. Tunc magna diffidentia et quodam horrore adversus novum regimen istud præoccupati fuerunt.

Plures sacerdotes, ab omni juramento abhorrentes, contra Concordatum insurrexerunt, et fideles totis viribus a pastoribus juxta dictum Concordatum institutis retrahere cœperunt; dicebant enim illud esse quoddam monstrum totam religionem funditus subvertens: sequentibus præcipue nitebantur rationibus.

1º Pius VII manifeste contra canones et essentialem Ecclesiæ disci-

plinam egit, suam potestatem evidenter prætergressus est, ac proinde Concordatum est omnino nullum : unde omnes episcopi et parochi ante Concordatum legitime instituti, adhuc sunt titulares, nisi titulo suo voluntarie renuntiaverint : qui e contra vi Concordati instituti fuerunt, sunt intrusi et nullam jurisdictionem habent.

2° Non licet communicare in divinis cum schismaticis, nisi prius schisma per retractationem publicam deseruerint ; id faciendum esse definierat et jusserat Pius VI : atqui jurati et intrusi ad sedes episcopales vel ad parœcias nominati, juramentum non retractaverunt, nec ullo modo schismati renuntiaverunt ; quicumque igitur communicant cum illis in divinis, schismatis eorum fiunt participes : porro omnes concordatarii, episcopi, clerici et laici cum istiusmodi schismaticis mediate aut immediate communicant in divinis : ergo sunt omnes schismatici. Propterea nunquam licitum est eorum templa ingredi, nec ullam habere cum illis communionem in divinis.

3° Nulla est potestas in terra quæ mandatis Dei derogare possit : atqui papa, per Concordatum, septimo mandato Dei derogavit, permitiendo ut bonorum ecclesiasticorum usurpatores ea tuta conscientia secure deinceps possiderent.

4° Maxime nitebantur reclamationibus canonicis episcoporum ; eas adhuc quotidie proferunt.

Singulis his rationibus breviter respondeo.

1° Pius VII non servavit quidem formas canonibus præscriptas in deponendis episcopis, multo minus eas quæ, secundum libertates nostras, in Gallia forent necessariæ : fatemur quod in tota historia ecclesiastica nullum hujus generis reperiatur factum. Attamen merito dici non potest summum Pontificem limites potestatis suæ prætergressum fuisse ; canones enim pro bono Ecclesiæ libere fuerunt conditi et ex natura sua non sunt immutabiles : certe concilium generale eis derogare, eos suspendere, vel contra illos agere posset, si utilitati Ecclesiæ id expedire judicaret : at summus Pontifex, tanquam B. Petri successor et caput totius Ecclesiæ, id omne potest in extrema necessitate quod posset concilium generale. Hanc propositionem jam probavimus, et Bossuet eam expresse admittit. Porro ecclesia Gallicana in extrema erat necessitate tempore Concordati ; a decem annis cultus catholicus erat proscriptus ; multæ ecclesiæ erant viduæ : pastores superstites erant exsules ; innumeri sacerdotes jam mortui erant, multi singulis diebus moriebantur, nulli ordinabantur, nulla spes pro futuro affulgebat, neque ullæ scholæ neque seminaria existebant, tota generatio crescens, in morum corruptione, in odio contra religionem, in ignorantia justī et injustī educabatur, infatigabili zelo adhuc quærebant impīi suā incredulitatis principia circumquaque spargere et omnibus persuadere. Aliunde, schismatici episcopi adhuc exstantes conciliabulum Parisiis tenebant, et toti erant ut ecclesiam suam pene collapsam de novo instaurarent ; maxima ergo pericula erant pro religione catholica in

florentissimo Galliarum regno. Si Pius VII circumstantiam sibi oblatam rejecisset, timendum erat ne altera similis unquam occurreret, et de hac negligentia frustra postea doleret. Nihil temere præcipitavit; per undecim menses negotium protraxit, et quidquid in se erat tentavit ut meliores condiciones obtineret: ergo injustissimum esset dicere eum in hac conventionem, potestate sua abutendo, prævaricasse.

100 Episcopi, contra 38, mortui erant aut dimissionem suam summo Pontifici remiserant: ergo pro eorum saltem diœcesibus Concordatum effectum suum valide sortitum esse fateri coguntur adversarii.

2^o *Schismatici tenebantur quidem schismati suo renuntiare et juramentum retractare*: sed forma retractationis est tantum juris ecclesiastici; itaque variare potest, et reipsa sæpius variavit. Dici non potest, nisi insigni mala fide, Pium VII approbasse juramentum quod illustris ejus prædecessor damnaverat; *id patet ex supra dictis*.

Si autem retractatio quæ exigebatur, in pluribus sincera non fuerit, hæc hypocrisis vel obstinatio summo Pontifici tribui non potest, nec impedit quin missio eis concessa fuerit valida, ac licuerit cum illis communicare in divinis; probavimus enim schismaticos et etiam hæreticos publicos, sed non denunciatos, jurisdictionis ecclesiasticæ esse capaces: si per schisma aut hæresim eam quam habent non amittant, pariter quam non habent valide suscipere possunt; tuncque nulla erit obligatio eos vitandi, et, positis ponendis, sacramenta Ecclesiæ ab eis recipere licebit. Ergo.

Præterea, monstraosa est doctrina quæ totam Ecclesiam constitueret schismaticam: atqui talis est doctrina adversariorum; qui enim communicant in divinis cum schismaticis vitandis, eo ipso fiunt schismatici: atqui, juxta adversarios, veteres jurati sunt adhuc schismatici vitandi, et omnes qui cum eis communicant in divinis fiunt pariter schismatici: unde concludunt omnem clerum vi Concordati institutum, quem ideo vocant *concordatarium*, esse schismaticum, imo et hæreticum, quia errores Constitutionis civilis censetur approbare: quicumque ergo communicant in divinis cum clero functiones sacras nunc per universam Galliam exercente, fiunt eo ipso schismatici vel etiam forte hæretici; at papa ejusque cardinales nobiscum in divinis communicant; hoc factum manifestum est et a nemine negatur: ergo papa ipse est schismaticus et hæreticus, ut quidam dicere non erubuerant de Pio VII; idem sentire ac dicere debent de Leone XII, Pio VIII et Gregorio XVI, a cardinalibus schismaticis electis; sed universus orbis catholicus cum eis communicavit. Ergo.

Insuper, si papa publicus sit hæreticus, vel etiam solummodo schismaticus, jam non est verum caput Ecclesiæ: atqui tamen universa Ecclesia eum ut talem agnoscit: universa igitur Ecclesia in perniciosissimum lapsa est errorem. Quinimo, tanto huic malo nullum sperandum est remedium: nam si papa sit schismaticus et hæreticus, cardinales sunt pariter schismatici et hæretici; schismaticum igitur papam eligent

et constituent. Quis, tantas absurditates audiens, eas patienter ferre potest?

Si, e contra, papa, cardinales et cæteri Ecclesiæ præsules non sint schismatici, nec tales erunt episcopi juxta concordatum instituti, siquidem ab eis reputantur legitimi. Aliunde, si Pius VII legitimus fuerit totius Ecclesiæ caput, legitimi sunt episcopi ab eo constituti; sic enim se habet concilium Tridentinum, sess. 23, can. 8: « Si quis dixerit episcopos qui auctoritate Romani pontificis assumuntur, non esse legitimos et veros episcopos, sed figmentum humanum: anathema sit. »

3º *Summus Pontifex*, per articulum XIII Concordati, *septimo Dei mandato non derogavit*. Fur, bonum alienum furando, contra illud mandatum peccat: at, domino liberam condonationem faciente, non peccat bonum istud retinendo. Porro summus Pontifex, videns impossibilitatem obtinendi restitutionem bonorum ecclesiasticorum jam alienatorum, dominium eorum, pro bono pacis, ad acquirentes eorumque causam habentes, tanquam moderator totius Ecclesiæ, transtulit: hinc ex injustis facti sunt justii possessores, prout dicimus in tractatu de Contractibus. Ergo.

4º *Valde immerito fautores novi schismatis reclamationibus canonicis 38 episcoporum nituntur*; nam illi episcopi maxima cum reverentia summo Pontifici loquebantur, illum ut legitimum B. Petri successorem habebant, unitatem communionis semper cum illo servaverunt, in Galliam redeuntes cum novo clero publice communicaverunt, et tandem omnes, excepto uno, dimissionem suam libere concesserunt, anno 1817, et ad novas sedes fuerunt nominati.

Solus D. *de Themines*, olim episcopus Blesensis, partes novatorum diu sustinuit, et contendebat universalem se habere jurisdictionem per mundum universum, saltem per totam Galliam. Talis doctrina, huc usque prorsus inaudita, constanti Ecclesiæ disciplinæ, doctrinæ et praxi omnino contraria, cerebrum annis debilitatum vel male constitutum denotabat: auctor ejus ante mortem eam retractavit, ut videre est apud *l'Ami de la Religion*, t. 62, p. 225.

Probavimus in tractatu nostro, simplices sacerdotes nullo modo judices esse controversiarum quæ circa religionem exsurgunt: atqui tamen in novo schismate simplices sacerdotes se constituunt judices adversus papam, cardinales et cunctos qui existunt episcopos. Pluries damnati sunt, v. g. in Anglia an. 1808, in Hibernia an. 1809. D. *Poynter*, vicarius Apostolicus Londinensis, ab omnibus presbyteris Gallicanis in suo districtu residentibus exegit, an. 1818, ut per expressam declarationem testarentur se pontifici Romano Pio VII esse subjectos tanquam Ecclesiæ capiti, se cum iis omnibus communicare qui eidem Pontifici per communionis vinculum sunt uniti: quicumque formulam sibi oblatam subscribere noluerunt, fuerunt interdicti. Summus Pontifex hanc agendi rationem laudavit per breve diei 16 septembris 1818, ad D. *Poynter* directum, eique mandavit suam intentionem esse omnes omnino prædictæ

formulæ corde et animo, absque ulla suppressione, mutatione vel restrictione, subscribere, vel ipsa facultate celebrandi missam eos privari.

His non obstantibus, temere et audacter insurgunt illi sacerdotes contra episcopos, eos improbantes et damnantes, contra papam et universam Ecclesiam docentem; ab omnibus separati sicut olim Luciferiani, gloriantur se catholicos esse. Nos vero pronuntiamus, sine ulla hæsitatione, eos esse schismaticos, ab Ecclesia publice sejunctos, omni jurisdictione destitutos, extra viam salutis positos et tantummodo ministerium mortis exercentes. Hæc conclusio ex tractatu nostro et ex modo dictis tam evidenter sequitur, ut supervacuum foret aliquid superaddere. Plurima prodierunt opuscula contra illam sectam, *la petite Eglise*; inter ea eminentem tenet locum opus cui titulus, *Jugement de l'Eglise catholique contre les nouveaux schismatiques de France, par un ancien vicaire-général*, in-8°, Paris, 1821.

COMPENDIUM HISTORICUM III.

DE CONCILIIIS GENERALIBUS.

Ium est concilium Nicænum I, anno 325 coram imperatore Constantino celebratum, cui papa S. Sylvester præfuit per suos legatos Osium, Cordubensem episcopum, et duos presbyteros: 318 aderant episcopi ex variis orbis partibus congregati, quorum plurimi gloriosi erant confessores et multa pertulerant tormenta sub Diocletiano et Licinio. In hoc concilio damnata est hæresis Arii; et contra Quartodecimanos statutum est Pascha deinceps ubique celebrandum fore dominica quæ lunam quartam-decimam martii proxime sequitur. Nonnulli alii errores proscripti sunt, et quidam conditi sunt canones disciplinæ.

Anno 347, habita est synodus Sardicensis, sub imperatoribus Constante et Constantio; illi adhuc præfuit Osius, nomine papæ Julii I, cum duobus presbyteris: 341 adfuerunt episcopi, qui plurimos condiderunt disciplinæ canones. Hæc synodus velut concilii Nicæni appendix reputatur, et ideo ejus canones indiscriminatim vocantur Sardicensis et Nicæni.

Ium est concilium Constantinopolitanum I, quod sub Damaso papa fuit convocatum, anno 381, imperante Theodosio seniore: 150 episcopi, omnes Orientales, concilium illud componebant; sed papa et tota Ecclesia illud approbavit, sicque, juxta omnes, factum est œcumenicum. In eo definita est divinitas Spiritus sancti contra Macedonium, episcopum Constantinopolitanum, et conditum est Symbolum quod nunc intra missam cantatur, cui postea adjecta est vox *Filioque*.

IIum est concilium Ephesinum, sub papa Cœlestino et Theodosio juniore celebratum, anno 431: 200 in illo aderant episcopi, quibus præerat, nomine summi Pontificis, S. Cyrillus Alexandrinus. In eo

damnatus est Nestorius, qui docebat duas in Christo esse personas, B. Mariam virginem non esse Deiparam, nec proinde dici posse Dei matrem, sed Christi tanquam hominis.

IVum est concilium Chalcedonense, anno 451 celebratum, sub Marciano imperatore et S. Leone Magno qui illi per legatos præfuit : 306 aderant episcopi, juxta *Fleury*, et multo plures secundum alios, ut videre est apud *Tillemont*. In eo 1° damnatus est error Eutychetis celebris monasterii Constantinop. abbatis, qui contra Nestorium fortiter pugnans docuerat unicam in Christo esse naturam; 2° irrita et impia declarata est definitio opposita *latrocinii Ephesini*; 3° Dioscorus patriarcha Alexandrinus, qui dicto *latrocinio* præfuerat, e sede fuit dejectus; 4° Theodoretus et Ibas, in eodem conciliabulo injuste depositi, sedibus suis fuerunt restituti; 5° 28 conditi sunt canones disciplinam spectantes, quorum unus secundum gradum honoris patriarchæ Constantinop. tribuebat. Hunc canonem S. Leo approbare noluit.

Vum concilium generale fuit Constantinop. II, anno 553 convocatum, sub papa Vigilio et imperatore Justiniano, ad definiendam famosissimam quæstionem de *tribus Capitulis*. (Vide p. 399 hujus tomi.) In illo 165 erant episcopi Orientales. Papa Vigilius illi adesse noluit, quamvis tunc esset Constantinopoli. Attamen illud concilium ab Occidentalibus fuit admissum, et ab omnibus ut œcumenicum agnoscitur.

VIum est Constantinop. III, sub Constantino Pogonato habitum, anno 660. Illi per legatos præfuit Agatho, summus pontifex : 289 aderant episcopi. Causa convocationis fuit hæresis Monothelitarum, quæ tunc proscripta est. Nulli canones disciplinæ in illo concilio fuerunt conditi.

Propterea aliud celebratum est concilium Constantinopoli, anno 692, cui 213 adsuerunt episcopi, et in quo 102 canones de disciplina constituti sunt : unde concilium istud vocatur *Quinisextum*, quia est velut supplementum ad quintam et sextam synodum generalem : dicitur etiam concilium in *Trullo*, quia celebratum est in magna palatii aula quæ apellabatur *Trullum*. Canones hujus concilii nunquam fuerunt approbati in ecclesia Occidentali.

VIIum concilium generale est Nicænum II. Celebratum est anno 787, imperantibus in Oriente Irene et filio ejus Constantino. Adrianus I, summus pontifex, illi per legatos suos præfuit; 350 aderant episcopi Orientales. In eo assertus est cultus sacrarum imaginum, et proscriptus error Iconoclastarum.

VIIIum est Constantinop. IV, quod anno 869, tempore Basilii imperatoris, fuit convocatum, sub Adriano II qui per legatos ei præfuit, ad deponendum Photium et restituendum patriarcham Ignatium a sede sua injuste projectum : 102 ibi sedebant episcopi. Deposuerunt Photium, anathema ei dixerunt, et plures canones de disciplina condiderunt.

Concilium istud a Græcis nunc existentibus non admittitur; contendunt illud fuisse abrogatum in conciliabulo anno 883 celebrato per ipsum Photium, qui de novo post mortem Ignatii sedem invasit.

Hæc sunt octo concilia œcumenica quæ ante schisma Græcorum celebrata sunt, et omnia in Oriente; cætera in Occidente habita sunt.

IXum concilium generale fuit Lateranense I, sic dictum, sicut tria sequentia, quia in basilica Lateranensi fuit celebratum, anno 1123 : 300 adfuere episcopi; Callixtus II ipse præses fuit. Præcipue congregatum fuit ad confirmandam abrogationem *investiturarum*, contra quas tamen vehementer insurrexerunt Gregorius VII et ejus successores Victor III, Urbanus II, Felix II, Paschalis II, Gelasius II et Callixtus II. De investituris longe et scite scripsit P. Alexander, Hist. Eccl. XII sæculo, dissert. 4.

Actum est etiam in illo concilio de Palæstina et Hispania a tyrannide infidelium liberandis, necnon de restauranda disciplina ecclesiastica fere ubique variis schismaticorum factionibus collapsa.

Xum concilium generale est Lateranense II, anno 1139, sub imperatore Lothario et Innocentio II præside celebratum. Mille circiter aderant episcopi. Causæ illius convocationis fuerunt, 1º exstinctio schismatis antipapæ Leonis seu Anacleti II; 2º exstirpatio hæresis discipulorum Petri *de Bruis*, qui Petrobrusiani vocabantur, et Arnaldistarum, id est discipulorum *Arnaud-de-Bresse*; 3º restauratio disciplinæ, circa quam 28 conditi sunt canones.

XIum fuit concilium Lateranense III, habitum anno 1179, sub imperatore Frederico I et papa Alexandro III, qui illi præfuit : 300 aderant episcopi. In eo damnati sunt errores Catharorum, Albigensium et Valdensium, atque multi editi sunt disciplinæ canones.

XIIum est concilium Lateranense IV, anno 1215 convocatum ab Innocentio III, qui illi præfuit, Henrico II imperante. Adfuerunt 412 episcopi, omnes Patriarchæ Orientales Latini per se vel per legatos suos, innumeri abbates, 800 procuratores prælatorum absentium, omnium principum Christianorum legati; nunquam talis visus fuerat cætus; ideo concilium istud vocatur Magnum concilium Lateranense. Actum est in illo 1º de recuperanda Terra Sancta a Sarracenis iterum possessa ab anno 1187; 2º de reprimendis nefandis Albigensium excessibus; 3º de restauranda disciplina : ad hoc obtinendum 62 conditi sunt canones, inter quos ille : *Omnis utriusque sexus*, etc. de confessione annua proprio sacerdoti facienda, et de communione paschali.

XIIIum concilium generale est Lugdunense I, anno 1245 habitum, cui præfuit Innocentius IV; aderat *Baudoin*, imperator Constantinop. Latinus, 140 episcopi et pauci principum Christianorum legati.

In prima actione hujus concilii Innocentius IV aperuit causam illius convocationis, scilicet 1º status ecclesiastici afflictionem et devastationem ex parte imperatoris Frederici; 2º schisma Græcorum extinguendum; 3º cladem a Sarracenis Hierosolymis illatam; 4º irruptionem Tartarorum in terras Christianorum; 5º Frederici crimina. In secunda actione auditus est Thadæus *de Sesse*, minister Imperatoris et ejus defensor in concilio. In tertia actione sententiam depositionis pronuntiavit

Innocentius IV contra Fredericum, sicut supra vidimus p. 458. Renovatum est etiam decretum de sacra expeditione contra Sarracenos, et 47 conditi sunt disciplinæ canones.

Quidam de œcumenicitate illius concilii dubitant. Vide Tournely, t. 2. Attamen communiter ut generale habetur.

XIVum est concilium Ludgunense II. Celebratum fuit anno 1274, sub Gregorio X qui illi præfuit. Aderant 15 cardinales, 2 patriarchæ, nempe Constantinop. et Antiochenus, plus quam 500 episcopi, permulti abbates, multorum regum et principum legati : plurimi vocati sunt etiam theologi, inter quos S. Thomas Aquinatis, qui dum ad concilium pergeret mortuus est, et S. Bonaventura qui durante concilio pariter mortuus est.

Præcipue actum est in illo, 1º de schismate Græcorum, qui cum Latinis reconciliati sunt in quarta sessione; 2º de auxilio Christianis ferendo adversus Infideles; 3º de disciplina reformanda, pro qua 30 conditi sunt canones; 4º de modo quo, papa defuncto, celerrime novi Pontificis fieret electio : quatuor quippe annis vacaverat sancta Sedes, inter Clementem IX et Gregorium X. Infinita inde nata erant mala. Tunc statutum est quod, post exequias defuncti Pontificis, cardinales concluderentur in *conclavi* et inde non exirent quin prius papam elegerent.

XVum concilium generale est Viennense, anno 1311, sub Clemente V celebratum. Aderant 300 episcopi cum cardinalibus, duobus patriarchis, Alexandrino scilicet et Antiocheno, et innumeris abbatibus. Adfuerunt etiam rex Galliarum, Philippus *le Bel* cum tribus suis filiis, Eduardus II rex Angliarum, et multi aliorum principum oratores.

In illo concilio, 1º extinctus est ordo militaris Templariorum; 2º damnati sunt errores Fratricellorum, Beguardorum et Beguinarum; 3º decreta sunt nova expeditio pro Terra Sancta recuperanda; 4º variæ editæ sunt constitutiones de disciplina quæ *Clementinæ* vocantur.

XVIum est concilium Constantiense, anno 1414 celebratum, ad magnum et luctuosum Occidentis schisma extinguendum. De illo jam supra aliquid diximus, p. 338 et 470. Galli contendunt totum illud concilium esse œcumenicum. Ultramontani vero et generatim alii theologi illud ut tale non habent nisi pro ultimis sessionibus quas Martinus V legitime electus approbavit. Vide Bellarminum, lib. 4 de Conc. c. 7.

In illo concilio, 1º damnati sunt errores Wiclefistarum et Hussitarum; 2º approbata est communio sub unica specie, pro non celebrantibus; 3º varios disciplinæ articulos, sacro approbante concilio, promulgavit Martinus V.

XVIIum concilium, Basileense, a Martino V convocatum, anno 1431 sub Eugenio IV habitum, spatio undecim annorum duravit, et quadraginta quinque sessionibus fuit absolutum; sed quædam divisionis species semper exstitit inter patres hujus concilii et Eugenium IV, qui per legatum suum tamen illi præfuit usque ad vigesimam nonam sessionem.

Saltem ab illa sessione, juxta omnes, non est œcumenicum ; at Galli illud habent ut vere œcumenicum usque ad sessionem istam, aut saltem usque ad decimam sextam, anno 1434 habitam, quo tempore Eugenius voluit illud Bononiam transferre. Sed « hujus concilii nihil est ratum » et probatum, nisi quædam dispositiones circa beneficia, quæ a concilio factæ fuerant, quas (paci et unitatis gratia) Nicolaüs V approbavit. Concilium vero ipsum reprobatum in concilio Lateranensi ultimo, sessione undecima. » Sunt verba Bellarmini, de Conc. l. 1, cap. 7.

In primis sessionibus illis varia constituta sunt disciplinæ decreta, quæ magna ex parte a summo Pontifice non fuerunt approbata.

XVIIIum est concilium Florentinum, ad ecclesiam Græcam cum Latina reconciliandam præcipue convocatum. Celebrari cœpit Ferrariæ, anno 1438, ibique sexdecim habitæ sunt sessiones. Anno sequenti, Eugenius IV illud, ob pestem grassantem, transtulit Florentiam; ubi, post novem alias sessiones, illud feliciter absolvit.

140 aderant episcopi, cum patriarcha Constantinop. et aliorum patriarcharum legatis : aderat etiam imperator Græcorum, Joannes Palæologus. Post longam discussionem, facta est unio utriusque Ecclesiæ Græcæ et Romanæ; sed cito hæc unio a Græcis in patriam reversis fuit disrupta.

Anno 1512, sub Leone X, celebratum est concilium Lateranense V, quod ab omnibus præter Gallos habetur ut œcumenicum : 114 aderant episcopi. Causa illud convocandi fuit, 1º extinctio schismatis inter Julium II et Ludovicum XII Galliarum regem imminentis; 2º morum reformatio, pax inter principes Christianos restauranda, et sacra expeditio in Terram sanctam promovenda.

XIXum est celeberrimum concilium Tridentinum, a Paulo III convocatum, 1º ad vindicandam fidem catholicam adversus Lutherum, *Zuingle* aliorumque reformationum errores; 2º ad firmandam pacem et concordiam inter principes Christianos; 3º ad restituendam Ecclesiæ disciplinam, per hæresim et bella plurimum labefactatam.

Inceptum anno 1545, variis de causis suspensum et interruptum, tandem absolutum est anno 1563, sub Pio IV.

Nullum unquam exstitit concilium in quo tot et tantæ quæstiones tamque scite fuerint examinatæ et enucleatæ; in quo tot lata fuerint fidei decreta, totque disciplinæ et reformationis capita fuerint statuta. Unde merito habetur velut quoddam totius doctrinæ Christi compendium et disciplinæ ecclesiasticæ codex. Omnes sacerdotes et clerici viri illud præ manibus jugiter habere debent.

INDEX.

	Pag.
MONITUM.	5
THEOLOGICÆ PROLEGOMENA.	9

TRACTATUS DE VERA RELIGIONE.

PARS PRIMA.

De religione revelata in genere.	22
CAPUT I. De revelationis possibilitate.	<i>ib.</i>
PROPOSITIO I. Deus homines alloqui potest.	23
PROP. II. Deus, ex hypothese quod aliquid revelare velit, singulis hominibus immediate loqui non tenetur, sed potest illud manifestare quibusdam electis quorum ope alios doceat.	<i>ib.</i>
PROP. III. Deus potest revelare veritates captum mentis nostræ superantes.	25
PROP. IV. Deus nova præcepta legi naturali addere potest.	30
CAP. II. Qua methodo inquirenda sit revelationis existentia.	31
PROP. In inquisitione revelationis sola via auctoritatis admittenda est.	32
CAP. III. De characteribus quibus existentia revelationis certo constare potest.	36
ARTICULUS I. De miraculis.	37
§ I. Quid sit miraculum.	<i>ib.</i>
§ II. An miraculum sit possibile.	40
§ III. An miraculum certo cognosci possit.	41
§ IV. An miracula habeant vim probandi veram esse doctrinam in cujus gratiam patrantur.	42
ART. II. De prophetiis.	49
PROP. I. Prophetia est possibilis.	<i>ib.</i>
PROP. II. Prophetiarum existentia certo cognosci potest.	50
PROP. III. Prophetiæ vim habent probandi veram esse doctrinam in cujus confirmationem eduntur.	<i>ib.</i>

PARS SECUNDA.

De religione Judaica.	53
CAP. I. De religione primæva.	<i>ib.</i>

	Pag.
PROP. I. Homo qualibet cognitione positiva destitutus, religionem naturalem nunquam propriis viribus excogitare potuisset.	54
PROP. II. Deus ab initio hominem cognitionibus positivis instruxit, et religionem ei revelavit.	<i>ib.</i>
CAP. II. De veritate religionis Judaicæ.	57
ART. I. De authenticitate Pentateuchi.	<i>ib.</i>
ART. II. De integritate Pentateuchi.	67
ART. III. De veritate Pentateuchi.	74
PROP. I. Vera sunt facta quæ in quatuor posterioribus Pentateuchi libris describuntur.	<i>ib.</i>
PROP. II. Vera sunt facta quæ in Genesi narrantur.	81
ART. IV. De cæteris Veteris Testamenti libris.	100
CAP. II. De divinitate religionis Judaicæ.	102
CAP. III. De duratione religionis Mosaicæ.	119
ART. I. An religio Mosaica abrogari debuerit.	<i>ib.</i>
PROP. I. Religio Mosaica non erat in perpetuum duratura, sed in ordine divinorum decretorum abrogari debuit.	120
PROP. II. Legi per Moysen promulgatæ novum fœdus substituendum erat.	122
PROP. III. Fœdus novum per aliquem mediatorem erat instituendum.	<i>ib.</i>
ART. II. An religio Mosaica de facto sit abrogata.	123
§ I. De prophetia Jacob.	124
§ II. De prophetia Danielis.	130
§ III. De prophetiis Aggæi et Malachiæ.	134

PARS TERTIA.

De religione Christiana.	137
CAP. I. De veritate religionis Christianæ.	<i>ib.</i>
ART. I. De librorum Novi Testamenti authenticitate.	<i>ib.</i>
ART. II. De librorum Novi Testamenti integritate.	144
ART. III. de librorum Novi Testamenti veritate.	150
CAP. II. De divinitate religionis Christianæ.	162
ART. I. De divinitate religionis Christianæ adversus Judæos.	<i>ib.</i>
§ I. De oraculis Prophetarum Veteris Testamenti, quos agnoscunt et venerantur Judæi.	163
§ II. De comparatione miraculorum Christi cum miraculis Moysis.	172
§ III. De mira connexionione religionis Christianæ cum religione Mosaica.	176
§ IV. De ultima clade Judæorum et præsentī eorum statu.	178

	Pag.
ART. II. De divinitate religionis Christianæ adversus incredulos.	183
§ I. De prophetiis Christi.	<i>ib.</i>
§ II. De miraculis Christi et Apostolorum.	185
§ III. De Christi resurrectione.	189
§ IV. De excellentia doctrinæ Christi.	200
§ V. De mira religionis Christianæ propagatione.	204
§ VI. De numero et fortitudine martyrum qui pro Christo sanguinem fuderunt.	211
APPENDIX HISTORICA DE SAMARITANIS.	217
APPENDIX HISTORICA DE MAHUMETISMO.	220

TRACTATUS DE VERA ECCLESIA CHRISTI.

I CAPUT PRÆVIUM. De genere argumentorum quibus in præsentis tractatus decursu utendum est.	230
ART. I. De Scriptura sacra.	<i>ib.</i>
ART. II. De traditione.	231
II CAP. PRÆV. De notione Ecclesiæ.	234
III CAP. PRÆV. De necessitate adhærendi veræ Ecclesiæ.	235

PARS PRIMA.

De notis seu attributis veræ Ecclesiæ constitutivis.	237
CAP. I. De notis Ecclesiæ negativis.	<i>ib.</i>
ART. I. De visibilitate Ecclesiæ.	<i>ib.</i>
ART. II. De perpetuitate seu indefectibilitate visibilitatis Ecclesiæ.	240
ART. III. De invariabilitate veræ Ecclesiæ.	243
ART. IV. De methodo auctoritatis in docendo.	244
PROP. I. In Ecclesia existere debet supremus controversiarum fidei iudex.	<i>ib.</i>
PROP. II. Supremus ille controversiarum iudex debet esse obviu8, clarus, communis et infallibilis.	245
PROP. III. Scriptura sacra, spiritu privato interpretata, non est supremus controversiarum fidei iudex.	246
PROP. IV. Spiritus privatus, quocumque donetur nomine... legitimus esse non potest controversiarum fidei iudex.	253
PROP. V. Christus instituit in Ecclesia corpus docens, cui competit jus dirimendi controversias circa fidem; sicque sola admittenda est via auctoritatis.	256
PROP. VI. Corpus docens in Ecclesia, cui competit jus	

	Pag.
controversias circa fidem dirimendi, est infallibile in docendo.	260
ART. V. De societate cui prædictæ notæ negativæ competunt.	279
PROP. Constat Ecclesiam Romanam quatuor prædictas notas habere.	<i>ib.</i>
CAP. II. De notis veræ Ecclesiæ positivis.	280
ART. I. De falsis notis a Protestantibus assignatis.	281
ART. II. De veris Ecclesiæ notis.	283
§ I. De unitate Ecclesiæ.	284
PROP. I. Distinctio articulorum fundamentalium et non fundamentalium a <i>Jurieu</i> excogitata admitti non potest.	285
PROP. II. Unitas Ecclesiæ Christi essentialis consistit in professione ejusdem doctrinæ, ita ut minima hæresis a via salutis per se excludat.	292
PROP. III. Vera Christi Ecclesia ita est <i>una</i> ratione regiminis ut a via salutis excludantur schismatici, etiamsi in doctrina non errent.	294
PROP. IV. Vera Ecclesia non tantum unitatem facti, tum doctrinæ, tum regiminis, sed et unitatem juris necessario habet.	295
PROP. V. Unitas doctrinæ et regiminis, est nota veræ Ecclesiæ positiva.	<i>ib.</i>
§ II. De sanctitate Ecclesiæ.	296
§ III. De catholicitate Ecclesiæ.	297
PROP. I. Vera Christi Ecclesia debet esse catholica seu universalis.	298
PROP. II. Vera Christi Ecclesia debet esse perpetuo catholica.	300
PROP. III. Ecclesia non tantum successive, sed simultanee catholica esse debet.	301
PROP. IV. Ut Ecclesia Christi sit catholica, sufficit quod per magnam orbis partem diffundatur.	302
PROP. V. Necesse est ut vera Ecclesia cæteras societates Christianas diffusionem suam vincat.	<i>ib.</i>
PROP. VI. Catholicitas est <i>nota veræ Ecclesiæ positiva</i>	303
§ IV. De Apostolicitate Ecclesiæ.	<i>ib.</i>
PROP. I. Vera Christi Ecclesia debet esse Apostolica ratione doctrinæ.	304
PROP. II. Vera Christi Ecclesia debet esse Apostolica ratione ministerii.	305
CAP. III. De notarum veræ Ecclesiæ applicatione.	308
ART. I. Utrum societas Protestantium vera sit Christi Ecclesia	309

	Pag.
PROP. I. Protestantes non habent unitatem veræ Ecclesiæ Christi essentialē.	309
PROP. II. Protestantes non habent sanctitatem veræ Ecclesiæ Christi essentialē.	310
PROP. III. Protestantes non habent catholicitatem veræ Ecclesiæ promissam.	312
PROP. IV. Protestantes Apostolicitatem Ecclesiæ Christi essentialē non habent.	313
PROP. V. Protestantes vere sunt schismatici.	316
PROP. VI. Non tantum schismatici, sed hæretici sunt Protestantes.	320
ART. II. Utrum ecclesia Græca sit vera Ecclesia.	<i>ib.</i>
ART. III. Utrum ecclesia Romana sit vera Christi Ecclesia.	323
PROP. I. Ecclesia Romana habet unitatem veræ Ecclesiæ necessariam.	<i>ib.</i>
PROP. II. Ecclesia Romana vere est sancta.	326
PROP. III. Ecclesia Romana est catholica.	331
PROP. IV. Ecclesia Romana vere est Apostolica ratione doctrinæ.	334
PROP. V. Ecclesia Romana est Apostolica ratione ministerii.	335

PARS SECUNDA.

De auctoritate Ecclesiæ.	342
CAP. I. De iis quibus residet auctoritas Ecclesiæ.	<i>ib.</i>
PROP. I. Plebs Christiana nullo modo est particeps jurisdictionis ecclesiasticæ et potestatis dirimendi controversias circa fidem.	343
PROP. II. Principes sæculares nullam habent auctoritatem in Ecclesia jure proprio.	345
PROP. III. Simples presbyteri non sunt jure divino controversiarum fidei iudices.	348
PROP. IV. Simples presbyteri non sunt necessarii fidei testes et episcoporum consilarii.	356
PROP. V. In propria diœcesi sua simplices presbyteri jus non habent causas fidei judicandi et leges ferendi, nec necessario sunt episcopi consultores.	357
CAP. II. De modo quo auctoritas Ecclesiæ docentis exerceri debet, ut illius decisio sit infallibilis.	361
ART. I. De unanimitate episcoporum ut sententia eorum sit infallibilis.	362
ART. II. An episcopi per orbem sparsi controversias circa fidem infallibiliter dirimere possint.	365

	Pag.
ART. III. Utrum ad infallibile fidei iudicium expressus requiratur episcoporum consensus, an vero tacitus sufficiat.	370
ART. IV. De condemnatione propositionum <i>in globo</i> .	374
ART. V. Quænam sit auctoritas conciliorum seu Ecclesiæ congregatæ.	378
§ I. De jure quo instituta sunt concilia œcumenica.	379
§ II. De conditionibus requisitis ut concilia sint œcumenica et legitima.	380
§ III. De auctoritate concilii generalis.	382
§ IV. De necessitate conciliorum generalium.	388
§ V. De conciliis particularibus.	389
CAP. III. De objecto auctoritatis Ecclesiæ.	390
ART. I. De auctoritate Ecclesiæ circa mores.	<i>ib.</i>
ART. II. De auctoritate Ecclesiæ circa disciplinam.	392
ART. III. De auctoritate Ecclesiæ circa facta.	395
ART. IV. De auctoritate Ecclesiæ in canonizatione et beatificatione sanctorum.	404

PARS TERTIA.

De capite et membris Ecclesiæ.	411
CAP. I. De capite Ecclesiæ.	<i>ib.</i>
ART. I. De primatu B. Petri.	412
ART. II. De primatu Romani pontificis.	421
PROP. I. Beatus Petrus sedem suam transtulit Romam, et ibi eam tenens mortuus est.	422
PROP. II. Romanus pontifex, tanquam beati Petri successor, primatum honoris et jurisdictionis habet jure divino in tota Ecclesia.	424
ART. III. De monarchia Romani pontificis.	433
ART. IV. De prærogativis dignitati summi Pontificis annexis.	437
§ I. De prærogativis Romani pontificis certis et communiter admissis.	<i>ib.</i>
Sectio I. De indefectibilitate summi Pontificis in fide.	438
Sectio II. De centro unitatis catholicæ.	439
Sectio III. De potestate edendi fidei decreta et condendi leges quæ cunctos obligent Christianos.	442
Sectio IV. De potestate dispensandi a legibus conciliorum.	443
Sectio V. De potestate concilia œcumenica convocandi, celebrandi ac convocandi.	445
Sectio VI. De jure appellationum.	447
Sectio VII. De potestate episcopos instituendi.	448

PROP. I. Institutio canonica, ab ecclesiastica potestate accepta, est omnino necessaria in genere. . . .	449
PROP. II. Solus pontifex Romanus potest jure divino instituere episcopos per orbem universum. . . .	450
Sectio VIII. De natura jurisdictionis quam summus Pontifex habet in tota Ecclesia.	455
§ II. De prærogativis summi Pontificis controversis. . .	457
Sectio I. De potestate summi Pontificis in temporalia regum.	<i>ib.</i>
Sectio II. De infallibilitate summi Pontificis. . . .	466
Sectio III. De potestate summi Pontificis respectue ad concilium generale.	469
Sectio IV. De celebri cleri Gallicani Declaratione anni 1682, et de libertatibus ecclesiæ Gallicanæ. . . .	472
Punct. I. Hist. Declarationis cleri Gallicani, an. 1682. .	<i>ib.</i>
Punct. II. De genuino sensu Declarationis cleri Gallicani anni 1682.	479
Punct. III. De auctoritate Declarationis anni 1682. .	481
Punct. IV. De libertatibus ecclesiæ Gallicanæ. . . .	484
CAP. II. De membris Ecclesiæ.	488
ART. I. De infidelibus, catechumenis et apostatis. . . .	<i>ib.</i>
ART. II. De hæreticis et schismaticis.	490
ART. III. De excommunicatis.	493
ART. IV. De prædestinatis et reprobis.	494
ART. V. De peccatoribus et justis.	496
COMPENDIUM HISTORICUM I. De schismate anni 1791. . . .	499
COMPENDIUM HISTORICUM II. De Concordato anni 1801 et de secta quæ dicitur <i>la Petite Eglise</i>	506
§ I. De Concordato.	<i>ib.</i>
§ II. De secta quæ dicitur <i>la Petite Eglise</i>	513
COMPENDIUM HISTORICUM III. De conciliis generalibus. . . .	516





Date Due

[illegible]

BOSTON COLLEGE



3 9031 01239089 4

62577

BOSTON COLLEGE LIBRARY
UNIVERSITY HEIGHTS
CHESTNUT HILL, MASS.

Books may be kept for two weeks and may be renewed for the same period, unless reserved.

Two cents a day is charged for each book kept overtime.

If you cannot find what you want, ask the Librarian who will be glad to help you.

The borrower is responsible for books drawn on his card and for all fines accruing on the same.

